

書叢本基學國

集文詩江北洪

(中)

撰吉亮洪

商務印書館發行



書叢本基學國

集文詩江北洪

(中)

撰吉亮洪

行發館書印務商

卷施閣詩卷第七

緱山少室集乙巳 戊申

寒食自潼關至閿鄉道中書懷二首

塵欲浮冠浪拍肩。未成寒食賣錫天。兼程驛路猶飛雪。是日大風並雨雹隔岸山村乍禁煙。舊友別來逾二稔。晤

陵渡巡檢李璣名花看盡入中年。匆匆節序渾難遣。柳葉牽人到酒邊。

一種人間未了愁。杏花斜月屋西頭。都無芳草能迷徑。只有閒雲易上樓。金釧影移籠畫軸。玉簫聲徹動簾鉤。殘宵舊夢何時醒。門外黃河拍岸流。

出關日先柬畢侍郎

花暗長堤草覆汀。上坡楊柳接天青。半春移節來關外。一路傳書向驛亭。管下名山皆有嶽。坐中奇士盡談經。報公欲著河防略。燭跋更殘手未停。

清明後一日憇靈寶東二十里風雪寺作

馬上游絲拂面過。匆匆寒食奈愁何。鶯花已逐華年去。風雪偏于岐路多。石鼎水清勞更淪。壁苔碑暗費親摩。重來綠髮蕭疎甚。入定枯僧鬢亦皤。

緱山道中夢遊仙詩

嬾跨茅龍上玉京。新涼踏月海中行。回頭碣石都無影。移得黃河近洛城。  
眞誥親繙太古前。容成展上本齊肩。吹笙歲月三千載。子晉還稱後輩仙。  
三度人間謫乍還。玉虛容易綴仙班。淮南雞犬偏無劫。穩住紅雲碧落間。  
來往閒雲不定方。莫遊西海曉扶桑。玉龍行雨都無暇。驅作羣仙代步忙。  
八駿前頭一鶴翔。步虛聲引玉鏗鏘。不誇帝繫誇仙繫。幾度瑤池侍穆王。  
上界仙人住杳冥。閒來紫府鬥心靈。青天大似彈碁局。空裏時聞有落星。  
裁雲片片作窗紗。銀漢西頭織女家。天上晝閒無個事。隨風時唾碧桃花。  
自檢名山結靜緣。藥爐丹竈火陰然。忽然萬里紅雲破。流下仙人濯足泉。  
太室峯連少室高。黃河空裏影迢迢。緱山幾尺神仙地。引得羣神日夕朝。  
蕭史吹簫子晉笙。半空鸞鶴鳳凰聲。神仙一例都年少。白髮無從住玉京。  
天都逐便訪浮邱。更向空同石室遊。鶴背乍涼還乍暖。不知人世幾春秋。  
閒童五百執香爐。玉節新從紫府除。碑石拂雲都嬾看。神仙不習漢唐書。  
紫府三層碧玉臺。曉雲濃處百花開。蒼龍白虎司天闕。卻放騎驢道士來。

妙義同參帝釋居。龍華會上集簪裾。忽然海水浮天去。無數星官盡跨魚。  
秋半天中看月華。廣寒宮闕泛浮槎。玲瓏玉樹交無影。空裏聞香不見花。  
天上仍攜古錦囊。依然覓句擅詞場。都緣長爪仙人少。勅取麻姑降李郎。  
膠舟南邁世人憐。傳說昭王作水仙。畢竟上蒼忠厚報。一家眷屬搃昇天。  
采樵三日入煙深。絕嶺分明屐齒橫。再轉一山雲氣隔。松花如雨落琴聲。  
遊戲東池采碧蓮。被風吹得鬢斜偏。倦來只踏飛鴉影。卻訝羅裙黑半邊。  
詔書新降玉霄宮。南下關門啓數重。勅取海魚三百尾。放來天漢待成龍。  
借得仙雲一片平。展來如席睡難醒。多因夢重雲頭落。閣在松風盡處亭。  
金闕南頭奏玉牋。薦將師曠更司天。神光豁處雙眸炯。曾見仙人總角年。  
天帝分明築外臺。琪花瑤草勅齊栽。裴家玉杵溫家鏡。挈取神仙眷屬來。  
洗馬清談庶子狂。勅來仙案與司香。才名畢竟人天重。詔册仍徵白侍郎。  
共守東皇藥竈邊。傳言玉女試金仙。回眸不語拈花笑。一夕都生離恨天。  
駕鳳閒來碧海濤。霜柑偷食近千林。都因橘債償難滿。強得天公爲雨金。  
玉妃兩兩鬥新粧。騎鶴公然下界翔。卻灑黑塵迷世眼。不教親切見衫裳。

童顏如玉髮齊肩。自守丹爐五百年。騎得石牛偷下世。一生不願做頑仙。  
怪得變成玉手溫。搏桑三日弄朝暉。鯨魚死後滄溟漲。添得天南綠一痕。  
嶽瀆羣神賀正回。玉皇高拱坐層臺。虛窗亦養紅鸚鵡。慣述人間瑣事來。  
無多識字便成仙。香案惟留易一編。詔取洛陽王輔嗣。茅亭重與論先天。  
上方光景若飛煙。臺殿空明徹四邊。三十一天無月看。月輪只照兩重天。  
惘早

鎮日帷車坐。偏愁雲氣晴。客行殊望雨。敢說爲蒼生。  
兩歲多憂旱。山田赤地多。到秋霖雨集。瘠土更防河。  
百車汲井華。綆斷水亦竭。辛苦野人言。殘冬已無食。  
三月黃花少。蓬蒿積菜園。殘燈山館夜。殊復愧傳餐。  
嚴侍讀長明屬賦歸求草堂十二詠

思話軒

我愛思話軒。默坐久無侶。香草一尺深。秋蟲自相語。

冬讀書室

寢然冬讀書。一夕抵一歲。若及三十年。便足一萬載。

知白齋

坐臥知白齋。萬卷閱金石。墨氣升作雲。寥寥室生白。

過雲室

一室名過雲。籤軸紛滿架。掩卷看青天。雲生亦如畫。

蒲盧學舍

學舍名蒲盧。萬事取相類。只恐劉真長。當今本無輩。

知魚檻

濠梁靜觀久。自謂能知魚。魚相忘江湖。豈復知有余。

賓竹廊

長廊列篔簹。此君無不可。他日或生孫。大父行屬我。

目矚臺

言登目矚臺。四望各百里。身世忽若浮。大江流足底。

茶塢



我尋茶塢來。茶味如在口。倘欲邀狂生。壚旁合呼酒。

兼山

拳石有山名。石勢殊卓犖。如許山不看。出門遊五嶽。

白兔泉

泠泠白兔泉。石闌高一尺。倘值梁王賓。應繙兔園冊。

小香林

寒深香意遲。夢破花枝小。無數鶴飛來。江南春正曉。

孫大自句容來貽我二石刻喜甚各賦一詩

吳衡陽太守葛君碑

君歸止三月。我夢已百回。君來打門夢初破。破夢示我孫吳碑。我聞黃龍年。赤烏日一縣。神仙都姓葛。羅沙大石人棄之。取以作碑奇字突。鴻臚冷卿倘哲昆。南海傲吏稱文孫。羅浮章上罷官急。遠遜衡陽政聲立。試問鄆湖酒一甌。何如句漏砂千粒。君不見葛君碑。在縣西。縣南英英祀達奚。縣南有達奚將軍廟。莫能得其本末。將軍夜半過太守。賀爾石傳名不朽。

梁天監十五年井銘

祇園近小池。一雨沒深井。

井在句容崇明寺側。余乙未年客句容與孫大等時遊焉。

我看紅荷花。時餐井華冷。井闌危坐無虛日。詎識

足邊奇字出。孫郎爲剔百年苔。楷法稜稜三十一。蕭家半壁江山麗。塔高參天井入地。

寺有塔甚古。相傳六朝時建。

和月後天驕陽。千乘萬騎來皇皇。淨名釋後兼好道。去訪宰相華陽岡。此時淮堰成逾月。

梁書天監十五年四月淮堰成。

萬井森森植楷骨。仁心詎惜五州民。卻憫居人道旁渴。茅山道士鳩工徒。作井十五遵臺符。一亭覆一井。

一井深百尺。行人如願飲甘泉。宗廟反憐非血食。尋源知味不可忘。欲蓋石屋名蕭梁。興亡一瞬中。都付

塔鈴語。更喚井底龍。亭前作飛雨。龍言守石已千年。奇石旣顯龍升天。

胡民部文銓蔣公子光世招飲相國寺

已拚泥飲度蕭辰。紅樹前頭忽覺春。偶語乍來窺檻鵲。高枝偏隱上樓人。相看舊雨都如夢。更展屏風已

隔塵。幾曲豔歌歸去晚。碧流離瓦綻星辰。

籠街紅燭照歸鞭。書記平安有報牋。天放薄寒醒宿酒。人傳太白是真仙。隔坊宛轉猶聞曲。上馬憎騰祇

欲眠。明日戟轅傳勝事。哦詩聲徹曉鐘前。

贈陸民部鐘卽送入都

去秋同侍鹿鳴筵。二百人中最少年。通籍早司金穀重。趨庭還羨采衣鮮。機雲洛下東西屋。韋杜城南尺

五天。今日送君春正好。青門遙望紫絲鞭。

聞謝大令聘由固始擢守鄭州卻寄

太傅園亭我下帷。早年蹤跡鎮追隨。碁爭別墅心尤競。詩學春坊格未卑。王庶子大雅爲君房師製錦乍來遺愛里。

栽棠留伴叔敖碑。同官尙有吹笙侶。留滯天南報最遲。謂居大令紳

自密縣至登封謁嵩高山留山下三日徧遊嵩陽書院及少林寺回塗訪三石闕

中牟及鄭州風黑已三日。行經大駟山谷險忽距轍。天青被原野。氣候亦殊別。十里輒一亭。穿雲到新密。山光時破碎。風捲出林栗。一谷石若羊。高下嚙馬膝。地肥巒翠暖。村叟襖衣出。馬尾別大駟。馬首揖太室。洗眼洧水濱。看山庶真切。

四面各萬里。茲山天當中。言尋古圖書。名號有獨崇。足踏河洛流。背與三塗通。赤日照上方。正如心在胸。誰云無神仙。軒昊已築宮。天帝湯沐饒。嵩陽與登封。自非雨露殊。何以歲屢豐。是冬大年不見長松枝。亦扇

天門風。

登封壇處南。外方祠在北。惟留少室峯。割作化人宅。少林寺在峯下祠前一株柏。屋外太古石。言從天地始。便已

挺孤直。軒轅雨七晝。堯代雪三尺。倘欲與細論。長風閃林黑。太室少室闕。開母季度銘。茲文在世間。一字

一列星。我來遊嵩高。兼謁縣吏庭。覓得數搨工。南北敢暫停。如猿升松梢。先剝苔蘚青。聞聲不見人。墨汁

灑杪零。三日始畢工。爲文謝山靈。字旣徑寸奇。文亦比六經。牛車馱百張。回鋪草元亭。

自少林寺攜僧欲登少室峯以積雪不得上還憇子晉峯待月

山空無定影雲白亦疑花坐待幘幘月聊烹堦院茶曾聞餌雲母誰解贈丹砂五岳此遊四還家鬢未華

余曾謁真定恒山及六安霍山王寅秋復陟太華與此而四

送王大令復之官臨漳兼寄楊州牧芳燦伏羌徐州倅書受太康

函關西去川原古下第六旬行役苦余以甲辰報罷後入關始與君訂交是時君爲短主簿夷門東來景物澄河浪三月方

飛騰是時人呼豐縣丞君才作賦尤可傳景龍才人王子安競爽遠有楊盈川卽論詩筆亦擅場鄰下首

湖登樓王作配乃有徐偉長梁園賓客嘉書記才子爲官亦遊戲卻被人呼作仙吏君不見神仙吏不可

忘楊伏羌徐太康王臨漳

戲詠玫瑰花

芍藥花嫌小茶蘼香較濃連宵枕函裏開得一枝紅

偶得五百字酬景方伯安枉贈之作

五年客京師五年客西秦十年亦何爲頗與載籍親昨來遊梁園編校事亦殷雖依尙書居一面或數旬

貪讀終卷書久立門外賓盤盤齋西頭乃與公比鄰君前官按察時衙齋與節樓比識面雖未嘗吟聲日相聞前奉一卷

詩未讀已束紳開帙贈友篇古意何溫醇我雖未面公已晤公心神豈惟識公賢公友亦絕倫方今富羣

才作者日以新。誇多而鬥奇。如鳥爭鳴春。若論性情詩。當代無十人。昨來喜雨篇。憂國何諄諄。民之饑渴。懷乃若在一身。聖人垂衣裳。周覽靡不臻。惟茲大河南。民俗庶可淳。疇咨雨暘區。責此司牧臣。溫溫今尙書。百族依其仁。抑聞爲治方。寬猛得並伸。推誠固宜先。條教慮勿遵。自非束吏嚴。曷表于物勤。此方當河衝。水旱又已頻。調劑幸垂思。蘇此十郡民。明明哲人言。芻蕘亦諮詢。吾儒道無方。詎敢分域畛。值昨憂旱災。露坐每達晨。雖無牧民責。憫此俗痛呻。又聞垂空言。不若實意存。元公生中唐。疲俗善撫巡。春陵詩一章。字複語句陳。不妄作一言。言言盡眞純。重之如典謨。敢並詞客論。期公亦如斯。古治藉以振。立言非徒然。六籍乃本根。公行擁麾幢。我亦邦國珍。各望致遠謨。貴在質有文。廿年客諸侯。利弊粗得分。前蒙相公知。謂大學士英文肅公謂可軼輩羣。相公居東華。于公世婚姻。我行讀公詩。宗法倘可循。公才及前修。況乃性行眞。感激贈一篇。交誼賴以敦。行當計吏偕。千里馳短輪。方其未屆塗。先欲一掃門。傾心于所知。拂拭衣上塵。公其佇清聽。含意庶畢申。

戊申社日送友人至河北

去年社日風。鼓浪渡河北。今年風更峭。捲卷送行客。梁園作客無可誇。春半欲過無春花。昨升射圃望原野。青草不見餘黃沙。狂來濁酒誰能捨。更逐兒童趨里社。丈夫志業亦區區。割肉聊同宰天下。

杏花四絕同方五正澍作

倚墻臨水只疑仙。豔絕東風二月天。要與春人鬥標格。有花枝處有鞦韆。  
春陰薄薄霧濛濛。魂在江南細雨中。千朵冷光看不定。辛夷花北柳枝東。  
春當好處鎮無聊。自向簾前理玉簫。手把一樽歌一曲。紅顏祝過百花朝。  
十年騎馬曲江頭。拂袖籠肩憶俊遊。畢竟植根高處好。占他天外小紅樓。  
開封寒食懷里中。勝遊並記壬寅癸卯看花章。曲之勝漫賦二十截句。

貫卻黃壚酒滿卮。破愁聊飲半春時。東風吹得沙成海。不見江南雨一絲。

時旱甚

沙堤高比鐵浮屠。不信經時草未蘇。七百年來理春夢。閒窗私展上河圖。

才人豔說李深之。束髮能題七字詩。一事至今忘未得。賣花聲過晏公祠。

末句余童年作也

枕溪樓閣水迢迢。租舍南頭巷北條。半樹桃花一雙燕。

與鄰家共之故云

十年同住裏河橋。

閒來時傍女墻行。半里蘇蘇草欲平。蝴蝶滿樓人不信。日烘花氣上春城。  
經句曾未踏蒼苔。杏樹花疎欲替梅。紅到枕邊驚夢醒。一枝掄破紙窗開。  
溯流歸去路偏賒。欲到溪南被柳遮。時有鶉鴉啼一兩。墨雲如夢罨千家。  
辛夷含玉柳垂金。襯得簾前一片陰。渾愛曙光初破處。透闌來看百花心。  
短短疎籬曲曲塘。過橋十步破雲光。春衫不上梨花影。只覺月明衣袖香。

一峯奇石構幽居。小極攤書向午餘。何事鏡奩光不定。紫藤花影罩紅魚。  
醉醒渾未識天涯。古寺南頭一徑斜。似有塔鈴傳細語。菜花黃徧那人家。  
兩年頻識曲江池。紅杏尙書是本師。知要傳公舊衣鉢。碧紗籠徧紀遊詩。  
樂遊西去幾長亭。杏樹交紅柳接青。卻礙白雲無路上。南山屏是百花屏。  
豹林谷口亂山交。三兩幽禽挂樹梢。與我一般無宿處。木瓜花覆舊時巢。  
半日招提問路行。欲歸已有野僧迎。一峯才轉一峯出。北斗向人衣上明。  
皇子陂前一徑通。藍輿三宿水聲中。小樓東面不曾掩。夜半月來花頂紅。  
傷春筵上憶王郎。容我朝眠錦瑟傍。榆莢盡飄荷樣小。更無錢與買年光。  
折柳傾觴日數回。班驩欲去更徘徊。送人一片南山月。穿到霸橋東岸來。  
花時頻入少年場。兩兩遊蜂逐隊忙。悟後始知春意淡。沿溪都種白丁香。  
被塵封處客難行。破曉愁聽粥鼓鳴。輕燕不來人跡少。客窗誰與證清明。

寄錢三惟喬鄞縣

昨聞急使到河干。珍重臨期語百端。念友心情成疢疾。著書蹤跡尙平安。  
閒中閱世誰先覺。夢裏聞君欲去官。繞宅太湖三萬頃。幾時同我把漁竿。

張憶孃簪花圖

花紅無百日。顏紅無百年。只有茲圖中。花與人俱妍。當時一笑春風開。頭上好花終不落。可知花福亦修來。長得纖纖手。香握卷中小。立亦百年。不覺衣帶飄東邊。幽蘭無言露猶溼。花意人意交相憐。百年花尙香。百年人不老。題詩我憶卷中人。莫更錯呼張好好。

題夷門餞別圖爲凌上舍廷堪送友

三千食客都無用。四十斤椎乃有靈。風黑滿天塵繞地。欲從何處送秦青。雖云卿自用卿法。坐覺人愁令我愁。目送羊車出城去。柳絲五月已驚秋。

趙大懷玉寫經圖

小時一筆不得書。吾母教以分行疎。小時一字不能識。吾母教之先點畫。識從一字至九千。寫自一筆幾連篇。年華屈指心先悚。書欲如山筆成家。人言學術有淵源。我視庭闈若周孔。自傷孤露東家子。不謂君前亦如此。卅年文譽冠九州。可識從親授書始。白雲溪頭橫舍東。吾親若親昔過從。互依膝下問奇字。各舉傳記談如風。檐前風樹聲無定。不待孤兒讀書竟。生年不造痛亦同。六十三年月冬孟。吾母及君母葉三下世又並以十月。貽親望子以令名。我免爲惡慚先靈。卽論至性愧君甚。泣血寫徧千回經。吳門日昨來何駛。共展雙圖淚難止。時余亦以寒絮永慕圖屬君賦長句題篇不敢寫今稱。母但知兒小名耳。



七夕詞倣方五體

閉門三日雨無聊。聞說秋霖漲絳霄。若使天孫有餘巧。擲梭應已化成橋。  
返船新到綠沈瓜。早汲銅瓶薦井華。佳節莫栽閒草木。牽牛花映女郎花。  
商量羽葆日相過。肅肅長雲裊裊波。莫喚填橋舊烏鵲。好教精衛去填河。  
紅閨小極戶常扃。只看銀河眼轉青。忙裏卻添閒意緒。拜完新月拜雙星。  
題仕女屏風

尋幽徑有三更霧。小病人如四月花。胡蝶影多簾影少。幾回隨夢入西家。  
怪來書味上春容。校得仙經意乍慵。不信驗他雙指爪。粉痕猶淺墨香濃。  
三年渾住宋家東。一語嬌羞尙未通。他日曲江亭子上。借他簪鬢一枝紅。

徐孝廉嵩芙蓉湖上讀書圖

有峯三十六。都接海天青。爲要魚龍聽。先繙嶽瀆經。鏡收千樹綠。鐙借一湖星。  
莫厭春蔬淡。時餐雨脚腥。嚴侍讀長明平生樂。雨花岡二忠祠。竹木之勝。沒後適權厝於此。其子爲圖。乞詩。因賦此篇。

梅花如雪開朝嗽。昔時翩然來叩門。山僧驚起款尊客。石上煮茗春泉溫。  
佛樓花謝剛前度。遺魄偏來賞心處。山僧行脚尙未歸。返使先生作常住。梅枝垂實葉暗廊。琉璃一鐙綠到房。  
闌干幾曲助風勢。總帳瑟

瑟生新涼。萬言結習難忘卻。真見唵聲出樓角。可知此客不尋常。三護鳴鑿四登嶽。壯志方期獨擊鷹。赴書已附西飛鶴。枉憶春風去住舟。癸卯甲辰間與君先長懸夜雨東西閣。謂同遊紫閣白閣君不見。雨花岡南坡草青。前後車馬來無停。先生高臥事亦得。不見墻外勞勞亭。

黃通守易訪得漢武梁祠堂。石刻聖賢畫象。既爲亭覆之。又繪訪碑圖索詩。

高平石刻皆雲烟。千載復見嘉祥阡。平原武安吾不識。得姓要在西京前。大河南移川變陸。削石棧棧數間屋。不隨巨浪入滄溟。中有聖賢牢置足。四百餘字漢八分。句字樸棟如皇墳。以之持較李剛刻。四角但少龍鱗文。訪碑客至何瀟灑。拓地爲碑營大廈。道旁錯認魯東家。一車兩馬栖栖者。

八月初九日將赴楚中。童少詹鳳三邀同張學使燾。崔編修景儀。趙舍人懷玉。蔣上舍齊耀。預至吹臺登

高歸飲寓齋卽席賦別

人生擾擾東西走。快意登臨亦何有。梁王城外亂雲飛。天預商量作重九。翰林仙人張別筵。邀客先上層臺巔。五車聯尾出東郭。七騎矯首來雲邊。紅沉綠暗青林表。人亦蹩躩若飛鳥。中臺陡接天半風。吹斷語聲空際鼻。歸來酒腸誰最寬。詩老昨幸留餘歡。謂張學使一時忽得兩短李。崔趙何處可覓詩方干。時約方五正澍不至冥濛樓閣鐘聲細。清夜淹留賞心地。遊客鄒枚讓馬卿。酒徒毛薛依無忌。卻憶三條樺燭人。時正屬院試青衫白鞵雨如塵。名經我愧身非佛。作賦羣推腕有神。少詹及舍人皆以召試通藉勝遊一夕聯吳會。別後萍蹤復誰在。明

日朱仙鎮上眠。先商黃鶴樓頭醉。時少詹亦將遊楚

中秋夕自尉氏至朱曲途中玩月作

四望各無際。疑行萬里沙。碧天微有影。初日定輸華。露采驚棲鵲。雲光發檻花。此時心跡冷。誰復夢思家。

中秋夕三鼓作

林露下千點。砌蟲鳴百端。此時羅袖影。一一上闌干。佳節異鄉好。清輝徹夜看。延回思往事。坐久不知寒。  
自樊城渡漢遊峴山歸謁羊杜二公祠作

我從南陽來。欲飲襄陽酒。秋霖三日不暫停。馬足泠泠挾波走。還攜梁園客。遠上樊城望。昨日秋風捲地來。一條漢水浮天上。襄陽城北樓正開。放艇若從天際回。城樓高與柁樓對。無數山綠衝帆來。松楸連綿十餘里。客到寺門山忽起。昔聞峴首今始登。一石真堪入雲裏。可憐好景輸後來。削壁點上千年苔。紅闌干落一江水。白日照舉堂中杯。當時幾掬西風淚。更值山公百回醉。寥落征南身後名。何如眼底杯常在。習家羣從噪一時。我知葛彊亦可兒。滄桑陵谷幾回改。何處可覓山公池。白雲茫茫一千頃。曾照前賢角巾影。羊公遊後渺無人。秋草荒寒沒人頂。山前一亭昨復傾。騎馬上與浮雲平。難追國士濡頭飲。亦愧英雄腴肉生。一碑橫眠一碑側。石上摩挲感今昔。百世來分風日佳。一編欲正春秋癖。時著左傳話歸路惜騰醉不辭。乍醒還謁二公祠。可知此客今無輩。放許高吟峴首詩。

隆中諸葛忠武祠

遂有經時臥。知逢漢德終。地當天下險。山卽宛中隆。蜀國望難極。沔江流不窮。蒼茫墮清淚。知不爲羊公。

九日雨中飲楊進士倫江漢書院齋舍卽席賦贈

堂中書百堆。門外雨三尺。堂裏讀書人。修髯新若戟。前時別君處。七客揖馬鞭。歲月苦未多。兩復地下眠。

謂莊舍人選宸  
楊司務仁基

君思武昌魚。我饌終南鹿。食鹿苦鹿肥。還尋渭濱竹。首春寄君札。八月無報書。聞言楚水

高。魚蝦自登廚。我乘東南風。鼓此接天浪。帆落卽訪君。疑君坐天上。讀君五年作。飲我九日觴。腹笥旣已

富。修髯有時張。轉思三十年。交君及君弟。君弟亦服官。

時君弟官淮峯  
州判官適至

自知吾老矣。無言契闊久。且喜會

而初。兩心苟相親。天地不得疎。

道中作

亂峯高映斜陽赤。谷裏人行已深黑。溪南新月透山來。千朵白雲不遮得。東西秋水隔一村。跌涉尙喜山

泉溫。山村樹溼昨宵雨。石屋冷冷出蠻語。

黃鶴樓

黃鶴磯前黃鶴樓。到來一笛欲迎秋。神仙蹤跡成長往。吳楚江山此上流。帆影靜排千雉堞。檐形飛控兩

雄州。支頤我正東南望。卻有雲生碧海頭。

仙臺亭

纔泊金牛港口沙。上山亭復做浮槎。真疑楚國萍如斗。誰識仙人棗比瓜。白鷺雨餘飛急浪。紅闌天半放秋花。談深我亦饒鄉思。時直里中舊友百椀頻澆陽羨茶。

月夜再登黃鶴樓憶尙書師荊州

上城已有角聲催。曠黑窗櫺信手開。十月魚龍先入定。三更烏鵲自飛來。巴人路向雲邊出。楚國天從滢口回。誰敞庾公樓畔月。不勝清興待銜盃。

種菊

古人愛深黃。今人愛淺碧。豈惟人事殊。花亦悵今昔。今晨買花至。隙地種盈尺。百種盡棄之。聊存花正色。清泉日疏灌。間以數奇石。倘訪泉明居。沿流卽彭澤。

食蟹

江客嗜飲江烹鮮。及蒞藕無緣。傍江住常復。面山走茲來。愜心素百步。距江口。江水照讀書。江船送春酒。武昌魚既好。鄂渚柑常有。右手留校書。持螯還左手。

黃鶴樓送史上舍善長至南昌並寄王方伯昶

蜻蛉舟黃犢車。爾不如仙人。陸行有黃鶴。水騎赤鯉魚。豫章城武昌郭。仙人不如爾。朝登武昌之飛樓。夜

宿豫章之傑閣。一樓旣參雲。一閣復接天。洲前鸚鵡喚客不能住。閣上蛟蝶飛舞開寶筵。司勳詩筆王郎文。我優爲之何論君。成名當世偶然爾。拍手笑殺神仙羣。神仙舊侶吾能識。方平牧羊今作伯。有時耳傾彭蠡百斛濤。手拗匡山幾方石。明月湖光一碧。百花洲香四塞。與酣容我倒玉山。不然爛醉從君校金石。  
方伯近著  
金石集成


送蔣孝廉知讓歸江西

屋角新月明。送君在今夕。君言歸故里。營家有期日。一奴一馬縛兩羸。千里冰雪高嵯峨。黃塵飛盡綠波出。剏上黃鶴同高歌。  
時楊進士倫主講  
武昌君言當訪之君家兄弟今無輩。百歲相知亦何愧。知君念我當有時。啓戶來看

九江水

爲張孝廉鶴題烏巢風雪卷子

枯楊聲已悲。夜烏啼不歇。男兒處窮海。十日九風雪。朝烏催讀書。夜烏催閉門。枯楊作薪爨不溫。老屋還倚枯楊根。去日長。來日短。夜烏窺人顏色慘。讀書成名何足言。不若識字依親前。君不見。兒行不離親。烏飛不離樹。烏巢呀呀能反哺。失母孤兒哭何處。欲望重泉作歸路。



卷施閣詩卷第八

靈巖天竺集丙午至己酉

跋英文肅相國所藏錢文敏詠物詩卷子後

故紙方三丈。尙書五字詩。九原悲宿草。七客有餘思。是日集余風雪授經。卷者七人同觀。是卷。詩以雲母。箋寫就。粉墨傷心色。烟雲過

眼時。猶慙門下士。亦辱相公知。余爲文敏門下門生。夢。堂相公見待。亦多異數。

入值同趨朶殿偏。匆匆落墨寫吟牋。曾攜暖翠浮嵐上。夢堂相公藏書畫。閣名暖翠浮嵐。忽寄開坊冷巷邊。文敏幼弟維。喬報最入都。

得之坊市上。時相國下世前數月。小友忘年情愷惻。兩家多故淚纏綿。相公詩格尙書筆。當代何嘗有後賢。

丙午二月十日借錢三維喬楊大夢符等元墓探梅作

停帆及山椒。雨點忽破夢。東風來林間。春衣香氣重。尋山三折至一亭。樹梢微紅雨脚青。山光雨光乍零

亂。薄暝花紅出天半。空林黃葉時。一零木葉盡。脫花含馨。全湖香氣收欲盡。時有孤客揚幽舫。白雲不在

天。碧霧欲沉水。一片溟濛盪成海。危瞻花路復百盤。瘦影先憐幾人在。時錢君借崔夫人等先在。花光如月澹不分。松

翠入戶團幽芬。繞花百匝不知厭。可惜下有春人墳。時尋明張靈墓不獲。持千觴。揮百尊。不飲已慚花下人。來開曉

馨聲。歸及晚鐘動。春泥深深鞋沒縫。十里回途花作街。



贈崔三景侃二首兼寄哲兄景儀都下景儼劍門

客兒微子本齊肩。未向衙齋識阿連。今日西堂賦春草。懷人蜀道上青天。難兄執筆趨蓬觀。小弟裁詩壓綺筵。三處離愁一杯酒。夜寒聊與對牀眠。

曾訪疎梅徑石橋。錢郎度曲蔣生簫。謂錢大令暨蔣上舍陳尊閒愁歲月過三十。如夢谿山似六朝。五夜衾裯交燭淚。

一句衣袂未香銷。穠春正好須歸去。且莫風前折柳條。

由淨慈寺至龍井道中作

離湖始入山。一徑青島巖。土風殊清淳。花比桑麻少。人家嵐氣重。屋角出青草。馬上人影高。窺林撫巢鳥。空外山雨來。方嫌出門早。

龍井小憩

昨夜月沉前灣。朝來白雲不閉關。款關僧少復誰伴。白鷺引客來前山。山巔一亭高百尺。峯後峯前勢相及。行人天外忽舉頭。一谷石奇都欲立。

冒雨尋三生石

一寺雨松梢。零天半樓閣。開青冥三生寺。邊石如屋。我坐剝蘚看題名。山空氣候殊難省。冰柱檐前燕巢冷。春風開徧半山花。尚有半山紅樹影。

薄莫至湖上小飲

行人乍離山。山色已如夢。回聽南屏鐘。薄暝數聲送。衣單思中酒。春醪喜盈甕。漁人蓄魚處。引水漸成衍。雙鯉欲飛時。全湖綠俱動。

錢唐舟次作

芍藥開雙枕。芙蓉刺裏衣。不知花是繡。蝴蝶上牀飛。

錢唐歸舟寄錢三維喬一首

昨來揖客津亭東。布帆如雲已挂風。春風亭前一杯酒。送客多于道旁柳。我行小別君遠官。十艇接尾衝波寒。虎溪橋頭住經日。塔影亭亭對波出。全湖雨勢開上來。放艇忽欲尋疎梅。梅枝高寒雨聲急。倒著羊裘雨中立。攜花滿船夜不眠。花底裙屐皆神仙。時崔夫人亦借往我韶載酒獨欲前。更有一艇鳴玄絃。玄絃初斷笛聲起。白鷺繞波飛不已。哦詩聲細出舵樓。更放健筆圖清遊。時方作聯舟雅集圖快哉風帆不獲收。一日一夕來湖頭。湖雲正好湖月輝。惜爾遠宦余仍歸。五年回首別孤嶼。夢度江波逐君去。君行送我一惘然。何日更放梅花船。君不見。故人士輩多爲吏。誰爲梅花決歸計。

送楊大夢符至東平書院

巷南春泥深一尺。知爾欲行行不得。杏花枝頭春日晴。爾今別我有遠行。欲行不行奈何許。隔渡先聞喚

船語。莊生

述祖

玉立北岸偏。瘦影已過溪橋前。趙家兄弟巷東走。拂盡垂垂道旁柳。沿溪送者三四人。日

日痛飲酣青春。青春回首六十日。與爾同舟及旬月。忽然疑我欲作仙。著脚萬樹梅花邊。忽然疑我欲出

世。百尺厓邊悟無始。看花十回月五回。更向西浙看山來。山花流紅照杯酒。碧月蒼茫墮湖口。茲行樂事

無不有。十舫義集良友樂。亦既已極。別亦不必嗟。劉安鷄犬亦同徙。羨爾一舫攜全家。此時只憶城東

門。桃枝李枝將放春。莊家笋足酒亦溫。可惜眼底皆離人。時將大齊耀將赴選盛二惇大入都補官趙大懷玉亦有浙西之行作詩寄耀崔

兼與瘦錢說。乍荒花好難久居。我亦清明挂帆別。

花朝日訪袁大令枚江寧。卽出隨園雅集圖索題。因賦以志別。

生年雖後可不慙。圖中五君識者三。吳門尙書年近百。艤舟亭邊亦相值。沈文懋我讀尙書篇。已識袁尹

賢。白門深秋一相訪。苦說詩人惟瘦蔣。蔣心餘騷壇落落此數翁。若論文筆尤推公。圖中少年昔驚坐。陳州

倅此日鬚眉已如我。公前罷吏學閉關。卻有謝傅遺東山。後先居山兩安石。公不爭墩名自敵。翛然松竹

倚北原。因憶主者名隨園。園本隋織造所構因仍其名卅餘年來執牛耳。不到茲園名不起。公自言名士未

貌昔遊。歲則乙酉時。清秋園林疎疎風屑屑。已覺尙書履聲出。彈琴旣無絃。垂釣亦直鉤。少年落紙不肯

休。我見識是非常流。此詩此畫誰能逮。出筆都憐才蓋代。南北詩人十數公。卷中如莊滋圃劉文定尹文

文懋彭芝庭諸尙書均已下世僅餘一老稱前輩。山中訪客當花朝。擲我一卷如牛腰。止留紙尾盈一尺。寒夜乞我來揮

毫。是夕大令留宿小眠齋外花光紫。窗前蔭花甚開讀書讀詩愁不止。尙餘一客昧生平。掩卷來尋尹公子。圖中唯尹

公子闌未及謀面

道中遣懷十首

月館風廊望若仙。眼花濃笑髮齊肩。讀書燈下匆匆見。此事分明十五年。  
欲歸清漏已迢迢。忽覺沿溪笑語飄。風裏紙燈拈不定。暗扶絲柳過紅橋。  
長廊轉盡款幽房。鏡穗微紅月乍黃。天半忽聞金釧響。最高樓閣整衣裳。  
私理銀瓶汲井華。個儂薄醉未回家。鸚哥欲睡人還立。團扇親拈自煮茶。  
看星歸去已匆匆。早闔園扉怨小紅。贏得夜深談往事。一雙人立雨絲中。  
春波東去迳西斜。紅杏枝低戶半遮。垂淚別他雙燕子。烏衣巷口欲移家。  
酒溫香膩乍魂消。月采冥濛隔絳綃。早有玉人傳細語。百花生日是今朝。  
團團月扇放簾低。對面梳頭背面啼。故倩旁人說春夢。自來庭北剪棠梨。  
夕望征帆已百回。模糊明月上梯來。梨花一樹宵無影。卻傍人人素袂開。  
往事怔忡一夢中。欲搴清淚寄東風。可堪行到無人處。一樹桃花著意紅。  
秦二世泰山石刻止存二十九字在泰山碧霞元君宮乾隆戊午年復燬于火榻本甚少今夏黃州倅易

搆得一本寄孫大因爲賦之

昔者東海神。照見泰山火。惜哉篆法存。竟值爇燬禍。神人嗜古理則同。急雨已下元君宮。碑雖不存紙本出。光焰尙燭秦封中。我聞漢家重六經。丞相半武夫。秦人棄詩書。當國悉大儒。咸陽門邊呂覽收。泰山碑旁斯篆留。一摩巨石衝天上。一抱遺經入黃壤。爲陵爲谷尙有年。碑石沒地下。遺經出人間。經學旣大昌。籀法亦可窺。人摩一本日觀寫。豈數丞相東封碑。斯言雖狂由激發。且寶斷碑臨萬札。君不見。欲將一字比一星。二十八宿應添伐。

童上舍鈺所藏晉太康五年買地菑歌

大男楊紹買地菑。太康五年歲在乙。文云九月廿九日。黃滕闕澤北瞰湖。古名今地勘不符。今爲山陰十

七都。明嘉靖中山陰十七都。七都人耕地得之。乾坤六合甫歸一。日月四時須作質。瓦尾更言如令律。可憐青蓋飛前年。四十三

郡登降牋。當時曾不費一錢。太平土價高于玉。買土爲墳傍山麓。四百萬錢稱賤鬻。土公當日疑有私。賣

地不與天公知。故列證佐詳年時。前孫吳與後司馬。劫後山川餘片瓦。光欲流虹手難把。童君好古無一

田。一瓦乃直二百千。抱瓦日向高齋眠。瓦文稜稜六十字。不及質君真恨事。采入晉家疆域志。時著東晉疆域志。適

成。藟中黃滕闕澤諸地名。悉采入山陰縣下。

青門送別圖爲史上舍善長賦卽送歸吳江

渭城西去青門東。古今送客愁不同。咸陽原邊馬行少。只覺客從東去好。去年別青門。今年客梁園。梁園爲客忽不樂。放眼歷歷思秦川。幾年君向何方住。君久客甘肅。卻望秦川作歸路。貪看削雪萬重山。行到斜陽最西處。東西歷盡詩一囊。已抵陸賈千金裝。吳江楓落句雖好。何似變體吟伊涼。讀君詩完飲君酒。七尺憐君好身手。塵衣浣向海東頭。飽看日上滄溟流。

送邵祕校晉涵入都補官

君行不得行。一尺大梁雨。流潦衝夷門。街泥積如許。大梁雨足欣有秋。君雖不行我夷猶。廿年三度與君別。被酒歷歷追前遊。逢君乃研經。逢君乃注史。當時苦說兩少年。只惜黃郎已前死。仲則。騎龍弄鳳戲里闕。斬蛟射虎節不拘。性情至此忽一束。細校科斗牋。蟲魚讀書識字居然異。長句猶能矯奇氣。大龍山下別君時。千六百言君倘記。辛卯王辰與君同客安徽學使幕後于懷寧城下相別各爲詩八百字以贈焉。壬辰三月上巳筵。江水一樓詩一篇。我欲白袷方詠月。君著宮錦行朝天。長安米貴居偏易。蓬觀爲君著書地。宜南坊外三斗塵。一客入門驚故人。故人久別儀容野。日倚陳編與傾寫。已看貴紙寫南都。君時著宋南都事略及附雅正義。尙少築臺名爾雅。十年哀樂事亦同。往往相左紅塵中。丙申夏君奉諱南歸訪余于里門不值是年冬余亦遭太孺人憂及甲辰春入都訪君又于三日前奉太公諱南下不及見矣。梁園握手亦意外。濁浪飽吸餐炎風。河流拍枕朝難醒。官燭燒殘夜忘永。蠹魚窺客客不知。雙鬢都垂二毛影。盤盤萬卷縱堆窗。只覺逢君氣早降。禮堂若寫羣經定。君署南江我北江。君據漢書地理志許君說文定分江水從餘姚入海因自號南江余亦據地理志

陵北江在北東入海因顏  
其草堂曰西齋北江云

黃州倅易得漢石經尙書論語拓本殘字共一百二十七因自繪象于後索賦一篇

陳留中郎真大儒六經能以一手書一手書後萬手模太學門外車填衢闕堂皇皇三百尺日月入之光

欲奪當時共喜聖籍尊可惜偏遭漢家末碑成不遺蠹蝨預恐識字驕龍蠹惟應儒者得觀覽證以師

說無差謬六經之文萬萬古水濡火滅均可補周籀秦已值祖龍漢刻晉還逢石虎水經注石虎載

左右地可觀掘土尺許皆琅玕魏安僖冢逸書出唐御史府遺碑傳宋初開地唐御史此經此本誰所拓

疑古疑今日詳度八分縱異石室體一字已勝稽山閣論語碑較蓬萊閣刻黃君是年三十四尺壁換來

殊不易賞音不啻鑿下材寶墨尤逾枕中祕吾儒策勳亦可哈詎有麟閣兼雲臺研經半世貌逾古畫像

且復登蓬萊虛堂六月消暑色且借此碑讎隸釋中郎中郎不能值我見虎賁三歎息

送沈秀才思誥回浙中就試

三日檐漏聲正慮大河決沈郎馳征車乘此疎雨歇一奴鬚蒼然一馬色驪栗亦有酒一杯迎門且言別

歸裝不憂儉萬卷深壓轍八月天地潮排空試詞筆吾鄉窮令尹錢大令維禔望我一書切軍門亦吾友陳提督大

用天上吹簫築君行倘相值定復詢消息爲言頗善飯暇卽耽著述去去弗復遲沿塗有新月

吳大令錫緯以二月抵大梁卽奉檄勘賑西平遭疾遽卒亮吉等斂金相助至九月旅櫬僅乃得歸率賦

此首哭之

夙交君叔暨賢昆

予與君季父祖健及仲兄繼緒素相契

相識方欣萃一門

濟水南來曾鬥酒

辛丑夏予下第借崔吉士景儀赴陝中時君在臨清權署

留飲

大河東去與招魂夢為蝴蝶同飄忽

昨夢君及莊同年選宸莊為生與蜉蝣競旦昏更向邗溝尋舊

侶十人今僅兩人存

君所居枕邗講巷東西最長予童時舊相識如錢伯謹仲默升之守之唐介石在茲兄弟孫思雍布衣潘章叔上舍二十年來先後下世今存者惟君叔暨錢樹參明府

二人

### 送汪秀才頌堂歸錢唐

琴堂曉日列長筵執卷呼名始得前

君尊人邦憲曾令陽湖予始應童子試即識君

我傍土牛依砌下君騎竹馬出簾邊論文尚

記三千士

時二縣應童子試者至三千人

此事多應二十年今日送君惆悵甚使君墳草已芊芊

喜楊大芳燦至大梁即送入都

十年復一面萬里各在胸重來酒壚邊恨已無黃公

謂仲

我方強仕歷九州尚恨未極天西頭君才早宦

原非過僅得一城如斗大花門鑿面昨負恩城大如斗真思吞升平本乏邊塞績小醜乃建君奇勳手揮

稜稜萬言檄左手更兼能殺賊城頭一矢落一人餘者不敢來爭門飄然望君一千里

時予客西安

日讀軍書

為君喜丈夫事業豈偶然頗恥僅以文章傳等身著述亦何有我抱壯心看北斗涼秋九月集大梁左蔣

並在寧辭狂

時左孝廉輔蔣上舍青曜適皆以事至

此時頗復憶孫楚

謂淵

爛醉尚滯華陽岡眠遲消盡雙紅燭別久話多



還抵足。尚書愛客知客狂。夜勅齋廚餉醞醖。一句送爾城南臺。倘得殊擢君還來。君不見。吾徒會合真無幾。更隔十年愁老矣。

乞梅詩投左二

故人齋畔樹。植我小池東。他日花開處。如君笑口紅。  
疏池貯科斗。搆石帶莓苔。預恐秋窗寂。先移春樹來。

卷施閣落成偶賦四首

我非一世人。世味本無泊。中年感孤露。顧影失棲托。故巢有時歸。戚戚寡歡樂。妻孥中道合。久對面生作。衣食粗已完。聊爲事疏鑿。閒身置天地。非可自菲薄。臺修忘世事。幽賞寄巖壑。藉此山一房。寥寥通五嶽。晨涼始讀書。午倦亦展衾。昔夢旣爲昔。今夢成其今。夢醒理未殊。安得分戚歆。昨者疏一池。貯水不欲深。安知旬日間。不復成雨霖。閒門晝常關。石古苔氣陰。積卷貯石旁。一詠兼一吟。掩卷忽慚然。此意難復尋。迷陽花斷腸。卷施草傷心。傷心以名閣。淚下霑衣襟。

東鄰啼鶉鴝。西廡蟬噪柳。忘機一延佇。物態欣有偶。茲晨風日好。爲具約吾友。豐歲慶有期。先秋富蔭藕。雖童識南北。款戶速誰某。齊年居七八。大者顏未叟。各各徵所聞。居然足談藪。傾觴及終日。僅足盈一斗。中坐或慨然。年前失黃耇。

昔者慕著書。鉛槧二十年。傳世難預期。庶足慰目前。前年少尹亡。黃仲則檢討疾亦綿。孔攜約惜哉同心人。生命均不延。初日照屋閭。神澹不復眠。偃仰萬卷中。有若田大田。注史忘歲時。炎暑忽已遷。一雨斷往來。展卷晤昔賢。餘事非所營。庶以全性天。

七夕獨遊放生禪院兼至楊氏宅訪友有懷進士倫武昌

一院千聲出。風蒲葉葉秋。怪雲都上殿。野水忽平樓。石徑歲逾圯。禪堂昔未遊。夕陽真有意。穿樹到東頭。九株松檜綠。遙識草元亭。鄂渚客偏久。山房昨已扃。款門逢地主。佳節指天星。正好涼汀坐。相攜采素馨。

初八夜蔣太守熊昌招同人小集卽席賦贈

久別眞憐廢過從。舅家庭樹尙葱蘢。所居本余從舅氏故宅樽前秋思催春燕。天外晴雲挂雨龍。安志約僮刪徑草。閒心邀客鬥詞鋒。狂唵痛飲都成慣。不管前溪渡口鐘。

冒雨

行人未歸處。雨點黑如鴉。細路獨三里。秋原餘幾家。魚梁人渡冷。荷徑送香斜。爲有年時舊。留賓過水涯。

郊宿

破牆南望處。十里月空明。秋露洗逾綠。殘鐘敲更清。樹疎涼意定。塔古夜光生。不覺心神寂。寥寥夢未成。

夜起

水南一燈明復昏。欲歸不歸夜向晨。秋花如拳挽行客。月露似眼迷歸人。流螢出門光乍小。徑密人行復披草。卻到橋西憇石欄。寒鴉噪客來何早。

早行

曙鴉聲一片。秋露洗高原。暗影驚谿樹。迷塗出毀垣。磬疎分寺塔。波響涉泉源。略約危如此。松梢手欲援。  
紅梅閣小憇

野人愛郊野。近郭行半里。紅樓出林梢。星壇入雲裏。因緣開北牖。半日坐難起。秋圃黃金花。空潭赤文鯉。  
東郊憇劉氏花園

出郭閒行閱歲華。風光偏足野人家。涼生碧玉參天樹。秋到黃金布地花。小閣四圍巢燕棟。夕陽三面響魚叉。林園不欲窮幽處。留與閒時共鬥茶。

飲酒十首

人生天地間。各各私所有。未知室中物。屬客百年否。百歲非可期。得半亦云久。萬事取目前。沉沉飲吾酒。憶從墮地來。不識天上事。同儕應念我。久別及一世。飲酒或夢之。時時致沉醉。寄語區中人。無爲擾余睡。嘗嫌生世遲。千載隔鄒魯。不知更千載。我又成太古。詩文代相祧。視我卽鼻祖。所以勤著書。空言不無補。作客二十年。衣食知其難。卑身與周旋。不敢忤世顏。人事旣以希。飲酒輒閉關。頗哂一世。人苦說不得聞。

性癖喜獨尋。不避邱與壘。高原何蕭蕭。愛此木已拱。要知百年後。行者皆接踵。春到骨亦知。柯條節間聳。涼蟬飲清霄。下者口亦啄。物性饑渴同。飲酒人所獨。神明頓通徹。味乃勝食肉。所幸吾已多。東鄰酒家屋。黃生苦不遂。飲酒或酒悲。孫郎庶通方。量復與興違。吾皆與之交。泥飲輒不歸。一死一別離。行當徹尊壘。秋聲來無時。當戶鳴蟋蟀。夜短心甚長。沉憂逮朝日。卑身處天地。非敢計家室。百念集一尊。傾觴亦將噎。客有一寸心。抱此亦云久。妻孥不能知。庶可喻良友。悠悠二三子。悼歎莫吾偶。一世乏賞音。吾將寄身後。前日無好懷。昨又寡勝侶。今晨心賞至。檐外忽風雨。蠟屐雖已攜。塗泥積如許。感此復閉門。終朝杯獨舉。將至烏鎮率成二首呈崔通守龍見

我騎竹馬甫成童。綠野堂開識寓公。

王午歲于錢文敏公第中識君時甫成進士

裁句早甘牀上下。飲泉今徧溯西東。

君歷署金華處

州及烏鎮同知

雲霄事業看兒輩。

謂長君編修景儀

夫婦神仙豔里中。若說通家較清切。伯孫榻畔拜扶風。

蹤跡愁邊與病邊。放懷應不受人憐。中郎才筆推前輩。太傅門牆記往年。謂錢文敏威鳳羽儀終就日。成龍腹尾盡升天。淮南賓客如相問。只我遲回懶作仙。

#### 四鼓渡鶯脰湖

三更涼月侵。放棹復幽尋。客念此時寂。鐘聲昨夜沉。露翻千葉白。雲定半湖陰。只有閒鷗鷺。能知天地心。夜話贈蔣上舍陳尊二首

秋樹齋頭夜氣深。故人久別話升沉。黃金市上空求骨。白雪尊前孰賞音。循吏幸依崔不意。君客崔通守署中甚久。

專家應學董無心。時訊董孝廉思願消息甚至。年來絕業誰能識。撰到清風與竹林。

二十年前共閉關。白雲谿上著書閒。曾拋屋畔撈鰕落。君有別業在鶴蕩近風人矣。卻買州南射虎山。君尊人近買宜興縣南山數十

頃云十年後當獲其利。別日壯懷應少減。故家生計未全慳。何時得遂幽棲志。擲笛風前與往還。

新正二日太倉毛州倅大瀛招同鉛山張上舍舟歛方上舍正澍無錫鄒公子恩三山徑探梅卽席賦贈

六首

昨來世事繁。今晨賞心果。寧惟市塵絕。十里斷烟火。行盡落葉聲。寥寥花數朵。

衡門當道左。客至主人辭。園林非一所。樓閣掩經時。開傍宜春帖。離離紅亞枝。

合牖敞風櫺。離堂開雨宴。陰晴花氣殊。深淺雲容變。猶斂向南枝。將無待春燕。

疎香不到處。山水足清華。曲澗流時斷。幽巖路忽叉。閒心聊點筆。元日詠梅花。

雙筵旣藏鉤。獨客時唸句。淺醉已學狂。欲歸猶未許。且上百尺樓。簾疎試春雨。

居然人慕蘭。毛君字又蕙故云。亦有字同楊。方布霧方誰學。談天口乍張。無爲勤遠送。揖別此花旁。

初二夕宿漢口聞爆竹聲不絕

漢水入江處。東西一道斜。五更喧爆竹。十里散飛花。已破早梅萼。還驚徹曙鴉。聊應當鄉語。淺夢乍回家。

確山贈金同年朱楣

故人爲此縣。幾載有賢稱。隱几書三尺。當門嶺數層。雨肥山郭蘚。風瘦驛樓燈。馬亦諳清況。衝寒只飲冰。元夕宿尉氏。贈張大令大鼎并寄徐州倅書受。

去歲中秋永。

去歲中秋日往武昌道過此留飲。

今年元夕寒。兩回明月好。都向此城看。邑宰幸同譜。盤餐聯素歡。遙憐徐

騎省。雲外倚闌干。

朱仙鎮元夕

鄭塞逢人日。朱仙值上元。殘燈依半壁。春夢入中原。月直危樓影。天連野燒痕。明朝騎馬去。又過古夷門。洪兒歌爲徐同年書受賦。

尚之三十後生子。乞余命名。余舉前人之例。名以余姓。而以余名字之。曰孟吉。則因其庶長也。並作是詩。

昨來欲訪夷門雪。獻歲發春才十日。故人舉子乞我名。我名故人子不輕。我年始十三。六經都過目。書堂學咏新月詩。得句先令輩流服。爾來卅載饒憂患。文筆天人倘堪贊。我老雖漸晉始興。兒行何減吳元歎。字之以吉名。則洪富貴或過我。文章止期同。白雲谿北餘環堵。我有三兒健如虎。架上盤盤萬卷書。他時一半應分汝。

董生詩贈董上舍達章

董生賦吳山。指上立采虹。董生賦南海。舌本翻龍宮。我知董生由趙左。趙大襄玉左二輔不識董生才過我。我詩

往復頗不窮。不及董生句更工。我文亦饒氣。不及董生律尤細。董生知我我不知。直待頌徧千篇詩。袁君

愛巧大令徐愛真。徐大書受二者生筆皆能臻。不然何以天風海濤相間鳴。亦復雜出紫燕百舌黃鸝聲。董生

三十無世名。我吟一篇見者驚。還生詩編生自省。我在何能壓公等。

閹官詩

徐上舍均爲言乾隆壬辰年。其尊人某官邢臺令。沒于官。喪歸至臨清。大風覆舟。一妹三奴盡斃。惟均子甫四歲。憑棺蓋得免。時奉天何士錫爲閹官。爲出錢募役。得曳柩出水。四人者皆爲藁葬。又賃屋居生者數月。均甫自邢臺至臨清。得奉喪歸。暇日爲余述其詳。余感何君之義。爲賦此篇。

臨清閹。閹置官。閹官閉閹方一日。忽見天上來浮棺。浮棺誰。舊令尹。急溜失風船。沒板。一女數奴魂不返。漆棺浮處沉四屍。棺頂乃復憑嬰兒。漕船義義下水來。大聲呼閹閹不開。閹不開。衆皆詈。閹官倉皇掉其臂。三百閹夫聲若沸。曳棺出水兒亦蘇。魚腹奪出雙亡奴。漕船不前漕卒怒。拍手大言官得賂。官寧受取得賂名。爲德不卒非人情。奴行烘衣兒進粥。更爲羣棺賃雙屋。周巡一日至數回。越六十日喪方歸。君不見。何閹官。救人出死力。送喪淚尙垂棺側。竟與棺中不相識。

濟源謁濟瀆廟作並寄錢州倅姑西安

我昔尋淮源。騎馬至大復。濟源今始訪。尙未及王屋。馬頭星落日未光。天半忽然落太行。山形西上水東下。中有百里雲之鄉。雲鄉萬畝收常最。水鳥鷺絲時作對。開門飲水性不浮。頭上白雲還可戴。尋源入廟得數潭。酌以木杓殊清甘。坐思地脉出靈異。更有一源穿寺南。延慶寺。四南有藻萍。靜覺微風起。那識泉流及千里。不是天青落眼前。都疑赤日行潭底。殿頭斜交松柏風。碑頂錯落填青紅。九州三瀆得配食。北海一神成寓公。廟後祀北海神。水光沉沉走靈氣。飲水況兼知水味。點波縱乏魚眼紅。入饌復添萍葉細。土人以萍葉作羹。雛童道我行不休。出廟遠看珍珠流。土人指點復非一。我臥欲向山南遊。斜行卅里無平地。石觸馬蹄如斧利。車箱側坐作一篇。聊當西尋濟源記。我有故人官故京。萬言能辨濟爲滎。州倅以爾雅濟爲澁。爲滎字之甚辨。何時並馬入河澌。應訝蔡河原號楚。

延慶寺

向西行一里。側耳水潺湲。古寺埋荒草。春風被北原。上樓迎雁過。遠樹避禽喧。欲抑飛揚性。時時酌水源。

盤谷寺

日斜來谷口。新月正東升。石壁餘千仞。空山祇一僧。品泉殘雪淨。當竈白雲蒸。照我歸途好。寥寥塔上燈。

盤谷寺東山墅題壁



我來百級盤空砌。一樹臘花香蓋地。寺中臘梅一株。花朶積地寸許。香尙郁烈。出門正值過嶺風。半里疎疎挹香氣。此山泉水不出山。曲折偶落幽人關。泉流落處閣飛起。更向天半支紅闌。閒心款戶還相揖。一馬一奴催去急。臨行偶展几上書。窗外白雲如鶴立。

盤谷寺道中

盤谷路屈盤。怪石都欲齧。馬行旣傷蹄。騎馬復傷膝。馬鞭苦不前。奴亦涕垂尺。當其勢倉皇。天頂作深黑。天黑未黑幸有星。松櫟百樹流空青。入山行遲出山急。馬上別山聊與揖。

宜溝行

宜溝驛中逢節使。三日馬蹄聲不止。衝途驛馬苦不多。役盡民馬兼民騾。民騎不給官家食。更要一騎增一卒。馬行三日力不支。馬病乃把民夫笞。長鬚歷後尤無忌。急選官騾訪官伎。民田要雨官要晴。一日正好兼程行。車前與夫私歎息。曾與此官居間壁。官前應試苦力疲。百錢得驢詫若飛。君不見。人生貴賤難如一。不是蹇驢偏有力。

夜過漳水橋

十里平沙兩戍樓。薄寒衣上點春愁。行人莫問銅臺事。漳水如今入海流。

自錢唐放舟至上虞卽寄唐大令仁植嵎縣

我拋西子湖。來訪山陰月。山陰道上夜不眠。明月都疑古時雪。古人何太閒。今人何太忙。四明山色笑人久。狂客一去誰能狂。山陰舊友無人到。還訪山陰昔時廟。巢梁秋燕忽翻飛。螢火遙遙出門照。山前月綠山背紅。十里燈火連青松。神籙法鼓聽不足。水面黑已搖靈風。北山雲暗誰能見。星點如萍落波面。枕中秋夢爾許長。船上月痕移一綫。我思訪友至剡溪。故人手版歸無期。曹娥江水秋轉綠。話舊還來此江曲。天台山連天姥青。舊遊十載難重經。偶然雲朵錯江上。訝落十二芙蓉屏。道旁峩峩孝女碑。當日偏遣兒童爲。閒繙榻本坐船屋。落落可笑時無才。自非賀季真。誰識李太白。我羞黃絹詞。祇憶錦袍客。詩成絲雨忽下汀。屈指明日秋當時。會須散髮飲官酒。百尺樓上眠秋聲。

湖上看雨

雨聲不著地。惟走松栢梢。山風颯然來。時時撼鴉巢。歸鴉點黑雨。點青星出復沒天冥冥。樓高百尺陰晴變。山外月明山裏電。

湖上坐月

闌干旣戀月。月亦戀闌干。十二回廊內。無人徹夜看。青天沉沉黑雲破。時見東山鬼燐火。星沉月落雨一天。闌牖更枕荷香眠。

湖上夜起

背山十里行何遲。沿湖草香人不知。草根螢火草頭露。照客歸夢三更時。紅疎綠暗誰家宅。十二曲欄眠獨客。開門無意望雲山。秋水連天月華直。

韜光精舍

山頭戴屋屋戴山。山上又復開禪關。斜行百步路深阻。飛鳥不到人應還。竹梢垂垂柏陰直。一徑夕陽紅欲沒。雲深草暗不見人。蝴蝶花開四山碧。

山陰舟中

四山圍一澗。流水不能東。青草添波綠。高雲映樹紅。挂帆零竹雨。啓帳引松風。已覺衾裯薄。寥寥秋氣通。夜坐

三更人意定。風竹自敲琴。樹樹月華直。峯峯秋氣深。海雲當戶落。齋磬隔烟沉。莫飲寒潭水。空明此夜心。中秋詞

樓上月疑尋人。穿戶南北還。當門墻頭花。疑伴客。覆屋高低復窺隙。秋棠軒北待月華。出戶小語聞呼茶。蓴絲如指藕如臂。齒冷怯進西園瓜。池臺左側闌干右。隔巷萬燈輝若晝。琅玕鎖徑不一開。坐久竹風涼逼袖。三更月暗絲雨飄。約伴溪北行三橋。走橋人多不相省。獨向橋心鑒春影。錢三維喬以桃花卷子屬題時錢新室將落成因作長句貽之

春風百萬花枝旁。桃花李花能不香。桃花紅紅李花白。誰比春風好顏色。昔人飯桃三十年。顏色姣好都疑仙。人生駐景亦虛語。聊取玉貌臨風前。披圖一人美無度。綠鬢猶留遂初賦。東邗溪北斗城南。欲種桃花閉門住。一株花開千萬株。紅蔽天。卷圖忽忽念疇昔。此景只有南山邊。牛頭寺古慈恩側。雲欲不紅何可得。君今臨水築新居。縱不栽多亦當百。春風一吹香半空。隱几如坐南山中。半城鶯燕在何處。聞氣只掠花西東。初陽入樹光凌亂。一日風光百回換。尋常客至門不開。祇許鄰童上墻看。我家亦傍溪水隈。桃無一株愁舉杯。豈徒鶯燕不相訪。蝴蝶絕少窗間來。與君街東西。屈指月三五。攜樽來遊莫相阻。我今題作桃花塢。

楊秀才岵谷漁樵問答卷子

聖不自聖何其謙。執射執御無能兼。儒羞爲儒亦何意。欲漁欲樵誰者是。方其學爲樵。不識世有淵。方其學爲漁。不識世有山。用心可一不可二。君意胡乃雙相關。我知終日樵。薪復不盈束。何以贈君。爲君歌伐木。終日漁魚。復不上竿。何以贈君。爲君詠忘筌。吾儒之道無不該。況乃二者當優爲。樵夫笑士匪無謂。漁父鼓枻何悠哉。君家家法爲儒好。天祿可讎元可草。堯夫經世吾懶觀。復恐誤爾儒爲禪。有入都者偶占五篇寄友。

孫比部星衍

自君居京華。令我懶作詩。作詩與誰觀。誰爲定妍媸。一篇偶賞心。世論不免嗤。一篇牽率成。裕賞反在斯。我雖不敢言。得失我自知。唯我與子心。膠漆難喻之。我工子開顏。我拙子不怡。非惟字句間。兼爲審篇題。前寄袁尹章。枚昨答汪叟詞。蒼霖上皆有墨瀋。由君指其疵。或時作一篇。我心如亂絲。置君于我旁。素者卽以治。別君居三年。作詩少千首。以此厚怨君。君能識之否。

邵校理晉涵

自君居京華。令我懶著書。一義偶有疑。搜篋復發廚。不然在君旁。理蘊已畢抒。問一必答三。背誦若貫珠。君疏爾雅篇。訂正五大儒。使我心上疑。一日頓掃除。君師錢少詹。大昕精識世所無。吳門及錢唐。復有王鳴盛。與盧文弨。皆言此書傳。遠勝唐義疏。盧爲校三匝。誤字一一鋤。惟嫌體清羸。力疾廣授徒。穀梁疏尙成。孟子義定乎。別君居三年。我書不盈尺。以此厚怨君。君行亦當識。

章進士學誠

自君居京華。令我懶作文。我前喜放筆。大致固不淳。君時陳六藝。爲我斧與斤。不善輒削除。善者爲我存。儀真有汪中。此事亦絕倫。藐視六合間。高論無一人。前者數百言。並致洪與孫。勗其肆才力。無徒嗜梁陳。我時感生言。一一以質君。君託左耳聾。高語亦不聞。君與汪論最不合君子文體嚴。汪于文體真。筆力或不如。識趣固各臻。別君居三年。作文無百幅。以此厚怨君。君聞當瞪目。

管民部世銘

自君居京華。令我懶詣人。詣人或有忤。時時致紛紜。誰能爲斡旋。並復正色論。我病非由他。半或飲酒醇。君齒逾十年。戒之每諄諄。畏此一尺面。嚴冷無陽春。我交有趙莊。懷玉述祖。我交有楊倫。數子亦獻規。使過不敢文。餘人非不言。言亦或不聞。言豈有不同。數子愛我真。前時傍君居。藉此得束身。備書蘭臺中。得免一世噴。別君居三年。酒失屢自懺。以此厚怨君。君行倘相念。

汪學正端光

自君居京華。令我懶入山。君雖不能遊。喜我窮躋攀。陟險慮我危。懸樹驚我頑。嘗坐白石邊。靜日待我還。復恐相背馳。時喚林壑間。每挈酒與肴。解我饑渴顏。共艇泛釣臺。同車出昭關。七十二盤嶺。三百六十灘。時登仙人峯。時上毛女壇。我狂不可遏。藉子爲捉攔。不然險上天。失足性命殘。紀遊實雄奇。君誦皆循環。別君居三年。過山亦不詣。以此厚怨君。君時當一噓。

酬崔太守龍見時攝處州守

萬里歸來攝一州。桃花嶺畔使人愁。松杉密處稀耕隴。麋鹿閒時滿郡樓。到海怪風聞尙懷。愛山狂客記

曾遊。丙申秋從王學使至此。官清何事忙偏甚。幾許新詩落案頭。

寄崔三景侃三十二韻

昨來遊西湖。兼爲訪君病。迎門一相見。坐語不能竟。欹臥六尺牀。朝曦與相映。紅窗闔兩扇。尙畏曉風勁。藥物貯枕函。醫嫌不符症。復言昨搗燈。失手不持柄。燈燼誤拂眉。癩痕額間釘。君雖顏色瘁。玉骨尙精瑩。竹扇揮不停。羅衣最娟淨。神清能照物。朗若玉爲鏡。榻畔數冊書。拋殘未裝訂。爲言是君集。偶亦取諷詠。雲箋蒙四壁。愛好實天性。翦几插白蓮。秋桃花亦倩。朱魚貯蠶楳。水淺喜游泳。憐余欲稍憩。深室早除摒。阿母喜客來。開扉急延請。齋廚戒葷殺。蔬筍搬欲罄。銀梨手中擘。綠果盤內釘。傾觴復攜楳。一一催使令。憶昨握別時。君妻尙初聘。今聞娶盈載。嬾婉並能敬。君兄持玉節。失喜早相慶。仲子昨有書。潛修怕奔競。惟君忘進取。所喜達時命。晚挈臥具來。紗廚放端正。辭君不可得。連榻話宵靜。絮語不覺長。疎疎佛樓磬。雖癯談尙劇。使我醉時醒。一夕話數年。奚奴隔窗聽。松檮移影徧。殘月復窺徑。明發倘別君。重來尙難定。九月念一日自府東街醉歸由迎春橋取空關處玩月歸舍喜而有作

我從缺月看至圓。復自月圓看至缺。其間何夕最賞心。初八十三今廿一月。當八日剛上弦。日午已挂城

樓邊。私心催送夕陽去。好透清影來窗前。十三此夜清輝好。遠挈幽人踏衰草。是日借錢竹初莊延叔飲。趙味辛宅酒後卽借味辛。

兄弟自雲溪步月。東折至葛仙橋始歸。趙家樓上千盞清。縣尉衙前百燈皎。今宵無意復出遊。坐客失喜相攀留。是夕值州守余存謙。

招客因拉入坐次。主人初歸萬餘里。塵面未洗邀朋儔。歸途正值如圭月。照我城東堞樓隙。沿溪寂寂摠閉門。剩

得清涼沁肌骨。我生愛月歷八州。月色無異殊歡憂。中間多病復沉醉。誰肯徹夜懸簾鈎。少年二八還三

七。得月不眠眠若失。古巷迢迢走欲窮。高樓漸漸看將徹。出門漸遠月漸親。千里對月如鄉人。幾回愁苦向之說。高興引亦同清樽。海門浩渺江流羨。看月出波還沒浪。萬斛清光一葉舟。誰言我不居天上。蓮花峯東玉女盆。五十六無黃昏。齋心曾向石壇坐。百怪看月來松門。嵩高夜色尤無匹。霜一層蒙尺深雪。嶽山明月向南來。三樣寒光一時結。東西南北遊萬場。祇恨不上天中央。我疑青天月色不及此。有若鏡面皎潔鏡背無輝光。看殘月慘新月歡。百歲月止千回圓。尙嫌平地住時久。起處落落處不得一一窮其端。我詩被酒尤清快。說月還愁衆星怪。夜深說月更有神。引得一番兒女拜。

爲史秀才次星賦焦尾硯

爾。硯才係端溪石。閩江舟人以支茶竈。史君客閩時。出錢三百易之。其半尙焦。後琢爲硯。因名曰焦尾云。

昔有焦尾琴。今有焦尾硯。山中木石豈有知。不遇才人不能辨。琴來鑿下五尺長。此亦日久支茶鑄。磨之三日故紋出。洗以海水逾清光。端溪僞質今無限。此石故應稱舊產。有時攜向沸水旁。蟹眼尙侵鴟鵂眼。史君才大不可量。攜硯歷涉天南方。興來草辨漢赤壁。否亦或賦秦阿房。草堂他日吾當識。匣以紫檀時拂拭。人生皆作如是觀。爛額焦頭稱上客。

偶成



情懷苦被繭絲纏。時醉時眠亦偶然。誰向西窗喚人醒。一房春夢碎難圓。

# 卷施閣詩卷第九

西苑祝釐集庚戌辛亥

## 萬壽樂歌三十六章并序

臣謹按唐臣元結有補樂歌十章。白居易有新樂府五十篇。類皆言簡意深。可以播于樂章歌曲。臣嘗慕之。伏見我皇上御極五十五年。仁如天。宏如地。舉凡廣聖極神。謨文定武。類非形容所克盡致。今者恭值八旬萬壽慶節。臣幸得擢巍科。備員詞館。自正月一日。恭讀恩詔以後。親見皇上敬天法祖。勤民察吏。諸大政足以度越百王。而垂則萬世者。已不下數十事。輒不自量。謹依類撰次。爲萬壽樂歌三十六章。非敢繼元白之逸塵。亦庶乎衢謠壤詠。得附本朝樂章之末云爾。

### 元日詔第一

上章之年月初建。旭日初升。太和殿。詔宣宗伯上玉墀。二十二條宣讀遍。九門以外齊歡呼。一日數驛馳郵夫。殊恩豈獨神州內。普錫還教外藩逮。遐哉上古迄漢唐。三千年來無此祥。皇皇天語真堪述。每遇庚年輒逢吉。

### 讀實錄第二

作者聖。述者聖。天命元年逮雍正。我朝開國值泰交。百八十載如一朝。夜向晨。讀實錄。玉檢金函日三復。人言帝治超軒鴻。嵩師三祖及二宗。

巴勒部第三

巴勒一部。遠在西徼。酪食漿飲。同時獻表。云敬大皇帝。如敬佛三寶。珠瑟瑟。衣班班。道畢拉。兼烏闌。哈哩。薩野先稽類。巴拉八都還合掌。

坎扒窪經第四

樹頭樓高五六丈。其實纍纍花可釀。葉名貝葉取寫書。一葉百字如聯珠。梵經不到西南部。以意作經遂。四布。國基既兆立普哇。傳經亦名坎扒窪。坎扒窪經有義。不歸佛法不歸僧。只願歸依大皇帝。

貢子象第五南學所貢

貢子象。貢子象。人面刺花。人性獷。遠邦百載名老搗。左佩右佩皆雕瓜。別乘數象來中華。不嘉遠物嘉誠效。特敕象房增俸料。

春燈詞第六

昆明湖水連天碧。萬盞燈輝一天月。臨湖亭上看春燈。魚龍曼衍從東升。春燈詞接春帖子。遠自乾隆丙寅始。辛壬以後皆八篇。卻與卦象同綿延。生生不已真堪卜。今歲自隨還至復。年年歲歲游豫同。誰識義

蘊陰陽通宸篇下計歸政日。卻合伏羲全部易。

普免租第七

免錢糧。免漕糧。四次兩次看膳黃。今年詔下恩尤厚。普免正供由萬壽。三分減一十減三。前史盛事何庸談。大農錢粟雖頻散。耕九餘三積儲慣。戶部銀仍八千萬。

殿勤政第八

夜未央。乾清宮中燭煌煌。日將出。勤政殿前傳警蹕。機庭綸閣三兩賢。日或一再瞻天顏。萬幾當書皆周徧。七品宰官多引見。法官御苑名總同行。在亦復懸堂中。江寧行宮有勤政堂讀書若以今方古。隻日視朝何足數。

續石鼓第九

太學中。周石鼓。二千年來石文古。若將一字比一篇。卻合關雎及殷武。石鼓舊存僅三百十字親加排比較短長。重刻十石陳堂皇。舊者藏殘珍珠琅。流傳至久還堪數。周宣中與製石鼓。乾隆萬壽年春補。

八徵璽第十

古稀天子古已稀。復越十載符貞期。重華宮中製聯句。既壽永昌猶泛語。嘉名肇錫得未曾。璽章特與鐫八徵。石經若舉殷宗例。享國百年重製璽。

五福堂第十一

萬年天子兮。萬年觴。五代元孫兮。五福堂。儒臣歷檢明宋唐。得者六輩錢吳張。士夫獲此慶已長。帝籙從未膺斯祥。膺斯祥。由慶洽。十一世還徵玉牒。

釐四部第十二

四部書。帙萬萬。提要一百卷。臣昫臣熊奉敕撰。全書告竣已十年。有敕亥魯須重編。本朝實事皆求是。不遺傳疑留一字。文淵畢。釐文源。百臣日夕來御園。東南三分皆無誤。海上然藜校文溯。

御製集第十三

御製詩。御製文。近自己酉溯丙辰。文一千。詩五萬。五十五年成百卷。九經廿史義蘊宣。四岳五瀆搜根源。遠紹二典三謨傳。巍巍卷軸如山立。豈特帝王難冀及。十倍漢唐文士集。

五國朝第十四

東西南北車書極。朝正國王三十一。三十一國分年來。春秋冬夏邸第開。普天同慶當斯日。五國遙遙適相值。神雞五色魚八捐。貢及犀兕兼獐獠。史臣若舉春秋筆。五國來朝王正月。

開經筵第十五

讀洪範。讀召誥。五三六經開祕奧。萬幾之暇日一編。春仲敬復開經筵。經筵樂奏何囉囉。抑詩還取衛武公。昔賢今聖皆先覺。九十耄期還好學。

親釋奠第十六

臨雍歌。幸學詩。八十天子猶尊師。崇賢坊。大成殿。二月上丁來釋奠。春渠如鑑波溶溶。前年天子臨辟雍。太平盛事皆稽古。鄉飲酒歌詩樂譜。

朝日壇第十七

朱旗絳扇來城東。至尊親詣朝日宮。黃軒紫幄光如燭。至尊親詣齋宮宿。太平五色雲擁輪。迎日正見雙黃人。雙黃人。捧日起朝日。禮成天下喜。

登岱宗第十八

會稽南。恆岳北。西及五臺中。太室。天旋向左帝邁東。卅年六徧巡岱宗。吾皇卓識超秦漢。但禮天中不封禪。天門日觀瑞色開。八旬天子騎驪來。

謁闕里第十九

猗昭維則。聖人在昔。衆善若林。六經乃宅。猗皇是欽。聖人在今。宗謨既纂。祖訓是尋。青旗央央。越歲來謁。前聖後聖。其揆則一。歲則庚戌。月維庚辰。山左三大。禮祀畢臻。

百歲民第二十

廣督摺。直督摺。百歲耆民比肩立。滇撫章。皖撫章。民間五世共一堂。太和翔洽超前代。不產麟。皇產人瑞。

朱提文綺出上方。幾餘染翰錫一章。耆年壽婦布魯特。絕域貢珍由感德。

萬壽科第二十一

萬壽節。萬壽科。九十八十來婆婆。春官一百二進士。外一百人年已至。詔出東華盡宣賜。膠庠抑阨五十年。閔苑盡許稱神仙。白髮亦戴花盈顛。升平盛事誰能及。兩宴南宮值庚戌。大學士臣璜謝摺。

勸察吏第二十二

盜不讞。責總督。清苑縣官愆莫贖。吏蠹民責撫臣。高郵州牧罪較真。皇躬一日周萬幾。外省案牘何從稽。詔書直下諸大吏。當戒江南與直隸。

清字藏經第二十三

西華門中關經館。大小乘經堆欲滿。法門先寫百二章。排比兩晉兼三唐。國書結體尤嚴重。舉筆如龍復如鳳。經成一藏功萬千。佛力祚皇萬萬年。

黑龍潭第二十四

三月麥。四月秧。不雨麥瘁秧將黃。行宮宵旰無時釋。先詣黑龍潭外歇。排空萬朵雲垂垂。真龍不禱雨不來。

三大祀第二十五

三大祀歲必親。五十一月象輦陳。南天壇北大內。百尺燈竿與相對。壇內宮中合虔拜。耆民夾道成風謠。五十五徧躬南郊。

山莊夏第二十六

灤河之北臨邊牆。每年避暑來山莊。雲山四面奎文署。云是山莊最高處。澄然四海集一心。日日亭上占晴陰。殿前引見員嘗滿。吏部帶來分月選。更撥幾餘念柔遠。山莊但識無炎歎。日昃可念宸衷勞。

經壇設第二十七

九門中官吏車。一日百輩來徐徐。殊方絕域摩肩入。在籍諸臣亦羣集。分曹百輩爲一班。盡檢大寺開經壇。湖山郁作梅檀味。初日輝輝照初地。青梯樓閣須暫開。無量壽佛拈香來。

盛典增第二十八

萬壽盛典凡六門。聖德聖文兼聖恩。萬方集慶儀文重。其次繪圖同獻頌。巍巍蕩蕩難具書。特徵二事右所無。八徵五代奇祥起。塞外關疆三萬里。

夕月壇第二十九

朝禮日來東郊。暮禮月來西郊。鸞輿親向齋宮出。萬壽節過才一日。規壇不獨祀夜明。二十八宿兼經星。不見唐貞觀。樂五闋。隋開皇。坎三尺。豈如吾皇大祀躬。致虔禮成光景生。中天千秋金鑑懸當前。



安南來第三十

安南來。安南來。國統雖舊基新開。廣南大吏爲陳奏。親詣天朝祝天壽。路人指點盡識名。安南國王阮光平。海邦自此知冠履。好變文身與椎髻。阮光平奏請從本朝章服特旨俞允。

前殿宴第三十一

太和門中頻列讌。日日平明御前殿。七旬宴後復八旬。下逮屬國兼陪臣。年九十階一品。特賜金尊殿前飲。千人統計歲萬千。稽首合作今年。就中受恩誰最樂。國子監臣郭鍾岳。

祝嘏樂第三十二

祝嘏樂。樂一部。歌者歌。舞者舞。敲銀瓶。擊銅鼓。萬里遙遙來祝嘏。太常樂奏列四蕃。不數貞觀兼開元。蕃王親向階前祝。更獻十章名法曲。法曲十可歌亦可謠。一章一章名特標。謁金門。賀聖朝。阮光平進萬壽詞凡十章。

昇平寶筏第三十三

三層樓。百盤砌。上千青雲下無際。上有立部伎。坐部伎。其下回皇陳百戲。蟠天際地不足名。特賜大樂名昇平。考聲動復關民事。不特壽人兼濟世。萬方一日登春臺。快看寶筏從天來。

王會圖第三十四

東西廿里如繩直。夾道樓臺成頃刻。千層覆屋百尺臺。大舸載自東南來。回廊曲檻天然合。空處屏櫺自

開闔方壺圓嶠咫尺間。海上頓訝移三山。拈毫若準唐貞觀。王會圖應添百卷。

普天慶第三十五

日庚申。圓明園中法駕陳。日甲子。乾清宮中鹵簿起。宮中御苑石作塗。萬叟夾道還嵩呼。如山燈火連湖曲。想見太平調玉燭。

萬壽節第三十六

萬壽節。日以十三時。八月月瑄日。徽皆叶律。我皇御極當丙辰。越若稽古堯期臻。五五數復箕書陳。無疆若展大衍策。萬有一千還五百。

馮少卿應榴夢蘇草堂卷子時馮作蘇詩合注

少卿室冷無纖塵。穎濱翩然來叩門。履聲皇皇響空谷。欲前不前猶躑躅。褰簾一笑霜滿空。迎門次公立。長公長身高冠貌。奇古七百年來覲詩祖。邀公不入亦可思。一屋光燄皆公詩。夢中自謂得所師。敬告欲續施元之。公雖不言心已可。來處仙雲落如朶。我眉山月清可憐。半夕移挂高齋前。來時不迎去何送。我謂非真亦非夢。醒來急詣南頭翁。謂翁閣學方綱證以畫象將毋同。君不見少卿詩名滿人海。夢裏師公醒如在。因君我亦念瓣香。太白樓前一江水。

自蒙陰縣界早發從車上望泰山半日始抵山麓又步行半日憇高老橋日已曛黑乃尋路而返

夙昔好大言。岱宗視秋毫。茲來距百里。意念肅不驕。靈風吹車帷。總向西北飄。日上戴一山。半白雪未消。平明開東峯。忽與天爭高。向背卅里間。鉅細無不包。聖人坐明堂。若受萬國朝。半日走未休。才能憇巖腰。絕頂豁一門。注視久亦勞。誰云千丈松。貼若徑寸苗。海氣漬石厓。天聲走林梢。來乘西月光。去揭北斗杓。小酌白石泉。吾行過飛橋。

臚傳日馬上口占寄畢尙書師湖北

五年爲客曲江頭。屢向慈恩寺裏遊。曾解綠衫陪廣讌。愛拈紅杏上高樓。看花未必輸前度。擢第偏教遜一籌。好邀公門舊衣鉢。至今慙愧說袁州。

昨年里中有入都者。偶占五篇寄友海內。交舊見之共詫。以爲洪體今適一年。余留官京師。里中知好復往來。不能去懷。適汪甥楷以定省南歸。爰更賦五篇寄諸同人。末章并以示弟原吉及兒子飴孫。見者幸勿復以爲創體也。

盧學士文昭

里中誰最憶。我憶抱經堂。抱經翁七十。讀易猶琅琅。餘經貯案頭。日漬丹與黃。盤盤經師居。庭草一尺長。問字數百人。誰來上堂皇。匪徒文體乖。書仍誤偏旁。俗學銅性靈。反厭師說詳。一月偶一來。惟應伺餼糧。就中領悟誰。庶有顧明與臧。歸時顧生嗜說文。臧生勤爾雅。百里澄江中。誰如二人者。

錢大令維喬

里中誰最憶。我憶竹初居。前年養病歸。買地十畝餘。四邊何周遭。桃梅竹棕欄。規高欲巢禽。掘地乃種魚。魚鳥既獲安。餘力營吾廬。一室開八牕。風日來徐徐。主人欲登樓。花氣爲縈紆。主人欲出門。芳草攔衣裾。北巷呂秀才。景尙南頭畢居士。鴻。偶有剝啄聲。經旬一來此。

趙舍人懷王

里中誰最憶。我憶味辛齋。味辛齋中居。風日多好懷。五日一出遊。經旬宴朋儕。我居與若居。僅隔南北街。花時與月時。出入必與偕。君尤善清談。觸緒理不乖。差苦持論莊。時爲雜談諧。同志六七人。均能外形骸。無日無客來。闔敝不必排。不來亦有時。或值體不佳。盛懃大吳堂。近南歸莊。寶書蔣齊燾。復遠宦。預苦離別多。臨觴定三歎。

蔣上舍馨

里中誰最憶。我憶杏花樓。杏花旣已枯。種杏人在不。雖無一株花。花下石尙留。雖無種花人。畫象懸樓頭。昔爲大母居。謂外王母。魏太孺人。今屬孫曾遊。孫曾昨問訊。敬我齒已優。童年看花詩。黏壁尙四周。種杏曾幾時。一讀一淚流。檢點樓下人。半又客遠州。阿三庶雁行。阿二延耀。尙兄事。何時續栽花。吾當日三至。

弟原吉兒子飴孫

里中誰最憶。我憶卷施谷。拔心不死人。時來谷中宿。谷中有羣書。谷中有嘉木。主人出門去。書好無人讀。花紅上斗拱。草綠出垣腹。賴有主人兒。時來理書籬。稍移礙簾燕。時剪出墻竹。昨宵家問至。北上期亦卜。愁無束裝具。典卻里中屋。一書寄令弟。一書示飴孫。此谷不入券。爲吾鎖重門。

自題城東訪月圖

余家清暉橋。距城東門不三十步。出城古寺五六。排比而立。寺後爲晉陵縣故址。廣場數百畝。幽人三兩家。余每晚食後。必一詣其處。半里之內。鳥之有巢。花之有名者。莫不與余相識。卽風雨夕不能至。夢亦詣焉。庚戌獻歲將北行。友人錢明府竹初。畢上舍蕉鹿。爲合作城東訪月圖。遂係以詩云爾。

月初三。至初九。一日一回城外走。十三以後人不閒。人靜月好更先闌。徹夜不遣城門關。月過二十看星出。乘殘月歸更欲絕。人言我愛月如癡。不識城東月尤潔。城東有白塢。城東有紅橋。橋痕下欲枕蘋藻。塢影上直干雲霄。迎春堂北東西路。一草一花都識數。匝月能來二十回。繞堤何止三千步。三松一客靜淹留。復有危巢結四周。好寄吟魂與烏鵲。夜深隨月上城頭。

張進士若采梅屋讀書圖

築室高丈餘。鑿檻深尺一。我愛一屋中。書外無長物。無心種桃李。無心種桑麻。我愛一屋旁。梅外無餘花。書牕只向梅邊拓。果熟好從書上落。長身如玉忽然來。不是主人疑是鶴。

送莊通判忻至漢陰新任

太乙從西來。終南向東轉。我前甚羨君。十宰山水縣。

君歷宰郿縣。宜居蓋屋。富平。長安。咸寧。渭南。朝邑。諸縣。今擢判漢陰。

高觀潭上銘。牛頭

寺中詩。君前亦羨我。五醉桃李時。花枝歷亂山南路。紅欲上天雲轉妬。君從山縣偶然來。一路尋花入韋

杜。黃河西岸渭水隈。我頃亦復騎驢來。

君官郿及蓋屋朝邑。時余皆曾至其署中。

君家令子亦好友。十日留飲三千杯。仙遊壇

北風飄瓦。君坐藍輿我騎馬。意外孫郎手重把。慈恩塔下日炙軒。君摹石刻我上巔。拍手尙有婁江錢。

謂獻之。尙書賓從居然異。醉裏後先升上第。萬條紅燭百篇詩。贏得人傳杜書記。識君已卅載。別君又五年。

重陽風日正晴好。相與共話金臺邊。治中別駕今何有。五十才名作通守。鄂杜山田買不成。全家更進褒

斜口。離筵重傍菊花開。適有尙書信使回。畢竟梁園賓客好。如今視草用鄒枚。

吳布衣蓬癡寄示紙仿秦漢瓦當爲題二絕

陶泥作瓦形難古。

近西安陶者能燒漢瓦。當與真者無二。

爛紙爲泥法轉良。總是劫灰燒不盡。有人閒裏仿阿房。

應共錢獻之。程彝齋作雅遊。青門西去曲江頭。蠻牋十樣如分寄。君定能成五鳳樓。

送李同年賡芸赴任浙江

上章闈茂歲。科舉由萬壽。我方登岱宗。三月乃北首。遊山筆殊健。得逐衆賢後。同舉一百人。于君契尤厚。

君才富詞藻。早復窮篆籀。闈中萬言策。兩策蒙進奏。春官遲錫讎。新例試當覆。光明殿東西。賢良門左右。

聖人親試士。如漢策孝秀。衆中君最捷。一卷成正畫。引見來御園。麻衣改紳綬。人才較清拔。竟以民社授。

官由楚改越。

以親老改近。

母老欲遷就。十月始出都。風號雪花驟。同袍凡八輩。執酒道旁候。疲馬出北門。依然

學寒瘦。阿翁循吏傳。

君尊人亦以進士宰江西有惠政。

車上可尋究。努力報最先。無徒事琛賾。輜軒倘重到。舊侶可全觀。

郎官改祕閣。此例亦有舊。二十有七人。

今歲蒙恩入館者共二十七人。待子成列宿。

王大令復自汴中來。邀同人小集。惜陰秉燭。山房羅布衣。聘作圖紀事。是日并送儲明經潤書南歸分韻

得租字。

有客歸何急。疑收陽羨租。似君來正好。還挈朗陵廚。官滿趨金闕。春濃買玉壺。朝衣吾幸典。衫笠入斯圖。

十五夜對月。獨坐有懷。里中舊遊。

獨酌一樽酒。含情上小樓。故人難會面。明月卻當頭。隻影長廊入。清輝滿鏡收。誰云天上好。今夜不勝愁。

送萬大令應馨之官廣東

謫仙樓頭乍相揖。君年三十我二十。

初識君在朱竹君先生節署下。所云高顧張黃皆署中客也。

平山堂外飄長裾。君年四十我有鬚。

廿年歲月真如駛。高東井。顧文子。張方海。黃此中。死。卽今海內論心交。汪子劍潭。憔悴孫郎淵如。豪馬蹄

亂踏長安市。前後與君成進士。若論位置殊可商。君爲外吏我漫郎。一官遙遙六千里。三月仍難具行李。

僮餓馬瘦住不安。我轉質衣謀爾餐。孫郎汪子交終厚。日揭破車門外走。窮冬行色略已成。此時送君須

出城崇文門前別不足。更借宣南坊裏宿。故人有子稱能文。謂仲昨歲主我今依君。君不見。貧交生死原非偶。此子年來況無母。君先令讀等身書。我爲故人兒娶婦。

錢同年福胙乞假南回書此送別

君歸我何憶。我憶西湖水。飲水亦已香。水中菱更美。湖中誰最憶。我憶裏湖魚。小繫雙篷艇。時來五柳居。湖頭誰最憶。我憶山陰酒。一葉載百罇。千錢沽十斗。湖邊誰最憶。我憶上山茶。煎向深甌內。如開數朶花。預想君歸時。食單先出宅。烹魚水要鮮。醒酒茶先摘。此時卻憶金臺人。無米飽飯天街塵。人生快意當有日。君倘能來我應出。

崔公子景僂竹樓圖

竹綠參天筍亦抽。偶然竹裏有高樓。不知樓上人何處。我欲打窗尋不休。

三尺寒檠七尺牀。阿三曾共捉迷藏。謂令兒景侃落來畫裏還相識。爲我窗西補夕陽。

袁安臥雪圖爲王太守嵩高作

屋頭無炊烟。門外一丈雪。此時屋中人。已恐不能活。永平及永元。三世弼天子。此時屋中人。如何避能。閉門一臥歷一時。門外雪深殊不知。洛陽縣令來何巧。從事汝南饑欲倒。門外雪花飛入竈。從茲舉足一出門。衣被四海皆陽春。眼前高臥匪無意。預想俗敝當還醇。君不見。丈夫一世歸懷抱。有事日多無事少。



卽論無事亦須眠。那得閒心訪安道。

三月廿五日小病初愈至法源寺看花適得崔三景侃書卻寄

剩得韶光有幾時。病餘端不負花枝。商量欲把春衫典。又值微寒颺雨絲。  
幾日人閒蝶卻忙。引人花底款遊廊。傷春正憶昨年事。迎面一枝紅海棠。  
冥蒙花外語呢喃。燕子真同佛一龕。千尺綠陰吹不斷。粉紅牆北是江南。  
鶯鶯燕燕可憐春。乍款花枝乍款人。無數亂紅飛上柳。更疑楊柳是花身。  
一春心事費商量。欲趁春陰夢幾場。花上曉星花底露。分明著眼看年光。  
春盡傷心抵歲除。江南別後意何如。丁香花底慳騰醉。卻展崔三二月書。  
五月初三日偶成

蜀葵如錦粲籬根。檐雨初添屋漏痕。新月乍來簾正捲。槐花落盡不開門。

五日憶白雲溪競渡作示兒輩兼寄錢三趙大里中

黍裏菰蒲酒泛芸。薄醺閒話小兒羣。江鄉四月饒新雨。樓閣三時盡白雲。  
溪果作紅偏礙帽。岸波搖綠欲煎裙。誰憐天上清如水。手擘桃符遠憶君。

送丁二履端南歸

白雲溪水向東流。我住南頭爾北頭。小市酒帘頻夜飲。斷橋蠟屐共春遊。場來天上愁無盡。卻惹人前罵不休。屈作宰官原可惜。時擬借崔曼亭太守至荊州以教習期滿以知縣用而止也應差勝客荊州。

法學士式善招飲詩龕并至西直門看荷花卽席賦贈一首

翰林近日詩名盛。遠有詩龕近詩境。翁閣學方綱額其齋曰詩境詩龕主人尤嗜詩。退直閉戶吟多時。

龍樓鳳閣森前後。尺五天邊住偏久。五經山色落墻頭。時有閒雲墮高柳。開門十頃荷花潭。邀我早日同

幽探。啓明星落已催駕。我本蓄意來詩龕。馬前遙遙兩紅燭。十里路中晨睡足。詩龕已到不索詩。舊讀主

人詩已熟。東頭詞宗百菊溪。百侍御宗伯宅復連街西。鐵侍三人分日操選政。時有滿洲四朝詩選一室墨雨揮淋漓。

以詩存史誰能及。佚事多年苦搜輯。遺山已矣傅習亡。北斗以南惟此集。清談已竟還傳餐。飽食散步來

河干。城門正對御河口。萬柄荷葉風聲搏。官衙南北車如織。騎馬欲歸歸未得。青槐影裏晝初長。我亦玉

堂將入直。

七月初四日遊極樂寺看荷花分韻得看字

出西直門三里而近。有極樂寺焉。長河蔭前。高阜倚後。其東有國花堂。西有勺亭。皆城外之幽構也。梧

門學士以偶日下直。徧招同人。飯于詩龕。接軫以往。車行者三里。舍車而徒。復二里。甫抵寺門。綠陰當

空。赤日亭午。池荷東西。曾不百步。間以傑閣繞之。回廊水氣升岸。結爲輕綃。林香入波。漾此晴采。于是

或暝坐巖側。或孤行竹中。或擘箋庭隅。或讀畫塢側。堂高于垣者一尋。門低于砌者百級。重寮洞開。直視十里。負載而來者。望之如鷗。乘軒而過者。擬之以艇。坡塘高低。岡阜回互。香氣拉雜。雲光降升。促織繞砌。聲如碎琴。風蟬過枝。韻疑零鐸。遊藤綿延。上樹皆紫。細草芬郁。扞花必黃。乃蔽炎牖。爰開北窗。松露尙零。柏風成陣。家京國者。離然有雲表之慕。宅南中者。又恍然有江鄉之思焉。林陰屢移。羽觴乍接。果則紅暈徑寸。與藏冰而共升。瓜則生黃滿盤。汲井華而并薦。陶令之榼。無說不攜。韋公之薤。適心而飲。相與商確。今古縱談。雅俗據石。命句臨流。作圖幽襟。旣抒勝賞。斯愜。又破曙而遊。薄暝始返。星河滿空。影乍曳乎籠燭。雷雨在後。勢忽掣于軒帷。此又晴晦出于一時。涼燠交于俄頃者焉。同遊者爲許封君兆桂、張運判道渥、李刑部鑾宣、何工部道生、吳明經方南、及梧門學士與余凡七人。運判旣爲之圖。余因序其顛末云。時辛亥年七月初四日也。

長河萬柄紅荷花。匝月不來開已半。花枝似嫌河水窄。幾葉亭亭欲升岸。初陽入浦看難定。十里雲光自淩亂。寺門南下景最幽。可惜年時水波斷。田田葉瘦花枝悴。我欲重煩桔槔灌。新秋天意亦可知。雷雨急將新水換。別來花不忘前約。一朵迎人出橋畔。東西燕剪掠不停。惹得盤珠落無算。鶯黃鷺白來成陣。一見花如欲喚。花香深處朱樓好。檢點新涼放詩案。明朝無用騎馬來。畫取花枝卷中看。

送趙大令希璜之官夏邑卽題其三十二峯詩集後

昨來卸輕裝。今復馳急騎。牛腰詩卷行必偕。復恐人呼作塵吏。趙生三十詩名早。脫手羣公已傾倒。黃生謂仲租屋與對門。五夜疊誇詩句好。爾來十載官長安。君行入關我出關。終南太華昔皆歷。所恨背我遊梁山。搜奇剔勝狂如馬。好古如君亦應寡。摩天欲覓秦昭箭。掘地能尋漢宮瓦。山南山北行不休。官好到處容勾留。幾年頗喜善摘伏。一事可慙同摸邱。盤盤法物歸樽俎。奇字入詩詩愈古。我披三日手不停。可惜良朋已黃土。指仲歷官差喜名區多。昔傍陸海今黃河。譙城北去黍邱右。不日佇聽疲民歌。河流日夜奔馳速。此土年來亦非沃。故人一語欲規君。好破夜陰披案牘。

跋鐵宗伯保容臺詩卷後

梧門學士交何遲。乍見示我容臺詩。

宗伯屬梧門學士。轉示亮吉。

容臺詩名高北斗。三百二篇如一首。誰言官貴詩難

王。此卷半出雲霄中。西清南苑日趨侍。日月澗漾天花紅。橫山北上灤陽道。眼底萬峯青不了。直廬夜半

忽朗噎。拔地倚天長句好。琅邪參政

劉命書埔嘉禾翁錢侍

詩名海內歸秩宗。先生健筆復軒舉。要與冀北開

宗風。萬條紅燭聯官騎。正好同官有難弟。閣學玉保玉河斜月午門鐘。馬上百篇成復易。我前讀公詩。今復隨

公遊。殿頭作賦公最賞。可許執筆從螭頭。君不見。丈夫事業垂區夏。豈僅曹劉與方駕。他時一品集編成。

我欲作文同鄭亞。

法學士式善山寺說詩圖

茅屋十數間。青松百餘樹。昔爲說法場。今作談詩處。說法祇了生死緣。不若說詩能使死者不朽。生者傳。倘同天釋較功德。一瞬萬古殊相懸。梧門學士才名勁。說法亦同僧入定。席前傾耳凡幾人。木佛都疑座旁聽。談深不知寺在山。高論往往通天關。指揮若假鐵如意。花雨欲落茅檐間。詩龕左右詩如海。時選近人詩

送周同知世紹回西安

詩名官蹟廿年中。雅興高三十五同。君行二十五年故云雙節正堪膺上佐。百篇曾共賦東風。同官一輩憐亭長。錢獻

之自號閱音亭長時宜況甚苦困爾連旬夢石公。君與張舍人石公交最厚欲別更邀通夕飲。城頭殘月已如弓。

贈陳方伯淮

十年兩度謁行旌。叩閣皆逢失喜迎。殘雪尊罍滋水驛。經秋風月武昌城。詩名早見題襟集。世澤欣承曳履聲。倘許從容話鄉里。鵝籠我本舊書生。

偶成

白露甫三日。闌干著意涼。偶然飛雨至。花亦點頭忙。

雨中答法學士見懷之作

重門三日雨。百鳥響俱寂。秋館渺無人。青苔夢行客。閑房夜難寐。矯首望城北。昏霧接半天。連林色如墨。

遙憐通德里。定閉草元宅。瓦燈紅一盞。砌草荒三尺。應有苦吟人。披牕檐漏滴。

卷施閣小集

秋樹脫一葉。素心來幾人。將以履齒頰。補此閒庭春。閒亭立多時。一客入門喜。胡蝶亦翩翩。飛來客懷裏。斜陽條西頰。新月已在東。同心六七人。團坐秋陰中。秋陰何離離。一榼傾未了。幸有石上藤。先扶醉人倒。屋南青梧桐。屋北雙株槐。諸君欲言歸。正好月滿街。

十三日張運判道渥招同人小集分韻得露字

長安路。花無邊。酒無數。醉中陶陶十年住。酒客家家識門戶。西風幾徧吹。酒人去何處。今朝花下飲。忽復思前度。主人愛客黃金富。何不先將酒人鑄。長安路。人生行樂須及時。君不見。屋角殘星草頭露。

中秋日無月獨飲

中秋月。一年無。一年有。有月卽出門。無時滯盃酒。離離雞冠花。短短鴨脚草。秋紅旣傷心。秋綠如何好。秋雲吹黑入酒尊。長安比來無酒朋。坊南深冷一間屋。判與無月還無人。闌干影外初停雨。舞罷筵前小兒女。我有心情梁燕知。三更尙作將離語。

十六夜有月

幽人喜新晴。屋角看星影。巡廊才數武。圓月出西嶺。白雲東西飛不停。七里壇樹秋烟平。危樓驚起白蝙蝠。

蝠似曳正練空中行。天橋南北千家宅。萬瓦參差月光濕。柳絲如沐草垂珠。添得碧苔無限色。微風吹空  
月流波。山翠落向城隅多。清輝入掌覺微膩。衣上似復傾銀河。歸來敞南軒。傾此一榼酒。三更靜後無一  
人。卻喜戴頭惟北斗。北斗未落客不眠。一榼酒盡愁無錢。光明如此不須燭。卻把道書梯上讀。

# 卷施閣詩卷第十

祕閣研經集辛亥

南樓憶舊詩四十首并序

夫鳥以高爲巢。魚以深爲穴。居魚鳥之中者人。築基九層而上爲之樓。則與鳥爭高矣。濬池十仞而中爲之島。則與魚競深矣。然鳥啁啾而爲巢。使無矰繳之患。則終歲猶是也。魚屏營而爲穴。使非芳餌之誤。則畢世無易也。人則不然。飛狐落雁之嶺。八埏之險也。鳥所不能飛者。人或上之矣。奔霆浴日之區。九州之浸也。魚所不能歷者。人或過之矣。則夫陟險不已。將迷東西。揚帆倏來。杳無津涘。當此者。其亦有故巢之戀。在沼之思乎。南樓者。外王母壘。太孺人所居也。余以孤童。幼蒙鍾愛。年未毀齒。從母移居。姊越十齡。弟才匝歲。魯國男子。方驚毀巢。漢陽孤生。未歌窮鳥。由春徂冬。衣無單複之製。以夜繼日。瓶無逮晨之糧。煢煢焉。踽踽焉。蓋十五年于此焉。若夫雨龍竹馬。瓦狗泥車。探春燕子。棟頭捉秋蟲。于徑裏。岡踏跳而將平。井投輒而欲滿。臨溪咒鴨。涉渚撈蝦。旣兒戲之無方。亦童蒙之求我。此一時也。隨母梳頭之歲。從師識字之辰。鳥焉混于一篇。蚯蚓登于半紙。藏書之篋。時匿意錢。衣帶之旁。私攜面具。同學則謝家阿買。送餐則裴氏小奚。盼日影之不西。怨雞聲之太早。此一時也。至乃歲值元枵。門憐奇



竊仲理則廚難耗鼠。史雲則釜欲生魚。井淘麥屑。反避知親。徑拾墮薪。偏逢長者。然而天青入牖。水綠周堂。秋月塞門。春花交砌。何嘗不破啼而四顧。擁絮以周遊。此一時也。又或蘇季上書。全家盡返。桓姬索米。半舫爰來。謂曙齋舅氏及適楊氏從母中外則雙丁二到。不乏奇童。弟兄則羯末封胡。并饒道蘊。虛堂論史。鵲亦垂頭。側經獻詩。蟲來嚙踵。篙師南巷。雅乞書符。蠶妾北頭。偏多問字。此亦一時也。授徒北館。作費東堂。卜商色養之時。賈誼秀才之日。會稽僚壻。動色而見嚴生。陽元尊章。改顏而親劇子。鄰有束紉之饋。室無戛釜之聲。闢竹徑而待賓。借柏堂而讌客。此又一時也。詩曰。維桑與梓。必恭敬止。又況螟蛉果羸之場。與松柏蔦蘿之所乎。此則明明如月。難忘在闕之辰。悠悠我思。無踰樹杞之里。遣聞傳于厮養。瑣事得于鄰童。畦栽赤莧。則滌上之蒼頭。穴識金鑲。則羊家之故媪。失簪楚國。墮履徐方。燕知春社之人。犬識衰門之客。延陵之劍。無封樹之堪懸。班惠之書。有篇題之可認。能無墮傷心之淚。鑄思舊之銘乎。又況臘頭社尾。上巳元宵。餅值春辰。餠名令節。楊柳半橋之月。芙蓉北市之燈。水增一尺。則已嚙閭門。樹密三重。則隱開樓扇。燭龍之首。與鷗尾競高。彩鷁之竿。與神燈並出。販脂鬻粥。擊鉢吹簫。莫不紛至沓來。風馳雨驟。此又晏嬰之宅。因近市而居奇。虞氏之樓。以臨街而角勝。標孝侯之風土。記荆楚之歲時。差可連類而書。削牋以奏者哉。詩四十篇。稿成以寄巡檢二兄。上舍三兄。文學四弟。凡爲此者。亦所云寄魚鳥之思。今昔之感也。

沿溪樓閣枕南頭。溪水迢迢自北流。怪底近來鄉夢好。一旬多半杏花樓。

余家自追賠先曾祖大同城工核減帑項田產悉入官至先君

子下世遂無乙棟可居

循廊三折入層梯。板屋居然判畛畦。不向大家廚索米。自泥新竈小樓西。

外王母以南樓西偏一間令太安人率余兄弟及三姊居之。余七齡附學實君舅氏書塾。蒙師爲憚牧菴先生外兄肇新則

學長也

婉轉隨娘識百憂。貧家照水亦梳頭。不知梁燕緣何事。卻怪春人懶下樓。

此言諸姊隨太安人作苦終歲不下樓也

三月青黃不接時。燕南書札寄歸遲。朝來欲籜桃花米。已報租船到水湄。

外租母田不滿百食指浩繁。每及缺乏時素園舅氏館于京師

亦間寄修脯歸供置乏

黃泥墻北颺街塵。簫鼓嘈嘈聽未真。清曉上書還未半。巷頭不放看迎春。

夜寒窗隙雨淒淒。長短燈檠燄欲迷。分半紡絲分半讀。與娘同聽五更鷄。

余八九歲時自塾中遺歸。每夜執經從太安人紡側讀。恒至漏

盡

一年多半住江邨。饋歲匆匆入里門。不待郡城元日到。江船先已送河豚。

此謂素園舅氏妻楊孺人。江陰楊文定名時猶女也。一歲歸寧

時多惟蜡臘乃回

十齡左右謝家甥。孤露偏憐易長成。縮得一般雙角髻。家家戶戶拜新正。

侍郎宗派號東莊。愛女先教住近坊。便了作奴如願婢。有人分口饋羹湯。此謂適莊氏從母事外。王母最孝常分日饋羹。

西頭阿姊慣句留。小極扶梯不上樓。約得走橋諸女伴。背人月午更梳頭。

天中節後賽神多。十六雲車次第過。剛是卷簾迎面看。水嬉又報進城河。吾鄉雲車相傳隋司徒陳杲仁守城時所創。今司徒誕日及賽

神皆設之城內外。凡十六坊。故數亦十六。

迎門西去徑欹斜。曲曲房廊被柳遮。一尺井闌涼沁骨。記曾團坐說人家。外家門西偏有井。最清冽。近聞已湮矣。

清明過了又端陽。母不梳頭針綫忙。幾日斷餐緣底事。疊錢來買束修羊。吾鄉從師者饋束修。常以清明。端午九日及歲除為四節。

衆裏聰明百不如。學將新樣寫神荼。比鄰一半迎春帖。乞取蕭郎弱腕書。歲除前數日。臨溪三五小兒。每將紅箋乞書春帖子。

久別都應見面生。相逢幾徧問年庚。早來阿母房前過。親切重聞喚小名。此指適河橋程氏姊。姊為曙齋舅氏次女。與余同庚。從宦京邸。

十年歸而問齒長幼。故云。

江鄉豐歲景偏饒。親製連環小樣糕。一榼牢丸三百顆。歲除筵上吃元宵。此指適楊氏從母居城東鄉。芳茂山下。歲除嘗饋外王母。餅及

粉丸。外王母以分給諸孫。及余等。粉丸俗名元宵。

走索人教細馬馱。十番纜了又秧歌。臨街樓上憎騰坐。要看魚龍徹夜過。樓前為縣學場。每日百戲俱集。每

問訊廚娘去不回。歸寧百徧使人催。五更枕上春波響。知是山橋艇子來。從母楊自營居後。隔一二歲始一歸寧。外王母必遣人促之。方

至

樓前楊柳最依依。樓下人家試袂衣。那識清明好時節。滿樓胡蝶雜花飛。

雲溪清明前。後風景尤勝。

尋常不放到門邊。生小都憐疾病牽。記故廿三逢縣考。小心囑上渡頭船。

此指十五歲時初寄籍。陽湖應童子試也。

連塵北出竈新添。疊日齋廚課米鹽。買得呂家新宅子。小房分住白雲尖。

曙齋舅氏出後從外祖。文元遂徙居白雲尖。

新裁錦襖束當胸。競渡先將逆浪衝。日午晏公祠外路。暖波初試小青龍。

吾鄉競渡最盛。以余所見不下十餘。有金龍。小金龍。青龍。小青

龍。白龍。及五色龍。諸目。

別開池館隔重牆。半種芙蓉半海棠。留得一方明月在。情人涼夜捉迷藏。

此指從舅氏啓宸先生所居。在南樓西偏。饒有花木。余幼時常

與中表寅谷定安等嬉戲于此。

社公生日是來朝。已聽沿門畫鼓敲。今歲燭龍添九節。簇燈還插滿池菱。

元宵及社日。並有龍燈。自三節至九節不等。其簇燈之佳者。俗

名滿池菱。

八字門偏路復叉。春陰曾不隔窗紗。冥濛添得牆頭黑。知是東鄰皂莢花。

此指從舅氏秀君先生所居。在南樓東偏。鄰有皂莢一株。覆屋

常滿。

塵土真疑欲汚人。尋常衆裏亦嫌身。蓬門一例先教鎖。明日高齋會六親。

自移居後。外家有大燕集。太安人常踰余兄弟于室中。不令出。

一條幽徑幾家通。徑轉偏憐曲似弓。攜得紙燈何處去。石榴廳北捉秋蟲。

外家東廳側有長巷一條。門凡三四。從外祖永嘉及從舅氏于

璜先生等並宅焉石櫛廊即從舅氏居也

銀泥榻子粉紅墻。蚊蝶遊蜂爾許忙。一陣暖風初過處。百花齊撲曬衣場。南樓後有隙地一廡為諸宅曬衣之所。

纔過中元又下元。賽神簫鼓巷頭喧。年來臺閣多新樣。都插宮花扮杏園。賽神會中每用七八人扛一棹上扮金元院本諸故事名曰臺閣。

手簡先蒙羣從招。郭東明日合登高。晚來乳媪床頭說。好吃倪家九日饊。南樓外臨水有小家住宅三四其一以賣饊為業倪姓即乳母

王氏女夫也

新來小婢勝樵青。識字依稀認一丁。乞與百番書紙仿。韋郎十五擅書名。此指素園舅氏自江西罷任回有浙婢名小丁最慧常給事書

云堂故

一室如瓢枕水隈。綠楊影裏小門開。紙鷺脫手人驚散。卻值先生曳杖來。外家書塾名園孤書屋

昨宵短至飲梅漿。功課新添日影長。還喜學堂人散早。初三新月上紅墻。南樓迤東即學宮寮垣

榻子通明刷絳紗。小庭三面放秋花。已涼天氣清如許。約伴今宵守月華。庚辰辛巳歲後值中秋日每與外兄弟鴻三定安重光等及外

家姊妹于南樓守月華恒至徹曉

除夕初開讌喜筵。諸孫合隊拜床前。有心欲乞奇書讀。辭卻朝來押歲錢。歲除日選青錢結百索賜小兒名押歲錢亦名百索

圍屏斜對禮門開。纔著襪衫馬已催。惹得比鄰皆注目。秀才初謁泮宮來。此余初補歲錢亦名百索賜門正對

露滴新紅水染藍。兩重門裏試單衫。薺花撩亂春如海。記得年時三月三。

晉鄉諺云三月三薺菜花兒單布衫。

只把聰明譽慙孫。說將孤露便聲吞。紗帷寂莫庭花死。垂淚頻過通德門。

外祖母以乾隆丁亥十月晦日下世不數年樓前杏花亦萎。

### 題張同年問陶詩卷

同輩二三子。詩各有所優。或優春夏氣。亦或優于秋。惟君一卷詩。盡把秋氣收。讀詩亦不同。候有昏與夙。或當燐疎星。或欲秉明燭。惟君一卷詩。宜剪秋燈讀。昨攜君詩歸。氣候已迫冬。俯然一室居。四面皆秋蟲。又疑秋鳥鳴。嚶嚶滿寒空。此聲非出砌。此聲非出籠。有聲亦無聲。均出詩卷中。秋燈乍滅還乍明。時復朗誦時孤行。思君此意不可得。無乃造物賦爾偏多情。燕臺住十旬。蜀道遠千里。思親兼念友。悒悒何能已。我欲借春氣。生君十指間。方君作詩時。桃李皆開顏。迨余讀詩日。花色猶斑斕。然後登君堂。飲君酒。我狂可百樽。君捷亦千首。謫仙和仲人。二公皆蜀人故云。並庶幾。若說今人已無偶。

### 附原贈作

張問陶

翰林曾未遇。名高神采王。歌聲塞寰瀛。筆與嶽瀆抗。今春同拜官。識面蠻坡上。示我紀遊詩。雙眸豁層障。墨雲騰十指。一往但奔放。崑嶽想嶽崑。江湖寫清曠。眼前真實語。入手見奇剗。五字作長城。騷壇躋名將。我生齊楚間。望古心無讓。衣染泰山雲。帆迴洞庭浪。年來苦饑走。轉喜遊蹤暢。足跡半人寰。舟車隨所向。夢中窺海日。愁外看雲嶂。方域所區分。鶯花亦殊狀。方知詩律難。一得終無當。小技具神工。乾

坤歸醞釀，軒然讀大作。一片官音亮，萬象羅心胸。此才胡可量，詩人遇不窮。名士語何妄，努力頌昇平。殷勤副時望。

長至前一夕，久坐待張同年。不至兼懷里中舊，遊拉雜書畢不覺破曉。

三更正懷人，一馬嘶過巷。失喜自啓門，正與馬鞭撞。馬鞭東指客面生，孟浪客前還致聲。入門無聊出門走，更向街西市春酒。歸來風葉隨打門，打門童驚欲冒人。僮癡貪眠客貪起，十二曲闌行不已。隨闌一曲酒一盃，靜若主客相追陪。青天淡淡雲如掃，月光畢竟江南好。金波樓閣紅闌橋，去年此月還此宵。相思不獨人如鶴，兼有野梅初破萼。梅枝開落未一年，轉眼客路成三千。人燒銀燭朝天早，我典金貂猶醉倒。坊南遠客期不來，不覺一窗先白曉。君不見，我居咫尺郊壇中，壇外雲氣升如龍。更殘烏鵲不敢東，天子今夜居齋宮。

附

張問陶

臘月十三日，與朱習之、石竹堂、錢虞夫飲酒。半夜忽有作道士裝者，影門掩入，視之，則洪稚存也。相與痛飲達旦，明日作詩一首，分致四君，同博一笑。

勝侶偶然合，何妨一舉杯。南隣朱老聲如雷，大呼僮僕無遲回。曼卿亦復隱于酒，錢郎爭勝惟狂吼。閉門歡笑儼一家，掃除賸客如揮帚。回看好月來窗下，更洗清樽同卜夜。看盡將擒寺狗烹，壺傾又向鄰

僧借客貧歲暮時搔首。豈不懷歸愛吾友。任他風折響三更。密坐談心還執手。何處微風入。開簾若有  
人。羊裘氈履五柳巾。莊嚴妙相如天神。大叫取酒來。四座皆逡巡。疑是唐朝酒人李太白。不然定是荷  
鍤所埋劉伯倫。屋漏之神或大笑。公等無鑿混沌之七竅。樽有餘瀝且澆之。乾坤浩浩知爲誰。吁嗟乎。  
乾坤浩浩知爲誰。醉中各化飛雲飛。

十二月初三日雪霽邀同年張問陶顧王霖過飲醉後作

墻東半畝園。雪積難置足。客來門亦鎖。護此一庭玉。高低枝上白。萬條愛惜不遣兒童搖。今宵卻初三。新  
月出墻腹。峨眉山下人。聞來訪庭竹。掃此枝上雪。迸作盃中春。冷飲亦可堪。胸次饒春溫。閒中富貴誰能  
有。白玉黃金合成酒。屏除童僕不入門。行酒卻驅坐上賓。公榮不飲亦殊苦。罰作怪禽筵上舞。墻陰一尺  
掃不開。醉便埋此何須回。一層銀燭輝。一層新月影。樹頭屋角看更奇。倒射清光百餘頃。主人不送客亦  
行。脫略酒後皆呼名。來時衣上黃。去時衣上碧。來乘斜陽去月色。君不見。人奇馬亦清到骨。囑我海棠枝  
上雪。

附同作

張問陶

臘月初三、雪後拉容堂就禪存飲酒。醉後酣臥雪中。不知何以遂至松筠禪院。五更酒醒。見案上有朱  
習之方茶山名刺。僮云。此二公者。昨日戌時過訪。坐此室中。談笑久之乃去。主人不知也。因細詢昨日



事。僮云主人在雪裏時。但聞洪顧二公呼李太白。主人在床上時。但聞朱方二公叫劉伯倫而已。  
賓主威儀一笑空。酒杯嵌入雪當中。大家伏地同牛飲。直有無懷已上風。  
錦衣玉帶雪中眠。醉後詩魂欲上天。十二萬年無此樂。大呼前輩李青蓮。  
何人負我入輕車。混把空門當敝廬。寄語鄰僧須看樣。非仙非佛是真如。  
上帝敲門也不開。偶然醉死亂書堆。比鄰二妙真多事。悄入遊仙夢裏來。

張同年將乞假歸蜀醉後作兩生行送之

一生居坊南。一生住坊北。車聲馬聲不得停。十里路中常若織。我馬見君馬。鳴聲一何高。君僮與我僮。望  
著手卽招。我來時多子來少。馬繫寺門僮醉倒。青天如磨旋不休。醉裏有時來打頭。心癡直欲走天下。  
瞰日月方開眸。朝沽三升菴盈斗。吸盡東西兩坊酒。朝衣典盡百不憂。尙有身上青羔裘。一生皇然開笑  
口。那著酒錢街上走。一生無聊想更奇。酒盡伏舐壚邊泥。有時忽下牀。有時忽出門。人來雪裏衣盡白。疑  
是送酒柴桑人。幕天席地原無礙。十萬人中兩人醉。醉中分手亦不辭。淚墮黃公酒壚內。君不見。長安莫  
復輕酒人。酒人腹裏饒經綸。容卿百輩等閑事。爛醉尙復噓陽春。一篇我作臨行曲。馬帶離聲僮欲哭。從  
此長安少一生。酒星只照南頭屋。

附同作

張問陶

讀君兩生行，涕笑一時作。黑夜關門讀不休，打窗奇鬼爭來攪。懷詩急走心茫然，遠登雲棧如登天。人言彼土卽吾土，藏詩可以經千年。我方欲西行，一星墮我前。戴罽衣，壺佩龍勺，俗客驚駭疑真仙。莫驚鬼奪詩，我爲公呵護。且復立斯須，和此好詩去。是時下界冬已殘，風狂雪虐天漫漫。一生牽衣愁欲絕，一生和詩嘔出血。城南萬柳禿無枝，天詔酒星縮離別。重讀兩生行，如見兩生情。一若吾語，大痛難爲廣。翩然一躍入杯底，繞地萬人呼不起。生瑜生亮偏同時，萬古之名今已矣。酒星抱月來，擲入兩生杯。兩生驚起糟邱臺，歡呼轟作隆冬雷。忽聞門外征馬語，兩童泣下紛如雨。馬聲高朗童聲俯，似訴兩生離別苦。一生聞之悲，一生聞之喜。兩生悲喜人不知，天外浮雲地中水。君不見，開天盤古氏，其情最可憐。九州莽莽無人烟，獨坐獨行一萬年。又不見，高真之居亦孤寂，舉酒招人人不暱。九天費盡百神謀，僅奪唐朝一長吉。兩生把盞同軒眉，居然日日相追隨。一生偶送一生去，臨期何必吞聲悲。我馬莫憐君馬獨，君僮莫向我童哭。雲天萬里好聯吟，共把長空當詩屋。

再送張同年一律

更從何處別，且復上高樓。一世真遊戲，三旬偶滯留。已超生死劫，難破古今愁。何日青天外，同君一舉頭。

附同作

張問陶

吸盡都城酒萬杯，此行原不算空回。眼前醉語天收去，別後詩情夢補來。小住談心孤月滿，狂呼拍馬

亂山開。思君他日書千紙。定向峨眉頂上裁。

小除日仿唐賈島例與張同年問陶祭一歲所作詩並屬王文學澤爲作圖各係以詩

君詩四百篇。我詩六十首。君詩苦多我苦少。差喜流傳同不朽。我年二十登詞場。接詠已有橋西黃。仲則晏公祠內祭詩處。一屋神鬼皆憎狂。生年三十尤奇肆。是日孫郎號同志。筆壓南山白額愁。挺鋒復把生龍試。燕秦楚趙遊何壯。所不能臻祇天上。風月千場酒萬場。醉中歲月偏奔放。爾來四十氣已降。筆陣敢詡今無雙。異才爾復出西蜀。百斛龍鼎邀同扛。前年同客龜山左。我不知君子知我。直待蓬山頂上行。相知一世方能果。我詩與君詩。識者不能別。雖然我自知。與爾陳一一。長江一萬里。先瀉君門前。若論飲水源。我較輸君先。一年三百日。日日有昏曉。若量日出時。我比君家早。君如吸盡江水源。使我門外朝夕無奔湍。我如繫住西馳日。令爾屋頭終古長如漆。我放白日西。爾蹴江水東。高高下下總無極。與爾分半填心骨。爾筆何處架。青城與峨眉。我硯何所支。黃山與天台。天公夜半笑口開。餘子位置碁難哉。此時一瓣香。裊入九霄碧。惹得千家與萬家。如椽紅燭都無色。君不見黃郎黃郎已前死。不及見君詩百紙。孫郎雖狂一字無。見爾亦作奇人呼。今宵約不來。苦說有官事。坊西令我走不休。欲把閑人作陪祭。醉中一客爲作圖。更遣一客題分書。時朱同年交翰適至君不見門前車轍痛掃除。分付鬱壘同神荼。今夜俗客不許來催租。

送張同年問陶乞假歸蜀井序

乾隆五十六年歲在辛亥二月朔日同歲生張君問陶乞假歸蜀其父洪亮吉采玉田之蔬挈山陰之尊送之于國西門曰足下家居遂寧婦留成都鼻子遠宦已傷親心疊臣督秦復悲身計然則足下辭金門而南邁並赤日以西馳勞乎此行蓋非能已仍復迂道密洛戒途雍梁爰謀裹糧並訪親舊西嶽道士留之而不能東方細君隨之而共反百武之外弱弟出迎一門之中密親咸萃解笏金而貯案被采服以娛親雖嚴生告歸相如乘傳不是過也又足下宰相四世孫也葛侯冢畔八百之株尙存召公祠旁一隅之宅能割谿茶可采則病婦攜筐山筍欲抽則衰年補徑秋原半頃稅給于王官春韭一畦食供于家老而且煮米作糲春麥爲糰以資餘人或給耕者甫生之犢等愛于孩提頻來之燕視同于親故則亦物我均適心形兩忘者焉又況蠶經禽演不乏奇書蛤港羸田別開精舍臘頭宴客社尾迎神朝衫忽著則鄰里詫觀縣令偶來則牛羊驚竄南軒旣闢北牖時開果落枕前花開鏡裏一林百樹招鵲辭雅雙澗疊波留魴放鱧若是者采其吉語娛我眉梨懲彼殺機戒茲子弟播三田之種閣上巡觀廡七月之章房中屬和未嘗不集吉門之慶極幽居之致焉定省之暇時而出遊則峨眉當其前青城出其後大江流其左資水徑其西解角之鹿可施鞍橋浮鼻之牛以當舟楫餐雲欲曙之嶺采藥斜陽之洲團蕉數尺非佞佛而可跌危梯百層不學仙而亦往閑防疾厄時覽方書偶有篇題緘之經藏此則金門大隱不止平原玉筍真人復來宏景若夫僕與足下之交道又可言焉僕處鳩吾之里君居

吠日之方。蜚距之合。無由牛馬之風不及。乃闕前一覲。忽若素知。飲中百篇。愛同前哲。顧性嗜釋氏。敢侈前因。亦鄙道流。詎云緣法。靜言思之。迨卽吾儒之所謂如舊相識乎。夫卅年成世。足下旣近之。僕則又過半矣。俯仰一身。離合萬里。常恐百年交道不盡。然精氣不散。當成神明。風車電帷。來往不絕。則僕與足下。又何慮哉。又何慮哉。自此之別。一日之內。僕眺朝陽。君眺夕采。一江之流。君飲水源。我飲波末。則亦何嘗有須臾之間。遠近之殊哉。保齋神理。時時讀書。簡牘不詳。悉之于夢。亮吉頓首頓首。

城南初日照高樓。樓下勞勞僕馬愁。此日別君須握手。古人見爾尙低頭。交同北郭推三世。學許東方記十洲。竟欲上天留不住。夢魂隨過古安州。

附留別詩

張問陶

離筵相新別情多。曾與羣仙會大羅。半世心交偏得爾。十年詞筆偶登科。堅持壁壘爭詩律。亂擲尊罍閔酒魔。忽送孤鴻天際去。月明千里意如何。

年年奔走逐風塵。又對春明折柳人。蓋篋隨身千管秃。鶉衣衝雪一童貧。山中酒熟還家好。雲外心閒得句真。肯學長卿西去日。高車駟馬嚇鄉鄰。

一椽破屋寄三川。累我西行欲上天。十萬峯巒生足下。尋常雲月在眉前。花時泥飲從田父。雪夜狂歌理釣船。只恐重來忘禮數。倒持手版謁同年。

小碾輕車出鳳城。東風煖到子規聲。一官偶得常疑夢。萬里能歸豈好名。細詠白華真樂事。便言畫錦亦人情。迴鞭忽下憐才淚。八百孤寒羨此行。

袁大令枚病中以自挽詩索和率賦一篇寄呈

我生爲鮮民。逮養苦未果。孤真同孟陋。名合作楊柯。雖然檢此身。欲死尙不可。唯公丈人行。早結文字緣。事勳與文章。一一喜可傳。卽論委蛻期。事亦須推袁。幸公未死時。我欲代公述。二十厲志初。七十著書畢。若論文福兼。公可死者一。早年預清班。繼復作循吏。風謠至今留。俎豆倘可冀。若論位望亨。公可死者二。君卿取十妻。諸葛得二男。身如柏枝強。境若蔗尾甘。若論居處優。公可死者三。十洲縱未遵。五嶽已畢至。黃山武夷間。垂老游復肆。若論山水緣。公可死者四。拾遺踏耒陽。供奉隕江潯。昌黎不攝生。和仲備疾苦。若論年命豐。公可死者五。中書廿四考。方鎮四十年。汾陽處危疑。長沙疾縣延。身命匪不達。得不償失焉。何如公致身。半世臥巖谷。入門與出門。偃仰無不足。若論心志舒。可死不止六。世凡號爲儒。家置公一編。上者師公文。次學公詩篇。下逮決科策。誦之口流涎。公名豐瞽知。公貌僮媪識。或疑天上人。或引作前哲。寧知公尙在。年僅七十七。如此復不死。寧能望神仙。勢必神采離。形作塊壘牽。與其臥閨闈。曷若墟塚間。顏公自爲銘。陶令自作詩。頗怪同輩中。一一不和之。逮公始創例。徧索執紼詞。我謂果愛公。生并致脯奠。及公能飲食。一切口嘗徧。庖人出新意。尙可令公羨。又公在地上。說鬼不肯休。恐歸地下時。萬鬼聲啾啾。

蓄憾既已深。瓦礫伺間投。公其見夢余。聊可助一臂。公雖塊然亡。我尚有生氣。鬼車與鬼馬。辟易一萬騎。公今雖自挽。我更欲速公。公如讀之竟。大笑聲隆隆。當嘉此狂生。交道有始終。

袁大令以辛亥除夕復作告存詩七首索和戲加二絕奉答

赴書昨日過江東。消息傳來總不同。我信戴逵無死法。越中名士勝吳中。

時誤傳錢少宗伯載赴書至京

儻來勳業那堪論。絲竹東山道自尊。卻見白鷄原不礙。故應久占謝公墩。已抵紅塵一百齡。名山五十載韜形。如何更展人間限。天上多應妒歲星。告存纔接七篇詩。此語賓朋喜可知。誰識仙山樓閣裏。有人望眼欲穿時。準擬銘旌已欲題。無端白日忽回西。生天成佛都應後。莫晒精廬孟會稽。耆舊居然壓輩羣。老來心力著書勤。十分彭祖當時壽。卻愧公還未一分。人嫌不及此偏過。恐是神仙受折磨。謫籍至今填未滿。周妻何肉累公多。名山咫尺好攀躋。趁此春江綠欲迷。畢竟太真年命脆。請公來日試然犀。脫手新詩衆競鈔。豐干莫怪舌偏饒。兩篇多作非無意。先代巫咸賦九招。

里中十二月詞

辛亥小除夕。避債沙河門側。因憶里中舊遊。及諸勝事。爰成十二月詞十二首。

西瀛里畔人聲沸。翠色染天紅蓋地。排門剝粉書豐年。屋後水屏燈影連。橋上人。橋下艇。不斷櫓聲兼帽影。東迎邗水西接城。夾河祇聞爆竹聲。料量香燭南街口。共向喜神方上走。元宵節近當出遊。卻喜客歲晴中秋。吾鄉四瀛里中爲百貨叢集之所。臨河一帶。半皆染坊。屋上飛竿。插天大率皆曝布廊也。除夕必晴。中秋竹聲尤盛。詰朝紅綠紙積地常至寸許。又里諺云。中秋雨打上元燈。若隔歲中秋晴。則元夕月必大好。以此爲驗。十常不失一。

右正月

神祠明日鐙花笑。屈指社公生日到。龍鐙九節菱滿池。就近還參各神廟。後街絲管聲沸天。鐙影直接斜橋邊。衣香隊裏春雲熱。謁廟仍須夜深出。鐙光疎處穿市過。社公不拜拜社婆。延回只說歸塗枉。朱雀橋邊水聲響。笑指鄰家姊妹言。百花生日還相訪。里中近年尤重社公生日。鐙火較元宵更盛。城內外社公徹夜不絕。傾城士女皆于更定後出遊。朱雀橋在玉梅橋東。過橋卽楊氏園亭也。

右二月

二月二過三月三。薺花黃徧穿單衫。單衫何處尋春好。先踏艤舟亭畔草。紅梅閣接迎春堂。一路草香花亦香。紅墻缺處危樓突。正好滿塘春水活。賣花擔子不得停。昨日寒食今清明。花間古廟門開早。一片香烟接花鼻。傾城人出不遽歸。緩步卻從城北回。君不見。興蘭欲訪閒桃李。卻惜山莊前已圯。里諺云。三月單布衫。艤舟亭。紅梅閣。迎春堂。皆在城東。距城北三里。有青山莊。爲前明吳氏別墅。林壑之勝。甲于郡中。雍正中。張布政。适居之後。籍入官。爲里中富民。所有乾隆三十一二年。其家中落。遂拆以償。迨今。久鞠爲



茂草  
矣

右三月

玫瑰花香一城嫩。數起數眠天不晚。城彎北去覓午涼。柳線亂將行客綰。鱗魚上市值萬錢。山笥轉嫩櫻桃鮮。微泉閣枕緩雲閣。商略欲啓茶蘼筵。廉纖梅雨纔經夕。已報江波入三尺。趙家樓上望欲驚。畫舫卻與樓窗平。出東門至天寧寺後有曲巷一條名城彎夏中納涼所也微泉閣在縣學西侍御史董玉虬別業今歸趙氏綏雲閣在雲渡東舊屬呂氏今圯

右四月

柁工昨日支關鈔。迓得龍頭出神廟。龍身沉處奠酒肴。頃刻龍尾波心搖。六龍城古龍舟七。城北東西按方色。一層彩繡鏡一層。水面徑看高百尺。晏公祠外臨河澗。朔日先聞賽神鼓。三元高閣颺錦標。聯尾北出迎春橋。飛竿快漿都成隊。船上樓中卷簾對。打招要取波面寬。一舸前呼百船退。雲溪半里樓接天。一河鏡光人不眠。龍頭纔過看龍尾。四面十番絃索起。洞庭楊梅甜不酸。更有盧橘堆成盤。舵樓吳姬約早餐。港口昨到江魚船。每歲競渡時一龍舟例支滯豐關稅銀十餘兩常州城有六門舊號六龍城余所見底而以龍頭藏廟中至用時乃迎取焉晏公祠三元閣皆在雲溪

右五月

萬花開後園林老。日永如年客來少。銀衫斗笠思出遊。城北水上多危樓。窗櫺豁處天光現。十頃荷香撲

人面東西兩水夾寺門。水綠欲把門扉吞。紅闌幾曲生林杪。屋古似巢僧若鳥。閒僧喚客客不應。小艇出市前溪淺。晚涼莫向閒街走。九栢山房門新酒。城北放生菴。內外有池。寬至十數頃。荷花甚盛。菴南卽元士倫九栢山房也。

右六月

七月七日侵曉妝。牛郎廟中燒股香。回塗更把裙衫整。織女橋邊鑒春影。彎彎新月看至圓。結伴好上臨河船。東塘北岸人爭覩。倚艇低頭放鐙去。今年鐙樣人更誇。飄出萬朵紅荷花。年年歲歲祈無疾。自信今宵鬼緣結。君不見東家女兒結束工。染得指甲如花紅。斜簪茉莉作旖旎。鬢影過處饒香風。又不見西家女兒還未嫁。閉戶挑鐙坐深夜。神鐙社火總不看。獨望銀河占米價。北門外十里。有牛郎廟。旁一木橋。俗又多市楮幣。于深夜燒之。名結鬼緣。七夕前後。天河隱不見者。常十數日。吳俗以日數之多寡。驗米價貴賤。多不爽。

右七月

十三月。如元宵。十四十五光尤饒。兼葭莊來鶴莊。更有蘆墅淺。堪嘗歸來樓上開扉望。正見光從海門上。江波濯月月更涼。千戶萬戶堆新霜。層樓影向三更直。高下棧棧瓦檐濕。更殘女伴出走橋。行過八字剛三條。頰顏難卻鄰姬請。更走烏衣及紅杏。莊家燈謎猜不完。曲巷更有花鐙看。打十番。跳百索。攔路復看飛鼠落。兜鞋纔了復墮斂。南街怯行行北街。君不見團團明月方迎面。一入采棚天不見。兼葭來鶴二莊。桂花臺盛蘆墅。

在北門外產菱尤佳八字橋在城東與紅橋及元豐橋斜對烏衣紅杏二橋名在邗溪上近年中秋燈謎盛行已西庚戌莊公子蓬吉在里門延名士十數人專司其事以是所製尤膾炙人口中秋前二日恭值萬壽聖節居民皆結采爲棚張燈至五晝夜大街及西瀛里尤盛

右八月

中秋說餅辰重九題糕節汪三湯餅倪婆糕卻與龔九作三絕出門衣袂多北風偏向南郭聽齋鐘再轉僻寺來城東驚聞天半人聲雜一郡人登七層塔攔門一客索一錢鼓勢直上浮屠巔窗櫺八扇迷方向咳吐皆飛鳥巢上前行如挽後若推足底復有人頭來飛梯盡處波如鏡坐久蒲團始神定閒尋菊種來僧房更借苦茗澆詩腸歸途忽見紅燈簇禮斗筵前夜焚籙雲溪倪婆製糕葛仙橋汪三製餅皆舊有名近府人製玉魁製粉丸亦精清涼寺在南郭外九月中香會頗盛自城南至東郭必出崇慶寺前太平寺在東郭有塔七層爲九月登高處里中人常以九月禮斗城東毘耶室塔隱山房皆禮斗壇

右九月

一花一草都無色黃葉砌邊堆數尺下元會好強出遊乍冷客亦披輕裘蕭辰欲借笙歌暖排得雲車大街滿迎神曲好還送神香篆影裏回陽春馬山紫蟹螯鶴蕩青魚尾屈指消寒會當起舍南竹屋梅乍開掃室便已安尊疊趙君飽噉吳君飲更有蔣君工食品潁州酒政推嚴明不到四更杯不停君不見坐中有客歸何遽欲附租船上墳去里中賽神以清明中元下元三節屆期城隍神皆詣北壇行禮出入儀從甚盛兼設雲車臺閣故事傾城士女咸設幕觀焉蟹產太湖者佳鷓蕩在四門外五里產魚最多里中諸老輩趙丈綱男食量兼人吳上舍祖健稱豪飲蔣太守熊昌酒政尤嚴舍南竹屋則余侍御舅氏書舍也食品每出新意他人做之皆不及又吾鄉展墓以清明及十月


右十月

租船歸日盈筐載精穀上倉粗入碓嚴寒料理及齋鹽買得城南幾挑菜花豬成隊羊一羣冬至日前商祀神蜡筵開處賓朋滿紅燭壓簾行酒緩清歌小部方上場門外嫁女笙簫忙君不見東鄰贅壻仍開讌自說豐年百般便連天爆竹西半城一月不停歌吹聲樂工醺醺里巫飽卻詡今年日辰好吳俗于冬日斤以鹽漬之可經久不壞里中富人于冬至後報賽名曰蜡筵是日必備請親朋又里俗婚嫁事必擇冬季若遇豐歲則更多亦昔人霜降逆女冰判而止之遺意也

右十一月

桃仁滿把餠盈掬臘八家家煮膏粥袈裟三百紅滿街穿徧一城云化齋闌干影裏飛花爆相約廿三先祀竈神祇五路土五方屋後有井堂前倉小兒新年上學堂牲醴并欲祠文昌年殘百物先儲蓄家讌賓筵喜俱足君不見書生生計絕可憐研斷凍墨書春聯臘月八日以百果煮粥并饋親鄰城東天寧寺僧徒常三百餘人臘月初則空寺盡出名化臘八米祀竈舊以廿四日今則家計稍裕者皆移廿三土俗以五路神為行人歲盡則祀五方土主人則加祀文昌朱衣歲除寒土之最窘者恒設筆硯于通衢代寫春聯可日得數百錢

右十二月



卷施閣詩卷第十一

五經聯騎集辛亥壬子

雨窗讀何水部道生詩適有饋蟹者率賦一首卽題卷末

平明生輕寒。秋雨閉門大。窗風扇如鬼。梢人竹數個。起來天冥冥。枯坐無一做。攪得一本詩。中邊頁先破。案頭光正黑。捉就窗隙臥。讀一首兩首。大叫急起坐。波濤欲掀屋。日月忽顛簸。無端蟠虹霓。光怪生土堊。排空一枝筆。五岳透皆過。凝然七字出。重欲百馬馱。又如五兵利。當者無不挫。讀時忽狂笑。一屋悉驚邏。一句復一滴。恍與檐漏和。雖然萬言富。無救一日餓。忽然敲門來。送蟹有鄰左。是時雖正晝。牆外黑若磨。安排醋盈盞。疊取薑桂剉。呼童急斟酒。好句我欲賀。遣經嬾書寫。卽此當清課。時爲幼子書爾雅讀詩一兩卷。食蟹七八個。快哉復快哉。屋漏頂上墮。

自蘆溝橋西人山至花犁坎道中作

山程七十里。半道馬已死。

時同行劉檢討  
湛齋馬忽斃

主人寄坐僕告歸。一馬乃載三人來。前山蒼蒼月初出。對面一

山看落日。微紅入水尙有光。水底已復鋪新黃。山風斜衝兩山口。倦客欲眠山石走。一峯擱葉下。趁人車上鈴鐸聲。疑噴。客行無糧馬無草。三兩人家閉門早。卻怪前頭紅樹多。橐駝不到山初好。

自慧聚寺北行歷化陽朝陽觀音諸洞晚上極樂峯作

峯形南北殊凹凸。入地上天皆一日。潛行五里不見天。蠟炬光遠空浮烟。莓苔森森綠疑夢。蝙蝠手捫皆不動。一風衝出微帶腥。足底萬竅聲俱鳴。好奇徑欲窮顛末。行僮失聲炬將滅。四人急轉我後來。風黑恍有千人追。是時屈指當交酉。出洞見天天尙晝。飲泉百盞神始清。坐調鼻息方遠行。樹巔斜行途轉窄。鴉點撲人如雨黑。東行一洞勢較低。一洞復出清泉西。斜陽沉沉嶺頭落。客意極疲龜極樂。下方已黑天頂青。側帽恐礙當頭星。

自潭柘寺至龍潭久憩

一亭蓋清泉。再轉泉已失。山腹空若囊。時時怪風出。青松高穴蒼鼠肥。紅葉遠雜烏雞飛。四山茫茫樵跡稀。山翠沁骨思添衣。斜陽下嶺客上山。山寺防虎門先關。坡陀百轉行客餓。林果却從頭上墮。

宿慧聚寺山房

寺門望殿樓。樓迥若天上。一松蟠殿角。高復出千丈。山僧導客行不休。石屋轉出青松頭。客行開窗玩松頂。下視僧房若居井。秋衾鋪月夢不成。一夜枕上皆松聲。松耶雲耶不能省。月裏千重百重影。三更闢戶禮上真。北斗正南來瞰人。

日午抵潭柘寺至猗玗亭久坐

到門諸峯低。青翠收一殿。直上百級奇。雲紅撲人面。穿廊入廚院。百匝水聲徧。危亭圍衆綠。當午無所見。林杪開北風。晴陽落如綫。山牕當殿展。涼燠亦時變。朝饑誰可喻。山果幸時薦。吳筠雖說餅。束皙仍賦麪。臥枕明昌碑。狂思永和讌。亭有流觴曲水故云。

慧聚寺夜起行馬鞍山麓

三更東峯明。斜月逗林左。連閭無人聲。獨往意亦果。北戶昨已扃。山風自開鎖。梢南通一徑。細路出罅堦。碧樹合作屏。黃雲散成朵。低同馴鹿步。高與彌勒坐。一寺十數廊。閒行止餘我。徘徊念儔侶。水黑月已墮。歸路愁徑昏。山榴綻如火。

山房與邵侍講晉涵話舊兼呈曹侍御錫齡劉檢討錫五張運判道渥

憶昨從君遊。青山謝公宅。五更搖夢醒。君苦行不得。出門殘月尙在牆。照見四野黃花黃。傍花前行衣袂香。綠鬢欲與花爭光。看山百度花千度。鏡裏朱顏已非故。五嶽雖成汗漫遊。一春每被風光誤。洪厓仙人寧足誇。君亦懶種青門瓜。雲山無意忽相合。且拾山果烹谿茶。對床七輩今誰似。可惜三人已前死。壬辰三月同遊青山七人。今朱竹君先生張學士才名上舍詩。還餘李嶠真才子。今日張顛有替人。曹劉聯轡出風塵。青松白石談遙夜。艷李夭桃訂好春。時約明歲三月重遊。

歸途遊石鏡山作



馬行半日坡皆陡。櫛葉隨風出林走。桑乾河北飲馬時。却望樹色還參差。平沙茫茫埋馬膝。復有一山當路出。遠尋千級到寺巔。寺外城堞皆衝天。紅林蕭疎日光薄。破樓無鐘殿扉落。庭隅堆草溼。邊夜半或有山魍眠。

梧桐葉

梧桐葉秋來大如掌。肅肅西風催蕭蕭打門響。

何工部道生招飲卽席羅山人聘曹指揮銳張運判道渥合作一圖名秋堂雅集因繫以詩

一人畫山一人畫樹。旁有六七人。嚶嚶屋中住。曹興宗昔時畫馬今畫松。羅江東畫人不工畫鬼工。張風

子畫卽有風。獨葉恍起秋堂中。兵曹詩百篇。

法時帆

舍人酒一斗。

劉湛齋比部談天

李石農

我叉手屋頭有樹樹

杪山。却怪樹底門常關。晚晴巷口車聲接。一徑呼僮掃紅葉。斜陽入樹留一分。道遠客欲趨城門。

時帆居內城

君不見山。雖窺客喜復噴。認是昨日遊山人。

遊古寺

入門悄無人。北風吹小住。誰肯揖先生。長身一松樹。

朱孝女奉親圖

孝女婺源人。誓志不嫁。以養父母。父亡事母幾二十年。及母沒。孝女年已五十。依兄弟。以君繪父母象。

懸室中朝夕事之如生。其兄某爲作奉親圖。索詩云爾。

二十事父母。三十依偏親。四十作藐孤。哀哀逮晨昏。父亡事母母亦亡。高齋却掃爲影堂。影堂西偏兒所住。生死不離親一步。行年五十不下堂。父母以外無尊章。畫師敬復瞻顏色。髮白未筭何可得。椿兮萱兮合作圖。旁有几榻兼詩書。君不見孝可生。孝可死。由周秦逮今此。伊誰作配光青史。北宮之女嬰兒子。歲暮飲酒詩十篇。

一屋無閒人。勉復出門走。一卷無閒人。驅車出坊口。東西街十里。排戶款良友。皆云出門久。十至九不偶。沿路爆竹聲。兒童拍雙手。車來仍復返。斜日已交酉。一世無閒人。誰同飲盃酒。

飲酒或不樂。時時復嘯歌。讀書有時疲。披牋亦吟哦。設榻書案旁。所以消睡魔。房廊亦周行。時還撫庭柯。大抵一日中。良朋間經過。飲酒時究少。讀書時究多。

自爲京朝官。童僕色不展。連晨朔風至。寒色到雞犬。吳奴昨告去。朱戶別思款。今辰關右僕。衣被亦將捲。欲留心不忍。各爲計安善。十年依倚久。一旦忽辭遠。周親復交臂。食窘衣不暖。笑讀東觀書。何如北門管。學士不能飲。而時負酒錢。法時帆喜招客侍講久輟詩。邵二雲獨喜客贈篇。孝廉耽宵吟。王惕甫日出擁被眠。廣文退

食遲。汪劍潭負券愁逼年。皆隔十里遙。誰能比吟肩。歡悰杳難尋。俗累苦復牽。惟應孫比部。淵如時闌笙歌筵。

比鄰指揮署。對戶車贏坊。鄰雞第一聲。馬嘶人亦忙。否則公案側。貫索聲琅琅。羣動既已繁。吾行起徬徨。門戶尙未開。初日上北墻。窺廚炊烟稀。正苦瓶無糧。吾師昔人言。冬日則飲湯。

歸鴉值歸鴉。十十復五五。酒人憶酒人。相思倍云苦。寥寥心一寸。誰復可傾吐。欲因西逝日。寄此蜀江語。

江水香以深。高原復相阻。思君不能見。夜起聽更鼓。安得雙鯉來。奇篇概今古。

此首寄張同年船山

屋頭無星辰。積晦已三夕。凌晨先習霰。騎馬懶入直。生徒來饋歲。野鷺間鮮鯽。更有酒一樽。聊云破岑寂。雖慚通德里。差比草元宅。呼兒開美醞。小酌經案側。正好無俗人。門前雪盈尺。

人皆處城西。我獨居城東。城西人不來。賓坐時時空。非徒息紛紜。藉臥篇籍中。日吁弱弟歸。粥飯喜與同。兒曹誦經餘。得句輒復工。爲善無近名。我師陳仲弓。干祿不欲多。我法邴曼容。興至卽舉杯。消磨寺樓鐘。昨來京華居。闢室作影堂。晨昏覲吾親。旬朔申瓣香。祿苦不逮親。時時我心傷。幸伴弱弟居。諸甥亦隨行。誨以勤讀書。庶幾能顯揚。歲晏風雪中。懷人益傍徨。一舅依郭門。兩姊居江鄉。何時能合并。築室先墉旁。向生無他奇。貧甚益偃蹇。人言年歲竟。屏當無一件。開函展然笑。一室尙仰偃。泉明乞食詩。吾行恐難免。欣然喻妻子。且設歲除宴。爲歡極今日。先把百愁遣。待過元日期。衣裘亦堪典。

歲除以酒灸。醉亡僕窺園。并繫以詩。

自余爲諸生。汝卽侍左右。皖江隨學使。姑熟依太守。兩年居白下。一載住京口。逮擢明經科。相從浙東走。

窮冬遭大故。九死返林藪。汝也痛哭隨。衣穿露跟肘。經年聖廬內。料理及搔淺。一僕乘間逃。蓬門汝兼守。余心感其義。待汝乃不苟。除喪來日下。百事益紛糅。春秋兩闈試。十上九顛踣。屈指十五年。所值苦不偶。親知久相弃。汝乃誓不負。落落十數州。商量竟升對。遊梁才匝歲。客陝時最久。中謀金半百。爲汝歸娶婦。南下不半年。長饑婦先詬。踉蹌復追及。訴室有病母。汝才工料事。兼復習科蚪。每寫百幅書。人疑出余手。余交徧區宇。能一數某某。孫黃暨崔趙。識我交最厚。不來同我憶。來卽具尊酒。各能諳食性。默爲理菘韭。武昌城郭外。客歲歷申酉。地也南北衝。邨墟雜花柳。平生汝頗謹。苦被僚僕誘。到此亦有由。都緣婦奇醜。安心希外遇。或可副箕帚。放艇夜渡江。時時逐鷄狗。衙推頻乘隙。間值墨尿毆。有時方縱笑。遭我出行陡。厲色一禁之。鞭笞願甘受。扶疴方就道。風雪復連嘍。余來幸通籍。解汝顏色慙。遣歸迎眷屬。兼爲覓糧糗。汝時雖已病。聞語尙抖擻。今年附舟至。面色益昏黝。殷勤覓醫藥。病早醫乃後。短至節氣長。時時伏床嘔。屏除諸食品。日僅啖蕩藕。沈疴由自取。將死乃一剖。彌留三兩日。作札呼汝舅。瞠目不得言。頭從枕邊叩。卅年爲一世。誰識汝不壽。汝行雖廁僕。汝義實兼友。汝不善攝生。吾行又誰咎。急爲馳惡耗。書至月已九。汝母哭定癡。汝父顏亦叟。伶仃遺弱女。學語未離毀。一棺雖草草。必爲枕邱首。除夕酌一杯。傷心汝知否。小除日寓齋卷施閣祭詩作

昨年祭詩日。同館挈仙史。謂張船山今年祭詩時。闔戶僅兒子。一兒讀詩業未醇。一兒學選粗有文。呼來筵上

作陪祭。不向屋外招詩人。事功一歲慙何有。詩一百篇文十首。借之作達亦可憐。敢向衆中誇不朽。此筵設自我。此例舉自唐。浪仙詩句鏤肝腎。積歲預恐心神戕。我詩直欲寫胸臆。元氣未刷何由傷。雖然一日間。檢韵亦已忙。灤河仙鹿北谷羊。作脯聊潤詩人腸。南鄰詬誶聲。北巷市塵沸。吾廬雖冷一事無。尤喜門無索租吏。一詩焚筵前。一詩寄蜀中。狂生避債作臺後。預想掩戶浮千鐘。我行亦返卷施谷。欲仿長江作詩屋。更邀諸老同祭詩。短趙狂孫附壘陸。陸秀才繼轡年尚幼。已工詩兒子友也。

小除夕從家大人祭詩歌

飴孫

兒時放塾庭前過。重慈提攜侍行坐。桑陰屋側隨嬉遊。手捧新詩當餘課。十年負笈從師遊。樓前學詠珊瑚鈎。閒中分賦荷奇賞。出語不肯同朋儔。歸來朗誦喜阿母。慈顏一笑開眉愁。歲除亦解束詩卷。雅伴積軸堆床頭。屋傍十畝富風景。絕愛春晚兼新秋。偶然好句覺自得。僮僕往往嘖伊憂。癡舟亭畔蠶河地。花落花開搃能記。年華二十春二分。入世文章敢遊戲。春明北上隨慈親。歲星在亥月在辰。曾登鳧繹望泰岱。更喜擊楫經渾淪。看山看水不相識。問名一一窮本根。祝風咒雨一枝筆。行客舟子驚奇珍。燕中隨宦樂趨侍。一卷兀兀隨晨昏。過庭重誡爾小子。學詩一語言重申。閒堂月好命分賦。擘牋搦管噓陽春。一篇偶合長者笑。一篇若拙長者嗔。弟昆相賀復相戒。冥索時復煩心神。金臺芍藥闌河柳。快飲百杯詩百首。夜闌掩戶時朗吟。一屋兒童都上口。卷施閣集排西東。更列酒脯酬天工。庭除恪侍

作陪祭。缸穗凝綠花冥濛。太華培塿並時列。光氣淩亂殊青紅。瓣香縱不在前哲。敢說家學能兼通。他  
年倘得爛一藝。略比過邁隨坡公。

花朝日獨遊。二閘歸適馮編修集梧得田侍郎雯大通橋秋泛卷子索題因率書長句于後

花朝日展重陽圖。百年風光今在無。蓼紅荇碧色不減。只有卷裏人俱徂。河流北去都成岸。驢背紅塵亦  
頻換。誰從物外觀古今。石塢亭亭峙天半。惜哉秋好何如春。津水乍綠無纖塵。獨遊徑苦意蕭瑟。坐恨不  
見當時人。百年似此清遊寡。都策疲驢不騎馬。沿堤正好迎面風。攪得柳絲盈一把。米船東來畫舸西。百  
丈往往率朱旗。羣公觴詠致堪樂。可念民力東南疲。君不見東南十郡沿江潯。陟險誰憐挽輸苦。就中若  
以河沙量。我亦江鄉一編戶。田郎仁者固不同。刻石告誡垂橋東。卽論文筆亦殊健。赤幟已植騷壇中。風  
光過眼誰能久。感舊懷人一杯酒。春禽送客如有情。約我重來看新柳。

葉舍人雯移居觀菜園上街東作圖索詩爲賦長句

樓頭壁山作兩峯。門外江漢流無窮。先生開軒日正東。繞宅萬樹桃花紅。朝烹武昌魚。暮飲江渚酒。卅年  
撰述無不有。博士一官堪白首。無端欲將閭闔排。愛看紅藥翻當階。江頭池館覓人住。反使猿鳥情俱乖。  
水程迢迢陸程少。糧盡唯憑讀書飽。津門橋南賃百驢。囊金雖少書有餘。竭來都門三易居。菜圃開處真  
吾廬。盤盤老屋橫街後。分半貯書嫌不穀。鎖廳退直事亦忙。目力苦短書聲長。談心時接北街李。小松編修聯

旬尙有南頭王。惕夫君不見，買山何似還山住。一樣門前幾株樹，屋頭添得十丈塵。失卻雙川合流處。

法學士式善屬題曹指揮銳張運判道渥所繪二卷子

蓬壺有仙人，早歲卽食祿。所居尤禁近，丹闕森在目。官清饒暇日，當千駐車軸。閉門詩作命，萬事不貯腹。我頃謂先生，身外物皆足。無須更誅茆，天地卽詩屋。苦吟朝復夜，雙舉日月燭。惟愁鑿幽險，或致鬼夜哭。元氣不可漓，期君返真璞。詩名試屈指，海內不五六。餘如閱傳舍，彼此可駐宿。賞心雖偶寄，過眼亦苦速。茲龜庶突兀，表以出檐木。名山原有待，壇坫今已築。我亦念故居，卷施一隅谷。

右詩龜圖

我家門前接早潮，却行一里數十橋。橋邊朱樓橋下艇，千尺闌干漾清影。扶橋楊柳高接天，樓上著客疑飛仙。偶然窗際落高詠，却惹遊魚出波聽。此橋此屋別幾年，轉眼風月凋朱顏。幸從塵外覓棲止，百步尙有泉濺濺。車聲馬聲何日歇，每遇橋名輒驚絕。橋心何止無水流，反惹岸塵高尺一。先生詩思本最超，更喜晝裏逢溪橋。桃花溪南楊柳梢，著一斗室如鴉巢。我因鄉夢頻生妒，君爲尋詩盍延佇。徑攜秃筆及團蕉，明日從君畫中住。

右溪橋詩思圖

寒食出遊詞

墻頭無雨聲。墻下無草色。杏花一枝空復情。薄暝吹香作寒食。春衣初試欲出門。東風吹塵日已昏。天橋南去路如掌。楊柳缺處藏春墳。春墳高高盡尺五。貼徧紙錢知有主。橋西燕子飛不停。啄得幾家墳上土。啄殘墳上土。來作梁間塵。堂前宴客開酒樽。卽是掃墓歸來人。世間行樂皆如此。一邊生人一邊死。消沉代謝那得知。冷眼卻輸雙燕子。東風吹塵日向西。燕子亦逐遊蜂飛。成團蝴蝶出門去。屋角幾樹桃花低。坡陀高低土無隙。高種花枝下栽麥。老翁往歲食有餘。麥穗旣黃桃實赤。今年無雨桃少華。麥隴三月飛黃沙。關心歲事各惆悵。令我興盡思還家。歸來閉戶同誰語。一枕輕寒夜如許。忽驚飛夢到江南。借得鶉鴝來喚雨。

館僮折梨花一枝供膽瓶中率賦一絕

折枝聊復翮春華。插向文窗影絳紗。蝴蝶一雙來入定。錯疑添得樹頭花。

三月廿三夜丁香花下獨坐適法學士式善以庚戌辛亥兩年所作詩屬訂定因跋于後

丁香花底展君詩。花穗千條月一絲。句向卷中吟欲活。月從窗裏墮多時。商量握管題長句。珍重臨風嗅亞枝。明日欲邀花下醉。更憑殘朶索新詞。

三月晦前一日清曉獨遊法源寺看海棠花下值馮戶部敏昌因同過寺旁亡友黃二景仁舊寓室已傾圮不可入感賦一首



出門誰是看花路。縱馬直前知不誤。斜行七里破曙光。馬不識途能嗅香。平明一寺攔街出。萬綠衝門馬驚逸。客行下馬方拂塵。花下已有先來人。羨君何止尋花早。花氣入簾餐欲飽。十分花事情已過。砌下漸比枝頭多。明朝更惜花無幾。窗外怪風成陣起。看花人老花莫悲。花下幾見常追隨。不然花枝南頭兩間屋。曾有詩蒐抱花宿。眠時如鷗立如鶴。看得開時復看落。如今寂寞鎖幾春。花屋祇當詩人墳。門闌雨圯紙窗破。時聆唼聲夜深墮。君行歎息欲出門。我更代花招客魂。君不見。客窻定在花深處。怪底曙鴉啼不住。

暇日校法學士式善張大令景運近詩率賦一篇代柬

我詩時苦難。法詩時苦易。若欲詩筆工。兩人先易地。張君下筆有古人。我詩下筆苦有我。若論詩格超。有人有我皆不可。咄哉詩道匪易言。何況雅頌至此已。及三千年。誰無好句播人口。大抵來往起滅。一一如雪烟。天有日月星。地有嶽與瀆。筆端撼之不能動。何以奴視荆朱僕賁育。若夫一身之內理。更該心志各凌爍。口眼各闔開。不將我之心志。口眼寄于古人。四體百骸內。始覺我與天地錯立成三才。不能已于心。乃復出諸口。爲天地立言。于我亦何有。有所溢于目。乃復矢厥音。爲山水寫照。而我何容心。一言二言精不磨。千語萬語寧嫌多。鋪牋直可概八極。濡墨真欲成江河。然後張君詩法君詩。牛腰巨卷擲我。我欲頂禮同所師。且令前萬古與後萬古。得我數輩中立。藉可相支持。

晦日卷施閣餞春偶賦十首

紅杏枝前拜朔來。丁香花底餞春回。冷官一月無餘事。祇向疎闌數舉杯。  
經旬常坐此花前。花慢愁開日影煎。怪底鬢絲都不潤。江南拋却已三年。  
白雲間有護花心。時墮高枝作曉陰。雲起接天花委地。欲憑誰與判升沉。  
細語檐鈴那得聞。城東風物感羈魂。春原一樣平如掌。只少棠花黃到門。  
雨絲真欲比黃金。尺五閑階草未侵。九十日春晴過了。却餘今日是春陰。  
春殘排日鎮飛沙。自掩疎櫺護碧紗。誰向燕南記風土。屋頭青草窖中花。  
閒禽多半向城東。花裏高樓面面通。不看生紅看生綠。天壇十里柳絲風。  
送春歸處敞斜扉。星露微茫點袂衣。休更梯牆看風色。明朝不放紙鸞飛。  
悟徹繁華摠是空。興來擺笛自西東。尙餘幾尺斜陽影。要與春花鬥晚紅。  
一種心情小婢猜。四更猶自踏蒼苔。燕疑殘月衝簾出。那識幽人秉燭來。

惜春詞

一風吹自東。一雨來自西。風催花作塵。雨催花作泥。作塵飛揚作泥定。誰是春花舊心性。桃枝欲窺廊。柳枝欲窺樓。窺廊見客行不休。樓上柳眼看春愁。入門復出門。不見碧天色。離離滿徑堆綠陰。明月欲從何

地白心長夜短睡不甘。曉夢亦復歸江南。夢時看花醒時叫。芍藥如盤向人笑。

四月十三日張運判道渥招同王給諫友亮劉舍人錫五伊比部秉綬何水部道生胡文學翔雲陶上舍  
渙悅至海北寺街古藤書屋看花小集分韻得花字

一屋如舫門開斜。半空吹香不見花。入門老榦復橫路。根古半入鄰人家。抬頭花向竹梢颭。一架正把天  
光遮。綠雲濛濛雜紫霞。花朵缺處蜂爲衙。花光豈止潤眉宇。坐久衣上濃香加。主人華筵開咄嗟。有畫可  
質無須賒。巷南喧喧來酒車。花片驚落隨飛鴉。以花入酒沁齒牙。海濱石首津門蝦。更喜蘆筍先抽芽。年  
光慨如赴壑蛇。春止一日須豪奢。十五日握拳透爪拇陣譁。上樹百徧能搔爬。酒盞嵌入枝丫杈。不爾恐  
有旁人掣。十三清宵月正華。笑視竹影生窗紗。忽思逃席路復叉。一徑却好鳴官蛙。到家冥冥吹曉笳。袖  
底香氣留些些。

自御園回半道遊五塔寺寺中有古樹二株出檐幾數十丈花開覆屋寺僧曰銀杏也爲賦一律

五塔寺邊雙樹奇。馬行迂道款禪扉。高枝似向雲中出。落葉猶能天半飛。清磬幾聲催夕照。疎香十里點  
朝衣。鄰齋東去春如海。寺旁卽極樂寺。牡丹薔薇盛放。較爾濃陰覆院稀。

廿二日侵曉借孫大至豐臺看芍藥

馬嘶嘶過柳梢頭。宛轉雲容清淺流。十畝竟從人外闕。萬花如向鏡中浮。狂思海國春三月。夢斷江城尺

五樓小坐不妨遲。日出滿汀濃綠撲藤籬。

國花堂看牡丹

新綠叢邊競吐芽。柳陰先爲障飛沙。縱教風雨無寒色。占得樓臺是此花。幾日酒中勞悵望。有人簾底惜韶華。如盤莫向閒時笑。第一銷寬數謝家。

崇效寺看海棠

入寺先教蜂蝶忙。殿前一樹倚朝陽。若逢蜀客應回首。不作秋花恐斷腸。夢雨心情初挹露。冠春顏色肯施香。紅紅白白看千朶。莫更臨風笑野棠。

題阿少空彌達西尋河源卷子

鞭梢生層雲。馬尾搖晴暉。却行數里卽天上。側帽忽礙星芒歸。雲外一株樹。我疑是落棠。不然何以夸父擲杖來茲方。石林何周遭。復疑天盡處。不然何以豎亥逡巡欲回步。地高于天石壓雲。北斗背上生峻岫。幾回洗眼望來路。祇覺黃氣一縷從東奔。漢家西南羌。元人鄂端尾。去此不知凡有幾。一條天路雖分明。歷萬萬古無人經。飲源三日馬亦靈。五色石上飛而行。天河轉近滄溟遠。三面銀光截雲斷。行經萬里無一人。立久氣如春日煖。乃知山經水注皆放哉。眼底甫覓眞源回。道逢青鳥亦不訝。見慣捧日黃人來。中

繪花翎  
黃馬挂

君不見。相公奉命安河流。怒濤如雷喧七州。此時那識鑿空使。藐爾已據天西頭。一尋其源一疏

委。同日奏功天子喜。雲梯關北望板桐。只隔地中三萬里。

立秋前一日法庶子式善邀諸同人至積水潭滙通寺泛舟觀荷分韻得學字

入門一徑何磽确。山鳥迎人如鼓樂。繞垣三折到寺樓。松樾圍堂密如幄。是時正值新晴後。破曙園亭色

班駁。張顛窗裏先揮翰。以指擘牋如可學。卷頭祇寫波一層。已覺清光動榷桷。苦唵尙獸人聲雜。逕上高

枝與商榷。何生入座先邀客。後日出遊期可確。時約遊南西門外金尚書園亭坡陀高下石百堆。坐啖冰棱與瓜飴。新蓮

去葯桃芟核。客未及餐遭鳥啄。纍纍紅果堆綠陰。不問鄰家聚先撲。誰人升屋思逃酒。墻角銀衫險遭捉。

樹頭啖果人不知。風峭時時墮菱殼。碧筒盃好長三尺。荷露殊清酒偏濁。東西拇陣何喧雜。熱暑欲將衣

袖濯。趁閒拉客凌波去。忽有小舟無木榷。船頭三四船梢兩。喜得吳儂體修掣。豈惟快飲荷盤露。盤底嫩

紅時一搦。離離百頃生晚涼。此樂江南庶堪較。坐中誰復唵詩健。欲以持橈抵橫槩。弄波東去香尤迥。指

爪時驚刺菱角。潭平日落風正生。手撼前汀鷺絲覺。

法學士以康熙己未鴻博前輩徐嘉炎等崇效寺雪公房探梅詩册索題爲賦一律

棗花寺裏看花日。我後諸君祇百年。見說雪公疑古佛。却驚梅榦亦飛仙。馬蹄聲冷春三月。鴻爪泥留尺

五天。莫晒阿儂題卷末。後來應又作前賢。

卷施閣詩卷第十二

黔中持節集壬子

八月十四日闈中奉視學黔中之命紀恩八首

手披口誦日巡環。清福誰言不等閒。却愧主恩原過厚。校文纔了許看山。

未妨旬日緩征程。官閣西偏瑣院清。時居會經堂西八百孤寒倘回首。使星猶傍玉階明。

學荒寧好作人師。心賞偏教下筆遲。日向一堂橫處坐。沉思不異課經時。

二十三人說聚星。三主試十八同考及內收掌二人共二十三人橫排几案做屏櫺。諸公僻事勞相訪。我尙應慙劉石經。

一紙除書下九重。凌晨傳徧棘闈中。神仙亦有升沉感。閑向瑤階說杜沖。時分校十八人惟余及江西李編修傳熊奉視學恩命

箱擎甲乙卷縱橫。宵漏沉沉入五更。忽得一篇勤擊節。却逢紅燭語分明。俗言燭花語為吉祥

七尺筠藍手乍拋。舉子入場例攜竹藍貯什物竟攜文筆試同曹。官資深淺由君較。坐中有言科分深淺者是以及之只我前年尙白

袍。姓名題向榜頭遲。短李才偏噪一時。填榜畢本房頗有知名之士纔欲解顏先下淚。孤兒十載已無師。予少孤從太安人下世已十七年矣

姓名題向榜頭遲。短李才偏噪一時。填榜畢本房頗有知名之士。纔欲解顏先下淚。孤兒十載已無師。予少孤從太安人下世已十七年矣。

九月十六日次子盼孫殤

一病經旬朔行蹤爲爾遲。如何束裝日。却值蓋棺時。檀楚威初斂。予督課參苓命不支。九原翻羨汝。先得

待重慈。兒爲太安人所愛

臨發志感

萬里初持節。經旬屢斷寬。受恩原色喜。念母忽聲吞。負米程非昔。傳經席尙溫。明明昨宵夢。親見倚閭門。

蚤發良鄉小雨

村雞喔喔五更餘。馬陟坡陀步轉徐。昨日晚涼翻急雨。滿堤黃葉似遊魚。

良鄉道中

我行雖值秋。氣候已冬月。尙喜天宇溫。風霰猶未烈。濛濛遠道開。溼光楊柳綠。盡初生。黃歎鄉。豈獨民無業。樹底饑鳥亦餐葉。

早發涿州

寒夜雞失晨。馬嘶聲愈警。十籠銀燭輝。遠遜殘月影。

由涇陽驛早發至望都縣小憩復抵清風店

早發涇陽驛。兼程日未西。力疲山縣馬。聲短戍垣雞。淀落雲千頃。秋成菜百畦。傳餐吾自愧。車下有饑黎。

蓮花池募訪汪修撰如洋不值留束一律

豈料塵千尺。猶留水一方。風沙來數驛。烟雨忽橫塘。漿仄開波暝。星圓蓋樹涼。主人何處在。雙雀入書堂。

趙州雨花庵小憩壁間有雍正三年吳少宗伯襄題句和者甚衆亦用其韵作一首示菴僧滿坤

一菴當孔道。終日鐸鈴譁。但願土宜麥。不須天雨花。乍醒完縣酒。頻浣趙州茶。知我南來客。勞勞問九華。

宗伯白蓮九華山人故菴僧詢及之。

邯鄲題呂祖祠

兩年前尙一書生。持節今看萬里行。自恐功名亦如夢。漫逢人說是皇程。

自柏鄉至磁州道中雜詩

一日行兩驛。所苦乏昏曉。十日歷數州。尤愁值僵殍。眼中過百井。生計殊草草。閭邑雖尙盈。歡顏抑何少。日斜楊柳外。一一閉門早。驛亭依北郭。路斷垣亦倒。吏僻供億困。慙此山縣小。僮僕有人心。宵餐不能飽。昨日馳縣東。今日馳縣西。屈指兩月中。萬里積四蹄。我願騎馬人。惜此馬力疲。渴引就水源。行無使長饑。此寧欲市恩。體物或庶幾。廩吏慘不仁。鞭撻詎有期。我詩寫驛亭。墨淡字亦欹。用以警牧民。危言匪無稽。十里一驛樓。三里一堡房。塗皆列五軌。楊柳踈成行。持較江以南。地方殊太荒。行者色苦饑。居者無餘糧。岡原何高低。土脈鬱不揚。洺水旣已微。滏流庶湯湯。欲著水利書。俾引清濁漳。越俎倘代謀。何人宦茲方。



北風連晨來。節候已冬月。荒荒野燒紅。補此炊烟缺。人家林木外。氣象何凜冽。饑來聊飲水。乾糗苦時絕。誠知年歲歉。生理亦殊拙。道逢駝背叟。引與話清切。辛苦無他言。惟祈一冬雪。

道中寄真定邱太守學劬

雨花庵內柏林中。太守文章老更工。得句便思勤寄與。郵筒今變作詩筒。

湯陰道中簡管同年世銘時在河南撫署

強半詩從馬上成。孤吟不覺過層城。人因入洛三年別。天許看山萬里行。尙喜石交難割席。若論子舍各

沾纓。時君方居憂夷門東去繁臺路。明日知君望遠情。

衛輝行館憶己酉春計偕北上阻雨于此一日逆旅主人尙識之

臨街樓上雨縱橫。三載重來感客情。莫訝馬前雙節引。道旁還識棄繻生。

早發鄭州

此地通河洛。車聲徹旦昏。適逢秦歲首。來過鄭時門。百戰荒原在。三椽遺愛存。謂子產祠土垣青不斷。一綫上

朝暾。

鄭州十八里舖

連閭擊柝破林昏。候吏迎人過一村。無數鵲聲原上起。日光濃塞戍樓門。

自鄭州至新鄭道中作

鄭州及新鄭。百里劣不足。程其土色堅。乃可礪剛鏃。森森秃邱阜。厥性不宜木。行過郭店驛。益覺欹地軸。土門何陰森。岡隴愈回複。出如囊露穎。入訝車脫轍。是知名函陵。曾不異函谷。前行泥沒髀。後矚塵眯目。危橋經洧水。我馬行始速。十里脛山青。原田亦輪綠。

早發新鄭作

脛山月落尙有星。紅燭亂注幽禽驚。坡陀逼仄若行巷。楊柳缺處天初明。濛濛豈獨衣垂霧。點滴初明馬頭露。天寒十月已有梁。無假縮足升車箱。

將至穎水橋

高原日午露初收。紅葉踈林尙帶秋。岸勢欲南岡自北。一條清穎向中流。

十一日暮抵襄城行館作

龍陂山色參天半。城內石坊高插漢。昏時騎馬出南門。烟水微茫欲無岸。沿橋南北皆石堤。鋪岸月色何高低。排空忽奏軍門樂。驚起大魚波面躍。

抵南陽行館。蔣表弟青曜自舞陽來訪。因邀至前驛。共宿談次。出行卷索題爲拉雜書此。并以志別。白雲谿之東。書屋名團瓢。君家屋東偏。小巷走北條。酣嬉少年遊。厥性誰最豪。我齒加長三。賭跳欲競高。

阿母愛汝深。縱汝塾屢逃。壓袖十數錢。日市倪婆糕。上樹或偶閒。墻東紙鳶飄。阿定與阿馨。屈指無汝刁。光景若目前。歲月忽已遙。自余爲孤兒。怕與親串遭。往事一縱思。痛極祇欲號。十年三值君。京洛及漢臬。情話苦太長。日短繼以宵。今作萬里別。離懷益蕭騷。爲汝設一筵。環之以兒曹。汝姊亦不眠。頻將燭花挑。袖中出短圖。灑落白紵袍。頽松兩三株。日午響怒濤。不飲顏亦紅。唵聲激林梢。鬢豈類禿鶩。須亦磔蝟毛。欲我作一詩。爲汝略解嘲。前餐泔水頭。樂土願久僑。我意乃不然。欲汝返舊巢。庶幾三徑中。剪此蓬茅蒿。他時我歸田。與汝頻招邀。投老暇日多。歡悰續垂髫。支木斗拱間。勻甌補堂坳。盆池益栽荷。更植千葉桃。因君夢還鄉。小立紅闌橋。我醒君已行。雙淚頻頻拋。

王大令復以雪苑消寒集屬題。因憶甲辰乙巳間。與大令同客西安。畢尙書師幕府。亦有此集。預其會者。吳舍人泰來。嚴侍讀長明。賈上舍元模。莊通判斫錢州。倅坵朱秀才燿。徐布衣堅。蔣縣丞齊耀。王文學開沃。孫比部星衍。凡十人。今甫八年。存沒相間。不勝懷舊之情。爰作一篇。跋大令集後。并寄尙書師武昌。

憶昨三冬飲。誰如十客閒。嚴吳歸地下。王賈散人間。別有神仙侶。偏淪簿尉班。謂錢朱雲稱久疾。孫楚亦

長鯨。避債媧山側。莊謂逃禪胥水灣。徐謂襟期總霄漢。遊戲偶塵寰。醉每忘階級。狂寧避謗訕。別來經歲月。遙

隔萬雲山。吾子官初達。高齋客乍還。一編沿故事。百首許重刪。驚坐名原振。陳明經雙登樓賦早嫻。勝遊

何灑落。逸興與躋攀。水碧圍衣帶。峯青鬥髻鬟。嘔心憐句好。握手恨緣慳。我愧持雙節。行將化百蠻。凌門

欣咫尺。謂尚書師在武昌。沔水歎回環。屬有同堂誼。時方子雲孫香泉皆同在幕府。都愁會面艱。感情抑抑。懷舊淚潸潸。爾日風多厲。相思月乍彎。持牋不能寐。已恐鬢添斑。

夜至林水驛

薄醉馳三驛。迷途轉數岡。岸藏茅屋小。村入密林長。水鳥依沙白。天星映月黃。依微有漁火。此景是江鄉。夜抵呂堰驛。因憶戊申八月與方五正澍赴武昌。阻雨于此。却寄一首。時方尙在武昌節署。歷歷經遊所。明明美語溫。半廊斜礙砌。雙榻小依門。隸覺饑年瘦。燈憐雨夜昏。思君幾回喚。恐有舊時魂。

樊城

樊城三萬戶。美語徹晴江。帶得斜陽影。都開臨水窗。養神沿楚俗。吹笛雜吳腔。正好衝風渡。漁人盪漿雙。涉漢欲至峴。首與丁誤輿。入九宮山時。日已將暝。因小憩而返。

山光欲雨江欲晴。雲黑復白波微明。此時擊楫涉江去。薄暝始向前山行。林梢一抹斜陽色。高下山礮一千尺。雲中道士來遠迎。語不分明指碑石。纍纍林果紅一山。傾耳祇覺禽聲蠻。道旁礫石削如鐵。山溜滴瀝苔花斑。沿岡久立怯北風。送客出戶聞敲鐘。昏江棧棧水聲起。却喜一星明舵尾。

羊杜祠

拍手兒童送遠行。荒祠重到轉欷傾。金環倘識生前事。石碣誰爭死後名。偶爾折肱成素志。居然垂屨戮

遺氓何如祇學山公飲。日日高陽未解醒。

宣城

一路沿江轉。隨帆到郭門。燈明小河集。縣古大堤村。欲飲宣城酒。偏貽京口尊。是夕署縣事。楊君餉京口百花酒。壁間詩

句在三復憶狂孫。行館壁上黏余及淵如聯句詩。

將至荊州先柬太守崔丈龍見

昔年判鄖鎮。昨來佐臨安。我皆騎驢來。訪舊河之干。痛飲曾幾時。丈人復原官。君前守順慶。緣事左遷。近始復原官。郎君昨

來稱使星。次者近復成明經。劉綱夫婦鬢猶綠。往往聯句開中庭。黍前五輩吾皆識。阿四形疲阿三瘠。因

君我復念存亡。痛哭東山謝安石。君爲尙書錢文敏公。增是以云。我今行役敢厭遙。昔者司寇馳星輅。相傳一日行五驛。

腴肉總向忙中消。稜稜執法原無礙。過峻差貽後時悔。王令先悲少子仁。鄭公幸有孤孫在。此州地大甲

楚中。城險況值江流衝。五年民氣未全復。所願吏好年常豐。尙書用法公施惠。法立民方識慈愛。但使遣

黎說有瘳。何妨大府稱無害。武昌欲往道苦迂。我視荆郢兼程趨。心知尺一定相迓。果有驛使來通衢。談

深夜久殊難別。駐馬卸裘謀久歇。酒酣試問座上人。量好何如浙西日。我持使節難久停。明日送我西南

程。匆匆更作道旁語。殘月欲向衣邊明。武陵南去桃源路。回望荆門在何處。一山歷盡復一山。不到青天

恐難住。

自麗陽至石橋驛道中作

移居欲避千章木。山鳥山人齊出谷。高低一月共苦辛。高處結巢低蓋屋。客行望谷如可遊。前欲涉水愁無舟。茅齋了了見烟火。笑語自共谿聲流。背岡北去行難速。嬾向溪東石橋宿。三更入門甫卸裝。頻起開戶看山光。寺鐘初鳴鵲聲起。月墮長林三十里。

早抵荆門州憩象山書院

殘月已墮風淒清。水綠自向城頭明。冥濛山徑開一綫。籊栗吹處幽禽驚。吟堂豈獨山堆案。堂下水聲還拍岸。芙渠雖枯菱葉黃。枝榦尙帶前時香。周堂綠竹復千箇。惹我百徧唸回廊。堂虛無人水聲急。雀到空亭與長揖。出門數步馬忽驚。却訝樹頭山欲立。

本欲詣武昌以驛道迂回不果行次建陽驛三鼓得尙書師急遞以適欲至襄陽閱兵爲先期行二日約相會于鍾祥塗次時亮吉已越行二百餘里勢不能回車再圖握手夜起不寐輒成長句一篇却寄

從公十年遊。八年居幕府。離公祇兩載。月僅二十五。

余自己酉春從武昌計偕北上。至壬子三月尙書入覲都門復得握手統計別時僅二十五日耳。昨

年公入覲。復得旬日從。自喜師弟緣。時可意外逢。慈恩縱愧傳衣鉢。幸出公門早持節。監監百驛敢厭遙。更喜路從荆沔出。才過新野縣。已得鄂渚棧。橐鞬一何雄。控馬拜道邊。襄陽日訪閑僧寺。兩日待公書不至。酒酣上馬嬾出城。縱有峴首愁重經。大堤南去方逾夕。夜宿荆門建陽驛。三更門外遞急郵。失喜讀罷

翻成愁。偏憐此度緣難巧。急遞書遲我行早。自悔王尊叱馭忙。欲從墨子回車好。細思會合亦有期。公待入相光綸扉。同門數子各清要。謂邵二雲孫淵如我亦官滿歸京師。城南奕奕鳴珂里。早侍趨朝暮歸邸。三館讐書我定隨。百篇脫稿公應喜。此時憶公因不眠。起視落月行檐前。曹騰却夢旌麾過。只隔武陵山一座。抵荊州。

早行荊南展然喜。碎甃砌塗三十里。渡舟復有兩下篷。恍若置我秦淮中。濃濃水綠低飛鳥。近郭更聞人語好。差憐屋瓦碎不完。昨者江浪衝城垣。危樓傾欹石坊倒。城北至今人戶少。爾來差喜皆有年。移戶漸入居城邊。長衢似砥房廓寡。願飭官窰急燒瓦。此州歷歷鎮重兵。戶號十萬田疇盈。災傷元氣亦易復。吏不擾民民已足。宰官近我勸駐驂。導訪息壤來城南。荆臺遺跡渺何處。但見蒼茫接江樹。西琛南貝夾道陳。簫鼓一城稱賽神。君不見新城峨峨堤屹屹。我仰廟謨同禹烈。城工及堤皆奉勅建

至公安寄崔三景侃

十年五度手頻分。猶喜常時入夢勤。行到驛亭殘月出。一叢修竹臥思君。

澧州城外渡涇澧諸水作

澧水綠如玉。水清魚露目。沿波惹得鶯絲忙。高下日光飛不足。紅霞欲渡波攔住。一綫分明接天處。涇波入澧澧入沅。欲向何處尋江湍。殊方晚稻收偏早。黃葉自零花自好。行人十里香筍蹊。踏得涇陽岸頭草。

宿澧州行館夜雨因東州守方維祺

昨來行館宿。蕉柏雨縱橫。更漏分明處。思君吏術精。一麾今出守。三拜昔知名。他日涪陽浦。彌添望遠情。

至清化驛

澧州六十里。行抵清化驛。其中涉三水。淺者亦沒膝。前旌及行李。半响渡方畢。盤盤升頰岡。轉轉歷黝穴。肩輿忽高視。天上炊烟出。回頭戒僕御。至彼謀久歇。初日出縱高。杉林帶殘月。晴光時破碎。宿雨明復滅。岡南勢稍坦。我馬行已疾。手劈樹上橙。聊先慰饑渴。

大龍驛道中

五塘汎南塗。百折二十四。岡斜刺日。大岡如龍小如虎。復有如雷水聲阻。肩輿力盡跨馬行。屈指籠燭當相迎。溪風蕭蕭生馬尾。一綫日光馳卅里。

桃源行

沅江水碧疑無岸。一路布帆飛入縣。藍輿偶憶義熙年。三復陶公一篇傳。我知栗里宅。卽是桃花源。武陵路遠不須涉。咫尺好上潯陽船。陶然酒後詩成偶。可識漁人亦烏有。試問千株洞口桃。何如一帶門前柳。北窗日共羲皇遊。眼底尙恐無般周。何言秦漢與魏晉。卑論不欲驚時流。華胥以上風尤厚。事隔千年已非舊。雲中雞犬尙有知。肯出淮南八公後。但書甲子仍作詩。此意亦有誰人知。永初開國是何世。不若洞



裏忘年時。沉沉遠岸楓林出。恍若溪桃欲成實。波流千折樹百盤。再轉或恐逢真源。

夜抵桃源宿江上行館

澧水旣已綠。沅江流益清。三更鑑江波。波影逾空明。昨宵雨足山流黛。添得江波幾層翠。帆空若行明鏡中。鏡裏對舞山禽紅。涉江何處江波狹。欲向回塘問鸕鶿。鷓鴣忽迎殘月飛。扇得水波流向西。溪深綠暗途尤阻。纔見郵亭一燈吐。三層閣上客少休。閣底自任江聲流。虛窗閃白疑人面。却是布帆來一片。

桃源行館夜起

明知宵漏竟。開牖光尙黑。萬木裹一亭。森森日難赤。瞻西殘月影。微露遠山碧。高低飄溼翠。不放白雲白。江溜昨有聲。回汀沒三尺。

涉蘇溪

蘇溪何彎環。中有百家屋。出間臨水坐。炊飯白如玉。樹頭山果殊酸甜。祇向縣中求食鹽。涉溪前行馬礙脚。水鴨多于枝上鵲。

過長板塘進山口作

甫過長水塘。山色當晝昏。林木旣回翳。湍聲急東奔。樹杪出數家。竟闕東出門。非徒便趨麓。藉可瞻朝暾。欲習筋力勤。絕壁居子孫。昨搆木百章。營巢畜雞豚。空處立一橋。下倚松柏根。我渴趨此林。索水貯瓦盆。

箕踞進一瓢。詎識官長尊。戒吏勿使呵。喜彼風俗淳。

武陵行館飯畢戲作

飲溪何其涼。佐以稜稜薑。自常德以上水性過寒。每食必啖薑少許。養魚何過美。芼此青青菜。溪田晚稻亦有香。山果嫩綠橙。

生黃。蠶腸似荷山神憫。爲我一林生瘦筍。

新店驛夜起

四更林梢明月出。光甚暫。山禽影落波。反使遊魚啖。欲攜雙艇子。遠至谿南泛。離岸山雨來。衝波閃燈暗。出新店驛雨暫止留東李學使傳熊

積晦殊難霽。山靈倘待君。料量三日雨。留得一溪雲。高閣燈初燼。東峯曙欲分。猶餘竹間露。衣上灑紛紛。入沅陵縣界雨中遠望壺頭諸山

沿溪雨猶零。上嶺天始曙。帶得桃源雲。來穿沅陵樹。濛濛竹木覆。一山不見馬公穿岸處。男兒出身須立名。足底萬里遊行輕。雖然垂老亦宜審。當日何意輕南征。君不見二十八將登雲臺。馬革獨裹公尸回。論功我意亦未允。不特薏苡遭嫌猜。蕭蕭谷口松杉直。怒幹都抽一千尺。精靈倘化蜀山蛇。夜夜山頭望京

國。相傳穿岸處有一巨蟒。卽公精靈所化也。

發界亭驛

昨宿新店驛。今居界亭谷。試看黔中山。久已離地軸。藍輿不至天。恐未得歸宿。雲中數騎出。北斗貼馬足。我驚一回顧。詎是後來僕。濛濛露迷眼。背上北風肅。高處難久停。身心願時束。

廿八日五鼓師子塘西見殘月

如塵似霧影溪流。惹得行人馬上愁。却比初三更消瘦。曉星一箇占當頭。

過揚武堡升嶺

我方下嶺謀少休。前騎又復穿雲頭。藍輿待得土岡脊。一谷白雲無馬跡。高高下下半日中。百徧起伏隨雲峯。有時望嶺行欲及。石復離雲自孤立。半空山果紅欲然。連臂恨不如羣猿。到來始信高居好。從此擡頭已無鳥。

將至辰州先柬陳太守廷慶

到州已歷百重山。消息應知太守閒。釀酒乍迎千里客。作歌欲化五谿蠻。日邊書至顏先啓。天上詩成手自刪。爲問玉堂前度宿。可曾飛夢入壺關。

界亭驛南以山險肩輿增緯夫八名

卅日歷萬山。所幸軀未損。今晨出門望。失喜忽一哂。輿丁增八箇。繫緯筓輿本。爲言塗崎嶇。藉此力勉隄。不然升陡壁。或復致狂窘。我感郵卒意。百計致安穩。回思立身處。曾未藉牽引。茲雖憑衆力。失足亦能殞。

途同蟻旋磨。客類牛負紉。高低既相倚。曲折若施準。天路即可通。吾心尙當付。

白露塘道中

沅陵三百里。秀止萃林木。居人讀書少。見客輒瞠目。雖云枕山住。愛結水邊屋。十月溪無梁。行歌赤雙足。山深寒不至。荷榦尙芬馥。商略出市鹽。門前菜畦綠。

山行

日光沉入淵。水光浮上嶺。水日空明中。禽魚趣何永。無窮物外意。所苦人不省。魚將蘋作屋。鳥以谷爲井。飛行寧復越。各若守疆境。我讀莊周書。閒觀尙心領。

廿八夜飲陳太守廷慶署醉甚四鼓起行四十里至馬溪河乃稍醒

森森萬竹竿。日出溪上綠。涉此徑寸波。溪魚圍馬足。溪流三折忽暫停。石上戴土營危亭。茅菴一僧閒誦經。烹茶餉客酒始醒。指途南行入峯缺。壁陡仍煩數人曳。沿山松竹忽無聲。一嶺蘆花白如雪。將至辰州道中望大小西諸山作

施黔江上望山路劣纔通。天壓松杉綠。雲連橘柚紅。緩行長水驛。時見伏波宮。入沅陵界居人祀伏波甚虔我亦無他願。書藏大酉中。

初一日未曙渡辰溪

一州及四縣。皆以水得名。凌晨渡辰溪。天黑尙未明。臥聽柔橈聲。知較沅水平。上流一燈飄。爭渡喧有聲。輕帆觸烟來。誤向溪左行。船丁正徘徊。穿出林鳩鳴。

從山塘驛行十里至龍門塘一陡坡作

削峯峨峨天半立。白馬白雲爭路入。有時雲向馬首飄。馬足亦與雲爭高。坡陀直下蹄難駐。雲始離山欲升樹。乃知馬亦戀白雲。行過西坡復回顧。

渡周溪入山

沿山三日西南行。山果愈美溪魚腥。出門忘挈種樹經。靈橘百樹疑冬青。水花茫茫亦登陸。一頃寒蘆雜修竹。山危不平心轉平。馬上睡起知身輕。

十一月朔日發懷化驛與丁甚速行三十里至板橋塘天始曙

四更排馬陟山岡。候火齊明竹樹光。欲向藍輿續殘夢。鑼聲驚過第三塘。每至一塘。塘兵輒擊鉦相迎。雙溪水繞一山流。溪上冥濛薄霧收。睡起不知雲弄采。錯疑天半有朱樓。

大山頂

山頂樹樹杪人。樹底歷歷吹輕塵。回頭人復出樹底。樹上稜稜一山起。危塗似却反得前。要在絕地方通天。拋書莫关無心得。幾日山行增學識。

板橋塘北入山

五色溪光炫眼新。到來不信是蕭辰。穿林石墮偏驚鳥。出嶺雲奇欲趁人。小夢乍迷千樹橘。長吟想見萬山春。行經谷口須重問。恐有當時鄭子真。

已刻抵羅舊驛

我來羅舊驛。日已及午候。陰晴勢未分。赤白雲相鬥。須臾赤雲升。日影乃微溜。白雲復歸谷。空作一川皺。山雲本無心。人意有左右。白鳥亦喜晴。勞勞向川咒。

抵羅舊汛卽沿無水行

今來見無溪。不復憶沅澧。同此石磷磷。無流清到底。沿溪山百折。勢斷復中起。似欲勒波住。不放出山裏。魚遊戀潭曲。鳥亦鑑波喜。最羨臨水居。峯峯石如洗。房廊藏暗谷。石罅墮蕉尾。天半露一窗。知聞馬嘶起。山行至一谷。

好奇往往入雲扃。此谷樵人或未經。行到上頭心轉怯。四山綠欲破天青。

至巴洲汛無水中生。一洲長幾一里無。水至此分流復合。

無谿忽分流。水色仍可辨。洲窮溪復合。波影益蔥蒨。沿溪盤細徑。直下欲如綫。馬走北谷中。恍若帆一片。紆回出林杪。馬上露人面。同行成久別。忽復得相見。稍休厓石上。一一喚名徧。愛水故緩行。吾真欲成殿。

自芷江縣曉行

沅州出西門。頗苦歷永巷。出城卽板橋。長逾一里。上皆覆屋。馬行幾不能舉首。坊屋無隙地。覆屋不獲仰。俯行一里始出坊。欲曙未曙。星猶光。溪深谷陁。杳難辨。撲面祇覺林蒼蒼。前旌半日途疑失。數騎驚看隔山出。人行貼樹馬逼屋。上下朱纓紅奪橘。看山一路不覺疲。吐納雲氣忘朝饑。峯奇正惹人回顧。急溜偏從馬頭注。

下山至大栗塘

與丁愁上山。我意怯下嶺。步放不得停。顛危出俄頃。白雲英英鋪嶺平。誰識左右山崎嶇。行人欲前飛鳥停。勸客暫憩山前亭。一坡棱棱注千尺。直下途危況深黑。始知身世總若浮。譬若鴻毛輕一擲。

上回龍關

夕宿無谿西。朝發明山東。藍輿天半忽一折。坐處正落空潭中。心驚不敢復俯視。尙喜缺處交長松。回頭顧僕復不至。人說尙隔雲重重。行經平地願少憩。飽聽萬壑衝松風。

山行

探奇因失路。觸處總高墳。渡水雲成陣。爭山獸作羣。轉愁人跡少。渺與世塗分。一晌支頤坐。沉沉靜見聞。便水驛行館。見水仙。一盆榦長三尺香。亦較江鄉者馥郁爲賦一絕。

榜山臨水幾人家。下馬匆匆感歲華。牽得客懷無別事。芷江驛裏一枝花。

騎馬行

我昔居里門。騎馬如騎龍。屏息不敢言。急復掣馬馭。十年作客奔馳急。與馬誰知日相習。風陵渡北中條西。百里風馳入安邑。謂赴黃仲則之喪。一日馳二百餘里。即今騎馬如騎羊。馬亦步步隨低昂。愛之不忍復鞭策。一日常教餘馬力。朱纓纍纍玉鞭把。我馬力常先衆馬。舉鞭問僕笑不休。何似吳下蜻蜓舟。

渡無溪士人名大河。

溪亭皆有屋。分半水禽巢。昨夜前灘漲。遊魚上樹梢。

無溪道中

我行十日歷五谿。馬蹄不南卽向西。凡渡澧沅施辰無五水。山深愈轉塗愈出。令我日日看山疲。臨溪飯罷行尤急。

轉眼斜陽欲追及。亦知此地近西垂。好擇一山看日入。

將至波州汎行入一山轉轉不得出。林木甚美爲小憩少頃乃別。

沿溪北折山如夢。濃綠堆林欲無縫。忽然樹杪一綫開。穴底倒射天光來。一村松竹復疑繪。鷄犬亦雜居樓臺。林陰染黛山成幄。我酌水泉疑漱玉。君不見。炊光上與雲頭平。烟火亦徹仙人局。他時縱復得霞舉。誓與此山通性靈。僕夫催行三十里。我坐松陰不能起。卜鄰結宅亦虛言。但假十日山中眠。

波州汎南上山



東峯視西峯。已與碧天界。南峯更孤迥。意乃出天外。峯頭一峯雲不收。似向天外仍回頭。前山行完後山阻。我識天公用心苦。六曲屏風界黔楚。

將至大魚塘山行

水聲湍急處。山亦讓溪流。只此萬峯隙。何來一葉舟。石潭魚瑣碎。竹徑鳥鉤輻。正覺孤吟好。黃梅發嶺頭。過風木塘有感

及此塘西路。連岡百折餘。徑荒飛野馬。名古泣臯魚。人說官資好。吾傷祿養虛。望原徒步過。不忍坐藍輿。曉發玉屏劉教諭嗣武陳訓導秀升率諸生相送輿中口占六首示之

一例青衫馬首迎。羅施山半見諸生。眼前指點爲文法。似此峯巒始不平。

童年敢說有師承。一事如今記尙能。堂比雪深三尺路。不曾辜負讀書燈。

予少孤蒙太安人授經

潛修莫恨閉門遲。倍惜分陰是此時。却喜十州民氣愿。殿頭早荷聖人知。

召見日蒙諭以黔省士習淳樸須勤爲教導

開帖堂碑奈俗何。烏焉三寫已成訛。子雲門下生徒盛。誰比侯芭識字多。

一字離音總不成。黔音差較楚音清。諸生莫慣稱天籟。好屈周顛學四聲。

我無奇術報殊恩。欲闢當時通德門。他日講堂勤問業。六經誰似鄭公孫。

發玉屏縣

玉屏及清溪。五十里不足。其中山雜沓。頗覺寡平陸。寥寥依斥堠。時有幾家屋。西南綠吞山。雲斂日光縮。猶欣枝上竦。土性無曲木。山凹諸土著。居各面林麓。邊徼歲屢登。稍聞事儲蓄。深林鵲聲喜。時得啄餘粟。前及羊坪塘。村烟已成簇。

山行

出山泉百折。殊有戀山心。澗水復時落。重源何處尋。紫藤垂岸陡。白鳥渡波陰。臥聽灘聲急。勞勞自古今。將至漫溪塘。

漫溪途猶危。絕巘立斥堠。心疑不能到。再轉谷已湊。遵坡何洶洶。雲出與石鬪。不知雲起落。但覺一山皺。前行塗轉晦。時見涉波獸。濃綠復萬重。密林無正晝。

將至清溪縣上嶺

障坡千萬樹。不覺有山城。忽訝鳥巢外。時飄人語聲。撥雲看塔峻。映柳識橋橫。及渡清溪水。方知水色清。清溪行館見梅一株花甚爛漫喜而有作

風利如刀雨若梳。一林花密竹蕭疎。墻頭更有山無數。疑是江南二月初。

何曾驛使解封題。空向長安醉似泥。三載別來惟兩面。白雲溪外卽青溪。都門不產梅。惟庚戌春初。計借北上。蔣大齊燿錢我于舍南竹

屋時老梅適放數花。然不及此十分之一。

夜移瓶梅入紙帳。伴曉起香愈酷。烈復賦一首。

自來荆郢南。山路愛曉行。馬蹄慣踏紅燭影。送盡殘月聞鐘清。偏憐昨夕山窗裏。寬滯踈香不能起。風疎雨薄送出城。猶執一花籠袖底。

發清溪縣至梅溪塘二十里。沿無水行。山徑逼仄。幾不能上。

盤山道險幾不通。大石礙路如癡龍。灘聲愈急嶺愈峻。嶺似不放溪流東。一卒引馬。十卒引輿。頗念衝途人。不得常安居。兒童生小登山易。履險真如履平地。百錢縛肘餅繫腰。口吸山泉詫甘味。梅溪才過復小溪。十里肩上藍輿飛。書簽倒落茶具剖。只有梅枝猶在手。山行望舟始覺平。舵樓客眠尙未醒。君不見。行經平地僕夫喜。一葉舟驚突波起。

渡水至焦溪行館。山水環抱。林木尤邃。覺嚴灘剡中無此奇勝也。

山百折。溪百回。到來山水欲俱斷。一葉忽破青冥來。南津樓。北津樓。津樹對出雲分流。嵐光密處山花好。十月猶青堤上草。沿溪一帶飛綠烟。偏向人家鏡中曩。人來岸南立少時。岸北征馬聞驚嘶。行人衝寒馬流汗。馬影度波魚忽竄。

盤石塘

黔中行兩日。山險止梗道。東西無起訖。所苦寡阨要。行經盤石汛。石脈始森峭。奇峯破天出。頽石突若廟。

排空立一徑。萬古不得到。中疑穴靈怪。縷縷雲出竅。飛瀑復百重。誰能抉真奧。生平好奇性。失喜忽一咲。尋路欲出山。鷗鷺恍前導。

侵曉入太和洞

轉覺岡巒峻。難容地脈回。客方升閣望。山欲渡溪來。市郭燈初暗。帆檣霧未開。半時心境澈。孤坐此層臺。  
上油榨關

一石橫絕天。一石橫塞地。盤空兩巨石。缺處復鋒利。雖云置營汛。劣僅入隻騎。前經絕壁下。轉覺人馬細。東南初破曙。一縷入雲氣。大息撫鳥巢。吾形願同寄。

下關逢驛使。却寄張同年。問陶

時張方由蜀入都

君來蜀道如天上。我渡黔關入地中。今夜相思倘回首。各從北斗辨西東。  
相見坡

小相見坡折不休。三起三落時句留。藍輿正對我來路。迎面不復勞回頭。盤盤路向雲中辨。七里來尋大相見。石古途危細如綫。馬頭亂撥雲濛濛。馬上人面猶雲中。東西對立峯何陡。天半驚看一招手。馬頭已西人面東。隱約尙見坡竿紅。飛泉攔路復衝出。人面始同坡面隔。下坡十里行轉遲。縱不相見還相思。還相思。不相見。我願天下人。皆如此坡面。東西縱復隔浮雲。一日之中時隱見。或云會面數則離。此則仍復

分東西。雙坡近。又判兩縣。大相見坡屬施秉。

亦若古者好友百里愁分攜。乃知在遠仍如邇。我念神交倘如此。劉

家塘畔作一詩。火急封貽二三子。

偏橋

重鎖當年建節旄。石闌千步尙迢迢。江南到此川程絕。想亦應名萬里橋。

天梯關在施秉縣城內。

樓閣排空雉堞齊。霓旌高閃夕陽低。萬山過盡疑天上。不信前頭尙有梯。

二鼓至飛雲巖。秉炬上巖略周覽。卽回至養雲閣。宿平明獨行上巖。并至聖果亭。雲根泉等久憩。

藍輿小睡已二更。半里外響飛泉聲。入門一徑生虛白。是石是雲同一色。前行百級卽少休。秉炬却憩巖西頭。征衣暫付山童滯。先煮山泉與山款。自來京國夢始寒。枕上一夜鳴飛湍。平明待得雲全出。始向山根搜石窟。乃知雲亦無石奇。石轉覺瘦雲嫌肥。纍纍却似枝垂果。一朵峯尤奇。一朵飛騰只在人眼前。不遠拔地思升天。遵巖欲及仍難及。石却戴松空處立。玲瓏百竅生百松。飛起松亦當排空。松身夭矯本若龍。會見汝植天門中。須臾日晦光開闔。雲復飛來與山合。出門雲動石覺行。雲脚送我來黃平。

巖側古梅一株花正放

碧澗層層暗綠苔。石闌干畔久徘徊。不知樹向巖中出。祇覺香從頭上來。新月正宜當檻坐。高枝疑欲待

人開寺僧云今日花始盛放泉聲石色都成戀。便繞花光亦百回。

黃平州西見日出

黔中行兩日。天短日苦陰。玉屏及清溪。尤若日暮行。黃平州北逢初七。甫見平衢流赤日。車前歡喜到八騶。馬上曝背寒威收。宜娘山外風尤峭。一半花苗出趨廟。紅綾肩上羊一腔。七尺花幡引神轎。相違百里風士殊。山前老苗亦讀書。怪來門帖宜春字。明日欣逢日長至。

至日發重安江行館憶京師早朝諸君子

過盡州西劣嶺峯。重安江水綠溶溶。獨從萬里橋邊宿。却憶千官闕下逢。三殿左趨燈影密。石經國史諸館皆在殿左五雲高捧日華重。幾年此夕朝天慣。猶向山齋數曉鐘。

渡重安江上嶺作

三里與江背。泠泠響尙聞。前經百重樹。始隔一川雲。天向松梢暝。途從石罅分。寄書情較切。空有雁成羣。入大風洞半里。阻水不得進。

途行抵清平。山不秀而樸。盤盤十里外。石脈已潛伏。巉巖當面出。劣欲轉地軸。停輿入欹徑。風氣早森肅。泉流四飛注。細石時礙足。絕險劈一門。途寬不紆曲。東南諸洞穴。所苦地維促。茲遊庶森爽。敞及萬間屋。恍若古達人。推心貯人腹。渾淪含衆有。不太別清濁。巖奇列千竅。尙未及雕劂。乘虛一燈入。百怪露人目。

風輪覺森森。大氣自回復。寒裳行欲進。捫黑若相觸。陰房長入夜。日月光不燭。狂思傾海水。一洗龍霧毒。  
東西靈境闢。真見列松竹。方志云洞深可廿里許昔有高一廬者乘炬深入忽見天光豁然洞外松竹森列 暝坐一縱思。莓苔照人綠。

晚晴自白泥塘至楊老驛山行

才收薄霧卽新晴。似畫溪山馬首迎。添得白雲成睥睨。連岡真似古長城。  
白泥塘北石零星。下坂難教足暫停。幽絕山村幾家屋。晚霞黃處炊烟青。

宿楊老驛

兩山中間夾一驛。驛路如繩盡高出。山凹忽現數百家。瓦屋鱗鱗若居穴。下山欲向橋南住。水碧堤青渺無路。更殘繞砌空百回。新月不過山岡來。

度響琴峽

排空石筍立一山。人向筍上行。變環藍輿舍。此卽無路危。在皆從筍尖步。行人至此亦掉心。空有細響同鳴琴。琴聲愈急步愈促。一跌幾將陷山腹。我行萬山無此奇。過此一折山仍夷。君不見危塗莫謂無人到。此是康莊通六詔。

黃花坪道中

黔中雖易雨。一雨亦易晴。溼翠甫欲收。早喜霞光明。山花亦時開。助以百草馨。最好山徑奇。一轉一曲屏。

才過清水塘。已抵黃花坪。回頭望諸山。復覺雲冥冥。  
冷溪塘

四山盡高出。中陷若一井。居人欲入縣。數里方及嶺。松櫟若井闌。沈沈閉升景。塘兵瞻導騎。半日已引領。  
樹杪百尺樓。樓前柝聲永。相將過溪去。溪水清鑑影。太古雪尙留。何嫌水光冷。  
牟珠洞

屏山天半列作屏。下有洞壑藏真經。到門口缺若建瓴。一徑斜入天光青。飛空真人倚踈櫺。法象奇古忘  
年齡。千百萬態韜真形。旋螺三折步不停。石上戴石何瓏巖。巖深無人杳冥冥。石腹天矯參龍形。中陷若  
穴堆蜻蜒。凝脂點乳流素馨。石嫩可指膏猶零。恍如鴻鐘撞寸莖。絕巘往往揚空舩。有聲無聲難可聆。偉  
哉造物實至靈。鑿出雷斧穿飛霆。另闢一洞居明星。小者如盎粗如瓶。否亦或是仙人庭。百丈高處懸飛  
鈴。更有一曲雕雲駢。馬前兩兩排仙伶。馬旁力士疑五丁。後來一人殊伶俜。側首鬢影光熒熒。回身匿避  
如尹邢。千年老雀初刷翎。絕壁萬丈懸狻猊。或如空原萃鵲鶴。或如高枝綴蜻蛉。如人狒狒似豹鼯。回毛  
宜乘細角鷹。形奇態詭孰使令。久視方得心神寧。稍南一厓結作廳。嫩綠錯雜同回汀。碎影點出踈踈螢。  
一門森森列萬釘。五色變幻形蛤蜊。巨者恍若浮江萍。山南如坎北若陘。幸有巨石層層回。萬古不入蛟  
龍腥。靈風蕭蕭雨濛濛。晦朔惜乏知時莫。來遊如夢出若醒。刻石欲作山前銘。我留一言神倘聽。巨斧徑



欲鑄鈴幣。一綫裂處開明廷。從茲光怪不得局。正午赤日來亭亭。時議欲用四川開鹽井法。于巖頂鑿一穴以通日光。  
過新安塘末三里見絕頂一關高出鳥道。卽隴首關也。延回行半日始至。  
才過新安塘。未抵壠首界。嶺樹千重復萬重。驚看白道懸天外。計程七里行半時。我意尙覺來何遲。回頭  
忽驚飛鳥墮。隔却白雲穿不過。

晚至龍里縣

清絕山城祇百家。城門樓上晚吹笳。猶餘溼翠收難盡。商略明朝作曉霞。

早發龍里縣道中雜詩

濛濛四山雨中。有一山晴。漏得朝曦影。林鳩復怪鳴。  
絕巘疑無路。雲穿一徑斜。野花隨意放。不復有人家。  
山樵值山樵。陡壁亦相揖。濛濛雨不晴。莓苔綴圓笠。  
牛羊識分界。不復過溪隈。只有谿魚好。斜穿石罅來。  
全家三五輩。種藥此山中。開牖摘生果。朝霞滿袖紅。  
誅茅搆一亭。遠近皆可徙。因貪聽溪聲。移入前林裏。

觀音閣

溪聲流不盡。三折到橋南。初日紅猶斂。殘冬綠尙酣。乍疑僧入定。眞與佛同龕。北閣休教掩。衝寒性所耽。  
小除夕祭詩作

南行逾萬里。小歲入三更。爆竹驚心碎。桃花照眼明。時桃杏及海棠諸種並已盛開祭應遵舊例。醉復盡餘觥。笑向兒曹語。今年帙已盈。

除夕寫歲寒圖貽徐太守日記

樂府新傳二十篇。太守近勸事定番州有樂府二十篇蠻花斄烏倍鮮妍。使君循蹟吾能識。記得相逢又廿年。壬辰年太守官英山令時

余隨學使者至六安得識面

風光知否入春無。竹葉青蔥柳眼蘇。欲祝一番交誼永。臨溪仍寫歲寒圖。



卷施閣詩卷第十三

黔中持節集癸丑

人日登東山遇雪復攜客至黔靈山久憇

別來方十日。春色滿山村。樹矯將穿牖。峯奇欲突門。  
半城新綠影。齊上振衣岡。露濕棲鴉徑。春濃選佛場。  
我愧非安石。山真似白門。乍披天半牖。同醉雪中樽。  
松陰委曲廊。杏樹攢高閣。城中客始來。原上花先落。  
積雨廚烟重。穿雲澗水溫。馬頭山鵲噪。牛角野禽蹲。  
樹侵官道窄。山壓女牆低。馬逐雲頭上。人隨雨腳西。  
三層樓上雪。百尺樹頭花。白欲迷天影。紅疑迸歲華。  
廊長縱獨行。龕小容危坐。天上有人聲。山樵墮松顚。  
小亭三面影。清磬四時聲。樹暗藏西嶺。窗明瞰北城。  
半窗初積霰。一枕昨聞雷。時連夕臘意屏前散。春容鏡裏開。

新正初一日發筆

誰向黔陽記歲時。殘年氣候較參差。夢回昨夜燈猶永。春入空園柳已知。小病乍將人事減。薄寒聊遣酒杯支。驚雷爆竹都成陣。門外三更雨若絲。

初春憶里中諸同人

萬山深處住。忽憶海邊春。不特花香好。兼思花下人。花枝濛濛柳條長。花裏高樓日堪上。危橋東轉多坡陀。一水出城名蠡河。河流至此剛三折。亭號艤舟人亦歇。左家兄弟工煮茶。閑訪屋北疎梅花。錢郎多愁趙生矯。瘦董超然。癩崔瘦生兄弟。鄉語好。昆耶室冷畫不扃。塔影七級看亭亭。圍壺聚久清談足。小臥還繙藏經讀。蒙莊興逸不可當。來及曙色歸斜陽。一童攜錢每先走。爛醉城東市橋酒。此時十輩五客燕。兩客復住荆江邊。我頃南行路七千。遠道誰拍洪厓肩。山形盤回水迢遞。夢裏還家亦非易。作詩火急欲寄回。屈指到日榴花開。

貴陽元夕燈詞

花墅連宵爆竹催。惹他桃杏一齊開。惟餘徑草難全綠。却值山南絲雨來。西南郭外盡平疇。節使筵開百尺樓。燈火似山人似海。忽驚天半一回頭。廿家門巷一樓燈。火樹銀花夾數層。只有笛聲淒怨甚。四更還待月華升。

金鎖橋西送客回。趁人叢處廣場開。蘆笙吹徹秧歌起。逐隊花苗跳月來。

一句強半雨連綿。不信黔南是漏天。騎馬出門思鏡聽。沿街却喜說豐年。

廉訪齋南笑語譁。姜廉使開陽工射。每集同官角勝負。當筵絕技使人誇。射棚一盞銀燈上。牆外驚傳鼓子花。

花枝不異故園春。短巷長廊記却真。倚徧石闌干畔月。就中只少走橋人。

簫鼓初停坐客稀。魯巖節使以予不觀。劇爲擇日另設一筵。半酣筵上換春衣。七千里隔津門路。却有黃魚入饌肥。

古牆陰碧燭花紅。待月樓高影數重。一簇銀燈山半墮。乍看真訝下天龍。

踈楊成幄水如烟。錯認江南二月天。星月未來樓閣暝。萬枝燈裏漾秋千。

### 清鎮道中

春陰一堆紅百堆。山翠缺處桃花開。冥濛綠意石根迸。春筍昨夕聞驚雷。行人衣上泥猶濕。高樹塘邊漾

晴色。山泉日午開鏡光。菜甲花滿疑斜陽。

### 過龍井塘上坡

李花如含顰。桃花已迎笑。藍輿再轉復一岡。天外奇峯門清峭。春塘北折凡幾家。飛蓋過樹驚棲鴉。回厓

陰陰蝶飛滿。春在海棠深處暖。

### 春分日抵安平行館作

清削峯巒得未曾。峭厓馬上却肩承。山泉圍郭綠三里。村樹接天紅一層。遠道書來春正半。小樓人去月初升。商量欲待尋巢燕。齊捲疎簾喚上燈。

沙作塘西上陡坡

連聲爆竹鵲驚回。正好山南雨欲來。只有桃花解迎客。趁人叢裏一枝開。人家多住石塘西。石屋參差望欲齊。空裏鶉鴉聲轉急。山雞飛上故巢啼。

中火塘西入山

東厓及西厓。深巷密無縫。厓窮山寺突。補此密林空。行人下岡脊。騎劣急施鞵。石罅三百家。隨波綠疑動。冥濛遠天外。飛鳥忽相送。宿雨時一零。檐間杏花重。卻葢一層雲。山房尙春夢。

寒食出安順府西門校射

閉門甫經旬。芳草已如積。黃花瀾平疇。春露曉逾白。青山迎道左。濕翠馬頭滴。關圍三里餘。朝晴試騎射。隄旌紅閉野。岸柳綠窺隙。山鵠閃畫弓。林鳥占門戟。于焉心寄賞。觀者足若植。慙無養生技。敢論扶風德。聊記在蠻方。西郊度寒食。

三十日遊金鐘山

百盤升作嶺。一石削成臺。山筍高逾屋。天風響若雷。澹紅雙徑羃。新綠一窗開。正好容危坐。齋鐘莫屢催。

武當山久憩

道人侵曉初啓關。一城花光浮上山。闌干影外春陰膩。香氣依微塞空際。交鳴鶯燕殊有情。三里路中飛不停。深紅淺白看難足。葉底參差間新綠。看山百回眼轉青。山殿開處祠元冥。殿旁一徑天風墮。我借蒲團向風坐。此行訪客擬夕陽。一騎忽復來山房。傍花南行衣袂濕。花裏先聞響鳴鏑。是日彭軍門延棟約射鼓子。

初一日出南門至華嚴洞持燭入三里許

百折山已深。遵巖復千轉。山扃深萬仞。欲往怯途遠。洞門蠟炬擲兩頭。直下無底光難留。奮身一擲若飛鳥。回視偏驚洞門小。土花濛濛綠滿衣。巨石礙路如雙扉。牽衣屈曲入扉罅。飛瀑偏從兩肩下。危崖覆釜下轉空。大聲如鐘疑蟄龍。孤筇欲拄不得拄。地底陡復衝天風。厓窮路斷天愁晚。半寸燭中人復返。高低三里路蜿蜒。出履平地同登天。當時誰把華嚴說。已覺豐干太饒舌。我欲磨厓易舊名。讀書山畔藏書穴。華嚴洞外山甚秀。折而無名縣人趙氏聚族居焉。余歲試安順趙氏子弟獲榜者文武各二人。因以讀書名其山。從土人所請也。

城南十里路回環。百折烟嵐水一灣。却喜青衫迎馬首。華嚴洞口讀書山。是日直詣生釋菜回。

初六日發安順作

昨旬騎馬入行臺。草腳踈青尙未回。今日藍輿向西去。海棠花放蜀葵開。韶光欲老愁梁燕。碧月初圓照



酒杯莫更匆匆感時序。山榴紅綻客仍來。

上巳日自鎮寧抵安莊道中

銀塘北去山如鎖。正好一村新綠裹。沿林乳鵲飛刺天。掠得餘花落千朵。藍輿小睡轉數岡。夢裏時觸幽蘭香。山危已換長繩挈。一半花苗帶花出。林深綠暗路欲迷。却喜穿樹如鴉飛。今年上巳風差緊。分水橋邊鑿春影。過橋南北分兩堤。樵徑北去行人西。柳絲濛濛挽客衣。去路開徧黃茶靡。

白水河

我尋白水源。澗削流殊細。西經白虹橋。河聲始如沸。前行十里響不停。巨石欲裂穿驚靈。河流至此經千曲。激得飛濤欲升屋。回頭屋後山俱破。却讓河流隙中過。非烟非霧鬱不開。此景豈是人間來。忽驚一白垂無際。高欲切天低蓋地。泉聲落處搆一亭。水色正壓羣山青。離潭一尺波如斛。襯出空潭影逾綠。蠻方三月景不妍。賴此兩雨懸珠簾。轉愁萬古簾難捲。隔得仙源愈深遠。潭側有水簾洞。爲昔人避兵之所。潭旁一枝花較紅。照影只在空潭中。四圍山色高如岸。祇覺白雲顏色暗。眼中神物誰得看。潭中相傳有犀牛伏此。會待月午波心寒。行客去不停。孤吟我偏久。泉飛兩派君知否。分送行人出山走。亭側有二道往雲南。及南籠府者。于此分。

鷄公嶺

險絕鷄公嶺。枝蟠百斛蛇。嶺背有古藤。粗幾百斛。上樓天欲墮。攀樹日初斜。怪石團孤寺。蠻烟簇幾家。下山途更窄。

警客有棲鴉。

關索嶺

山南路。鳥飛亦不知。排空翠巘逼天住。乃識細路懸如絲。前行問路頻相失。時入穴中時出穴。東西向背杳莫分。幸向林梢辨斜日。兩山中間夾一橋。細水畢集聲如簫。過橋三折方遵嶺。忽訝危橋若深井。前行籐條後戚施。時俯時仰愁難支。征衣匆匆棘心挽。攬客復有青松枝。居然一廟藏山半。上視山巔尙霄漢。停輿聊復酌山泉。以手讀碑疲復換。後先濟美誰所云。徽上有關索廟。相傳祀蜀漢前將軍子。當日或隸征南軍。神扉開處山僧避。我敬英靈且先拜。虛亭留客聽晚鐘。炊火遠雜山花紅。出門撲面風尤大。幸有扶人竹千箇。君不見來途一綫雲初破。天上驚看馬頭墮。

永寧道中

一馬行天半。雙旌逼嶺頭。澗光黃奪月。山勢黑吞州。蟻穴開平郭。猿梯直戍樓。人家止三兩。相對雨中愁。

哈馬塘

哈馬塘邊路。肩輿趁午晴。山如重甌合。人亦左擔行。竹密都題字。花杳不識名。前旌且回緩。留酌野泉清。

抵盤江過鐵索橋。久懣復下坡。至涼水營。午飯盤江水。流千里。三月江水清。泠泠望無底。岸東安順西南籠。天半一橋飄若虹。空中正練交如織。知費當

時幾州鐵。高低兩層鋪板平。人行半空馬不驚。登樓試面晴江色。陛下驚看一千尺。四圍山勢若削成。樹亦直上無縱橫。危厓盡處僧房鎖。三月榴花已如火。闌干影裏望行人。一半分趨石厓左。蠻中節物何太忙。百卉開落誰平章。賞心豈獨無儔侶。鶯燕南來亦蠻語。出門石罅路不分。烏道十里鋪黃雲。涼塘三百家。忽覺春如海。我食盤江魚。還憶盤江水。

普安道中作書寄南中諸友

別來春色已成團。一種花枝隔水看。榴火樹中風驟暖。芭蕉聲裏雨仍寒。蠻方不定陰晴景。瘴嶺先慵且晚餐。南籠一府處貴州極南微有瘴氣。客此者宜節飲食居處是以云。便欲寄書無別語。七千里外客平安。

新城行館卽事

繞廊不厭百回行。客已離軒酒尙傾。銀燭一條花兩樹。伴人清夢到三更。闌干都復綴青苔。鋪地松陰綠不開。半捲竹簾貪看月。鶉鴉啼雨枕邊來。

南籠苦旱余抵郡。二日卽得驟雨然。麥苗未暢發也。十三夜甫就枕。卽聞雷聲自南來。雨急如注。徹曉不止。喜而有作。卽柬張太守鳳枝。

經旬誰說使車閒。憂旱心情未解顏。乍覺清涼思擁被。忽驚雷雨欲移山。沿堤松栢爭飛瀑。合隊烏鴉猛叩關。却趁電光升閣望。已聞歡喜到苗蠻。

答張太守鳳枝見贈之作

領郡天南復幾春。退衙仍是苦吟身。苗蠻繞郭風偏悍。孔李通家誼最親。千樹影中圓月上。萬山深處一官貧。閑情譜到雙紅豆。莫晒吳儂白髮新。太守有紅豆詞二闕極工。

南籠府東郊試射士作

盤馬場西綠欲勻。紅旗獵獵起纖塵。貪看一角春山翠。忘卻當前角伎人。一條馳道倚晴空。破曉先聞響角弓。正是柳塘風急處。亂花隨馬入雲中。南籠道中夜行

盡輿三折面方塘。雨後溪光著意涼。行到石橋剛夜半。野花殘月鬪深黃。羊場塘西見海棠

三月風光疑有恨。十分顏色已無香。林昏露薄誰人看。留得松陰護曲廊。發新城道中值雨

別來春色已陰陰。收拾高低徧野金。來時菜花極盛。一晌東風豈無意。雨絲都灑百花心。

三望坡騎馬歷黑土坡老鴉關諸隘

三望坡前綠欲迷。一鞭高與白雲齊。多因馬上人回首。惹得春禽逐馬蹄。

楊柳三層接綠苔。春陰如海浸樓臺。山凹一騎穿花出。錯認雲帆天半來。  
度老鴉關

絕險疑無路。回頭雨復來。正愁疲馬惑。却值嶺雲開。細草黑如霧。野泉聲若雷。輿前長官拜。何處與徘徊。  
安南令張君世昌迓至此。

過保甸塘至盤江道中

隔江途若綫。正對行人面。更轉百坡陀。江流尙難見。

春盡日發新鋪至永寧州道中

到曉風難定。山雲欲亂飛。上樓初破夢。過嶺復沾衣。石澗草蟲響。藥欄花事非。去程三十里。如夢雨霏微。  
道中作家書戲占一律

過得鷄公嶺。蠻風說亦愁。春田喧蟋蟀。晴木嘯鸛鷗。雷雨輒排戶。牛羊分占樓。居人怕飛瀑。竹屋製成舟。  
自永寧州署發至北口塘值雨

百折途如綆。千林晝若昏。嶺藏初祖塔。苗別仲家屯。竹瘦欲穿石。雲奇竟塞門。隨車謠已愧。偶值雨翻盆。  
連日至安南永寧皆得雨。土人有隨車之謠。

觀音洞

仄徑西來日欲曛。洞門流水綠沄沄。擡頭忽覺峯奇峭。錯認天空數朶雲。  
半厓音響若聞鐘。石罅纔開薜復封。誰識洞中仍有洞。小橋流水一株松。  
自界首塘至駱家橋道中

南岡北阜自分條。如雨谿光路轉遙。欲引行人向東去。柳花攔定駱家橋。  
乾溝道中書所見

新綠填街馬過遲。幾家竹屋枕陂池。鴨欄明淨鵲巢整。却有野棠開一枝。  
初六日渡鴨池河至四方井道中作

隔窗催客鳥何勤。涼甚先將濁酒醺。才欲出門衣袂濕。馬頭猶罨昨霄雲。  
江干清曉泛浮槎。隔岸山隅路幾叉。行入白雲紅萬點。半空都放石榴花。  
將至黔西東州守張同年會瘡一首

憶昨相逢渭水邊。忠宣門下說齊年。同官萬里君尤遠。曾宰三峯吏是仙。  
到處溪山疑綠野。予曾兩詣桐城並至相國  
園別來京國望紅箋。時郎君計衙齋借榻心殊慰。爲我先開卜夜筵。  
林

四方井至黔西州道次

危途旣稍夷。平壤拓十里。溪聲流四面。山亦伏不起。良田富林麓。百鳥展然喜。固知巢危厓。心亦匪得已。

溪田新雨後。波活掉魚尾。裊裊青竹竿。抽梢入鳥裏。途長怯晴日。迂道走坡底。一頃荷花風。炎蒸忽如洗。十九日至大定城西坡上。校射歸途復詣斗母閣看飛瀑。

射場距五里。清曉聞吹笛。初日旗幟翻。鳴鉦出官衙。拂露過北郊。先驚樹頭鴉。藝士植若墻。臺高建崇牙。下馬入鎖廳。山青四周遮。臺杪射的紅。高低奪明霞。一水出道旁。來源抑何賒。墻缺竹樹交。路若之字斜。直下百尺餘。依微有人家。雲氣復四飛。驚風走汀沙。回路改郭西。山田夾鳴蛙。飛瀑空際來。濕此半嶺花。客倦欲暫停。禪扉試煎茶。

路穿巖

萬仞峯何峻。巖腰豁一扉。遠從波影入。已有日光飛。攀徑野花綠。排空石笋肥。谷鶯偷覷客。時復閃紅旗。

烏西塘

清晨馬上來。薄暮烏西宿。烏西人已知。巖頭注雙燭。

黔西州署西偏有海棠一株大蔭半畝惜花時已過同年張君約科試時再過此相賞因作此以贈之  
海棠籠半畝。辜負此花時。車馬何因暇。闌干有所思。碧窗懸舊句。紅藥剩殘枝。不是張公子。誰能訂後期。

張同年邀遊東山寺

山廚連日綺筵開。邀客東峯角伎回。是日約同人  
在山棚角射我比謝公心更冷。屏除絲竹始能來。

石峭潭空夜氣生。少焉亭上燭縱橫。酒闌倘復待殘月。北斗欲斜山四更。  
將至爛泥溝上嶺

四山飛瀑合。鳥亦誤西東。乍劈林梢綠。遙分寺角紅。幾家波影外。終日雨聲中。絕險藍輿折。尤防撲面風。  
革撥塘遇急雨

百道飛泉合。魚龍欲上天。戍樓何處在。野水忽無邊。徑仄花迷眼。厓傾棘刺肩。夜程猶十里。愁絕馬難前。  
夜黑行三重堆汎南諸山中

卅里羊腸路。高低夜色浮。虎風腥撲面。榴火艷擡頭。雨急三層磴。雲迷百尺樓。林梢一聲磬。隱隱出平疇。  
贈周刺史景益

卅年家住蠡河灣。只隔衡門不往還。清切早聞登上第。沈淪我亦廁朝班。閒情偶欲消餘晷。君善遠宦同度曲應歷萬山。何日對床鄉夢好。白雲流水自潺湲。

渡渭河橋

渭河北去路尤稀。急溜橫衝石徑微。二十二條衣帶水。劈空爭欲上山飛。

楊柳塘道中

雨絲初斷日光微。十里亭前試袂衣。剛被軟香吹破夢。滿山黃徧野薔薇。



白蠟坎道中

忽覺身無據。藍輿下半空。冥濛萬重綠。中隱夕陽紅。客醉連宵雨。花殘昨夜風。誰言播州惡。土脈較疎通。鳴溪道中

水田千百級。中有石泉青。一道復孤下。四山相與冥。過溪晴乍永。隔岸雨猶零。最是椒花好。時時破夢馨。

五月五日遵義試院憶里中競渡之勝十首即寄錢三維喬趙大靈玉

溪流一曲巷雙條。燈影三層接畫橋。我亦趙家樓上客。七千里外憶今朝。

新闢柴門遠市塵。病餘讀書復逃禪。謂錢多因暇日添遊興。偷上吳娘鴨嘴船。

內河昨日雨蕭騷。溪水平平添綠篙。惹得龍舟銜尾去。十番船泊北城壕。

簫鼓聲聲壓畫檐。整衣多半出襄簾。檝頭艇子如飛去。就近還趨八字尖。

河干扶醉却歸來。聽雨樓窗半面開。偏是謝娘諳食性。枕函堆徧紫楊梅。

兒童撲手說端陽。杏子輕紅梅子黃。乞與一瓶桑落酒。醉眠仍入少年場。

三元閣上久裴徊。天氣陰晴乍熟梅。畫舫塞河人塞岸。忽驚雷雨打頭來。

雲谿谿北接官衙。添得紅闌眼乍遮。好是一河燈影白。橋東錯認月西斜。

連日河頭畫舫開。無端鄰嫗亦追陪。溪南一樹石榴盡。都到美人頭上來。

艾葉紛披蒲葉長。盈觴酒綠泛芸黃。蕭王里畔鄉風好。幾日門前角黍香。  
遵義試院

花紅結作屏。山綠圍成障。引領望山城。山城在天上。

遵義校射場在城外六七里。因就近假副將署射圃校士。

三面青山繞角場。僅餘一面入斜陽。沿林石細馬堤脆。帶得落花來射堂。

三里周垣百尺臺。斷碑如戟翳莓苔。多應曾作老蛟宅。夜半石厓喧怒雷。  
署本明楊  
應龍舊宅。

回龍洞

過橋凡五折。已到遠公廬。徑削才容馬。溪喧欲土魚。曉烟搖竹栢。初日定村墟。莫訪垂龍洞。泉靈脈久淤。

桃源洞

名區馬到亦徘徊。竹葉迎人鳥語催。已覺溪山隔城市。絕無鷄犬有樓臺。前塵事向殘碑讀。  
洞土人相傳  
爲李太白聽

爲絕壁花爭五色開。依舊澗聲流不住。錯疑重到武陵來。

渡烏江

出山殊有戀山心。飛漿迎人過浦陰。百折水紋千折嶺。急流時見點波禽。

江流中劈四山開。雨後江聲怒若雷。萬朵白雲空際落。錯疑潮自海門來。

馮巡撫光熊招飲卽席賦贈二首是日馮初度

早識雲間大小馮

時令子開州牧克

轡方何幸服官同欣看裙屐筵初啓難得民苗歲屢豐囊筆卅年呼

內相

公久值

趨朝四日領司空

自山西巡撫入覲特旨署工部侍郎四日卽有黔撫之命

到來倘竟稱觴地却有東山若待公

咫只衙齋遞往還識公心跡幾曾閒

公自山東布政司調直隸旋擢湖南巡撫又調山西

八月恩先洽百蠻州任

甫八月又

調撫雲南秋半風雲迎使節樓高烟雨夢鄉關移家我合稱同里只隔明湖水一灣

使院後牆俯臨縣倉有荷池十頃癸丑二月將按試上游命工築三層臺于牆內五月杪歸池荷正花臺

適告竣因分日讌客于上同里楊上舍浦爲繪千葉蓮臺雅集長卷同人各繫以詩余亦率成此篇云爾

北人喜看山南人喜看水我雖南人居北久有水有山方不悔胷中先有萬仞山山外流水聲潺潺欲從

山斷水流處更種疎花築廬住拜官昨歲來筑中所見宛與胷中同不特有山有水有高閣且喜山綠繞

閣閣外十頃荷花紅爲補竹百竿爲築臺三層倉廩百舍比如櫛靜裏已落書窗燈花枝紅水流碧雲氣

時黃亦時白有時天黑雨欲來却好一窗收五色宴客既有藕藕底復有魚池蓮可劈桃可食酒盞借此

青芙蓉簾垂百尺樓千丈讌客真疑在天上窗櫺八角燈影聯一城居民望若仙樓高高觴滿滿豐歲莫

教行樂緩黔中有山皆可田雨足便已成豐年新秋昨夜涼風起樓閣都歸雨聲裏君不見紅荷花開亦

無幾接得稻花香十里

七月五日曉出南門三里至南嶽山下射圃校士回塗小憩野人籬落偶成

數月不一出禾麻已盈疇炎暑曾幾時節序慨已秋  
離離瓜田花黃朶露未收日出鷄尚鳴沿灘飲羣牛  
射圃向北開南折路苦修旗門揭峯前東西兩高樓  
迤左百尺牆觀者積上頭山鵲噪不停矢向巢上流  
馳道滃白雲馬行亦遲留回途改西南偶作物外遊  
園扉映方塘竹筍秋尚抽防驚幽人眠花裏停鳴鷓  
七夕四首示女紡孫

一歲十二回回回拜新月何事禮雙星一年惟一夕

牛女緣何摯天人路本殊何須借靈鵲月裏有蟾蜍  
挈得書千卷樓頭曝不停分將小兒女樓下拜雙星  
銀漢間紅牆迢迢理七襄天孫如果巧何事不成章

十六日姜廉使開陽招同馮巡撫光熊萬方伯寧吳超尼堪什張繼辛三觀察暨徐太守曰紀聽綠軒賞  
荷卽席爲賦采蓮詞十二首并邀諸君同作

群柯秋到雨如麻盼得新晴露已華我自看紅君聽綠

一月前余曾邀同人集紅香館賞荷

參差一月賞名花

曉日華筵水上開瑣廳千尺接層臺笙歌小部雍容甚都雜兒童竹馬來  
門前赤棒肯攔遮齊放遊人入使衙惟底鷺絲無立處壓波人影黑于鴉

鳴騶來處甫侵晨。午榻橫排任欠伸。各占一亭陳百戲。却忘賓主是何人。

束素腰纖點履高。

是日令諸歌童結束作采蓮女子

花非勺藥卽櫻桃。旁人錯認紅粧好。十五吳姬刺錦筵。

偶然擊楫趁波平。也學津船打鼓行。消受小年無個事。一花開處一飛觥。

繚垣日午轉驕陽。一例都將小繖張。知有美人空處立。好雲低爲護明璫。

水心亭北接危城。亭左先聞按玉笙。見覓柳陰深處坐。暫停雜伎奏新聲。

無端燈影欲迷星。高拄檐牙下繞汀。空裏忽驚添异采。晚霞黃入電光青。

百重檐子憩牆陰。小合高擎唱點心。一樣酒帘花外颭。亂吹羌笛搗胡琴。

薄暝遙看打漿迎。紫微花點照波明。若非萬里橋橫岸。

軒側有萬里橋

尙認吳頭楚尾行。

廿年前乏此花枝。

貴州近年始有荷花

小艇何由泛曲池。此日黔陽似江左。當筵爲譜采蓮詞。

十七日徐太守曰紀偕安順遵義思南石阡黎平銅仁六太守威寧麻哈開州普安四刺史松桃丹江兩

司馬貴筑遵義及候補諸大令復邀集聽綠軒賞荷是日馮巡撫萬方伯以事未至卽席戲柬諸君子

笙歌隊裏許閑行。月黑簾櫳水自明。鸚武亦知遊客意。此來看雨昨看晴。

夜涼移席屋西頭。燭跋都同笑語流。怪底諸君興偏逸。座中有蟹少盃州。

是日始食蟹

鄭州倅覬自永豐寄近作百篇乞爲點定因率成長句題後并寄張太守鳳枝

我從黔靈山。望子萬峯底。知君升黨領。夢遠亦千里。山能隔面不隔心。一月不斷瑤華音。官閒一室開常早。虎跡訝多人跡少。使君句好誰能謳。高吟祇憑石點頭。怪來詩札霧如許。道遠聞經普安雨。我時宴客開華堂。發函光擲馮侍郎。侍郎讀詩笑語我。屈宋衙官何不可。東南賓從萃一時。更拓北牖哦君詩。八行莫訝詩牋皺。入坐荷香可同嗅。三更客去益朗吟。涼月正墮層波心。倦來復憶南荒守。索米還家得之否。書成燭跋贅一言。蠻府參軍我詩友。時太守欲假百金歸爲兩親齋聞尙未得

馮巡撫既作外臺讌集詩及見余采蓮詞十二章即日復依韻見答其用韻之妙不減皮陸爰作此志謝傳牋飛騎一何忙。射虎將軍善挽強。不特事功吾拜倒。瓣香直欲到文章。

新秋回憶早春時。頻把餘閒付酒卮。燈影兩層花幾朶。博公二十五篇詩。公元夕燈詞及兩次賞荷詩共二十五首

吳司馬玉墀洗硯圖

瓶花齋中書有目。不減鮑家知不足。搜羅各本元宋明。天一閣中無此精。東方冊萬言。南閣九千字。盤盤嗜古三十年。歲宴不知門外事。忽然四十作漫郎。騎馬遠復來炎荒。牙籤錦軸誰寄將。書少乃珍硯一方。蠻陬豈獨無書假。硯亦止憑縑素寫。君未攜硯來所見止有圖耳一世難耕慨石田。半生卒業思蒼雅。可憐有硯不鈔書。僅寫年來主客圖。開緘忽欲念良友。讀畫已覺忘朝餉。因君我憶卷施谷。千本異書碑百束。他時兩客各歸田。硯北還從借書讀。

十四夜坐月

初三逮十四。月止晴一宵。差喜晷已圓。清光徹層霄。鄰東歌吹聲。舍北亦叫號。豐歲庶有期。中坐喧酒豪。而我亦甚閒。銜杯飲陶陶。一酌天宇開。再酌雲氣消。悠然到三酌。月采如鮫綃。兒女集我前。競索梨與桃。礎潤旣已收。房廊步周遭。幸此徹夜光。歡喜到汝曹。他時返江南。水郭景倍饒。結伴或采菱。沿堤泛輕橈。比舍攜密親。相將走谿橋。此景汝勿忘。興至我欲謠。紅燭忽斂輝。開簾已崇朝。

寫管下名山圖八幅寄富尙書綱

古人祝長年。類取象岡阜。我今頌尙書。亦以山爲壽。尙書八州督。惠澤及民久。前時持節處。閩海及陝右。仁風所丕播。地方實雄厚。每于奇絕處。皆得未曾有。中南從東趨。太白向西走。武夷清曠海。華岳秀參斗。尙書前按部。一一迎馬首。飄然來萬里。清夢憶之否。雲奇嶺復奇。倏又落吾手。碧阜出我前。蒼山峙其後。烟嵐日千變。各各入窗牖。春秋多勝日。時復挈賓友。咸云享清福。得此蓋非偶。慙余課士暇。秃筆有如帚。翩然圖名山。不敢雜培塿。圖成寄尙書。應復開笑口。倘有飛仙人。同來獻春酒。

過隴首關

排空傑閣勢迢迢。百折才能及嶺腰。只向密林深處轉。怕憑風力上層霄。

新安塘道中

橘柚叢中半里遙。秋雲如畫束林腰。溪南欲訪閒親串。趁曉先支獨木橋。  
村村都喜說豐年。板屋斜開穉煙邊。飽飯芋魁無個事。盡收雞犬上樓眠。  
廿二夜看殘月

團欒時節雨辛酸。待得如鉤轉耐看。那識幽人有深意。五更樓閣坐高寒。

谷子塘

人行谷子塘。林木始回互。野花生東西。葉葉悉垂露。肩輿欲東轉。黃犢忽攔路。旆影拂曙鴉。驚飛四穿樹。  
初陽開谷口。樓閣恍無數。知有山僧居。泠泠曉鐘度。

九日偕署中同人至城南福泉山。高真觀登高。鄧大令五典設筵于此。相待卽席賦贈。

纔經寒露辰。已值題餽節。騎馬上城時。暉暉半樓日。臙脂花紅菜甲黃。夾道半里來山房。主人開筵樂未央。  
琥珀作盞菜萸觴。幽禽語琳琅。清磬聲疎越。騎馬下城時。輝輝半樓月。仙人樓閣涼意生。隔嶺遞響山泉聲。爨光如霞出山頂。却壓萬家燈火影。

九月十一日發平越至葛公橋作

平明天氣晴。送者逾五里。言尋葛公橋。乃復居釜底。泠泠江一綫。絕壁插江汜。嶺樹鬱百重。凌晨露如洗。  
危亭峙林表。初日出亭裏。花朵映日紅。晨扉竹中啓。鄰舂杵相答。童叟色俱喜。白屋飯已香。幽人睡難起。



清平道中

四山茶花香。黃白均可愛。花苗聯袂出。時折一枝戴。秋葵盈半畝。野蓼色如醉。危塗穿竹徑。竹密出岡背。險絕天半程。疲蹤屢思退。前旌久延佇。半晌甫及隊。行及羅仲塘。山雲轉深晦。

藍嶠至草塘關道中

藍嶠及草塘。十里壁如削。濛濛棘生刺。左右難著腳。回崖野花艷。谷口日西灼。石竅噓北風。鷹驚馬頭掠。人禽爭一竇。撲面險欲著。東西缺盈丈。道險藉略約。樹杪俯石樓。窗櫺望依約。驚沙莽成陣。馬走前復却。半道聞語聲。長纜剛山藥。

過偏橋西三里上一陡坡

石黑雨亦黑。行人向何處。巉巖當面出。欲往決無路。蹊斜非意想。時隱復時露。石罅逗一門。奇花忽無數。高低盤百級。樹杪作回互。盪客西北風。洶洶有如怒。頻于奇絕處。欲把生命置。老樹猛攔人。踉蹌敢回顧。危疑行半日。深險已畢度。出谷路轉平。欣然下徒步。

翁頭塘道中

半嶺昏雲積不開。空山秋盡恍聞雷。怪他百道山泉合。却詫藍輿飛渡來。翁頭塘北路尤賒。屋脊橫看一徑斜。誰向閑門訪秋色。夫容開徧野人家。

自平貫塘至白巖汛道中

午餘都枕白雲眠。兩兩飛泉出竈邊。肯向淮南乞靈藥。本來雞犬只居天。  
馬頭濃綠間深紅。半日全行複嶂中。百轉千回抱村塢。江南無此好屏風。  
濃濃絲雨日千回。夕照光中霧半開。怪底樹頭山鵲噪。却驚天上笛輿來。  
秋來風味足山家。深淺園林百種花。先有入樓紅柿子。飽嘗聊可當罍茶。

百阡城南溫泉

石罅空濛逗燭光。訪泉亭上拂衣忙。半生莫訝塵勞甚。已試人間第七湯。

予所試溫泉直隸則盤山陝西則臨潼整屋江南則黃山硃砂

泉及和州句容與此而七矣。

白石潭疑築釣磯。流從壁隙漾依微。形神釋後卻危坐。蝙蝠嚇人頭上飛。

自塘頭舟行至思南府城外

青山至塘頭。南北忽中斷。驚流適有幾葉舟。一半舟行半登岸。帆影欲入地。馬嘶驚上天。高高下下行不歇。馬力反後帆居前。雙江合處波流折。急溜平添水千斛。高低橘柚合一村。五色石中魚比目。風帆北轉飄雨絲。馬上戴笠知多時。舵樓半响酣清夢。馬背人愁濕衣重。江流曲處城郭開。岸上一騎驚先來。船頭吹笛船尾鼓。濕霧驚開日剛午。

出思南府遵化門道中

一山方如筐。一山圓若筮。山真中繩尺。雲亦就規矩。偉哉造化功。幻此亦奚取。奇零不能割。嵌以數僧宇。霞景正欲升。炊烟穿縷縷。林紅初曙日。潤綠昨宵雨。誰闢天半扉。幽人正軒舉。

至思南府城東七里校射作

三里出郭門。七里至角場。材官藝士已先待。日乍破曙雲蒼涼。忽然對面誰能覷。霧捲千人萬人去。須臾一騎來破空。帽影正罩晴暉紅。斗坡直下誇輕舉。馬背白雲飛縷縷。山雲高高上接天。萬綠條條現屏山前。紅林蕭疎噪山鵲。屋後人家飛矢著。

夜起至射堂看殘月

樓臺高下樹縱橫。環郭峯巒不見城。好是四更山月上。獨來亭裏聽灘聲。

觀音閣

到來已覺上青天。尙有人耕屋上田。老樹綠零前夜雨。夕陽黃破半城烟。江聲似恨山重疊。鄉夢都迷路七千。且倚石闌閒啜茗。半空靈果落僧肩。

小厓關

足底先驚萬疊山。半空樓閣自回環。紅雲堆砌不知冷。白水繞門無用關。日影鏡光偏照耀。鳥聲人語合

綿蠻差憐送客殷勤甚。七里岡前馬未還。

將至掌溪塘道中

歷徧危岡陟淺沙。沿江途細欲如麻。蠻鄉秋盡饒春氣。十月猶黃菜甲花。客程難得片時間。穩臥藍輿出險關。欲剩心情看江水。垂簾行過幾重山。

將至石阡道中

水西林塢好。迢遞隔東村。偶跨水牛渡。閒從石嶠蹲。嶺穿疑有路。雲定不知門。清絕垂綸叟。忘機坐竹根。重浴石阡溫泉。

曉發路瀨塘

離堂尙聞雞。暗谷甫見日。濛濛荆棘影。披草至絕壁。露氣周一山。秋衣冷侵骨。回瞻驚後隊。如蟻穴中出。前旌復穿雲。石瘦路如髮。風蘆聳清聽。時墮隔林橘。客倦欲少休。茅軒樹頭突。

將抵荊蓬塘

誠知山百折。每折非意想。飛瀑間一層。泠泠愈神往。茅齋雲際逗。絕壁倚仙掌。十月花尙紅。松濤落清響。山田欣倍入。石困列三兩。豈僅人事饒。雞豚耕生長。兒童乘冬隙。倚戶結絲網。相約捕渚魚。烹鮮佐樽盎。

過思南塘道中

高下田如百衲衣。人家初日啓雙扉。草中尙有閒胡蝶。却恨蘆花作雪飛。  
轉覺空山氣候春。冥濛花氣拂蕭辰。峯根獨石誰來坐。時有松枝掃落塵。  
出鎮遠城南三里。試射士

一半山雲雜水雲。到來空裏草香薰。環牆人語覺清脆。曉日射堂紅一分。  
寥寥飛矢去如星。惹得樵蘇跡暫停。天半午鷄啼不徹。東南樓閣疊烟青。  
沿流歸復誤西東。出郭燈光映水紅。不信鳥巢皆戴屋。幾家樓貼半空中。

送姜簾使開陽入都

相離真不忍。且盡酒千壺。每歲衝風雪。憐君在道途。君自言五年除夕皆在途中計應朝北闕。且莫憶西湖。好趁帆檣便。行過故里無。

同官凡幾輩。接跡戍三邊。謂歸王順三方伯吾子能孤立。君恩僅左遷。暫還諸季節。行贈繞朝鞭。他日金臺側。相思屢寄箋。

冒雨訪諸葛洞

雨聲無時停。天宇忽已黑。輿從空際下。蹊路有白石。前行未及轉。飛瀑已及額。蒼蒼兩層崖。萬古積暝色。

懸流至三仞。雲出波下白。排空列千竅。難作老蛟宅。居人掩關坐。屋上浪花織。傾耳聽此聲。天空地疑拆。再度響琴峽。

黃平州度玉虹。

玉虹峽在黃平州南。

青天飛下一白龍。魚梁江度琴峽。十萬絃聲驚拉雜。大聲疑宮小聲微。激得山雲去如駛。斷崖峻岫石色紫。崖上沈沈日光死。離波百步飛雨飄。隨響曲折經危橋。溪風蕭蕭溪月靜。疑有神魚出波聽。

黃花坪道中

連岡西去路千重。竹色蕭蕭間嶺松。照路野花然似火。出山流水活于龍。風棧時掣當風燭。雲朵驚飄隔院鐘。錯認脫綿時序近。豈知寒序迫隆冬。

再經隴首關

朝晴爽氣通。胡蝶尙西東。錯訝春花放。平原野燒紅。掩關暮復朝。香篆生林末。孤客心易驚。上樓雲欲活。

雪意試貴山書院諸生題得先字。

嚴凝雲樓杳難眠。是處林巒憂暝烟。飛霰乍飄孤嶼外。重陰欲釀小寒先。光埋高下三更月。雲黯西南半壁天。不是官齋望偏切。欲憑盈尺卜豐年。



卷施閣詩卷第十四

黔中持節集癸丑甲寅

初五日近山堂消寒一集分體詠秦宮人鏡鏡銘云天上見長心思君王八字

六王雖畢閭左空。男行築城女入宮。長城東西萬餘里。永巷迢迢亦無底。宮中永巷邊長城。內外結成冤。苦聲入宮詎識君王面。三十六年曾不見。轉思天上歲月閒。那識相見期仍難。班班血淚銷難盡。剩得團圓一方鏡。攜來照影影亦寒。明月尙作秦時看。非珍異物思垂鑒。背上千年土花豔。君不見。鏡銘八字誰所爲。篆體絕似東封碑。留伴斯刻千秋垂。

家大人命同作

飴孫

祖龍一臥羣雄起。三月阿房土花紫。千年宮鏡出人間。往事分明亦如此。玉容顧影人爭羨。昔日紛華鏡中見。驪山明月夜梳頭。竹宮歌舞朝勻面。鏡能察面難察心。冷眼那及金銅人。菱花徑尺青絲紐。拂影都誇好身手。可憐三十六宮懸。不辨興亡辨妍醜。天上迢迢望本奢。昭陽銘後事如麻。誰攜玉匣闈中物。去照宜春苑裏花。

初十日漱石山房銷寒第二集題張太守鳳枝珠還圖



圖爲太守侍姬冉氏所作。姬母無賴，妄構訟端。姬由是遣歸。其母謀別嫁之。姬剪髮自誓，乃止。同人感其義，勸太守復迎焉。爰作是圖，名曰珠還，亦所以美太守也。

瑣廳圍坐燭如山。本事詩成手自刪。輸與清廉海南守。六旬傳說去珠還。

自返蓬門百事非。香雲和淚剪依微。從茲百幅梅花帳。不覺蕭娘鬢影肥。

兩條官燭影闌珊。百詰初窮語抵調。絕勝河陽舊潘令。種花猶易護花難。謂陳大令。

暇日間窺青瑣旁。玉山筵上未頽唐。抵他一曲鄴風怨。只有銷寬淚兩行。姬以訟事未結，留貴陽守署。匝月一日隨徐恭人觀劇，偶窺坐

客見棧齊太守在席不覺垂淚。

輕車油碧許迎回。紈扇親拈出鏡臺。臨行徐恭人以二絕題紈扇贈之。不是求仙舊童女。肯隨徐福住蓬萊。

垂老休嫌善賦愁。使君宗法本風流。他時九曲梁溪上。合與修成燕子樓。

十五日藏春塢消寒三集題范巨卿碑額卽送張州守曾擘南還

昨者黃少尹。此碑刻係戊戌年夏亡友黃君仲則所貽。貽我金罍碑。摩天石刻揭巨孝。復有獨行名孤垂。洪流浩蕩豐碑沒。僅

識青龍舊年月。八分徑寸誰所書。無乃山陽縣君辭。傳觀足令友誼敦。二千年來八字存。若言至性刊金

石。不數王貢兼雷陳。一篇論愧朱公叔。中世交期益翻覆。賣友人傳鄙曲周。面朋我恥蕭光祿。史家創格

非好奇。欲與薄俗貞心期。不傳東躋傳友誼。此意亦愁知者稀。開緘淚已垂言下。恨不還君伴長夜。匹馬

招寬又一時。荒阡種樹知何暇。百徧摩挲紙亦光。含情重送邳君章。他時北上金鄉道。酌酒應臨官道旁。  
家大人命同作

飴孫

烈士相交祇情性。一千年來傳獨行。偶從山縣拓此碑。姓氏偏教坐生敬。卓哉山陽范使君。獨抱古意超倫羣。豈其交誼足不朽。乃寄金石垂斯文。千秋一語饒奇旨。生死論交自君始。始知友誼殊可珍。交到重泉合心死。邳君章與殷子微。未識死友焉知生。長沙學生新野卒。縱不性交亦心折。巨卿好友不顧身。落落死後殊無人。幻形誰復論爾我。一往直欲兼幽明。鄉民翟循縣君薛。留得金鄉墓前碣。篆文不特軼八分。好補酈元經注缺。建安以來世俗澆。慨然何止劉孝標。願將剝落數行字。持贈世人同石交。蠻鄉刺史殊今昔。況值窮冬束裝日。偶讀廬江太守碑。一篇還贈張元伯。

張州守瀕行又以素冊索詩復成二絕句

風雪連晨偶滯留。行蹤莫爲左遷愁。君看判府威名重。絕勝西南領小州。

紅塵十載鬢初班。却喜今因定省還。欲借寒威暢離緒。留君十日住黔山。  
時留作消寒第三集

二十日聽雨蓬消寒第四集同詠諸葛燈  
尙從遺製識英靈。五夜軍書肯暫停。收燼未應忘火德。宥胸先已勒金銘。虛疑絕徼留銅鼓。遠憶高原墮大星。畢竟出師餘恨在。至今燈影作深青。

二十三日寫歲朝圖贈馮巡撫光熊並繫以二詩

如水臣門日往還。識公清節服諸蠻。何妨饋歲無長物。自寫黔南幾尺山。  
錫香粥鼓滿平疇。鬧得花香出樹頭。都是蠻方小兒女。春風竹馬十三州。  
二十五日思補齊消寒第五集卽題徐太守日紀陽春有腳圖  
何妨遣婢中閣。聊爾充君下陳。欲賜人間湯沐。先回天上陽春。  
蓮蓋屏風凍雨。梅花紙帳春雲。待過消寒九九。預防修竹彈文。

附

飴孫

溫和足底有春光。着意真能識熱腸。頓憶孤山林處士。梅花多處太淒涼。  
早從洗濯見風流。一响春華偶滯留。不着人間閒冷暖。此鄉端合號溫柔。

小除日消寒第六集招同張太守鳳枝孫刺史文煥陳大令熙藩王參軍滿恩暨兒子飴孫卷施閣祭詩  
卽席成六十韵

我方謀讀書。俗事急除屏。爆竹出我旁。瞿然心始警。起來視林梢。失喜發桃杏。黔中花事最早明明紅燭燄。一歲  
去無影。因之思我友。走僕急延請。陳生疲案牘。王子困簿領。孫郎耐繁劇。張叟性剛顛。窮冬居省會。衣敝  
鞮不整。居然七千里。聚此數萍梗。豈無還鄉夢。隔越萬重嶺。蒼蒼四邊山。城郭若居井。牛車行鼠穴。一笑

等蛙黽。差欣合并數。未覺昏旦永。規船作吟齋。製小類舴艋。獸炭紅一爐。先堪辟奇冷。雙棚支鼓子。弓弩  
懶不繳。樅門誰更出一室。樂恬靖。房廊稍曲折。衆詫若仙境。堂阿鋪長筵。載脯雜餈。霜螯搗初碎。鮮鮑  
已剔鯁。演榴暨勻橘。兼不棄梨棗。南方來百物。圓鱗長者廬。歲除饒食品。一一列盤皿。非徒祀心神。藉以  
壓灾眚。明燈懸四角。香炷紅耿耿。高杯羅數十。文石及生礪。雄黃鑄咒虎。犀角刻蕩荇。或如肘生柳。或若  
瓠有瘦。爭先誇大戶。蓄意欲吞併。盤飧來陸續。誰識夜已丙。慙余少孤露。敢說有殊乘。時時避詩債。獨處  
心怏怏。永豐才尤奇。筆早露鋒穎。創爲小言賦。剖析到句颺。南籠年六十。齒硬截春餅。雖然能飽啖。不改  
顏瘦瘠。惟愁酒杯寬。苦語求減省。參軍揮千言。尙說才未逞。微知所宗法。天問及哀郢。浙西饒秀士。遠復  
勝汝穎。宰官仁及物。讞獄繼張祁。心雖尙寬大。酒政獨嚴猛。藏鬪兼拇陣。十九冀微倖。與酣開牖望。繁麗  
富星景。衙齋闕西北。隙地得一頃。雖非二三月。春樹已華鬪。兒曹不入座。窗隙屢延頸。大兒粗有筆。頗復  
愛習靜。年來通選學。出語喜彪炳。盤盤祭詩筵。得預良已幸。小兒才十歲。逃塾每遭打。攔門喧畫鼓。日轉  
益頑獷。阿翁防醉仆。座外戲扶綆。酣眠到童僕。百問百不省。皆言沐餘歡。沉湎誰可儆。窗樞頭互觸。蠟炬  
險失搖。更闌客辭主。失笑喉復哽。肩輿北風大。各各蔽箬笠。與前馬居後。爛醉戒馳騁。何須更持燎。太白  
光罔罔。

新正五日消寒第七集同人集陳大令熙藩雪溪吟舫大令以盆栽素心蘭見贈卽席賦謝

此日何日。窗櫺陰撫。序不樂求。我素心。素心之人。其室如斗。街南巷西。爲約良友。春酒旣熟。園蔬雜陳。雖未投轄。童先閉門。離離光明。一室四出。重簾無人。花影若月。坐客默坐。咸披素襟。所愧空谷。趺然足音。移花居前。移酒在左。友知我心。舉以贈我。我家南頭。一閣面山。山桃水仙。位置其間。人之素心。花亦相肖。言詮已忘。靜不索笑。時或獨醉。時還孤眠。半窗冥冥。香徹曙前。

賀方伯長庚屬題其尊人蘭竹卷子

畫蘭不畫雨。雨已飛晴空。畫竹不畫風。風已出榦中。稜稜數竿風。卷此楚波白。亭亭幾枝雨。亦勝楚天碧。先生偶開門。漢水澁水流。無痕先生偶。槌戶蘭枝竹。枝約同住。卅年豈以畫得名。轉借蘭竹抒幽情。乃知氣味本無別。與蘭同心竹同節。一幅雪景一幅晴。末幅皎月枝間明。君不見蘭枝竹枝幅盈十。并寫森森石林立。展圖不及見先生。奇石當前且長揖。

人日消寒第八集同人登黔靈山復迂道訪聖泉歸飲王參軍洪恩一角山房雜成三十二韻

兩載逢人日。三年住鬼方。路疑窮北首。雨欲破南荒。過臘飭簫緊。初晴筍屐忙。願尋何地勝。咸指此山岡。峻嶺回天外。奇峯立斗旁。浮青界滇粵。濃綠壓城隍。交壁松烟暝。岐途柏榦搖。幾回衝馬首。百折走羊腸。積霰鋪層殿。罡風響曲廊。解鞍懸石磴。易履坐繩床。果向僧衣落。禽從佛面翔。怪聲穿土穴。仙掌拓蠻鄉。半郭積光斂。全黔地勢張。天龍煩說偈。野鹿看傳觴。更許陪開士。憑誰禮法王。客方搜古蹟。蠟已下斜陽。

詎可辜清興。仍須束急裝。澗幽留剝薜。寺僻富修篁。毀廟神無火。陰崖虎有佞。微黃辨樵徑。曠黑墮漁梁。  
聖水名終妄。上人言投一錢。泉即漲起。試之不驗。同人擬易其名爲廉泉。廉泉改未妨。逸情嫌晝短。回路覺川長。候騎依官柳。宵鐘出  
女牆。雙街籠燭樹。一角訪山房。濁酒何能減。遺篇久不償。簪裾來淨域。旗鼓集虛堂。當代爲長句。羣公雅  
擅場。俊才同鮑沈。堅筆鬪班揚。設榻容孤臥。行廚約徧嘗。擁爐樹淺碧。升閣望空蒼。此會多應羨。他年誌  
勿忘。靈山今夜月。添影照詩狂。

十五日五鼓起看雪

欄門語忽驚。僮報四山晴。蠻地少冬雪。逢人詫夜明。冷光飛列帳。寒影淡孤檠。幸有辛盤在。聊將卯酒傾。  
陳大令熙藩屬題城南雅集卷子

茲方當九日。撫序卻三秋。早陟高真觀。客秋按試平越。九日在高真觀登高。遙思甲秀樓。果然逢大尹。于此集名流。愧未陪  
遊屐。題詩最上頭。

十六日消寒九集滿碧亭禪房看雪至二鼓乃返

及此初更後。冥冥雪乍晴。林巒互蕭瑟。水月與空明。兀訝樓臺影。寒流烏雀聲。倩誰圖作障。一角傍山城。  
蠻方慙久駐。豐歲喜頻仍。一尺道旁雪。萬家門外燈。爆從冰柱裂。月共凍雷升。是夕大雪。中有雷聲。此夕清虛景。還  
應念遠朋。時徐太守馮開州以疾不至。

寒風送別圖送張太守鳳枝南歸

甲寅新正十二日。太守遭外艱去任。將于春杪奔喪南歸。同人欲作黔山折柳圖贈行。余意有未安。易爲寒風送別。蓋仿燕丹時白衣冠送荆卿之例。攷白衣冠本弔服。非執喪者所衣。吾輩與太守交厚。于其行。故當素車白馬送之。情事方稱。爰賦三詩。卽邀諸君同作。

名山人日記勾留。乘輿聊同麋鹿遊。一度巷門重問訊。麻衣如雪感蜉蝣。  
歸及江鄉五月時。北堂正好夢孤兒。思君欲贈忘憂草。不向風前折柳枝。  
易水千年事已陳。歌聲猶若繞梁塵。何妨更舉前修例。皆白衣冠送此人。

初春折柳圖送陳大令熙藩北上

前年來黔陽。長官攝疲邑。貴定城東南。馬前驚一揖。去年駐會城。長官爲劇縣。衙齋欣咫尺。投謁乃無算。  
長官爲政甫及今。大吏拭目民輸心。琴堂愔愔靜撫琴。暇復伴我耽幽吟。一行作吏何嘗廢。赤棒森森墨  
胥避。簿書叢裏集賓朋。撰得城南一篇記。謂所作城南雅集圖記初春柳絲黃及肩。拂拭鞍馬行朝天。蠻方百姓心  
難足。官好更防遷去速。燒燈節過持瓣香。私向山神社公祝。十月種麥四月秋。官歸正好麥上場。吏胥無  
權戶殷阜。但祝官遷此方守。

出貴定城雨至高家塘稍止

今晨山氣寒。呵凍集徒侶。行穿石罅中。濕霧黑如許。蕭蕭松竹徑。馬首寒不舉。前旌瞻後隊。似隔烟萬緜。忽然衝山風。捲去一層雨。稍復見晴雲。山樵喜相語。

自蔣塘岡至谷洞塘

寒空時復捲風聲。石削橋傾道未成。忽訝禽巢落人語。山樓都向竹梢生。連山無際水無涯。過嶺南來一徑斜。不是數聲山犬吠。全邨都被雪花遮。

早發谷洞塘

一峯雲。一峯雪。一峯冥冥影未開。猶帶前溪夜深月。須臾天平明。月向雪峯墮。冷光百道飛撲人。穿得白雲如縷破。前山日欲出。後山雨復來。深谷隱隱喧輕雷。君不見。蠻方氣候殊凌亂。曉日須裘午須扇。

落月西塘

馬首迢迢溯北風。兩山青破酒顏紅。我來似欲齊昏旦。落月塘西日正中。

將至都勻道中

一山途四出。一水流百曲。山奇方礙帽。水冷復縈足。途危輿轉穩。空處交竹木。前行皆俯視。一綫入山腹。茅檐無冬春。濛濛土花綠。花苗迎使節。半嶺注紅燭。十里戍鼓鳴。蘆笙響空谷。

橋頭汛



過橋方數折。正對石塘西。却望來時路。蒼蒼樹已迷。野蔬全上屋。春水半吞堤。莫厭山程緩。才聽日午雞。

初六日小雨至都勻府西門外試射士

半里冥濛霧。山邨雨不成。野雲隨地落。春樹接天生。白訝懸泉影。清流飛矢聲。射堂寒較甚。馬過亦驚鳴。

初七日射堂試士畢登劍河橋聳翠亭望西北諸山

沿流都有鷺絲飛。空翠時時沁客衣。忽訝危崖突人影。似驚鳴鏑啓山扉。回潭西去綠沄沄。一角樓臺上夕曛。傾耳却聞空際響。入山雲門出山雲。

勻陽書院春望

春波闊處春堤狹。十二回塘滿浮鴨。晴鳩催換袂衣忙。樓上人閒盡開篋。半城花香裊若絲。新綠對岸愁參差。銷魂別有東風柳。絕似春人十五時。

多結塘

多結塘邊雨似麻。沿途風峭尙飛沙。無人知道春將半。時有出墻紅杏花。

晚度大登高小登高諸險

一山當面氣冥冥。高下燈光接樹青。不是雨絲飄左右。玲瓏猶認半天星。

都江舟中

危崖春正半。花氣欲薰天。劇愛東風樹。斜生北斗邊。凌空自樓閣。絕壑渺雲烟。一帶人家好。簾垂飛瀑前。  
下陡坡渡鷄賈河

上征誠云難。下達亦非易。橫空旋若磨。百折始及地。藍輿寧敢却。頭上壓飛騎。欲前仍縮足。蟲處石犀利。  
胡蝶忽一雙。飛來立人臂。厓窮坡復陡。入隙途轉細。平視雞賈塘。斜陽落巖際。  
羊忙塘

行徑羊忙塘。奇石破空下。壓雲排萬仞。時裂一尺罅。飛泉頭上出。光景相激射。稜稜峯斷處。欲往少憑藉。  
馬首卷北風。孤桃向空謝。杉林轉蒙密。間亦露臺榭。頗念北山人。幽棲若長夜。

石檻灘俗名石門檻

始棹發都江。江干日初起。鑼聲行不絕。奮迅已百里。蒼蒼兩邊山。厓斷石將圯。驚梭時一擲。險欲沒潭底。  
石腳萬竅鳴。時時出潛鯉。前行經石檻。舟子展然喜。風暖日亦晴。沿邨數桃李。

雷音灘

一舟挈一繩。一繩長百尺。繩頭持十輩。畢力踞巖隙。高低懸半里。觀者咸失色。一瞥倏已過。微驚眼光黑。  
危崖排石齒。都向舵樓突。我僕忽失聲。頭低險遭嚙。長年欣過險。緩棹出厓側。却望四邊山。蒼蒼路仍塞。  
都江夜行

前山誠欲雨。其奈後山晴。澗水忽然暝。李花無數明。墨鱗成隊出。白鳥破空行。臥聽花苗曲。勞勞解送迎。  
古州登抱膝亭春望

山城二月花光足。空處香飄萬家屋。桃枝搖岸柳拂簷。花裏兩兩懸珠簾。樓臺影外春陰薄。試茗重登一層閣。日斜盤馬射堂西。却送菜花黃出郭。

抱膝亭望憩園花木甚盛欲往未果

小築烏蠻地。全家綠水灣。數聲花外屐。千尺雨中山。午倦童呼茗。春閒鹿抱關。上頭容展眺。未肯說緣慳。  
渡溶江登五榕山兼謁諸葛祠作

溶江江頭石如磨。五龍徘徊一龍臥。排空一石支一樓。高榦四出扶樓頭。一枝雅復高羣木。樹腹空于百間屋。低枝欲雨高蓋晴。臘雪尙向枝梢明。年深樹古禽難宿。剩有一巢藏廟祝。行人入廟火伴驚。嗚嗚角聲巢上鳴。

孫司馬鑑招同彭軍門廷棟書副將麐飲署西諸葛臺並角射至二鼓乃返

闌干曲處林陰直。官裏春閒試鳴鐺。平坡十頃吹細香。日色曩曩垂鵝黃。笛聲初停鼓聲警。舫屋深深若居井。忽地排空雨作絲。梨花白得春無影。

八匡塘

一邨都不見。全被李花遮。澗水到門合。山樓出樹斜。露光開梵剎。雲影抱人家。時有遠香至。應知春事賒。

夜宿寒麻有苗女年十三四者結隊來歌苗童吹蘆笙和之  
歌管初停舞袖忙。燭花紅處勸飛觴。前身合是梁間燕。猶着烏衣入畫堂。苗女衣裙皆黑故云。

山中夜行

小雨乍三日。梨花合一邨。夜燈紅覆屋。春樹綠當門。卷幕留禽影。開扉驗水痕。更殘月將出。山氣尙昏昏。

九朝塘

嘈嘈天半響笙簧。雉尾排肩繡兩襜。三百蠻姬擁前後。藍輿飛過九朝塘。

大容塘值春分

薄寒初散酒初醺。炊火斜連嶺上雲。小閣兩層山四面。百花香裏度春分。

宿路圍行館

使節遙從柳外村。一間茅屋侶鷄豚。妖禽入樹花先顫。薄霧吞簾鏡亦昏。吹夢夜風寒有影。接天春水月無痕。柴扉莫謂誰來款。宵半驚雷欲劈門。

將抵黎平歷滾馬坡諸險

古州及黎平。天黑少白日。忽然雲際一閃紅。天外雷驚劈山出。沿山巨石悉欲崩。轉眼已失千家邨。白雲

茫茫時吐吞。陰厓束人疑鬼門。一坡直下如注矢。削壁棱棱僅容趾。輿夫歎息何至此。呼吸真堪判生死。峯形中斷裂若溝。鞭馬一躍愁回頭。前峯行完後峯起。上欲摩天下無底。眼前親切雲霧生。足底忽已開山城。君不見平岡鱗鱗鋪萬瓦。突起一峯名滾馬。

出黎平南門

街衢南北嶺西東。柳外高樓而面通。一晌曉霞紅不定。前旌行入百花中。依然江水綠無邊。不信離家道七千。絕似踏青南陌路。暖風晴日袂衣天。

射堂卽事

出郭濛濛霧。林鳥背客啼。梨花三百樹。白到射堂西。隔岸坡陀好。人希馬作羣。過橋飛矢急。穿破一溪雲。極目望層城。春融萬家屋。祇覺遠天低。靡靡接新綠。山樓鼓角忙。歸騎出橫塘。無數春人影。斜陽落女牆。

南泉山

今朝天氣晴。靈鷲聲有喜。言遵南泉山。异境乃獨啓。喬枝森上聳。側出悟石理。生翠羃一山。空青露如洗。蹤疲方問路。絕頂尙三里。裊裊石鼎香。迎人入亭裏。天風盪衣袂。雲白欲緣履。卑瞻窮萬仞。微辨爨烟起。

却晒下方人。經旬居釜底。

靈觀閣春望

千折泉出山。百折人上嶺。尋源至亭側。石闕方若井。禽聲千百種。蠻語本難省。手掬石上流。呼童試新茗。郡齋憐官寂。飛騎餉春餅。幽人居絕壑。構屋恍橫艇。微風振林杪。斜日逗光景。闌干飛百尺。坐處據松頂。半日衣袂香。濛濛逗花影。

過少寨河橋

平蕪一雨春花謝。濃綠樓臺若深夜。雲陰如夢不逢人。澗水分從馬頭瀉。波空若行明鏡中。鷗鷺兩兩舒春容。危厓面水不濡水。石腳到地仍懸空。人家屋上山如活。石竅玲瓏牖邊突。沿溪三里行半時。細聽丁丁斧聲出。

少寨河旁入一洞行半里許

一峯高疑帆。缺處作堂奧。前行石當額。側足入岩竅。玲瓏千百隙。曲折孕奇妙。大石闢若扉。稜稜縱森峭。左途右爲壑。坐石儼可釣。稍深阻天日。飛瀑光已照。支遁少石牀。稽康留鍛竈。厓同豺虎伏。水學龍鸞嘯。削室驗孟勞。入洞有鍛者數十人在此製削藥籠驚伯約。昏程不逾百。閑客倘能到。來欣去悒快。一步一回蹈。半里望始迷。晴陽赤如燒。土人云入洞可五六十里。惜未窮其勝。

早發新化塘

水田百級行方半。攔路野雲蹊忽斷。牽衣避道歷少時。大石如牛復當岸。行人欲歇嘶馬催。村店正向雲頭開。山坳石磴暫延佇。衣上綠綴寒莓苔。冥濛路向松梢破。絕頂一山如石磨。清泉落處花朵妍。山翠壓樓人尙眠。

平江塘

晴鳩聲裏燕呢喃。高下藍輿睡乍酣。好向春波寄花片。迢迢此水入江南。春殘是處綠芊眠。十里平蕪盡帶烟。胡蝶欲高高不得。野花黃已上青天。

出錦屏縣城上斗坡

一山綿一縣。高下里三十。高者仰如跂。下者俯如揖。愁霖行撲面。碎石險埋膝。中途勢倉皇。懸溜復飛及。天風下林莽。石竅自呼吸。蟠澗三兩松。人禽亦爭集。厓深羣燎火。盪此衣袂濕。濛濛雲氣蔽。却向空際立。石罅忽啓扉。生苗下山汲。

黃泥峽

馬蹄真已踏千峯。上嶺叢杉下嶺松。當午日光分顯晦。南山雲淡北山濃。誰將界石作橫梁。上是黎陽下灑陽。怪底廟門開向北。南行不炷嶺頭香。

紫雲橋

春山一片疑無骨。都作紫雲扶曉日。馬頭隨意歷西南。無數樓臺復飛出。沿溪一橋如一舟。橋上三面開朱樓。前旌後隊何回緩。似向長虹腹中轉。橋心倒插十丈餘。飛蓋過處驚遊魚。君不見。一山前頭復如井。却喜嫩晴鋪十頃。

師子厓

我行及雙溪。大石黑半天。人緣石隙中。有若蛇蜿蜒。危巖何陰森。行處正壓肩。懸瀑復四飛。時聞響濺濺。藤蔓百尺垂。倒出花朵妍。空處突一亭。簾垂裊青烟。延回出層厓。萬頃鋪水田。清絕半里程。人家總疑仙。沙鳥亦有情。飛蹲笏輿前。

早發叩水

早行出叩溪。殘月溪上漾。濛濛千樹花。正罩叩溪上。花朵落盡。巢禽不知。遊魚吹花。香氣若絲。花光深。萍色淺。襯出魚苗綠。千點枕波樓閣三百家。春夢正好驚啼鴉。橋東覓路才能出。暗影溪頭自飄忽。千林綠重曙不開。一樹梢紅甫迎日。

瓦寨

半程卅里走沙礫。一寨四面圍松枿。雄黃出穴百蟲伏。牡丹壓闌羣卉慙。洞形如扉日韜采。天頂若握雲



拖藍相攜活火欲烹茗。却有死谷邀停驂。

鬼鳥塘

石徑空濛露有光。四山風刺被衣涼。杜鵑一樹紅于血。月黑愁過鬼鳥塘。

路瀨塘道中

路瀨塘西石逕迢。人家竹屋半臨流。低飛胡蝶高飛雨。百種花香出草頭。  
高下岡巒馬去遲。緩行剛及午晴時。山南一片波如掌。閑看兒童捉活師。

雨夜至石阡溫泉浴

月黑雨聲愁。穿林到嶺頭。似防湯谷沸。飛瀑入池流。  
昨宵江水深。沒却江干樹。老鶻無處棲。從人屋檐住。

延江兩生行示貴筑熊生煥章思南安生蟻

延江水。流千里。一生居江頭。一生住江尾。熊生十八貌最羶。自構竹屋臨江居。一室窘乏文豐腴。安生英

英年十九。從宦三年住清口。

尊人官江  
南桃源令

落筆居然學劉柳。我前持節來衡文。萬言日試童子軍。惟二子者

超倫羣。雖然日課文一篇。不若日讀書一卷。亦文綠字填方寸。激電驚虹注雙腕。嗟余遲莫猶勤學。矧復  
生年甫當冠。九垓一瞬何難屆。尺璧寸陰寧得換。扶起三霄翮欲全。遠行百里程方半。佇看子筆排風霰。

會見余言匪河漢。君不見。蠻中一雨何綿連。延江水流行拍天。吾曹學術亦如此。努力來看有源水。


袁太守純德招遊城南文昌閣並歸飲署齋卽席賦贈并壽太守七十

我前遊秦中。聞君宰米脂。十年來荆襄。君官擢同知。盤盤政績推尤異。佐郡淹留賞心地。尙書清節號知人。我作門生君屬吏。昨慙持節來黔陽。君亦五馬官思唐。秦中知名楚中見。何似黔中日謀面。春殘約客城南頭。江漲欲從城上流。看花步幃遊山屐。誰信使君年七十。窗櫺八面閣四層。飛步早從高處立。日斜回馬東南街。轉歷百級來官齋。亭危正面延江口。我飲一杯君一斗。眼中落落五老峯。且挈浮邱爲君壽。雨發思南袁太守純德鄒遊戎寬率兵弁出小厓關相送卽席賦贈一首

袁君揖我處。絕壁立千丈。藍輿方欲下。飛瀑眼前滉。竹亭留少坐。茶話覺清曠。雨立三百人。升頭致微悵。愁霖敢安坐。急騎出厓上。澗水奪路流。巖門不能抗。前行泥滑滑。黑霧馬前障。五里甫出山。晴光草頭放。發都勻日枉道過七星山入仙舟引洞

偏仄疑無路。隨雲七里東。水從深徑黑。果向怪厓紅。削壁風徐下。幽軒日乍中。正憐書韻好。鳥語復瓊璫。

諸生徐時英  
等讀書其中



卷施閣詩卷第十五

關嶺衝寒集

八月十五夜

蠻方今夜月兒。女集樽前。迢遞思鄉國。團欒敵客筵。塔光雲外隱。菱角雨中牽。不寐緣何事。相將話昔年。

十六夜雨

闌干沉不見。都在雨聲中。細霧吞簾白。孤花隱幔紅。半街籠畫燭。一笛引涼風。正好臨流坐。寥寥爽氣通。

秋日登城南甲秀樓訪鄂文端公紀功鐵柱

層樓設重扃。事罕與俗接。芳洲歷春夏。送客偶陟躓。節序慨已移。青林半黃葉。雙橋通梵刹。三面俯城堞。攝履偶上征。褰裳畏深涉。豐功緬疇曩。往事稽故牒。銷金清四野。立石表三捷。勳名旣鷹揚。文史復漁獵。丹方初奠定。黃閣藉調燮。俯仰跡已陳。苗蠻志猶懾。叢祠屏乍展。荒徑露還浥。詎止攬勝心。孤懷濟時業。

九日偕富尙書綱馮侍郎光熊重至甲秀樓登高

菊已衰黃柳尙青。更尋芳杜出前汀。殊方再值重陽日。候館欣聯五使星。是日送黔中兩主司北上諸葛廟旁開石舫。伏波灘畔訪金銘。惟公志業差無愧。十五年來邊徼寧。富節制瀘黔已十五年

徐太守日記餉菊數十盆。因結作花龕。并邀同人共賞。卽席賦謝太守。

十日苦雨三日晴。秋老已覺無歡情。打門有客送花至。一笑紅紫紛相迎。來鴻去燕無消息。剩得山雞日  
啾噴。攤書堂北日猶長。人與花枝共高格。衝寒花性昔所諳。斗室合作歲花龕。重重簾幕夜難放。勾取殘  
月來花南。秋堂夢好偏能醒。看足花魂抱花影。寥寥風味許誰參。不種醇醪稱清茗。醒時看花倦卽眠。人  
意花意交相憐。君不見紅塵十丈官道邊。誰有清福來花前。

沈太守丙招集寓齋賞菊

三間古屋如浮槎。靜掃四壁懸秋花。扃門不出究何事。却與此花商位置。簣篋三寸截作瓶。刳腹滿貯寒  
泉清。高低花色誰能省。恍若銀河瀉星影。一花前頭酒一盃。客若不飲花徘徊。酒傾十斛花千朵。醉倒倩  
花扶客坐。三更以後客較狂。月影花影催浮觴。君不見花前五客皆濡首。花意未知嫌客否。從花乞假亦  
可憐。明日閉門須病酒。

嘉杜軒公讌

嘉杜軒初構。今看一再來。霰從雲外落。花向雨中開。夜已侵三漏。狂猶酌百杯。主人留客摯。籠鳥亦徘徊。  
馮刺史克鞏招集七研齋

窗前葉葉芭蕉雨。坐上沈沈簫管聲。不是主人情較重。醉眠誰遣到三更。

入坐先教飲百壺。簾鉤影裏燭花粗。狂來合被時苗罵。蔣濟頭銜是酒徒。

題篇已擅沈休文。頌酒仍須劉伯倫。

謂坐中沈太守  
丙劉太守雁

明日馬頭西北去。醉顏還剩十分春。

自新鋪至永寧

馬上尤愁撲面風。坡陀百折誤西東。初晴也識朝陽淡。添得千堆野火紅。  
山南山北路嶙峋。只隔蘆花便絕塵。削壁四圍溪半折。野鷹盤處定無人。

安南抵安姑作

幾日西風撲面吹。濛濛尙有柳絲垂。鳩方逐婦天偏霽。馬到安姑路轉危。渴思乍拈籬畔橘。閑心還讀道旁碑。山程紅燭誰相迓。却喜前邨月半規。

將抵南籠道中作

羊場驛外千山亂。一郡如巢突天半。藍輿百折入郭門。細水中分兩峯斷。高低半日坡難上。斜處却留行客館。尤愁馬瘦蹄應碎。不覺役疲肩屢換。居然一巷深如井。對面樓臺若居岸。如龍松柏競瞰城。幸有女牆高處判。已看日沒繁星景。難得雪天揮兩汗。雙旌早駐前山麓。一屋尤爲衆峯冠。排衙纔了且賦詩。百尺龍山作吟案。

南籠試院卽事

衙齋高處逼浮屠。天半樓臺落日孤。雲氣大都紅似火。居人多半黑于烏。城隅尙隔三層嶺。樹杪驚看四出途。也識搏猿饒瘴厲。怕從直北展輿圖。

十八先生墓

按南籠府志。明桂王由榔。自廣西至貴州。孫可望處之安籠所四年。無人臣禮。從臣吳貞毓、張鐫、周允吉、楊忠、徐極、蔣乾昌、李元開、李順、朱議屢、鄭允元、趙廣禹、蔡續、易士佳、胡士瑞、朱東旦、任斗墟等憤甚。與內侍張福祿。全爲國謀。遣之滇南。諭李定國共圖可望。事洩。皆爲可望所害。時人哀之。收遺骸葬于城外西山之麓。題云明十八先生成仁處。自是桂王復入于滇。蓋國朝順治五年事也。

七千里路接蠻鄉。十八先生併命場。絕勝瀛洲唐學士。就中寧有許高陽。

黔中樂府十二首

賽神謠

山腰十數家。屈指無百人。樹頭營危巢。云以祀土神。前門飄風後門雨。偪仄半間神乏侶。村女纔燒一辦香。社公腹內秋蛇語。

打虎謠

斑斑猛虎文。彎彎水牛角。牧童騎牛來。乘便虎欲撲。虎憑爪銳牛角尖。兩兩轉門來山巖。腥風沾林血粘。

草虎臥病創俛出禱。

起龍謠

黔中怪底淫霖注。石腹龍藏不知數。閒來龍穴看起龍。頭大如豨聲疑鐘。晴天亦覺風雷湧。百步龍堂陷如冢。排林牧馬莫不收。日盼生駒得龍種。

網魚謠

上山忙下山緩。花深深波滿滿。踏波不須郎。儂衣正將浣。腰肢不怕春波濕。村樹陰邊裏衣脫。沿回半响。卽出波。八幅裙拖鯉魚出。

漏天謠

東黃平西普定。十驛雨中行不竟。有時雲際露日光。萬戶爭曝泥衣裳。巒山萬疊愁霖透。不說天荒說天漏。老翁自詫八十年。生日未逢晴正晝。

跳月謠

一年中好時節。前中秋後元夕。錦袜碧當胸。羅裙紅染血。蘆笙吹徹人欲還。眼波一瞥郎上山。上山亦識儂心切。天際黑雲來罩月。

摘蔬謠



廚中苦無鹽。盤內久無肉。幸喜一方田。青青菜畦足。山家食料常如此。瓜蒂深黃茄色紫。筠籃挑滿手暫停。牽得樹梢紅柿子。

采茶謠

今晨儂獨來。昨草歡未遇。製得憶歡歌。沿山采茶去。春慵不嫌歸路遲。茶藍枕首眠少時。村花滿頭紅未放。胡蝶一雙釘頰上。

宴客謠

男行欲成婚。女行欲出嫁。團團茅柴筵。纔把生客迓。石臺却有八尺長。東西南北羅酒漿。座旁誰牽牛一隻。黃犢離村亦爲客。

嫁女謠

十五愁嫁遲。十三欣嫁早。嫁女雖十三。偏愁歡已老。山羊十角米百擡。嫁女不惜傾家財。歡來牽儂儂不宿。卻抱黃羊水邊哭。

織錦謠

阿娘理紅絲。阿妹理彩綫。竹閣止一間。織絲看四面。眼波時向郎邊瞥。十指纖纖化工出。春禽怪底齊上樓。織得一堤花欲活。

曳纜謠

上官來役夫走。百板雙繩齊在手。上山居前下山後。排頭雨汗揮不停。髻上都插山花馨。生苗出語真無緒。官好牽他上天去。

自南籠至新城道中病酒

一程纔了日平西。遠近岡巒望欲迷。渴馬縱蹄尋野水。閒禽展翅曝山泥。節臨長至猶餘燠。天入南荒漸覺低。慙愧故人知病酒。滿籃黃橘早封題。

新城行館獨坐

獨坐竹軒內。冷冷夜欲分。半窗斜入月。空徑靜生雲。病酒宵餐減。拋書吏牘勤。同儕知欲至。隱隱馬嘶聞。

小病

小病初除偶自思。料應不及少年時。酒能忤客先宜減。墨欲磨人漸不支。婦解藥方參服食。兒通選學付鈔詩。君親一例酬難盡。閑處齋心懷四知。

三味塘道中

一帶坡隨馬首東。記程今夜宿波中。敲殘石虎尋雲母。見慣山羊類雨工。傍屋種松憐地窄。冠厓營閣與天通。寥寥橘柚今餘幾。留伴楓林門晚紅。

自高伍塘至安姑宿

高伍塘邊渡隙河。緩程不覺夕陽過。人疑夸父西追日。路識安姑北下坡。白首僧從初地出。茜裙苗憶仲家多。桑間三宿真成戀。況復頻聞子夜歌。

自安姑抵安南道中

界首塘東路復彎。情懷真耐雨闌珊。無魚偶作經旬客。多虎全荒一縣山。捲地黑風迷鬼箒。排天紅葉出禪關。安南令尹驚相訊。走馬來偏走馬還。余往還此縣皆騎馬以避三旺坡老鴉關諸險。

范公子學敏讀書倉廩索題

伏波能聚米。上蔡亦監倉。移作攤書地。真成避客方。水泉朝淪茗。石鼎夜焚香。落月諸峯好。玲瓏影上床。自保甸塘望盤江。對岸諸山半日行。尙未到感而有作。

半程誰識路途修。百折巖坳尙未休。只有鳥飛偏逕直。往來曾不礙雲頭。侵曉渡關嶺

之字山程卽字樓。昨宵剛值月當頭。一聲雞唱出門去。小市夜燈猶未收。松櫟爲屏石作壇。罡風吹袖覺衣單。相看卽是青天上。莫更頻歌蜀道難。去歲三月。自安順按試南籠。道過安莊。花事甚盛。今復經此。則秋林盡搖落矣。感而賦此。

安莊汎北路頻又使節重來感歲華。依舊野羊眠道左。半林紅葉替春花。歲莫懷人二十四首

袁大令枚

清福能消四十年。老來仍作地行仙。居然手筆空千古。隨分頭銜寫一編。公頭銜或書庶吉士或書江南知縣或書陝西候補知縣不拘例一名士竟須依作主。美人間已放歸禪。存亡舊例都參破。生輓詩鈔萬口傳。

錢少詹大昕

燕吳楚越路偏長。君官京師余在里中及君服闋友人延修浙中志余亦自楚中歸甫得相見十載纔申一瓣香。絕業竟傳齊稷下。此翁何似

魯靈光。奇搜秦漢碑無缺。例校金元史獨詳。我亦誼應參北面。淵源寧止丈人行。

畢尙書師時緣事降撫山東

全湖南北節初移。聖主優容俾近畿。五斗未能除薄俗。兩旬聞已昧先幾。右才每構千間廈。左宦仍披一

品衣。山東巡撫兼提督銜此日汲公難臥治。九州分半入封圻。山東一省全得青突二州境其迤北迤南及迤東諸處又兼有幽豫徐三州地也

錢通判維喬

相識寧論行輩先。爾來久已訂忘年。早傳吏績人呼佛。晚避詩魔自學仙。百種盡除留畫癖。幾時重與枕書眠。勸君歸後余纔宦。面目多應愧此賢。

王侍郎昶

聞聲卅載苦相思，孤露同看母作師。爰雀從軍憐早歲，尊鱸歸計惜衰遲。眼前事業千頭橘，身後才名萬首詩。一卷苦爭君記否，三條官燭校文時。

盧學士文昭

文格蓬萊賦紫微，罷官依舊苦長飢。六經校後真無誤，七十行來尙若飛。雅苦俗儒噓狗曲，閒謀隙地築漁磯。草元亭在雲溪上，除却侯芭問字稀。君自言主講常州三年，能請益者，惟臧輔堂一人。

邵侍讀晉涵

苦憶餘姚邵夫子，授徒却待勘經回。君兼石經國史二館，下直卽復授徒。殊師肯啖公羊餅，君擅穀梁學。絕業誰營爾雅臺。憶共五陘連榻住，也同六郡校文來。謂在朱笥河先，生安徽學使署。青山回首應惆悵，斷送高張幾許才。謂同幕高東井張方海，黃仲則諸人。

屠刺史紳

案牘如山目已迷，趁閒偏欲逞篇題。縱官刺史無千石，却學君卿有十妻。好友總拋蠻嶂外，全家憶住小湖西。所居名西小湖。何時共泛南歸棹，臥聽溪禽自在啼。

李太守廷敬

五載欣看歷四州，清郎出守最風流。曾登秘省稱前輩，重到蘇臺感舊遊。愛客自拈金縷曲，迎人多上木

蘭舟吳閭風月梁溪酒。可憶人居天盡頭。

法祭酒式善

翰林詩格冠詞場。屢改頭銜作漫郎。左手書應成絕技。苦心詩已入中唐。兩番胄監遷官速。百本名經選佛忙。君時選同館課藝我愧枚公賦情拙。莫將疎陋玷班揚。

管侍御世銘

積歲機庭苦未閒。昨觀除目與開顏。青驄早避鮑司隸。溫樹難言孔博山。作賦廿年推老宿。爲郎十載冠清班。也應寫寄爭臣論。好待昌黎出使還。

趙舍人懷玉并酬入直見懷之作

舍人入直題牋日。驄馬南行按部時。明設提學御史今尙沿稱學院却憶紫微廳北路。聊吟紅杏驛中詩。鄉園漸喜田除稅。余有田二頃入京後皆爲主者贖去。聞君年來亦割田償債。故云。兄弟都驚鬢有絲。遮莫善愁兼善病。得閒須復強支持。

王學博吉士

誰是南宗與北宗。阿兄城北弟城東。穿籬却有<sub>三</sub>間舫。入市頻驅五尺童。產破中人憐沈駱。宰迎上客說孫洪。瘦羊博士今何處。薄宦聊應似轉蓬。君尙未補缺。惟東西署事。

楊大令倫及令弟煒

迎春橋北放生池。猶憶平生訪舊時。門巷一雙前進士。家風五葉老經師。藏花席上看君醉。君拙于酒令。問字堂邊待我遲。同在龍城書院肄業。羯末封胡俱下世。謂大令煒伯兄簡及仲弟端從弟濬諸人。不愁君不鬢添絲。

汪明經中

不敢隨車試大廷。頭銜眞許號明經。人言蠹目同荆尹。自詡龍頭壓管寧。喜讀梵書排釋氏。慣餐劣藥冀修齡。狂來更頌東陵跖。君有狐父之盜頌一篇。手劈蠻牋寫作屏。

陳軍門大用

識字何須五石弓。昇平儒將最謙沖。爭看隨陸司兵籍。無復伊涼唱土風。江國別來饒豔句。海氛清後寡奇功。軍門只在千花內。好買鱸魚鬥酒筒。

汪助教端先

卅載閒情不自持。蕭疎今已鬢添絲。纔看薄宦拘平子。多分揚州誤牧之。我欲共參山水月。人傳三絕畫書詩。年來苦憶梅花館。開徧南枝到北枝。

孫比部星衍

早入承明侍從廬。爲郎莫更嘆紆徐。經時偶斷船官獄。何日同乘使者車。郭芍藥詩成本事。鄭櫻桃室作安居。奇寒可憶茅山夜。兩客同驅一蹇驢。

張檢討問陶

西蜀奇人作冷官，青氈猶剩十分寒。何妨日住蓬萊頂，不改常餐苜蓿盤。子美數間吟舍窄，淳于一石酒腸寬。金釵典盡眉常斂，欲畫仍須拂鏡看。君篤子仇麗。

呂學博星垣

卅載詞場志已灰，狂名猶被世人推。好奇欲破古今格，傲俗肯交中下才。不覺一官餐苜蓿，依然十幅寫玫瑰。年年避債君尤窘，曾與同登百尺臺。己酉年除夕君避債城東。經臺余訪君劇談竟日。

王孝廉芑孫

人言風貌太酸寒，那識詞源萬斛寬。吳下早聞呼短李，禁中久已識詩韓。傳經帳後縑雙疊，君以賣文爲活。寫韻軒前墨數丸。誰似阿儂夫婦好，賣琴錢少減晨餐。

揚州守芳燦暨令弟觀察揆

家山百里望堪通，君住溪西我水東。兄弟才名吳二陸，宦途階級漢諸馮。射雉身手知還健，君前守伏羌城射殺一番。入蜀詩篇詡最工。我在黔中七千里，寄書應趁石尤風。

左大令輔

當時踪跡最清閒，繞屋梅花自掩關。千首早摹梅處士，一官今榜謝家山。緣知小弟才尤捷，可識衰宗客



未還。謂黃仲則子時在廣東。余屬至君署中讀書應舉。腸斷廿三年上事。黃公壇在白雲灣。

莊公子達吉

兩載何因滯故鄣。一鞭聞已入咸陽。多金結客家頻破。廣柳藏人事已忘。狂甚竟聞呼彥國。貧來先欲弃姬姜。何時碗壘澆應盡。與築糟邱醉百場。

續懷人詩十二首

紀尙書昀

子雲筆札君卿舌。當代無人可並論。直閣新銜同掌院。文淵閣開先生首兼直閣事。曲臺故事號專門。研心十載讎皇覽。快意千篇續瑣言。謂近所著說部五六種。只我最饒知己感。下春官第柱高軒。先生主甲辰會試。余試卷最爲所賞。欲首擢之。爲監試御史所阻。而止。子卷末題惜春詞六首。有云。萬紫千紅號花海。冠春畢竟讓槐黃。徹棘後。又枉道過訪。

江布衣聲

家榜要離尺五墳。布衣七十甫名聞。因題刺字摹秦篆。君生平未嘗作楷書。即題刺亦皆篆字。爲愛尙書冒古文。生世未嘗知鮑謝。學徒差喜得芭葵。君自少至老。從未有授館者。近忽有市賈延君教子。執禮甚恭。亦奇人也。閱晉亭長今同調。謂錢州判。州一樣嶽嵒不入羣。

家編修梧

機庭綸閣兼詞館。十載勤趨朵殿東。家世我慚稱大阮。制科人已比三洪。君兄弟三人皆以召試得全拋中書人比之鄱陽三洪云舊業因廉史。君伯兄僕出守順德清節絕人家以此中落合譜新詞寄阿翁。君尊人填詞最工兩樹櫻桃一樽酒。風懷閒日與誰同。

管漕督幹珍

早歲清名滿石渠。東南久已駐輶車。君巡江南漕至三任數程不異官鄉郡。十省今看領國儲。嚴檄早清飛輓路。閒心時復故人書。堂開依舊塵凝坐。爲有耽吟習未除。

方上舍正澍

家本新安客上元。半生知己得隨園。工愁五十偏無恙。避俗三旬竟不言。手筆捷如錐脫穎。肩輿行比鶴乘軒。梅花百本扁門住。尙厭朝來鳥雀喧。

徐太守大榕暨從弟縣丞書受

二十年前契最深。鳴珂南巷酒時斟。阿兄作吏能強項。小弟裁詩學嘔心。七子才名虛擬議。一家官爵竟升沉。篝燈倘憶初逢處。只惜秦州宰木森。余初識縣丞時方從董州守照讀書今州守聞已下世

唐少府軼華

中河橋左廟溝西。老屋三間戶最低。蠟屐每思穿巷過。粉書時復到門題。卑官已屈陶彭澤。佞佛何如孟會稽。一事至今忘未了。謝家園裏有鶯啼。園在君宅後

章進士學誠

鼻窒居然耳復聾。頭銜應署老龍鍾。未妨障麓留錢癖。竟欲持刀抵舌鋒。君與汪明經中議不合幾至揮刃獨識每欽王

仲任多容頗冒郭林宗。安昌門下三年住。一事何嘗肯曲從。君性剛鯁居梁文定相公寓邸三年最爲相公所厭憚

蔣少府廷耀暨令弟上舍馨

君增十歲稱齋長。我後三人作學徒。外家兄弟五人。余齒居第四。逃塾早曾窺睥睨。背燈時欲學吟哦。樓扉敞覺書聲脆。紙仿描鴛字跡粗。重向講堂尋舊事。桂花零落杏株枯。

莊縣丞寶書

夢來阿鬢竟無徵。從母生君時有夢兆。五十驚看白髮增。詩社早參三健守。君詩集中與蔣太守熊昌徐太守大榕及從子通守所唱和最多。通守時攝興

安府事書名誰似兩龔丞。君書法與蔣縣丞齊耀並名。回車尙憶南皮飲。丁未夏訪君河間客邸。歸艇同尋北寺燈。指庚戌年元夕。荒徧外

馮戶部敏昌

早向長安門酒盃。之秦之楚屢追陪。一官止抵傳經席。五嶽都成避債臺。君以避債出都。遂徧遊五嶽。此日最推長句好。名山曾步後塵來。已酉春余北上枉道遊王屋。時君甫出山數日耳。青松兩樹花千本。頓使先生笑口開。在部日。屢同詣法源寺看花。

姜廉使開陽

憶自蠻鄉入帝都。舊營池館日荒蕪。三層閣上簾虛掩。萬里橋邊水亦枯。吳晉有萬里橋。搜篋雅知廉吏窘。時甫謀捐

復道持杯誰念酒人孤。何堪早逐西飛雁。謂君所善歌者喜兒。爲問先生記得無。

福公相康安自全蜀移節滇黔近聞已抵威寧寄呈四首

烏撒山川界蜀滇。遠勞上相復行邊。拜公鄧禹年三八。鑿空張騫路萬千。左道更須嚴折石。偏鑪誰敢鑄

浮錢。時辦理大學郭教兼清盤錢法。旁人莫羨頭仍黑。國事辛勤已久肩。

束髮爭傳命世才。相門出相著風裁。何妨早日登三省。已覺奇勳塞八垓。兩度廣陽看飲至。頻從絕域受

降回。朱轡玉節雍容甚。分野星明接上台。

昨傳使節入秦關。威望先馳壓百蠻。三萬里躡星宿海。八千人上賀蘭山。偏裨盡注通侯籍。掌記猶分侍

從班。方太常惟甸楊侍讀。揆近日皆曾隨幕府。却笑燕然地猶近。寶公容易勒銘還。

外臺何幸接班聯。溫語頻番荷報牋。一刺記投通德里。庚戌夏公自兩廣率安南國王入覲。余時新入館。曾謁公里第。十年久領大羅天。

欣陪節鉞來荒徼。敢向蓬瀛說散仙。幾度自慙文思拙。欲將簪筆頌凌烟。

安平行館見梅

輕裘覺暖寒猶淺。峻嶺初平路轉又。獨坐小窗斜日裏。膽瓶風折一枝花。

荷齋十詠

貴州學使公廨最湫隘。乾隆癸巳。今大學士孫公士毅視學此方。始於其後積土爲堂。名曰近山。然屋止三楹。不足以資燕息。余抵任後。復于堂西隙地。築屋十數楹。或高而爲臺。或曲而爲塢。或因樹構屋。或臨溪製軒。賓僚觴詠之暇。昕夕讀書。恆于此焉。開歲將報滿。入都爰分詠十截句。以貽後之來者云。

官廨各占山。

貴州官廨自巡撫以下各占一山。惟學使署在平地。

此但與山近。最喜開北軒。寥寥發松韻。

堂後與東山咫尺。

右近山堂

獨坐思話軒。孤吟悵無侶。幸有黃栗留。時來伴人語。

右思話軒

筑中山最高。沉復據山頂。披香夜半開。東西眺星景。

右千葉蓮臺

春來樓檻外。百卉盡杼紅。欲別風花味。香生第幾叢。

右紅香館

屋仿江南船。聊住江南客。所苦一百旬。孤篷雨如織。

右聽雨篷

日坐此閣中。著書愁未了。窗櫺三面陰。綠徧卷施草。

右卷施閣

蠻中金粟花。三歲偶開一。方牀夢醒時。婆娑滿窗月。

右金粟山房

惡木旣已鋤。篔簹植千个。只有問字人。時穿竹中過。

右修竹廊

無日不讀書。無日不晨起。闢牖看啓明。濛濛鵲聲喜。

右曉讀書齋

天無一日晴。地覺四時暖。持此養寸心。潏然春氣滿。

右藏春塢



卷施閣詩卷第十六

蓮臺消暑集乙卯

乙卯人日早登黔靈山

扶雲入山門。一壁削天半。青松三百樹。直上寡曲榦。危崖嵌樓閣。懸處鐵索斷。開軒同客話。響與禽雀亂。窗紗裂盈尺。臘雪尙堆案。僧延繙佛藏。石匱鼠驚竄。雲光開半郭。下視起烟爨。東西萬家屋。驛道復中貫。一徑促下山。藤枯屢縈絆。巖巖生對面。欲下削如岸。風寒砭肌骨。坐處裘屢換。忍凍舌本強。輿丁尙揮汗。回途自郭外。東轉至雪厓。洞小憩。

危橋背郭幾人家。石徑東西路轉斜。清淺溪山浮曉日。冥濛樓閣散棲雅。閒身乍嬾非關病。春氣原馨不繫花。一帶壁龕藏古佛。幾回欲與論年華。

十五日立春

元夕春。百年少。日月食。皆逢卯。鴉聲愁。鵲聲喜。兔申頭。虎曳尾。雷憑憑。電光掣。春朝風。元夜雪。

二十日送客久憩圖寧關

黃塵飛百尺。樓上馬蹄聲。道古高于屋。山奇逼若城。關軒春睡足。窺逕晚烟生。莫更留行客。勞勞尙半程。



二月初六日偶成

春雲黯黯飛一城。城角缺處花枝橫。風吹折枝供膽瓶。不向樹上牋其生。烏烏角聲吹不停。憶昨夜過三千兵。山陰美酒貫百瓶。傾耳欲聽苗蠻平。時銅仁苗匪滋事。撫以下並領兵親往。羣公花下來駐旌。醉過寒食兼清明。

初十日侵曉至龍場

銀燈影外星初落。一山開雲蠹樓閣。冥濛花氣不知名。十里曉風浮絳萼。花前鶯語聲猶澁。花底春衫著疑薄。晴光豔豔鋪郊甸。青氣茫茫注巖壑。馬頭回處客亦驚。卻值曉暎紅出郭。

阿江汛道中

一山途四出。曉日正當頭。好鳥背人立。清泉擇地流。霧歸僧閣暗。雲出寺門浮。半响沿林走。偏忘路阻修。  
杏花一絕

屈指好春惟二月。稱心小閣却三層。多應獨夜愁無侶。來向書窗惹客燈。

十九日出城東門看花至芳杜洲作

只有尋芳興未闌。閒排僻徑出層關。淡紅十里杏花路。淺碧四圍楊柳山。夢好尙憐春思冷。塵飛時望捷書還。征東將士應無恙。何日先平板楯蠻。時銅仁逆苗尙未授首。

曉發龍場

二月氣尙寒。蟄蟲局未啓。冥濛菜甲花。飄黃十餘里。南瞻黃盡處。一綫日初起。人家依竹木。分半住坡底。東風灑然來。綻此桃與李。宵露濯滿枝。浮香出垣裏。寒鳩蹲屋角。兩兩鳴未已。一响雨復來。高原忽如洗。  
延江道中

桃花已全紅。李花未全白。翩翩馬上人。高比花逾尺。初陽才出樹。紅紫相映射。花梢度人影。花底繫馬策。西顧殘月痕。冥濛淡無色。沿溪籬落好。風定爨烟直。香氣不可名。交飛蝶如織。

早渡延江

蠻鄉居已久。不復知蠻中。蠻水一彎綠。蠻花千樹紅。蠻人如飛禽。舉足能蹈空。但覺雲四飛。眼底青濛濛。倏忽下萬山。驚流盪心胸。青綠瀆一堤。撲此詹宇濃。解纜語未完。舟已當水衝。中渡驚語聲。我僕留岸東。蒼蒼鷗鷺羣。送客飛逆風。

將至螺堰塘

白雲埋西山。雲破花一谷。花光接雲氣。交處香斷續。沿山行十里。稍覺展地軸。高下極水田。參差萬畦綠。波流縈折處。臺榭亦回複。溪魚能入市。驚筍穿石腹。日午飯已香。幽人候茅屋。

養馬塘道中

延江及播州。山勢忽平易。坡陀騎馬入。逼仄始見地。衡門兩下屋。構製亦微異。曲巷分數門。平堤溢川氣。

連岡西北展斜與碧天際。居人汲深泉。百級盤石砌。雲容間梨杏。稍覺天宇膩。一頃黃花風。牛羊下山細。  
曉發遵義四十里鋪

濛濛雨不停。十里天尚黑。春塘白鷺絲。寒飭梨花立。  
沿溪數十家。斜左窗並啓。風遞人馬聲。吹笳入雲裏。

遵義試院

二月春光好。幽尋使院西。草迷僮室暗。花屐步墻低。馬病離槽立。禽閒擇樹啼。樓前小家巷。時聽屐衝泥。  
二月晦日使院小樓看桃花

長水捷書當可達。銅仁逆苗聞已達。勦尙未得實信。播州春雨不能晴。山圍城郭常時暗。花發簾櫳徹夜明。精舍未妨勤

課士。麤官聊願與談兵。如掾紅燭燒何事。樓上閒來酒獨傾。

試院小樓獨坐柬嵇太守承孟

風光多在小樓西。無數山雲壓檻低。與客生疎惟燕剪。背人開落有棠梨。酒逢地主慙中戶。君量最宏。札報天

兵過五谿。時得福公相書言已。華黔兵入辰沅間矣。早晚捷書來郡閣。春融拚共醉如泥。

曉發遵義

深淺山坳內。時浮一樹花。白猶零露雨。紅不見人家。澗水碧于玉。雲光薄似紗。面西樓閣好。翻恨路東叉。

八里水塘道次

十日雨始晴。高原鬱春氣。連山亘南北。濃綠漲天地。斷嶺一以開。花紅亦無際。連綿芳艸合。來路渺難記。幽香惹行客。處處欲停轡。竹屋三四家。鳴泉響頽砌。臨波亭自好。新筍大如臂。窗櫺紅八扇。花裏自開閉。簫鼓知賽神。村廚爨煙膩。

鳴谿行館

一巷黃鸝語。多于雞犬聲。酒邊人去住。花裏徑縱橫。戍火上樓見。山泉篋榻生。居人最勤力。月黑未歸耕。

石壁塘道中

一程六十里。昨午發蠻郡。窮鄉不知途。祇覺嶺奇峻。坡陀懸絕處。十退乃九進。人方驚失足。頭上鳥飛迅。敗葉已隔年。因風尙成陣。輿夫行視地。石削利如刃。岐途仍百出。荒絕少人問。冥濛山澗綠。壓客睂宇潤。一响花氣紅。山村已知近。

發半水塘

南原寡桃李。桑樹圍成村。桑葉尙未抽。稍待春氣溫。居人數十家。咸闢臨水門。無事遠汲勞。清泉繞山根。山廚豁然開。餘瀝傾瓦盆。斜左一徑寬。呼聲集雞豚。深屋復數重。遠颺簾幕痕。已有白髮人。樓頭曝朝暉。度虹安磻。

分半溪聲作雨飄。暗風時復響錫簫。百重花路行初透。又踏春紅過小橋。  
短篷風捲落花多。却趁春晴曝雨簑。捉得鯉魚長一尺。小舟如葉旋回波。  
宿沙溪行館

依然下馬歷重局。宛轉房廊屈曲屏。添得蠻中一句雨。屋頭山比去年青。  
風光都被亂雲遮。水閣南頭路較賒。看到小桃紅盡處。夕陽幾點着歸鴉。  
過三重堰上嶺

蠻方積煙霧。日午氣始開。梨桃搖天風。引客上北臺。衆山西南趨。中峯獨東回。  
迤左削一厓。俯瞰綠萬堆。值此春雨餘。山泉響如雷。飛旆過北林。飢鳥已驚猜。  
半道值戍樓。復有畫角催。陰寒中人深。屢剔衣上苔。稍休下前山。呼童剪蒿菜。

渡渭水橋晚抵牛場塘

厓東無暝色。一谷李花明。澗底水流響。雲頭人語聲。半橋楊柳占。獨徑鷺絲行。  
正有衝寒意。欣逢候火迎。黔西州麻海棠一株大可半畝。到日花正盛。開喜而作。

兩年心跡寄喬柯。喜向花時整玉珂。碧澗雨餘泉溜急。紅闌風定日華多。  
山光著客濃于酒。簾影隨雲逝若波。要與東皇再三約。好留十日待重過。

看牆外桃花

池臺斜占水波東。無數繁枝壓砌紅。醉裏似聞鶯燕語。桃花顏色稱春風。

宿海棠庭院

墻頭香氣時飄忽。騎馬入門絲雨歇。春風亭外二分花。夜色簾前半規月。梨桃杏李春事忙。參差一畝橫海棠。三更窺徑花如活。紅氣入窗蒸夢熟。

自黔西州至新鋪道中

春陰何重重。花外路如墨。擡頭見鳴鳩。咒雨一雙黑。坡陀過新鋪。稍覺徑夷直。高原三日雨。千頃抽宿麥。溪山最雄奇。大氣自闔關。森森松柏榦。雲外挺怪特。生苗饒種類。作屋厓畔匿。年來厭追呼。塞逕橫巨石。居然判畦畛。遊騎停不得。遙望一畝花。沿波弄春色。

寒食大定試院試威寧等三州童生竟日坐聽事作

日午臺前試袂衣。柝聲清脆掩雙扉。多應人氣蒸如雨。惹得梁禽觸紙飛。

十五日薄莫作

枕上紅燭攤書看。貂裘壓被防晚寒。離居誰信是寒食。檐外風雨來無端。登樓試眺山南北。薄暝窗櫺已無色。萬點歸鴉何處棲。冥濛壓得桃花黑。

清明

三年寒食住三州。

前年在安順。昨年在黎平。並皆屬院試土。

一樣攤書據案頭。春半雨多頻臘屐。蠻中花好不登樓。扃門鶯燕

時來覷。出谷烽煙昨已收。

時得馮巡撫知會。初二日在喚腦助殺逆苗二千餘人。正大營道路已通。

卻笑青衿未知事。漫思投筆佐軍籌。時有

附生熊瑀具呈欲移送軍前効力。余已諭却之。

十七日晴使院後圃望遠

分半山城入畫中。炊煙都裊岸西東。房廊映水多時綠。衫袖承花一色紅。上冢船歸雅咒雨。築毬人去馬

嘶風。年年桃塢春如許。辜負鄉園三兩叢。

將抵西溪

欹斜石徑杳難通。來往輪蹄若踏空。卻好一村居谷底。纍烟開處萬花紅。

冥濛曉露濕花心。欲到橋西路莫尋。三兩鷺絲明似雪。隔溪飛不破春陰。

西溪汛卽事

蒼蒼山已深。淼淼流不止。無嫌鳥飛疾。撇浪魚若矢。稍休厓石上。四面聒流水。風勢聚一橋。驚看去雲駛。

橋西邨落好人語。罷朝市。紅白花萬堆。中飛纍烟紫。

重至黔西宿海棠庭院

闌干十二做銀屏。尤喜芳時此再經。雙柳有情垂檻綠。萬山如夢壓簾青。花邊惆悵尋前約。葉底參差聞曉星。依舊燕鶯飛不定。可能重把夜窗扃。

將抵鎮西衛

兩山雖百步。中挂一絕壁。人攀厓樹上。碎石傷馬膝。穿雲過深澗。飛露灑如雪。高下千級田。濛濛漾朝日。房廊臨水好。雲向枕邊出。茶樹花亦香。迎人下山歇。

偶寫荷花便面寄費方伯淳

小閣纔看暑雨過。一拳奇石面層阿。知君雅有鄉山念。爲寫錢唐一頃荷。

端五日聞官兵捷音是日夏至

今年節候奇。元夜立春節。如何日長至。復值端午日。榴花紅處排兩筵。卻值露布來東邊。興酣邀客共劈棧。饒吹雅樂吟連篇。官兵早破黃瓜柴。賊勢愁亡榔木隘。後隊仍燒蘭艸坪。前軍已逼花園界。固知廟算無遺策。遠近花苗更輸力。臺築三層號受降。詩歌六月勞還役。主將翩翩善出奇。搜牢應遣種無遺。還憐春夏行軍久。倘念西南民力疲。

自春及夏淫雨連綿。倉池荷花十減六七。感賦一篇。近東馮侍郎光熊張兵備繼辛銅仁尼堪巴圖魯臬使思州並寄姜兵備開陽甘肅



前年築臺面池水。昨歲花放池臺前。朋來喚我作花主。日日樓上開賓筵。今年霖雨無停刻。水綠衝臺臺欲缺。三層閣上無一人。花亦悄然如惜別。征東軍容盛如火。憶昨出城來別我。殘荷隔歲尙數莖。臘雪初看出梅朵。城頭一別經廿旬。轉眼已值看花辰。豈徒花色減疇昔。把酒苦憶花前人。幾年愧作單車使。不獲荷戈先戰士。昨日軍符又發兵。焚童捲甲東行駛。此時花發不欲看。月裏閒卻紅闌干。已涼天氣纔幾日。一任風雨搖無端。轉思萬里橋邊水。多半樓臺雨中毀。泉使署中荷花最盛。今空署中。年聞樓閣半傾。花亦憔悴非昔。兩地看花無一人。寥寥壁上詩牋在。藏春塢北偶傍徨。風急猶聞遞遠香。莫更城東招小吏。左官先已抵伊涼。謂姜泉使事。左遷平度兵備道。小史郭郎。卽姜所眷者。何時一輩重相聚。笑折花枝賦長句。屈指平苗露布來。主人亦欲辭花去。

平苗凱歌十章卽寄福康安公相行營

海宇年來慶謐寧。偶移旌節洩邊庭。鉤陳十二明如月。上相星聯上將星。軍律嚴同細柳營。聲威先已懾蠻荆。囊韃大將皆趨左。詔統川滇五路兵。萬仞蒼厓一綫通。兜零火照馬頭紅。原知廟算真無敵。先定黔中下楚中。五姓花苗敢獠狷。曾傳吳畢石雞娘。烏羅地大如甌子。又見天兵下石梁。明史土司傳。宣德五年。石各野糾同石雞娘。吳畢耶等擾亂銅

仁亦會川湖兵討平之。

出險方看建鼓旗。居然絳灌列偏裨。前軍早報花連布。已解長圍入永綏。

南出羅蒙北哨關。十旬先定五溪蠻。摩厓好壓中興頌。勒徧壺頭百尺山。  
關外軍威敢自尊。國恩重疊與傳宣。勞來不用歌周雅。六月王師已凱旋。  
黃旗植處許歸耕。一半蚩氓慶更生。神武聖仁原不殺。詔書先築受降城。  
五度殊方討不庭。凌烟圖上鬢猶青。酬庸比日原無兩。耀首新頒三眼翎。  
榴花紅徧四山梁。初度欣看日正長。十萬貔貅齊下拜。凱歌聲裏慶傳觴。  
楊兵備揆兩至黔中。皆不及見今得書。知又抵軍營寄懷一首。

我生遊跡殊通達。禹貢九州今歷八。雖然輸爾涉河源。遠度崑崙越哈察。  
東西南北五萬里。頭上翠翎風細戛。如拳大字如椽筆。先把天山石磨刮。  
銘功紀德字五千。高比浮屠七層刹。居然遠壓神邱頌。何日重煩墨工刷。  
丈夫志業真難量。一半貔貅歸統轄。昨來雪嶺今炎山。車不停輪況脂牽。  
花門異種方稽顙。五姓苗偏肆輕猾。盤陀斗絕隆棚險。一半休誇地形丸。  
搜牢匝月肯暫停。山搏熊罷水擒獺。滇黔楚蜀雖同勦。神武聖仁非嗜殺。  
杈枒怪樹當山巔。百歲根株一朝拔。尚煩奇計參帷幄。頓使蠻方靖戈鋌。  
讀君露布才益奇。鬼膽先看破羅韃。寧知馬上殺賊手。正復翩翩如俊鶴。  
相思苦欲專人訊。道遠又愁泥滑滑。重陰天氣發一械。霖雨應零八行札。

聞銅仁日來復有賊警兼辰水決城數丈馮侍郎光熊率官弁晝夜堵禦寄懷一首

天乙虹梁暑雨交。昨傳江水決城壕。蠻中穉穉紅千頃。峽裏舟船綠半篙。六月可能平板楯。一軍聞尙駐松桃。蕭蕭白髮籌邊夜。誰識馮唐志意勞。

酷暑至蓮臺夜坐

六月六日天乍煦。窄袖葛衫猶苦暑。連房早厭人語稠。卻曳襖被來樓頭。蓮臺三面波光漾。一榻居然最清曠。濛濛桃樹月西斜。烏影斜生紙窗上。

自六月朔日移至蓮臺避暑。聞兒子飴孫疾尙未愈。書示一首。

經旬曾未涉南臺。藥裹頻從禁滿開。却笑兒曹未耽讀。燕痕纔去雁痕來。

七夕陳大令熙藩邀集城南鳴玉山房。卽席賦贈一首。

感時青鬢欲如何。初地聊從暇日過。赤甲一軍爭渡久。時續調滇粵兵甫過境紫微雙樹得秋多。陳邱已保思邛水。

劉秩應嗤曳落河。莫向尊前問牛女。早憑天漢洗兵戈。

中秋日曉望

城南未見烽煙歇。忘卻秋中有佳節。陰寒霧雨迷一旬。纔見清涼此宵月。烹葵剝棗飲不休。逸興且上城南樓。忽然黃葉下如鳥。笑過三歲蠻中秋。

秋海棠

一種嬌無那。新涼小院東。葉猶棲敗蝶。根已泣秋蟲。豔色偏嗟晚。酸心孰與同。昨宵鄉夢破。露冷一庭空。  
中秋夜坐

上弦及初圓。一夜輒三起。連廊南北抱。輟履行未已。闌干嫌露重。空處聊徙倚。衫袖葉葉風。斜穿竹華裏。樓臺萬家夢。燭影沉不起。簷瓦弄月光。空明忽如洗。簾櫳中外徹。暗牖不須啓。照水水亦空。魚鱗逗波底。蠻鄉三載住。良夜能有幾。握管欲賦詩。朝曦墮林尾。

乙卯貴州揭曉會城書院生徒獲雋者二十七人回途率成五百字志喜全用十四緝韻卽呈吳烜陳希曾兩主試及許刺史學范諸同考

前年使者來。冬仲月初拾。奉命宣化條。窮經事尤急。周行十三府。日或不暇給。苴蘭及毋斂。亘古屬蠻邑。山坳嵌城郭。俯視類蟲蟄。無旬不淫雨。萬古地卑濕。蠻生粗識字。書不入行笈。刪除到筆硯。所事者簞笠。間歲試學官。泥塗甫衣褶。低肩對文卷。窘若遭縛繫。四聲踈不講。顛倒出篇什。化俗具苦心。庠宮飭修葺。陳書數十篋。云以待溫習。兼疏聲韻譜。潤此舌本澁。峨峨講堂開。一善皆引汲。經句輒分俸。俾得備糧粒。行之勤不懈。多士志方輯。貴山儲人才。兩歲雋及冊。謂貴山書院生徒甲乙兩科中式者至四十餘人方忻讀書效。私自理囊褻。昨歌鹿鳴來。城府已膺集。然聞聘同考。頗復論階級。歷龍藩文爲第一。然不預內簾。朱雲名不預執卷。每鳴吧。朱鑄其擬墨。編送同人。關門逢月朔。雨霽路微曠。監司迨州縣。一一連騎入。堂深更局鑰。門外植雙鋏。朱墨卷

二千兩吏相對執名皆抗聲唱。得失判呼吸。挨排附欄楯。頭上墨淋汁。開書五經魁。千百燭光煜。紅箋名在手。咸擬破鍵屐。白屋士較多。塵聲沸如瀾。我行然炬返。欣此輿論翕。酬恩願粗了。行且具舟楫。三年飽看山。大峘小者岌。籠南箐東北。靡險不搜緝。誰云鬼方惡。直欲勝宣歙。麻衣三百輩。門外時鵠立。諄諄戒勤學。士行尙謙挹。紅苗前蠢動。論此嘗悒悒。昨聞大芟勦。不日兵可戢。高低萬山田。耕者看偃偃。頻年仍大有。喜氣溢原隰。持衡兩君子。公望庶諧謔。筵排多士卷。一一蒙訪及。庶幾能相馬。拔十真得十。翩然召陵許。文不尙沿襲。前時鎖廳見。贈子先一揖。掄材盡如此。願爲執羈馭。談深嫌夜短。時復飯薤皂。只惜北郭生。猶然向隅泣。時諸生中知名者惟賀世清獨不售賀居北郭故云

十九日獨酌偶成是日家累南回

不覺蕭蕭雨。風聲徹戶涼。又添新別恨。獨對古重陽。石鏡花千朶。琴臺酒一觴。遙憐車騎遠。凝睇此高岡。徐太守曰紀屬題桐廬申屠氏宗譜中山水畫冊八幅雙婆澳嶺頭時有窄徑。江口皆通小河。鄭姥宅連杜姥。陳婆溪繞楊婆。

兩坂邨

爭傳上坂下坂。卻界前村後村。漁網陰邊小市。稻香深處衡門。

黃山

名擬三天子嶂。秀參五老人峯。莫訝山田龜坼。時瞻雲氣如龍。

范井

家移浙水平壤。里本陳留外黃。瓣香我憶傭叟。汲井人傳墾鄉。譜云申屠氏自漢代遷居富陽之屠山及宋時有贅于范氏者又移居荻浦焉井卽

范氏之舊也

慈濟寺

紅雲高閣初啓。白鴿春田四飛。待得孤僧入定。鐘聲穿出松扉。

荻花溪

高低山合村塢。南北江連渚沙。消受九秋明月。輸他千頃蘆花。

雞頭峯

欲賽社翁社姥。相邀漁弟漁兄。雞頭峯頂晨雪。鴨嘴船邊夜明。

松濤浦

閣外蒼苔一片。門前碧水三篙。居屋不殊居艇。松濤遠接江濤。屠二紳自尋甸州守擢判廣南道過貴陽留飲三日醉後賦贈  
依綠亭邊識君日。三十年來五回別。一回握別一傾倒。我越壯年君未老。天憐狂客愛遠遊。遠宦皆出天

南頭君行斗大得一州。我亦持節來邊郵。囊空衣敝官初改。歷盡疊山飲炎海。北來驛使遞一箋。驟閱反疑君左遷。人言宦廣勝宦滇。俸入乃逾十萬錢。平原坐上多良友。比日談君不容口。忽然一客來款門。矯首徑入無寒溫。旁人驚看僕夫笑。三寸麴塵猶在帽。卸裝先約欲促裝。爲爾南去程途長。秋花黃處頻高會。一日爲謀兩回醉。朋來尙未悉姓名。脫口邊已聞歌聲。我行一一爲分析。故態狂奴總如昔。不爾先防欲逃席。昨日醉外臺。今日醉縣中。歌盡百曲傾千鐘。新交有嵇陳。舊交憶孫趙。鄉語連翩述難了。君不見少歲警我去。幸有少歲交。紅闌百尺挂酒瓢。恍若醉我城北之山橋。山橋邊。卽鄉社。我距君家不三舍。何日同歸醉橋下。

喜代人將至率賦六詩留以志別并貽新學使談戶部祖綬

我饒山水癖。乃官山水鄉。黎平及都勻。靈秀之所藏。大山何峨峨。長川亦洋洋。五嶽四瀆外。得此庶頡頏。間歲輒一遊。奇蹤匹翱翔。靈氣歸筆端。奇矯得未嘗。詩文及千篇。藉以壓客裝。仲冬當北征。念之尙傍徨。約客頻出遊。時時陟高岡。西郊松竹幽。南郭蘭杜芳。作詩別山靈。此景殊難忘。東從相見坡。西去亦資孔。茫茫三十驛。鎮遠迄南籠。疲氓居要道。百事實倥偬。民夫徵不足。搜剔到蠻洞。負擔行萬山。心傷足俱腫。衙省不之卹。而復相驚恐。我朝恩澤厚。域外悉帡幪。況茲梁楚界。大吏所控總。所期仁及物。役不到繁冗。公廉率其下。守宰自惶悚。昨來馳尺一。荒戶給田種。軍行所過郡。秋不賦秸穗。

愚民縱無知。戴德已山重。東南傳露布。艸野悉躍踊。聞宣寬大詔。卻立手俱拱。花苗旣輸誠。吏勿輕煽動。  
雲山殊戀別。忽作兩月晴。自八月十四日至此已兩月並無大風雨土人云爲數十年所未有清晨來閣中。霞采東南明。連岡何蒼蒼。修林亦英英。機事庶久忘。物亦諒此情。伴我日讀書。不覺寒暑更。謝者尙未謝。生者日以生。愛此三載中。日添雛鳥聲。新篁手所栽。亦樂觀其成。

泮柯及夜郎。古乃列益部。今茲十三州。夔郢實門戶。津船通列貨。間亦雜書賈。流傳坊市本。十竟不登五。刪除到羣經。擢髮罪難數。我行搜左塾。見此赫然怒。嗟嗟蠻嶠士。化久隔鄒魯。開篋出六經。仍疏四聲譜。口陳兼手畫。聽者若環堵。精微難遽悉。冀或得其粗。餘閒陳列史。俾得究今古。憶昨核部回。書聲滿堂廡。紛然陳藝暇。略亦通訓詁。明明尹荊州。庶思能步武。後漢書西南夷傳泮柯郡人尹珍從汝南許慎應奉受經書圖緯學成還鄉里教授常璩華陽國志尹珍

毋斂人官  
荊州刺史

此方雖蠻方。楚蜀粵上游。延江及沅江。其源一何修。沉埋唐宋間。地志苦不收。前年使者來。一一窮險幽。暨水旣合溫。黔江亦通涪。盤南鎖鐵橋。勻左列木舟。我行皆乘之。徧歷十二州。惟銅仁府寄考嶺遠按部所不至馬上作一書。分此楚蜀流。芟除土俗名。不使混固彪。庶以示後來。不貽茲土羞。

香榭南北廊。修竹東西徑。紅雲樓百仞。白藕花千柄。茲廬最閑適。旁榭亦幽靚。豈茲崇土木。藉以適身性。昨者偶讀書。欣聞有除命。前旌臨沅水。當遣騶從迎。周閭更修飾。砌石拭如鏡。雖爲居者計。客暫寄歌詠。



分番扶美植。惡木久除屏。以此黽勉心。庶幾貽後政。

同里諸君子。邀集蘇參軍鳳池廨舍餞別。卽席賦贈一首。

逶迤徑折入琅玕。蠻府參軍廨宇寬。已覺朔風傷謝眺。不妨微雨過蘇端。羣公雅稱芙蓉幕。一老曾餐苜

蓿盤。聞徐太守曰紀亦欲入坐。拚得花前幾回醉。馬蹄應又踏長安。

卷施閣詩卷第十七

回舟百嶠集乙卯丙辰

自鎮遠舟行至常德雜詩

時正會勦銅仁沅州紅苗一路皆傳箭送舟僅乃得過亦幸水程距札營處稍遠也

青溪及玉屏水程從此起飛夢入吳江迢迢七千里  
兩關皆虎豹一棹若蜻蛉昨得軍門札傳烽送使星  
孤猿攀危崖意思亦若懼仙人飛空行投杖手復接  
一程復一程幸爾水流急山頭看花苗排刀向空立  
水祇深三尺舟搖亦不妨來朝衫笠影隨月漾瀟湘  
見慣卽不驚殘骸蔽江黑鷹隼何不仁抽腸作常食  
楊柳千條巷夫容百尺樓可憐兵火後剩有夜烏愁  
空灘三百級一石一文贏更有莓苔影朱文漾錦波  
殺聲喧落日何處可潛逃幸是昏黃月騰身附鵲巢  
泊舟仙人房仙人遁無影我欲上帆竿延回瞰深井

浦市甫經燒劫所見尤慘

楚女生來好。凌晨掉小舟。神魚知好色。出水看梳頭。  
及到洪江口。材官馬上迎。蘆灘都有諜。不敢點燈行。  
人頭及人脛。一半出魚腹。怪底帆不前。荒灘鬼叢哭。  
凌晨坐清寒。閉目養心性。過盡千百灘。都從雙耳聽。  
烽煙不到處。幾樹發黃梅。鵲語先傳喜。雲光亦四開。  
六州兼十縣。魚鳥竄紛紛。只惜桃源洞。難容爾許人。

辰州謁畢尙書師出所定詩文集見示卽席賦呈二首

一半戈船下瀨橫。烽煙開處見山城。天南縱置籌邊驛。研北仍聞擊鉢聲。幕府盡稱詩弟子。謂劉侍御錫嘏等。虛

窻閒禮古先生。軍容茶火由來盛。未改臣門似水清。

述作多應拜下風。憐才如此復誰同。諸生並致三霄上。五嶽分標各卷中。歲月釀成無事福。灾氛消盡未言功。殿頭第一人爭羨。不負科名僅有公。

常德胡同年文銓招飲郡齋卽席賦贈

十年前事重徘徊。曾醉梁王百尺臺。未覺壯懷輸少日。不妨閒裏鬥深杯。掃除硯北橫經席。料理城東小史來。清興到今仍未減。春風先爲拆疎梅。

荆州喜晤錢上舍伯垌卽送南歸并寄令叔維喬

年時揖子清暉橋。卷施閣中挂酒瓢。沉沉醉後不能別。轉盼燭花明復滅。彈絲戛竹夜未央。節日笑我行。

何忙。一城春燈轉曲廊。送者短趙兼髻莊。謂舍人懷玉縣丞寶書。翩然一別萬餘里。凌亂雲山馬頭起。尙書筵上說。

錢郎。抵辰州日尙書爲言君尙在荆臺未歸。坐客半驚余失喜。嘉平廿日來渚宮。騎馬直詣官衙中。攔門握手久相視。尙喜

君貌非衰翁。中郎阿大欣俱在。時令兄鍼亦在署。詠絮詩成復誰對。我官蠻府已四年。才劣恐難成一隊。飄風三

更入五更。墻外羽檄飛無停。龍山殘雪落如掌。頗念未息征苗兵。萬言揮灑仍如故。此筆合移書露布。不

然手挽五石弓。上馬殺賊成奇功。稜稜俠氣填胸抱。可惜君偏著書老。卅年知己姜侍郎。姜巡撫辰。一見猶能

一傾倒。雖然此遊不可忘。踏徧七澤兼三湘。零珠斷璧箇中字。尙抵陸賈千金裝。欲行不行更搔首。握別

還思素心友。君不見。竹初菴內證無生。應笑勞人日奔走。

荆州官廨借錢上舍鍼令弟伯垌暨崔恭人作消寒七集卽席有懷崔丈龍見

款客荆臺苦致思。舊遊重到酒難辭。猶憐匹馬衝寒日。卻值閑庭詠絮時。久別未妨書代面。故交多已鬢

添絲。冰弦彈至傷心處。時話文敏舊事。不管花窗夜漏遲。

一載軍書插羽飛。人傳公瘦我寧肥。路穿烽火驚身在。夢逐波濤入姊歸。時在宜昌一帶獻獄。會面未能忘息壤。關

心先自理初衣。君時乞養病歸里未允。天南佇看苗氛淨。好買蓉湖築釣磯。

題崔恭人秋山訪菊圖

幽窗雨過點青苔。蠟屐曾從響屐回。自覺向來秋氣少。不隨探菊祇探梅。丙午二月曾追陪鄧尉看梅。

衣裳葉葉起雲霞。簇蝶裙飄一徑斜。卻過小橋天路近。絕無人跡有飛鴉。

飛瀑渾疑石上琴。欲從何處更幽尋。空明一點靈山月。與證迢迢世外心。

雲裏紅闌曲折橫。半秋時節出山城。飛仙一個花千朵。都署頭銜太瘦生。

閒從卷裏憶西州。零落羊曇感舊遊。苦向尊前問癡叔。謂大令維喬。渚宮殘雪不勝愁。

少日談詩有性靈。後堂延客眼先青。願營百本梅花屋。更展紗帷乞授經。

酬錢上舍丙曜

舊時門巷判西東。蠟屐常穿楊柳風。占得雲溪一灣淥。小樓都在水聲中。

詞筆欣看萃一門。比年風月共琴尊。龍華會上如相問。交到彭侂四葉孫。余幼時謁蕭山公。卽蒙獎識。及長。受尙書之知。又與大令及伯

垌兄弟並稱莫逆。

鄉園春半飲屠蘇。握別仍行萬里途。自笑遊蹤太遼闊。更從北夢說西湖。前在西湖與君別。

襄陽呈房師王觀察

遠宦迢迢各一方。馬頭真喜向襄陽。西南尙見烽煙赤。師弟初驚鬢髮蒼。懷古池臺聊駐節。探春簾幕偶

傳觴。是日立春。盈箱案牘須勤理。肯學山公醉百場。

立春日過襄陽謁羊杜二公祠有懷孫觀察星衍山東

君爲東國諸侯長。我作南方多士師。竹馬共思逃塾歲。土牛又見迓春時。酬恩尙愧身無補。傳世先驚鬢有絲。至竟古人能及否。薄醺閒謁二公祠。

元日南陽

幄殿趨朝夜向晨。宛南春首淨無塵。早聞內禪光唐宋。又見元年值丙辰。全楚正欣秋再稔。史官應奏日重輪。堯階未在追陪列。尙愧西清侍從臣。

人日抵鄭州巡撫景安遠遣人相迓書此報謝

握別梁園已八年。憶君風味逼前賢。大河南北頻經歎。好爲蒼生計息肩。

人日聊登百尺樓。繁臺東望久淹留。破除舊例吾何敢。瘦馬羸童入鄭州。君清素如昔。一切酬應送迎之禮皆絕。今獨遣一介相及。是以

云。

衙齋聯句記經時。風雪甘涼苦致思。

在甘肅籌邊最久。

尙以書生待開府。逢人仍索憶山詩。君所著有憶山詩草。

王大令復專人約遊。偃師余以驛路迂回未果。翊日從岡里渡河。半渡風發。舟幾覆。日晚僅得抵南岸。因徒步攜從子兩門生至惠濟橋行館宿。卻寄大令一首。

故人一別經歲時。封書約我遊偃師。把書沉吟復東走。塵土隨人已三斗。津頭塵暗風尚微。挂席如馬從風飛。忽驚風從半空旋。長年大呼人語亂。眼看北岸離纜尺。帆急欲收收不得。一風吹舟舟轉輕。樓櫓盡訝凌空行。蕭然天末一使星。河伯已遣鮫人迎。盤渦欲下仍未下。惡浪幸從船後瀉。舟人心定客始猜。欲抵岸北偏南來。聳身一躍得平地。觀者居然詫神異。鄰舟望我竟若仙。餘艇尙在風中顛。君不見。故人此日遲高會。客臥津亭自顛沛。瓦燈一盞土橋南。且喚行童理生菜。時覓食物無有。僅得生菜數把。

葉縣道中雜詩

保安及昆陽。一驛三十里。奔馬逐歸鴉。齊入黃塵裏。屠蘇酒乍傾。簫鼓賽昇平。爆竹聲何脆。年頭年尾晴。卓午昆陽道。溪橋細細風。春衫紅一片。併颺日華中。

寄王大令復

南來已是一旬馳。真擬恹恹入偃師。河外土風堪作宰。洛中人日偶題詩。何因祖客筵前酒。轉憶孫郎帳下兒。來書言及舊僕吳順。已作孫郎帳下兒矣。幾許笙歌兩行燭。呢人魂夢憶多時。

黃河阻風卻至惠濟橋行館晚攜從子門生至橋東玩月作

寂寥山館許停驂。酒薄都憐興未酣。多謝北風能款客。吹帆三日住河南。

頽墻三折路參差。拂樹先驚鵲踏枝。豔殺野橋山店月。不妨人去立多時。

過新鄉贈孫同年希元

籃輿薄晚過山莊。飛騎驚看迓道旁。一代相門傳縣譜。君爲文定孫。千古邑號新鄉。采風近郭民謠肅。話

舊虛窻月影涼。更喜外臺條教密。時景侍郎撫豫有善政。又爲州縣設立科條甚周。

兩河應可息痍傷

曉發湯陰

破曉趨南郭。城荒竹木稠。地爲今下邑。山卽古中牟。殘雪明華表。驚沙暗驛樓。停驂吾不願。昨已飯宜溝。

將至安陽先柬趙大令希璜二首

尋常三五團欒月。自到牂柯見未曾。料得鄴中元夜好。故人應爲剪春燈。

爾許情懷漸不支。屏除絲竹已多時。還能與鬥筵前酒。可有孫郎帳下兒。壬子冬飲君署醉甚。幾欲逃席。值孫兵備舊僕郭勺藥代飲數

解乃

湯陰謁岳忠武祠

古木叢臺起怒風。岳王祠倚堞樓東。何因浣盡孤臣血。不祀前朝嵇侍中。

埋骨西湖恨已多。小朝廷久厭兵戈。此方立廟非無意。尙爲君王障兩河。



抵安陽境塵土撲人。戲柬大令一首。

主人倘厭客經過。故遣飛沙織似梭。休望琴堂門尊酒。元規塵已污人多。

十四日未刻抵安陽。趙大令爲招春燈社。火讌客海棠詩屋。至三鼓乃別。翊日更邀遊天寧禪寺。設百戲。

餞別醉中賦贈

鄴中十萬戶。一戶排雙燈。城東城西徑十里。萬影礙月難東升。安陽大令我素知。飛書約我停少時。排門

燈影看不足。中有戛竹兼吹絲。紅塵障天綠波掣。馬尾搖風馬頭月。鼓樓街北蕭寺東。齊捲珠簾看飛雪。

昨日醉幾場。好友爲我招張王。皆幕中賓客海棠詩屋圍社火。夜半更約傾千觴。今晨別何地。更遣鬢丞控飛

騎。佛樓開處面廣場。關戶爲余陳百戲。此回元夕無不有。月影燈光與杯酒。董生董生惜前走。謂上舍達章時已入

都說與王郎應妒否。謂大令復更排石級上石亭。一城華燈尙若星。摩挲金石百回步。寺有元至元十二年足鐘銘及至正中石刻

力倦處開僧局。念君官事忙如許。衆裏離觴復頻舉。一响歌聲壓彩雲。梅花山館飛如雨。君持手板與前

立。我瓣心香馬頭揖。時以所刊近著見贈別袂猶餘燭燼光。離亭已暗風沙色。

晚發安陽至磁州行館。一路燈火甚盛喜而有作。

十里平沙柳數層。漳河橋上月初升。何因爛醉安陽酒。來看磁州郭外燈。

李舍人鼎元登岱圖

平生心力瘁躋攀。五岳遊完鬢未班。肯待向禽婚嫁畢。僅留老眼看青山。  
欲捫星斗挹穹蒼。杖策仍須辟穀方。我是上春君早伏。入山先已異炎涼。  
戲題秦人種桃采芝圖

童男童女五百。桃實桃花萬千。何不成鄉里。婚男嫁女耕田。

毛女忽然大笑。惹他四皓顏開。商洛山連太華。大家飛去飛來。

馮給諫培竹鶴圖

意中我有閒樓閣。閣下亭亭立雙雀。雀徑時看一花落。胸中我有奇峯巒。此外觸處皆琅玕。六月更有松風寒。乘軒豪。此君直開徑居。然得三益門。開無人。雀亦應門。叢竹兩兩。爲除行塵。門關無人。竹亦索笑。仙禽翩翩。自詡同調。先生此圖。實得我心。雀既有侶。修篁成陰。尙恨竹外無月。雀邊無雲。石牀無積書。竹兒無清尊。客來不醉相對。何以能追古人。君不見。今人不來古人往。雀步空庭竹森爽。畫中山好不可居。何不歸爲五湖長。

寒食早得家書偶題二絕寄南中小兒女

莫怪尋常鶯燕猜。踏青時節未花開。鉤簾欲訪春消息。却值江南驛使來。  
平堤一色綠初鋪。四月江鄉畫不如。遙憶風前小兒女。紫藤花下讀家書。

奉酬邵學士晉涵病中見寄之作

與君卜鄰意非好。欲拉酒徒時醉倒。牆西望汝一樹花。君病未瘳春遽老。牋云日噉半甌粥。頗厭牆東酒徒擾。墻東酒徒非得已。匝月行完七千里。轟天礮火衝身出。弔影驚魂可知矣。昨來偶自窺青鏡。不覺二毛填鬢底。期君醉我君辭疾。反作新詩惱行客。酒逋我縱盈門索。藥券知君亦山積。君如戒藥我戒酒。一日顛毛恐俱白。

李公子存厚梅窩圖羅兩峯畫

橫斜影百枝。坡陀石千尺。不知是我不得來。或是君家不招客。花遮簾櫳柳藏橋。空裏似飛鶴一隻。有魚千頭禽百翼。幽人一一與之數。晨夕兩峯畫石如屈鐵。兩峯畫梅如值戟。披圖我忽念疇昔。三十載前攜蠟屐。余未弱冠時從叔爲崑山尉曾過訪留居旬日。一峯如頽一峯劈。更上一峯吹竹笛。此時不知梅窩在南復在北。但見高低屋橫脊。屋上殘冬雪花積。百年君居此山側。孫時看梅祖所植。幸我淵源盡相識。不然何以揮灑千言有餘力。詩成對卷仍嘆息。兩峯老嬾殊可惜。君不見玉峯前頭湖水碧。咫尺應須望鄉國。倘使餘牋更有一丈長。直接吾家水西宅。

卻扇詩爲吳孝廉肅賦

譽婦詩成百口傳。可知標格本天然。青綾步帳曾相識。我是張爭友謝爭。吳所娶爲孫兵備從妹

半臂新裁蜀錦鮮。薄寒聊與壓吟肩。馬頭明月如團扇。偏照恩恩惜別筵。  
耳語臨岐記可眞。回頭生怕阿兄憎。看花遲早尋常事。莫作蓬瀛第二人。  
怔忡鞭馬出金臺。失意偏教笑口開。我憶塔鄉風日好。紅荷百頃待郎回。

白髮詩爲胡上舍唐作

鄰東胡生昨叫絕。白髮忽然衝帽出。大呼擲帽理髮末。幸喜根株惟有一。胡生胡生意若失。走馬索詩兼口述。我爲生語生勿怵。此事何關存與歿。古來賢聖半夭折。顏賈頭中無此物。矧生飾貌有不屑。從此何妨罷梳櫛。平生品與陸展別。無子未聞收側室。鉗之鑷之可不必。生聞我語笑兀兀。二三子者粗有筆。爲我責頭須痛切。我聞生言意亦豁。一毛雖小慎勿拔。或者明朝生七八。疾呼奚僮馳急札。朋來盍簪賀白髮。茅柴之筵咄嗟設。生今上坐非忝竊。燕毛之禮誰敢忽。雖然生不可不察。此物上頭急作達。從茲陸行乘驢水乘筏。面垢莫除塵莫刮。衛玠弗愁人看殺。

題王太守宸仿董北苑瀟湘圖爲徐孝廉嵩賦

此卷長三尺。零陵老守圖。居然棐几側。隄落洞庭湖。山水情今古。荒唐夢有無。臥遊吾尙記。千里下黔巫。

予自黔中還朝取道洞庭

四月廿日與胡公子稷會飲金光祿孝繼宅被酒醉甚歸途于馬上得五百字卽送南歸兼柬莊上舍達

吉陸秀才繼輅

今年絕代才。皆下考功第。汪端王芭徐嵩趙懷張安尤苦不得意。王生除學博。賣字作歸計。趙生居僻巷。

忽爾鬧車騎。無端長鬚奴。失笑復垂涕。揭曉前一日汪生將外擢。以助教當畢力此一試。寅初聞揭曉。側

立門隙伺。猛聞敲扉聲。妻子雜沓至。寧知非報捷。有客誤投刺。徐生病支離。一夜屢登廁。先期唵病鶴。君

作病鶴賦。識已兆雷翅。蒙頭聞報罷。急起理囊笥。張生已獲售。黜落爲奇字。欲歸東西川。柰此楚氛熾。相邀避

人跡。戚戚聚蕭寺。吳生顯示不屑。頻日酒筵肆。監廚得驚坐。謂假陳肯看饌悉精緻。酒徒七八輩。痛飲日

三四。我慚居下位。不克挽風氣。尙書名知人。紀宗本可愜羣議。微嫌心有主。意在急防弊。遂令中材升。杞

梓或被棄。凡茲數君子。一一洵國器。中年饒底蘊。詎止文藻麗。沉淪致顛蹶。此事亦匪細。今晨聞剝啄。君

又理歸轡。君才希數子。靡不夙投契。況茲年尙少。拭目盼遭際。嗟貧兼歎老。與衆不一例。感君行計速。飲

餞爲粗備。不愁分袂早。反恨遲把臂。君歸過庭暇。勤學戶嘗閉。吾州衙署廠。古檜陰拂地。側聞賢太守。一

歲興百廢。蠶瓏疏曲河。構閣臨睥睨。春闈兩人捷。吾鄉獲已獲毀橋利。形家言吾鄉威墅堰及城中白雲

其餘懲薄俗。悉力整凋敝。侯賢實棄梓。予與太守東望舉足企。明春當乞假。官閑尙可詣。蒙莊雖從甥。

夙昔視猶弟。知君過從數。一語煩遠寄。逋錢三百萬。土木苦煩費。園成諸債集。何不築臺避。陸生才筆健。

竟欲逾老驥。陸生嘗昨來觀近作。好句我能計。吾鄉茲數子。得不詫尤異。相思不相見。發念時一寃。遊山

我防嫺日在空中肄。所欣腰腳健。百里走尙易。一羸聊負篋。一僕持絮被。預思重握手。不得到春季。倘及三月三。春江可修禊。

五月初八日。方比部體吳孝廉。薰邀同人出西直門小集。金氏園亭。卽席賦贈。並送桂大令馥之官雲南。雨絲踈不斷。一路出西城。日閃塢頭影。雷轟澗底聲。草高飛騎入。花滿露舟橫。清絕尙書塢。當門杞已生。幾許關心客。無多賣賦錢。暫拋官裏事。來趁酒家眠。岸柳陰三面。溪雲白四邊。遙程愁更數。西去萬三千。

城南雅集圖

城南雅集圖凡八人。法祭酒式善、李編修如筠、張檢討問陶、劉舍人錫五、何戶部元煇、水部道生兄弟、王廣文、芭孫、徐孝廉嵩、圖成、屬亮吉跋之云爾。

城南百萬家。屈指無幾人。匪繫果無人。下直常閉門。幾年我苦居。天末聞煞城。南好風月。側聞我友興。尙豪。把卷呼之齊欲出。法祭酒。王廣文。近來作詩種雅馴。徐孝廉。張檢討。倔強自誇長句好。介休詩老偏改官。貧甚不厭居。長安稜稜弱冠才。尤異。難得何家好兄弟。我交短李惜已遲。覲面却值居憂時。八人所貴忘形久。不問圖中貌妍醜。昨日作一篇。今日作一篇。城南廩舍不數里。時有飛騎馳吟箋。流傳俗口殊難耐。只說羣兒自相貴。豈知帝京景物本冠十七州。賴有數子晨夕成清遊。不然東西紅塵日如織。何以使春花生輝月饒色。一奴前行不著鞭。八騎矯首皆如仙。穿行古刹及荒墅。日永或借閒齋眠。數君才調皆

經世所喜昇平無一事。木天粉署官本閑。欲以琴尊消壯志。徐生忽然策蹇驢。時下第王子亦欲登牛車。時赴華亭遂令七客忙不已。分日載酒延王徐。還君斯圖三太息。勝會如今亦難得。卷圖水竹自生涼。差教諭任信此中無熱客。

法祭酒雪窻課讀圖

堂中一寸書。門外三尺雪。弧兒讀未完。慈母心若結。朝行課讀書。暮行課讀書。弧兒業甫成。慈母年先徂。衰親無百齡。積雪不逾月。所以人子心。常思事親日。感君與我孤露同。六歲七歲稱孤童。君以七歲孤。貧家無師讀不得。卒業皆在紗帷中。雖然我與君稍異。憂患餘生復難記。五雅三蒼業縱同。經旬九食談何易。白雲前頭一曲谿。余昨繪機杼燈影卷子。亦圖太安人課讀時事。昔者我友會分題。長檠無光短檠繼。持較此卷殊依稀。我家茅三層。君家竹千箇。我家屋比君家破。雪朵盡從頭上墮。君家門向左。我家門向右。我家雪比君家厚。徹夜有光飛甕牖。可憐遲暮猶耽讀。只惜春暉杳難續。每值窮冬風雪辰。攤書時向茅檐哭。吁嗟乎。今年之雪非去年。今日之景非從前。安得衰親常存雪不化。兒寧讀書終老茅檐下。

少宗伯鐵保暨少宰玉保繪聯床聽雨圖屬題率賦一篇

散人步入蓬萊遲。大茅小茅皆本師。天門不敢與鈞禮。却憶抗手同行時。余與少宰同舉京兆鄉試祇疑未換仙人骨。閑掃落花消白日。忽聞天上落吟聲。矯首不禁狂興發。披圖乃仿逍遙堂。下直兩兩登匡牀。置身高處莫

忘却。但見榻畔左右竹柏搖青蒼。誰言天上清閑極。一例苦吟能入癖。他時竹杖或敲門。慎莫移牀先遠客。

送桂大令覆之官永平

汪錢盧邵汪明經中錢教授塘暨盧文昭邵晉鴻兩學士相繼作。海內故人今益稀。洪生終日塊然坐。欲哭不哭常歔歔。數君豈

止傷天折。汪錢邵年皆僅五十左右六藝微言亦將絕。開搜篋底出手箋。精義猶堪補殘缺。桂生亦是今儒者。六十扁

門校蒼雅。遠官萬里無一錢。手抱遺經尙難捨。君不見許君弟子有尹珍。首以小學傳蠻人。二千年來師

授絕。得毋待爾一一重敷陳。君不見蠻方志乘尤疎略。若水蘭滄考須確。博南尙許宦三年。他日應傳賈君學。

題陳布衣嵩畫梅册子

君前築屋臨江屯。老梅一株香一村。泠泠江水半彎綠。更向花下開橫門。幾年作客思家切。手寫一枝如鐵屈。猶嫌比屋多塵氛。不遣虬枝四邊出一花。中間綴一星。空處掩映天光青。嚴寒百鳥絕無影。間有老鶴來梳翎。客來時立梅花側。是客是花渾不識。三更月淡雨又來。清冷獨抱花魂回。

題陳同年慶槐借樹山房

人生天地間。百物無不借。日受天地恩。不向天地謝。况乎百年內。偶復賃傳舍。何人開此巷。此屋又誰架。



主人名誰何。何日得閒暇。因而覓奇樹。一一種如稼。何年高出屋。清影相激射。自從有樹來。人事疊交卸。前者有因依。後者得憑藉。冬有以爲冬。夏有以爲夏。時而蔭清晝。時而響長夜。除此千尺陰。無須一金價。居人不之德。鄰亦不之訝。我今爲評量。不得不枉駕。知非乞諸鄰。造物者所貴。君如思報德。日日羅酒炙。邀此一世入。相與酣樹下。狂來鋪席臥。林密已無罅。倘問身所來。亦從天地假。

七月七夕吳侍講錫麒招集澄懷園賞荷卽席賦贈

居然秋雨餘。邀客集深徑。何止盈眸花。葉聲清可聽。槐黃堆北牖。香氣一窻迸。奇書隨手讀。兼復展明鏡。婉婉越客謠。沉沉洛生詠。雖無鸞鳳翮。雅有麋鹿性。蒙莊方任達。管輅苦言命。坐中趙味辛舍人談命不已。莫負佳節。歡移樽酌波暝。

酒半移酌池上與張同年問陶皆失足墮水戲作一篇並呈

西頭萬葉戰秋雨。東岸百花明夕陽。夕陽紅退遜花色。秋雨綠淨逾溪光。張郎酒行冠已側。笑道一年惟此夕。攜觴約客臨北池。指點塘坳欲鋪席。影先入水身誤從。影沒反訝身凌空。一花驚從足底紅。轉眼荷葉迷西東。誰云直下真無地。幸踏纖纖藕如臂。玩波一响不出波。濃綠溪光若衣被。忽然一躍波已開。分手亂擘青莓苔。五曹不死亦可哈。多謝花朵擎魂回。

初九日早舊僕朱祿忽遭危疾卒將以是夕斂于旁舍余不忍視之因出巷至胡文學唐寓齋索飲醉甚

至二鼓始歸率賦一首

凌晨欲出門。一僕隕西牖。念其久追隨。不忍視棺匱。驅車出巷西。復東訪友十輩九。不逢雨聲蕭蕭促歸去。日晚方欣與君遇。主人不在客亦豪。胡時主程吏部振甲舍程前已出使呼酒半日辭無肴。充腸且復啖生果。幸有菱栗兼梨桃。我前與君同里井。三十六峯懸倒景。烏聊山頭筍堪煮。更摘鄉園雨前茗。時吳上舍文桂出問政山筍及松蘿茶啖客千杯百杯酒不辭。簾角月已來絲絲。排頭生客座旁聽。鄉語拉雜愁難知。鼓聲隆隆街北響。我醉欲歸神忽愴。馬嘶聲苦步亦慵。瘦馬轉若憐疲童。居不見魂燈已出門。藥帳猶在舍。世間百事皆代謝。新僕遂巡候檐下。

初十日吳上舍文桂邀津門李生爲余寫管領九秋圖爰贅以二絕句

管領秋花事可知。姚黃魏紫不同時。算來也被仙人妒。東海新教月上遲。

籬前薄薄有花陰。小立居然爽客襟。一曲紅闌天萬里。是誰能識九秋心。

桂大令馥戴花騎象圖

與其北方騎橐佗。不若跨象踰牂柯。與其東中餐苜蓿。不若簪花撫蠻服。我官蠻服諳土風。民戴長吏同家翁。車前何必八騶列。象鼻舒卷如長虹。花枝紅紅罩官帽。六十使君猶若少。有時象背啞欲顛。惹得幼姬開口笑。祝君官滿無一錢。堆鬢花好垂吟肩。君不見。三年政成歸亦好。叱象北來耕海島。

趙大令希璜雲車飛步圖

我昔至盤谷，欲登王屋山。馬疲僕懶不能到，日晚僅訪靈源還。是時閑雲逐歸鳥，天半夕陽紅不了。空林飛瀑影間之，襯得四山青裊裊。我亦欲乘雲中車，天門旁邊學步趨。舉頭見君忽大笑，已被怪風吹裂帽。張同年問陶夢月卷子

我夢久已闌，君夢乃方兆。斜月照天西，迢迢石牛道。此客支離極，隨人棄道旁。蓬蒿三五尺，中有竹匡牀。

陳布衣嵩詠篁軒卷子

深淺篔簹內，能令日氣青。四山飛瀑布，百道下巖扃。欲制安心法，聊攤種樹經。何人伴幽獨，螢火兩三星。卷施閣久坐

園林千萬葉，如雨落漫漫。秋燕已無影，夜窗殊覺寒。小眠琴榻潤，閑步竹廊寬。只有西軒月，無人徹曙看。送張孝廉問安歸蜀

朝看東籬花，暮折北提柳。人生無根株，安得不奔走。張生年四十，抱道苦不偶。西顧有老親，曰歸覓升斗。窮秋霜霰集，戚戚聚儕耦。相對慘不歡，惟應市鬻酒。君家難弟好，縱飲日濡首。長飢資薄俸，未足餬兄口。我意亦勸歸，名山關窗牖。沉潛三十載，庶可冀不朽。努力盡一尊，西行寡良友。

邵進士葆祺邀集寓齋餞張孝廉卽席賦贈

邵生不特詩才逸。兼買黃花醉行客。就中行客我素知。西蜀才人張亥白。十餘年來詩道乖。正論往往參  
俳諧。汪孫端光星衍近亦輟吟詠。欲覓長句誰能佳。張郎令弟才如虎。酒後千言氣頗粗。只惜奇書束不觀。沉  
酣自欲成千古。生成進士方少年。乃復憔悴長安眠。郎官上可應列宿。何必蓬島方神仙。聯吟快得閨中  
友。豔體疊成三百首。壁人居處亦不凡。蠅蝨裁屏月爲牖。花前揖客屢舉杯。客醉欲別花徘徊。攔門殘月  
向東逗。興發尙能騎馬回。君不見。醉中歲月偏無據。落葉紛紛訝飛絮。東頭言八朝標折柬來。明日酒人  
須復聚。

寓中獨坐

荒園倚古井。三折遠市塵。榜屋十數株。鳥巢多于人。蕭然一徑東南好。豈止無花且無草。堆檐黃葉一尺  
深。下有著書人不老。

廿三日雪邵進士葆祺餉酒并約張同年問陶過卷施閣小飲別後復獨酌池上讀亡友黃景仁悔存軒  
集至二鼓作

酒人攜酒來。賞我庭畔雪。我時方讀史。一卷粗已畢。掃茲盈尺地。相與坐林樾。風爐依土銜。隨意雜陳設。  
閒官兩移居。皆喜境孤絕。當時沉醉處。依約記庚戌。倏忽六七年。雲煙事生滅。橫街南北路。好友半天折。

謂邵學士 如何不酣飲。坐待生白髮。君看空中花。真如電光掣。

樓比部。淺醉不出門。送客竹籬畔。酒人從此去。蒼鼠亦隨竄。前車方越巷。後騎忽聲喚。俄頃人語希。來塗雪飄斷。移尊酌池上。看此冰欲泮。舊友隄上心。遂令齋無算。沉酣到中夜。空白忽欲暗。正好殘月來。光華與凌亂。題黃上舍恩長印譜

雅覺一拳堅。緞尙須八體摩。描試問誰工此技。山農谷口三橋。叔孫不朽三事。江夏無雙一人。文苑儒林藝術。恐君難以分身。

送黃戶部鉞乞假還蕪湖

黃生通籍久而乏仕進意。郎官才半歲。堅欲潔歸計。乞閑書既允。偃臥無一事。歸日萬斛濤。空明洗胷次。築屋古鳩茲。于焉可終老。苦無江上田。可刈霜前稻。仍然攜襤被。遠復客江島。時將遊皖江 一世無相知。何人識飢飽。

十一月十四夜卷施閣待月適蔣表弟良書以惠泉酒索售因留飲至醉作

所居偏西南。十日寡良友。今夜明月圓。清輝殊膩手。蔣生叩門入。半日俯其首。索我助急裝。餉我一尊酒。開尊與酬酢。鄉味汝知否。移坐石屋中。清談亦云久。苦言辭我去。相送出門走。夜半西北風。泠泠吹笑口。十六夜獨坐玩月至四鼓。月食詣太常寺隨班行禮。

全家既南歸。一婢攜向北。欣聞月當頭。爲我具肴核。軒墀開左右。雲向瑣窻白。古木十數株。居然富泉石。攜壺隨處坐。淺醉不終夕。官閑乏塵事。敢尙曠厥職。三更驅羸車。入寺救月食。

感舊

忍向三生石畔過。此情除有劫能磨。愁中花月催人老。夢後樓臺易主多。紫燕已聞移舊棟。白雲猶是宿層阿。惟將一掬東風淚。和雨和煙逐逝波。

胡上舍唐屬題夢李昌谷圖卽戲效昌谷體

古錦裁作囊。時嘔心中血。古錦裁作被。時縈夢中結。江南仙客夢隴西。魂氣上覺南山低。左耳黃河聲。右耳瀉滄海。塵飛接黃雲。如鉤月沉采。闌干十二行不前。轉眼已及三千年。玉京路向瑤池直。金虎玉龍攔不得。却怪仙人酒面紅。映天天作桃花色。清虛帝所宅。何有白玉樓。一語道破天應愁。天公愁。山鬼笑。神雞亂嚼星斗完。飛上燭龍頭上叫。夢中授受詩百篇。只借東壁爲長箋。從茲投溷詩。仍須出人間。來何翻翻去何遠。出戶有光團若絮。長爪纖纖破天去。

東錢三維喬

竹初庵主近如何。習靜翻憐歲月磨。到枕水雲清夢適。應門汀鶴道心多。黃金久已欺中壘。白壁誰能剖卞和。君前宰鄞縣。爲接任者。所累天爲上官白眼。一片五湖千頃月。收帆擬共著漁簑。

夢入從舅氏白雲溪舊宅感賦長句

一半軒窗面水隈。已涼頻奉板輿來。簾從碧月光中捲。花向紅雲影裏開。分砌紙燈搜蟋蟀。過汀蠟屐點莓苔。歡場總被風吹散。贏得春宵夢百回。

張烈婦詩

烈婦王氏。余友人張大令景運之子婦。文學慧裕之妻也。慧裕以勤學得瘵疾。氏剖肱療之。不愈。卒後一月。氏繪夫像于壁。雉經其側以殉。

張烈婦。交河人。年二十歸所天。所天勤讀書。氏亦助攻苦。朝聞雞。嚶嚶。暮聽統如鼓。所天學成。病轉危。夢裏血淚時時垂。誰言色如花。恆月成死灰。叩天乞緩須臾死。割肉如丸啖夫子。臂創未合髻已墜。柰此出腹兒呱呱。嗟嗟一塊肉。敢累翁與姑。長跪向保母。願乞存遺孤。捐軀卻憶前三日。心事曾爲小姑說。翁姑有叔兒有母。地下良人待余久。神完志定反不忙。却掃東壁如銀光。七尺軀。牆上植。烈婦善繪事。先畫良人像于壁。乃就旁繪。三尺繩。梁上直。墨光血光相對射。形影不離夫一尺。君不見。婦先兒。兒童烏阿翁。復作鬼董孤。大令近作述異記。歟。

種一家奇行皆堪圖。

偶成

哀樂中年詎可支。未衰恐已鬢添絲。遭讒真悔知名早。投隙方嫌見性遲。乍識面人偏入夢。不關心事忽

沉思平生學行吾能審。豈待悠悠論定時。

百種芟除癖尙留。閉門索句出門遊。研摩未及唐餘史。蹤跡粗窮禹九州。胸次漸能忘寵辱。舌鋒從不快恩讐。白雲溪畔三間屋。略有頭銜好乞休。

間來屈指溯從前。孤露餘生我自憐。平輩半皆成老宿。故人多已學神仙。難忘硯北千秋業。卻有城南二頃田。一事冷官差可慰。趨朝常得弟隨肩。

亘亘平生一寸心。不同朝士竟升沉。憑誰可解胷中結。倩客時彈海上琴。乞與藥罇希駐景。肯從塵網索知音。南舟北馬頻來往。坐使勞勞變古今。

廿五日雪

蓬門且喜絕將迎。繞砌南頭自在行。一片廣場三畝雪。好同心地證空明。

十二月十九日卷施閣招同人祀蘇文忠公卽席賦一章並邀諸人同作

七百年來彈指過。又隨裙屐壽東坡。生天至竟誰能免。傳世如公庶不磨。香篆裊時詩思入。風簾開處雪花多。狂吟痛飲君休惜。不見勞人鬢已皤。謂吳侍讀錫麒時以病未至。

小除日邀同吳侍讀錫麒戴吉士殿泗趙舍人懷玉溫舍人汝能方比部體劉舍人錫五伊比部秉綬葉舍人繼雯張檢討問陶彭明經薰交戴禮部敦元集卷施閣祭詩作



洪生除日築兩臺。鋪糟避債人俱來。客來不來豈須速。先注滿堂銀蠟燭。歲聿云暮興轉高。才半債帥兼詩豪。卷施之門如鐵立。百輩申頭不容入。側聞門外客。暗數堂中人。九州仙客萃一門。休嫌坐上賓僚少。閩粵楚吳兼蜀趙。坐中十二人。凡四川湖北廣東福建山西浙江安徽江蘇共八省。無端聚飲衆。或嘍轉假舊例稱祭詩。多逾二百篇。少乃十數首。吾曹自有傳世資。不藉詩篇成不朽。燭花分從肩上飛。蠟淚滿滿堆春衣。忽驚屋後雷聲墮。四面紙窻齊欲破。山雌水母并入肴。遠有吳客貽車螯。百壺不嫌多。一觴不言寡。夜半清談振檐瓦。肉拌貂酒汚茵。脫略極處無人噴。明宵莫守庚申歲。後日早朝纔破醉。

偶成

客來半不知名姓。到卽隨堂住幾時。醉後忽然長揖去。主人不問僕難知。破工夫把蜀茶煎。一枕新涼乍欲眠。不合約他狂道士。騎驢直到竹牀前。

卷施閣詩卷第十八

侍學三天集丁巳

正月十四日雪霽温舍人汝能招飲分韻得兼字

且插梅花壓帽檐。乍來香氣欲衝簾。籠街月與燈光合。繞砌霜將雪色兼。縱飲未妨朝客罵。朗吟生怕夜鳥嫌。千言一例輕揮灑。已有春華上筆尖。

十五夜琉璃廠步月

一市人如海。塵從隙處穿。帷車排巷窄。社火壓場圓。濁酒呼朋飲。奇聞藉客傳。欲尋容足地。飛爆向肩然。元夕有懷四首

半生思紀外家聞。

朱文公有外家紀聞

清淚時時滴典墳。十六人中留上壽。

男氏

再從兄弟共十六人惟男氏屆八十七

千里外寄奇文。

予典學貴州時男氏將生平所述作寄存余處

難忘閣上三更月。只占溪南一塢雲。莫晒灑陵亭醉尉。阿誰能識李將軍。

憶州倅男氏

一居闌闌一居鄉。零落年來姊妹行。少賤每教通世故。長貧時與話家常。封書寄弟箋曾溼。對鏡梳頭髮

已蒼。腸斷邗溝東去路。

適汪氏二姊下世已及十六年所居天井巷小樓屢過之不忍登也

小樓空鎖月昏黃。憶姊

晴暉橋北學場東。竹屋時時與夢通。砌繞石泉三寸碧。窻分梅蕊一株紅。已將複閣棲嬌女。可有新詞寄

阿翁猶憶北行牽袂處。萬家燈火五更風。

憶女戊元夕北上

故人生子我生孫。世執還應擬弟昆。

趙舍人得子最遲

竹馬跨時纔識路。紙鳶放處定當門。攤書已分傳

家業。學語差憐具。夙根遲汝長安來繞膝。看翁日日倒金尊。憶孫

吳上舍文桂倚梅圖

黔南冀北走紅塵。昨夢江鄉正好春。何不石旁添畫我。承明同作憶梅人。

纔過燒燈無幾日。誤書穀雨我心驚。

來札雨水日誤書穀雨

多應仙客思家切。預想踏青人出城。

劉刺史大觀爲亡友黃二景仁刊悔存軒集八卷工竣感賦一首卽柬刺史

一瓣心香契獨神。此公高義出風塵。應憐少日齊名者。已作千秋傳世人。檢點溪山餘笠屐。刪除花月少

精神。詩爲翁學士方綱所刪凡稱涉綺語及飲酒諸詩皆不錄入

向平婚嫁爲君畢。

君一子一女皆君沒後爲之婚嫁

亦擬穿雲訪列真。

題蕭照所繪宋高宗瑞應圖六幅

剩得東南半壁天。忍將奇瑞說從前。何曾楚壁能歸趙。轉使吳州又姓錢。

朝野雜記徽宗夢錢肅王入宮而生光燄

內殿早

教飯繡佛。小朝真欲泣金僊。蕭郎落墨非無意。只畫樓臺夕照邊。

不少當時命世雄。藥韃都覺有儒風。誰令密計參張慤。卻以中原付杜充。唾手燕雲時已異。傷心懷愍事將同。茫茫一局全輸卻。轉悔飛棋入九宮。

天水南流讖不成。臨安城異汴州城。到來捷縱誇三矢。從此寒應在六更。未覺赤龍能踐夢。好防白鴈欲淪盟。冰天雪窖吾家事。坐使披圖百感生。

三月三日作

不妨衣冷更裝綿。十里衝寒籠玉鞭。到處雨猶零昨日。別來人乍入三天。是日入直上書房情懷已分難成夢。消息緣知欲禁烟。只有御河橋畔柳。臨風裊裊試初眠。

送吳文學文桂旋里

我從黔中來。共子客京邸。君今新安去。是我舊鄉里。旄頭星落白虎傾。屈指井絡當銷兵。二千石吏倘奉法。五斗米賊何難平。金門索米空年載。無補于時亦思退。黃花半頃麥一畦。努力同輸太平稅。

送郭同年淳乞假還里

春秋三榜悉同年。入直同趨朶殿偏。手版竟思參俗吏。時同年外任者頗衆頭銜莫更說神仙。著書我續容齋筆。述祖君牋爾雅篇。他日講堂來問訊。胥臺側畔越溪邊。

古意十首貽晉齋應教同作

魚遊濁水中。鳥宅高枝上。托身雖不同。遙遙亦相望。連枝新月出。鳥影波上漾。魚樂我自知。沿流擘輕浪。晨興必資餐。夕寢必資被。一身雖無多。物物無不備。從茲百年內。殊覺太繁費。當前欣各足。安用事心計。

微名在身後。亦以付天地。惟時把書讀。捲卷輒垂涕。持此一寸心。寥寥欲誰寄。

莫辭家出門。出門路卽岐。處旣誰可借。出亦誰可依。身非我之身。父母之所遺。敢學陳孟公。一世隨高低。松筠及桃李。羣焉托春風。先時及後凋。命意乃不同。桃李方華滋。松筠亦青葱。共結青帝知。幽芳閒香叢。榮悴任所操。不居造化功。所以深識人。澄觀悟初終。

五日一澣衣。十日一休沐。衆中常緩步。敢逞絕塵足。齋糧時告匱。祇復購薪束。不知何奇書。然火樓上讀。昨者臥復起。忽然心憂煎。前古與後古。一身居其間。責備之所歸。安得不懼焉。何以貽後來。何以承昔賢。當食三歎嗟。高懷惜徂年。反羨行路人。逐便可息肩。

繁星與望舒。晨夕麗天闕。司存各有在。取道亦殊別。如何百星光。難補員景缺。北斗亦自知。光輝不如月。我不爲神仙。非徒厭荒渺。亦恐過百年。事能生意表。閑居偶然夢。列闕事幽討。洪厓與浮丘。容顏那能好。微聞田橫客。近尙住仙島。畢竟忠義人。後天而不老。

人言記誦佳。不必炫文采。寧知華與實。兩兩實相待。生爲行祕書。一死究何在。何如能涉筆。自命可千載。締交數十年。夜夢隔魂魄。忽然來同心。半面成素識。神明苟相契。不在今與昔。孔程乍傾蓋。華管久分席。君看曹平陽。方延掃門客。

送鮑郎中之□乞假南歸

五年不復同簪筆。忽向東華語將別。高齋學士我自慙。長慶老郎君第一。廿年前憶夫容城。君官我尙爲書生。一篇君賦初月影。我把君卷時縱橫。十年前過昆陽驛。君作使星君尙客。八句君嘲退院僧。僧把君詩倍珍惜。驛旁僧有娶妻生子者。君作詩嘲之。僧每舉以示客。揭來同宦曾幾時。君復僦屋鄰曹司。銜杯每苦暮鐘動。一僕一馬趨城遲。君寓內城。此回別君真草草。道遠飯君須及早。練塘湖北赫山西。他日訪君應未老。

西爽村雅集應教

平波三十頃。樓閣總如浮。聽雨來檐隙。穿雲歷樹頭。竹梢時礙鹿。花點欲驚鷗。不是春光滿。還疑雪苑遊。  
三雍開祕笈。萬畢述奇辭。古樂河間獻。新碑丞相斯。主人工小篆。時觀所撫嶧山碑。阜同分陝陌。水軼定昆池。喜值端居

暇。賓筵酒不辭。

清明日同人各携酒至陶然亭餞吳侍讀錫麒分韻得郭字

今晨值清明。淺步不出郭。言登西南亭。稍覺筇鞋拓。窻樵無用掩。空翠四垂幕。天半遞遠風。輕雲落如鶴。梨棠間桃杏。花暗一層閣。春蔬羅數十。所喜新意各。泥飲苦不豪。停觴歎離索。東瞻暨吳會。西念及商洛。時聞賊匪竄入魯山。如何遲露布。願望期屢錯。吾子又告歸。心期渺誰託。中年富筋力。敢退事耕鑿。無容籌去住。且復視寥廓。客去酒忽醒。泠泠夏車鐸。

閉門見花落有感

塵勞擾擾復紛紛。卻掩重門杜見聞。入世早推能慮事。到頭何止僅工文。閒花積地驚三寸。薄酒澆愁祇一分。欲構草元亭未就。暫將奇字課劉棻。

晚坐

草花豔紫林花紅。胡蝶五色飛當中。刺梅黃更出墻角。白玉一樹嬌春風。藤床坐久春陰薄。香氣冥濛合。成幕忽地吹來雨。腳斜。梨花樹上桃花落。

四月十一日綺春園雅集應教

名園一棹水云泮。柳正披香草乍薰。畫舫已教延碧月。紫藤偏欲上青雲。欣傳檄報秦關捷。不礙顏從魯酒醺。雅有剡溪牋百幅。時觀成親王所書堂額亦乞寫卷施閣榜醉餘書許乞羊欣。

昆明湖水接天流。揖客都從水上頭。正好柳陰三弄笛。未妨花裏一登樓。迂疎尙荷賢王禮。擾攘誰分聖主憂。殘盜莫矜盤踞穩。早看飛將下神州。

趙忠毅鐵如意歌

三尺鐵作如意。誰其握之趙忠毅。惜哉公生明已季。委鬼茄花吹滿地。恨不擊王孟津。門生有此真亂羣。恨不擊烏程魏。故人子已成敗類。半生所遇總如此。悼歎公生不如死。鐵兮別主二百年。倔強宛若公生前。君不見我雖不見公。幸見公遺物。稜稜一方硯。凜凜三尺鐵。嗚呼二物偶流傳。想見公心如鐵石。

米圖南鐵笛歌

一聲遲。一聲疾。雲將穿石欲裂。不知何人製頑鐵。百鍊鋼成三弄笛。空園初春。窅其無人。水際一曲。蛟龍欠伸。排清風。出明月。樓高高。聲不絕。三更已還客。與闌百舌軟語。花開顏。

望雨作

朝望雨。雨不來。烏鵲聲裏紅雲開。暮望雨。雨不下。柝聲茫茫星影瀉。五徑山。十日不出雲。赤日炙竄牛羊羣。昆明湖。一句水減尺。青草欲生魚鼈窟。東西紫陌飛麴塵。祈禱日煩兩聖人。君不見。安得檐頭雨如注。更望驛西傳露布。時望陝西捷音甚切。

廿六日新雨後作

燕歸梁。雀歸牖。雅巢左邊鵲巢右。延回只有雙老烏。無樹無巢向空鬪。先生看雨出屋頭。破暝復聞呼婦鳩。風聲蕭蕭葉聲亂。一尺鯉魚飛上岸。

頻夜起看殘月有作

少歲如新月。初三及上弦。策憐光滿夜。亦似客中年。齒髮今如此。情懷愈黯然。回回過宵半。判與看殘蟾。偶成

殘月出半宵。殘客扶半醉。月從門外入。披牖與之對。客行既不前。月影亦不退。何如鋪桃笙。就此月中睡。



澄懷園卽事十首

讀書樓上一燈紅。穿破疎簾入水中。隔牖乍驚錢庶子。誤疑殘夜月升東。所居與錢庶子柴相接

雨溼溪光畫不成。平堤百尺水雲生。過橋時有琤琤響。學士廳前落子聲。張學士運暹與王侍講綬裴編修謙暇輒對局

直廬遙對寺門開。童大理鳳三寓廬獨在澄懷園外分得西山一角來。載酒欲過重大理。十年重與話繁臺。十年前曾同客開封

八分日影上塔除。張檢討綬出入每刻日影爲度風動簾紋自卷舒。携得剡溪藤十幅。成王書罷定王書。

嫩涼時節雨初過。格子千行墨數螺。卻笑病餘陳贊善。萬全索書人比索逋多。

屈指風光五月前。蛙聲閣閣草綿綿。宮紗賜罷頒宮扇。日午傳宣集後天。

偶向花前共舉觴。自慙小戶遜三張。謂學士及檢討綬花豬肉好梅蘇熟。更憶西頭達侍郎。達侍郎樅飲饌兼人

破曙同看入左門。金爐宿火尙餘溫。傳經不愧真司業。分課皇家五代孫。邵司業玉清督課最嚴時分授皇元孫經

洗馬清談昔擅名。說經祭酒亦鏗鏗。闌干日午天風起。吹徹南來笑語聲。謂王學士坦修汪祭酒廷珍

閒塵一畝富莓苔。正值花時借榻來。架卻紫藤扶住竹。清陰仍待主人回。子應居西頭小樓以牆宇盡圮暫假寓萬侍講承風直廬

夜起

塔頭明月來。長徑一千尺。非比青松枝。欹斜不能直。

天中節近有懷里中景物并望家累入都

梅仁如豆杏如丸。桃實成拳砌滿盤。昨夜江船來海口。鱗魚三尺勸加餐。  
薔薇一架後先開。不向牆根問蜀葵。襯得石榴紅更好。野罌桃與土玫瑰。  
睡覺西窻雨氣腥。戲將采線繫蜻蜓。聚頭扇子無多摺。自寫黃庭內景經。  
石首江瑤總遜渠。品高入市故徐徐。銀鱗玉頰疑無骨。喚作人間團扇魚。  
新菊白酒透簾香。冰齒還嘗薜荔醬。卻謝水鄉三尺雨。楊梅深紫枇杷黃。  
約伴同遊西瀟湖。梳頭先費睡工夫。倦來不怕春魂覓。新貼紅梅閣上符。  
蜀山鞭筍出林長。紫萹黃瓜取次嘗。兔麥上場蠶豆老。便乘舴艋醉新涼。  
枕波樓閣止三椽。簫鼓盈盈咽一川。已是苧衣涼沁骨。更扶殘酒上燈船。  
初三已是學堂空。競渡爭看出郭東。六角蒲葵三角黍。采絲穿就過天中。  
不見津門信使回。小亭遲汝獨銜杯。船頭醉蟹船窻酒。可穀而翁消夏來。

山行雜詠

人從窻裏臥。塔向門外立。忽然塔上人。欲與窻間揖。檐鈴吹笑語。高下勢不及。無由寄真意。飄此頭上笠。  
一响乘便風。翩然墮階級。

空園半畝花。左右交虎迹。清晨客初來。怪鳥啼屋脊。心空忘喜懼。卽此鋪尺席。鳥亦竟遠飛。虎亦不前逼。

始知忘機人。物外有真適。

船從西岸行。馬向岸東走。魚從急溜下。三者勢若湊。中流微約略。十步拒前後。魚沉倏無影。馬倦亦難驟。客意正苦吟。沿流一篇就。

山樵本無家。隨意向山宿。忽于鴉巢外。突出半間屋。上竄鼯與鼯。下復走麋鹿。樵薪堆一岸。意倦亦託足。縷縷飛爨煙。應知飯初熟。

斜陽半天紅。雨氣半天黑。冥冥紅黑交。蟬竦橫百尺。仍然雨難下。依舊幻晴色。須臾雲黑處。透出星漢白。野老涕不休。低頭對原麥。

一塢寄塵外。謂有田堪耕。豺狼多于人。見慣亦不驚。客至主染疴。閉戶絕送迎。連呼強之出。先把門扉撐。荒寒信難居。滿頰莓苔生。

出谷雨聲碎。入谷雲光肥。一出一入中。蝴蝶雜客飛。疲蹤欲誰投。暫借雲所棲。一川饒怪蛇。百鳥噤不啼。何因知宵昏。庶賴警曙鷄。

橋東與橋西。破曙一招手。前行殊未覩。隔此水楊柳。荒荒行半日。月落斷山口。居人方啓戶。行者倦奔走。勸客盍早餐。山桃實如斗。

四望悉無見。松杉與檐齊。亂石黑半天。壓此眉睫低。石竅出一門。何能辨東西。居人耕山田。盡向屋脊騎。

勸客早出山。雲生路當迷。

迷途忘高低。蠟屐向空墮。濛濛倒生竹。衣袂牽向左。欲尋人跡間。半里斷烟火。沿流聊徙倚。缺處雲落。古廟無神靈。牛羊占高坐。

午日拜紗葛香藥之賜紀恩一首

弱冠爲人師。逮今幾卅年。人言紳佩榮。簪毫入中天。經傳聖人孫。戍削甫及肩。朝朝食天廚。盡鹽夢仍牽。日午宣賜來。鵠立朵殿邊。繽紛香藥丸。紗葛欣有聯。纔出內左門。傳宣復連翩。俯念節物佳。當食更賜鮮。是日並蒙賜克食我苦無母遺。承恩涕淪漣。會當家祭時。持此告寢筵。

偈側行同金秀才學蓮作題亡友黃二悔存詩集後

偈側復偈側。住世纔幾日。朝吟山頭魂。暮委泉下骨。偈側行。歌黃郎。黃郎五歲始識字。十五十六能文章。十七試冠軍。十八登詞場。十九客浙東。二十遊瀟湘。當其興發欲賦詩。寒暑昏旦皆忘之。山行麋鹿憎。水行蛟龍嗤。有時沿林覓句不知遠。前飛鳴鴉後獵犬。我疑蒼蒼位置皆得宜。獨出此人天不管。春非我春。秋非我秋。一世出不得。延回歷九州。大兒小兒亦何有。忽向燕臺訪屠狗。形疲骨瘦志已灰。偶爾一官頭上來。驅車入解梁。誓將涉咸陽。避責未築臺。塊然身遽亡。三十旣已逾。四十渺難得。赴君之喪哭君切。伶仃一棺詩數冊。此時偈側復偈側。巫咸岡。雲四結。昆侖河。濤百折。炎風蕭蕭雨聲急。又疑天爲詩人泣。詩

人亡後十五年。新鬼故鬼圍墳前。

君亡後君配與太夫人皆相繼卒

錦州刺史劉大觀獨抱一卷來長安。奉錢三百千。

一爲校刊姓名。一日長安市交口誦君如未死。我頃聞之淚難止。卻憶石交疑隔世。楊大令趙舍人。里中昔年稱等倫。此時憔悴百僚底。轉羨君名日邊起。偈側行誰所爲。金子亦豈人間才。浮名身後總如此。不若未死常銜杯。一杯復一杯。偈側歌偈側。卻憶虞山山頭論詩夕。夜半神祠火雲赤。茲遊何期死生隔。嗚呼茲遊真成死生隔。

送楊大令倫之官粵西

儒流誰說不知兵。躍馬提戈萬里行。猿鶴已堪成一隊。

時以粵西軍務檢發知縣八人皆先後同行

苗蠻從此乞餘生。愁經百

驛先頭白。官比雙江徹底清。莫忘鵝籠舊時事。夜寒風細擁孤檠。

南行飛雨北飛沙。三十年來事若麻。笑我尙難忘輩行。羨君先已富才華。論詩未欲輸餘子。破涕先聞說外家。姊弟數人天未住。君從洛中赴粵時蔣表兄鴻三久客洛陽表姊適繆氏幾時商略泛歸槎。

戲簡陳侍講萬全四首

時陳新納姬人作詩索和

填門索字比催租。頗覺仙郎暇日無。添與玉人書紙仿。者番須破睡工夫。

偶然一語尙嬌羞。說到雙眠着意愁。比似早朝還起早。怕人簾底看梳頭。

昆明湖左路偏賒。下直偷歸日已斜。好事卻同錢庶子。五更雙巷響雷車。

錢庶子榮直澄懷園每三日必歸卽于次日五鼓趨海澱入

直常以爲例君寓  
居相近故戲及之

倦來鸚鵡替呼茶。不掩窗櫺看月華。我屬司香好調護。東風纔放二分花。

姪年十四

立秋前一日偕顏大令崇榘趙舍人懷玉侵曉詣太液池觀荷便訪法祭酒式善遂自德勝門徒步至西直門五里長河花事甚盛並過極樂寺勺亭久憇乃返

北斗未落天冥濛。騎馬獨入蕭齋中。夢醒拉客事遊覽。曉日未透觚棱東。三亭二十有四面。所喜面面花香通。豈惟花色艷如錦。魚尾亦閃明霞紅。此時夜色未全散。樓閣不受驕陽烘。石闌干落一千丈。月影星影穿玲瓏。斜枝面水結巢穩。鵲夢未破花香濃。荷盤承露亦殊好。珠光細碎磨鏡銅。偶然興發欲出郭。三里已至官河衝。背城人語太岑寂。繞砌百級喧鳴蟲。劉家亭子足清賞。細路曲折諮老農。斜行距水不三步。仄徑尙被蛛絲封。黃塵車馬鬧如織。閑處鷗鷺何從容。西山咫尺不容見。花挺高榦遮雙瞳。乍紅乍白乍深。色裁出片段。非人功。環橋石勢門清削。花亦旋轉如長虹。池寬不放水波展。風蒲獵獵交水荇。迷行半晌始得路。屢盡豕柵兼牛宮。花前吟客果下馬。一一瘦步行偏工。寺門斜對御園關。當午紅氣酣房櫳。欽環塞戶不容入。是日國花室爲遊女所占僻巷走避衝斜風。瓜花斷路蓼橫徑。紫艷映水黃浮空。吐絲蟲碧轉丸黑。堆地棘刺仍叢叢。何來驟響刮客耳。別出水脈穿青松。僧房盡處避人坐。瓜果一任僧雛供。開窗望雨不能得。雷鼓隱隱聲隆隆。冰盤磊落高數尺。蠅蚋半日潛無蹤。良朋屢約期屢誤。世事何苦填心胸。團蕉臥

久僕夫促來趁斜月歸聞鐘。回車頓覺有秋意。一葉正墮青梧桐。

二十日早章大令學濂邀遊積水潭看荷同人分韻得光字

十里長河匯作塘。馬嘶人語看花忙。能閑客總神仙侶。當曉潭交日月光。斷札幾行留黯淡。時展舊遊長卷見亡友王友亮通副所作看荷詩喬松千尺揖青蒼。惟應薄醉牽船好。消受荷花面面涼。

跋方布衣薰所作春水居長卷後

方居士性本孤。畫水不畫舟。畫岸不畫廬。縱然畫屋僅結茅。前後左右皆禽巢。一身居其間。意態何嚶嚶。縱然畫舟僅一葉。四面風聲水聲接。掉船何所之。似欲出六合。春林綠重煙濛濛。初日淡作胭脂紅。杜門百事不挂意。闢牖自與天光通。方居士富有千頃波。貴作五湖伯。朝吟晚吟同蟋蟀。夜窗無人電光擲。人立大魚時揖客。不爾前灘訪鴻瀾。偶然興發作此圖。一筆卽已環全湖。全湖盡處青無數。知是君家家前樹。我與居士交。恨未及往還。手訂居士詩。不識居士顏。他時我訪湖西宅。爲補四圍松與柏。君不見飛去飛來寒鷺絲。渾疑弔客衣冠白。

七月朔日雨竟日夜不止作此排悶

一夜蕭蕭雨。開門水倒流。亂雲穿斗拱。野鳥宿簾鉤。兵甲真堪洗。機槍尙未收。似聞宵旰慮。仍在益梁州。苦雨待客不至戲成

五更雨急檐頭衝。壞垣倒屋聲洶洶。起尋蠟屐出門看。半里曳入塗泥中。西家床頭索瓦瓶。東巷歷歷排  
牆聲。重來輦轂又逾歲。天漏似向黔中行。吾家老屋常掩關。壁倒已覺無遮欄。獨愁苦霧翳天半。咫尺不  
見西頭山。冷官百事皆相左。折柬偏言此晨可。齋廚無蔬爨無火。拒客先將巷門鎖。寧知客念亦早灰。侵  
曉誰肯衝泥來。廠橋西門水三尺。到亦叱馭驅車回。水聲冷冷沒及髀。掩書無聊酒時把。一杯未已復一  
杯。忽爾風狂墮飛瓦。君不見。天公此意知者寡。要向西南洗兵馬。

哭慈孫

爾病真難起。吾衰久矣夫。猶應阿兄在。次子盼孫于王莫嘆夜臺孤。世業憑誰振。重慈藉汝扶。傷心厝棺

地。夕照滿平蕪。盼孫棺厝于城西四

夕照寺今亦當同。

詩家詩

無錫顧兵備光旭。選刻同縣人詩爲一集。其剩稿賈上舍崧乞得之。爲卜地瘞于梁溪之側。三伏日走  
數千里爲索詩。可云好事矣。爰爲賦四絕句。

側柏疎梅插滿塋。三千里路走燕京。不知何預先生事。肯爲詩人觸熱行。  
身後浮名定有無。尚餘清淚灑平蕪。他年地下傳文苑。此事真推鬼董狐。

少日齊名顧虎頭。老來吳質倍工愁。顧進士敏恒吳明經諱九原珠玉終難瘞。合置中郎與發丘。



不結詩人結酒人。邇來麴蘖更沉淪。潘張陸左誰能識。有鍤須埋劉伯倫。

女貞行爲俞貞女作

無錫俞貞女。許字高郵金明經蘭。未幾明經病卒。貞女誓以身殉。母兄防之苦。貞女畫女貞花一枝。題詩于上。以見意。不半歲。終以瘵疾卒。其兄孝廉坊爲索詩。爰賦此篇。

花莫作斷腸花。草莫作拔心草。拔心草死尤可憐。誰識斷腸花色好。俞貞女字金明經。二十待年仍未行。明經亡。貞女病。口不欲言。心已定。寫得一枝。祈絕命。不繫尺五組。不赴清冷淵。兒身雖可捐。母意殊拳拳。十旬百藥終無効。兒雖死。貞不傷孝。英英女貞樹。鬱鬱冬青枝。上有六出花。下有五色芝。君不見。斷腸可續死可生。不若此木尤堅貞。良人無年妾命促。手握此花方瞑目。萬古貞心托貞木。

同人約七夕。卷施閣小集。先作此代柬。

紅燭千條酒百瓶。石闌干外雨初停。人間未必輸天上。此夕虛堂聚德星。

七夕詞

今歲風波惡。濤衝星斗邊。時大雨連日。永定河決口。鴛鴦三十六。險欲上青天。

茅垣排東西。土室圯前後。只有天漢邊。紅牆尙依舊。

別夜雲軒斂。凌晨絳節移。年年當此夕。真可說瓜期。

十一日同人集卷施行閣醉後作

十日無一客。客至必滿堂。十日無一樽。客來必千觴。主人愛客客亦知。皆競來早無來遲。鞭絲影拂稜稜瓦。洗手花前客停馬。淵魚林鳥盡不猜。客到先已穿池臺。茶爐聲喧話不足。失喜一林新果熟。雖童攀樹鳥啄枝。一徑先入紅參差。果中開筵忘爾我。上坐主人無不可。忽然客句於速成。滿屋盡變爲吟聲。歡呼座中人。歷亂屋頭雨。驚雷掣電總不聞。銀燭如椽客園語。須臾雨歇月滿廳。蠟屐攢響來窺楹。半廳人歸半廳坐。別掃一廳留客臥。金山等皆留宿閣中。三更門索誰更牽。知是驚烏夜飛過。

鳳仙

砌下亭亭立。應呼侍女花。綠須扶徑草。紅欲睨窗紗。逸榦零朝雨。芳心待月華。窺籬兩三種。因爾倍思家。  
鷄冠

爾亦知時者。忘言得久安。未應憐鍛羽。空自揭高冠。秋實寧同味。幽花不並看。劉琨思起舞。側耳聽無端。  
秋葵

八尺檐楹峻。枝高尙出楹。孤懷終自揭。仙掌曉來擎。似愧凌霜質。徒矜向日名。寧隨鮑莊子。別足有餘榮。  
紅蓼

秋花雖自好。未比水花妍。紅紫分三徑。江湖別十年。舞風疎竹外。弄影夕陽前。不聽吳娘曲。從茲別夢牽。

秋海棠

何事腸俱斷。傾城色尙誇。春人兩行淚。秋雨一叢花。恨繞江郎筆。愁生蘇小家。蟲聲漫嗚咽。心緒正如麻。

玉簪花

秦關誰種玉。楚國尙亡簪。泣露冤難剖。埋蒿冷欲尋。淡宜涼月曉。閒稱古墻陰。似有泠泠響。風前荅素琴。  
十七日驚聞畢尙書師楚南之赴翌日于卷施閣中爲位而哭哀定賦詩六章卽寄莊邠州忻錢乾州玷  
陝西毛簡州大瀛四川孫兵備星衍山東楊靈州芳燦甘肅方伯揆貴州楊大令倫廣西王大令復河南  
三十年來事。都憑信史編。此生誰念我。九死欲呼天。計出朝班上。魂歸夕照邊。報公惟砥節。方不負名賢。  
死不爲公恨。傷公未盡才。潢池仍待勦。衡嶽遽先頽。諸葛中年隕。文淵半道摧。世儒真淺識。猶望歷三台。  
由來三楚事。終始一人支。微管功寧泯。亡彭讖獨奇。公少時衡士言公官楚南日卽當謝世蓋合公姓名爲讖也夜星驚櫪馬。秋霧濕

牙旗。千百孤寒淚。從今灑路岐。

遣大投艱後。羣疑衆謗中。萬言陳至計。

公去歲請撤湖南兵專勦湖北疏入上嘉其蓋誠

一死遂孤忠。分野旄頭落。盤門羽檄通。

蠻民商配食。先在伏波宮。

老每思巖壑。君恩未賜環。回天心獨苦。匝月鬢都班。公體素強自籌楚事旬日鬢髮皆白事與元勳勒。封同五等頒。傷心別

時語。乙卯冬余自黔中報滿入都公留話三日方別原不計生還。

同人凡幾輩。白髮半應飄。訝絕全家訃。中年以來。公仲弟夫婦及冢媳房老皆相繼卒。哀騰八月潮。公以潮生。日生故小名潮生。枕鞍書耿耿。

歸櫬雨瀟瀟。他日虛堂宿。仍歌楚大招。

曾都轉燠。以六月廿一日集平山堂爲宋歐陽文忠生日設祀。同人賦詩成帙。并索亮吉詩。因賦此。

臨安祀東坡。邗上祀永叔。兩公政績猶在人。不特高名輩流服。異哉平山堂。乃祀和仲。忘歐陽。予以癸巳甲午客揚

州權署臘月十九日。曾兩隨衆于平山堂爲蘇文忠設祀。門生風義古無匹。詎敢僭食來堂皇。千秋此論誰折衷。乃在七百年後曾南

豐。雖然文章節義謚並同。配食六一庶得詹山翁。此後君倘接武雙文忠。賓筵開酒人滿。太守風流逮都

轉。昔時門生今里閭。誰知誕日尤奇絕。君後公生纔兩日。陳八塘接邵伯湖。荷花世界昔所無。不羨奏樂

章。不羨祝嘏詞。只羨蜀岡岡頭三日讌。正直千朵萬朵紅。白花參差古來文。福能兼少。況復身持節旄早。

一輩才人座上多。二分明月揚州好。君不見。我亦平生感舊遊。吟魂多在庾公樓。大星昨報前軍隕。昨得

尚書清淚揮殘天盡頭。君思歐公我思畢。同是龍門異今昔。十輩門生宦九州。謂莊似撰錢獻之孫淵如。楊蓉裳。荔裳。諸同學。感

恩。一日頭俱白。王南寧。少林太守。陳博士。禮堂學博。我所思兮二三子。卻憶征南幕下人。一篇並寄吳江史。册厓文學。

重哭尙書師

三日愁霖漲滿池。打門消息到偏遲。南來薏苡冤方白。北渡瓊瑰夢已知。無淚哭公惟有血。此身閱世詎

多時。平原賓客消沉盡。誰共筵前奠一卮。謂邵學士諸人。

七夕夜坐戲擬古別離詞寄孫大山東

中歲念師友。懼或成晨星。晨星今亦稀。惟剩一啓明。啓明之東我則西。天末回首常淒迷。一回思君一回切。願減光明作殘月。一月相隨得旬日。不然此滅彼復生。君爲啓明我長庚。昏旦相代東西行。我持此語思上告。織女黃姑愁未報。南極老人先大笑。

苦雨

十日雨不停。莓苔綠斗拱。虛堂蒸毒霧。梁燕欲移棟。居鄰斷煙爨。款戶求火種。爲言墻半圯。床榻陷成家。填街三尺水。決竇不旋踵。憂來展書坐。蟲喙集窗孔。心切望曉晴。偏驚橫蠅蝨。

贈楊州倅廷煥卽題其傳硯堂卷子

難兄薄宦久蹉跎。時令兄倫檢發廣西軍營萬里新從馬伏波。小別竅憐饒涕淚。半程相送越滹沱。傳家硯比兼金重。

賣字錢無落葉多。我是孔融交兩世。一回展卷一摩挲。

八月廿二日侵曉出西便門抵海淀約任軍門承恩共遊西山因小憇官廨待法祭酒式善何水部道生

作

我行月初升。甫到月未落。初日亦已輝。星光尙回薄。濛濛開濕霧。纔止巷南橋。官齋野花艷。隙地日開拓。早飯及射堂。紛然具羹臠。年豐饒稻蟹。且喜繪新斫。傳觴休更緩。有約在巖壑。斜行車屢陷。溝水仍未涸。

周廬欣在望。便道一省度。園林甫修葺。昨已飾丹雘。笑指雲外樓。今成草元閣。時新修澄懷園。余已移居近光樓下。因便道入視。

循青龍橋北入山

高原無人居。千頃堆白日。前行驚眯眼。沿道飛石屑。流雲勢洶洶。意欲礙車轍。萬葉鼓北風。斜衝一門出。騎行既回互。徒步徑尤劣。絕險度一岡。同行儼相失。瓊璫諸石竅。往往野花苗。秋蟲與相間。竹徑亦幽絕。到覺萬仞湖。孤懸石樓末。

久憩龍神殿。觀泉源并喜春海棠復開

墮薪天半落。知復有樵人。及此林花放。幽巖忽覺春。稍稍開宿雨。黯黯及蕭辰。三時金鑑影。五色莓苔文。土囊風既迅。石竇泉初分。松陰灑危殿。嵐光度寒門。層層凌曲磴。步步絕流塵。禪局雲欲活。初地鳥尤馴。百念此時寂。齋鐘亦不聞。

登蒼雪菴小軒望安定平則諸門并見白塔

松陰甫迎人。櫛葉忽拒轍。土垣從東頽。了了露佛闕。旋螺方數轉。足險入石穴。欹斜臻層軒。眼界始突兀。窗櫺寧待啓。雲怒已飛出。重岡莽回環。幸有北口缺。奔流從此注。百里只一瞥。濛濛煙盡處。時逗人馬跡。心空無窒礙。木葉半俱脫。誰云飛鳥迅。詎若隙駒疾。危瞻七層塔。天際白如雪。斜日下九門。丹樓亦齊突。題羅山人聘爲周編修厚韓所作移居圖

人生安得如淮酒。更載奇書及嘉耦。書完一卷酒一杯。鶯燕一一飛前來。倦餘卽臥書函下。酒得美人斟。較雅我疑醉。鄉日月不可遊。何意復戀鄉溫柔。或云藉銷奇氣憑萬卷。否則佐此情話須千甌。周郎舊乞金門假。重到蓬萊已三夏。偶然聚得薄笨車。家具如此方移家。酸寒頓改儒生素。玉軸金鈔照衢路。遂令畫鬼羅兩峯。描繪人物仍能工。馬嘶塞路車填轍。一笑敵君如有術。以劍抵君書。以琴抵君妾。惟餘酒癖未盡忘。醉裏狂譚磨齒頰。雖然此客尤可防。倚酒或恐登君堂。書能目十行。酒亦吸一斗。把君奇書覆君額。惹得美人開笑口。

八月廿九日抵澄懷園成親王枉騎過訪并辱贈詩謹賦此報謝

偶廁談經席。頻勞問字車。過汀喧列騎。入室噪棲鴉。土竈茶難熟。丹林日易斜。不因鄰禁籟。猶認野人家。中秋日何民部元煥水部道生招同法祭酒式善伊比部秉綬趙舍人懷玉遊法源寺竟日

慈仁荒敗崇效遠。禪窟此間稱最古。維摩立地有丈六。傑閣去天纔尺五。三門乍啓通松徑。百步相連有花圃。虛堂僧健老復丁。靜夜人歸月亭午。

澄懷園九日

荒園秋盡景蕭颯。一半松林起怒濤。是處岡巒行已徧。破除今日不登高。

澄懷園夜起看月

卷簾列宿已全收。是處天光接水流。剩得一星隨一月。憑欄看到五更頭。  
周廬三面麴塵清。風起雲生與地平。百步樓臺少人影。馬嘶聲和客吟聲。  
管夫人墨竹

石徑空濛翠欲流。琅玕影裏雨初收。何緣不寫王孫草。多恐人饒故國愁。  
澄懷園卽事

橫塘萬頃荷花死。蓮葉蓮根泣秋水。參差鴛瓦鋪新霜。螢火一夕收清光。  
枯楊半掩窗前臥。抱葉寒蟬向空墮。湖東明月湖西來。綠窗此事開未開。

晚步

荒岡南去徑縱橫。半里斜飛落葉聲。惹得暮鴉成陣噪。夕陽人影樹頭生。

夜起

落葉驚人起。開軒月露迷。卻從行馬外。斜度濯龍西。萬樹風聲肅。千門燭焰低。  
勞勞我何意。默坐聽荒鷄。築屋

築屋臨官道。郵書鎮日馳。水寒雲去駛。天迥月來遲。劍閣初開捷。荆門尙出師。  
南征諸將士。知否抵恩施。澄懷園借同人晚步



歸鴉已入林。未礙客幽尋。風遞千門響。雲飄四野陰。訪經蕭寺冷。照水石梁深。不是逢搖落。誰知天地心。  
袁大令枚寄示擬戊午己未重宴鹿鳴瓊林詩二十首。率成十二絕。奉簡唐代詩人推李杜。何曾雁塔得追陪。先生要吐前賢氣。兩向慈恩頂上來。也逐遊塵上六街。不知早已脫芒屨。賓筵開處呦呦鹿。定帶長生苑內牌。白首研摩事可憐。從來一第比登天。名經千佛雙番寫。始悟公真劫外仙。三月春光暖已回。五雲多處綺筵開。劉郎前度誰能識。錯認耆年賜第來。一輩人皆上玉京。獨留老眼識羣英。先生遊戲蓬萊日。多恐諸賢盡未生。憶昔追陪聞喜筵。記同上相說齊年。謂庚戌登第日。稽文恭公重赴禮部宴。不知此老來春宴。更有何人步謫仙。卻笑從前向子平。苦留婚嫁晚經營。先生五岳書名徧。遊戲重題雁塔名。老去重登選佛場。此翁何似魯靈光。斷無門下門生在。有亦居然大父行。宴罷瓊林走壁車。珠簾十里影橫斜。當時玉貌誰能識。只有宜春苑裏花。短筇秋到倍精神。無數羣賢逐後塵。畢竟姮娥愛蒼老。桂枝全借白頭人。屢枉山公問訊。林泉歲月一何淹。公與文成公阿桂同舉鄉試。今文成已辭世。少微不隕中台隕。始信公真文福兼。王母蟠桃歲月長。竭來屢見竊東方。曲江杏比瑤池實。也要先生三度嘗。

十月初六日同人集積善大令晚香精舍看菊并出古琴十六相示卽乞主人與何水部道生于花下撫琴率成長句

琴琴不同聲。花花不同色。琴標六代元。宋唐花放百枝黃。亦白。古琴泠泠一十六。其外蕭疎盡叢菊。琴囊滿牆花滿屋。一本花開彈一曲。主人豈止能愛琴。愛琴兼賞琴知音。何郎三十妙指法。花下一見先題襟。主人豈止能愛菊。尤愛看花人不俗。爲花築屋亦殊雅。別自扁門不煩僕。我生嗜古癖未忘。舊物先撫澄心堂。主人蓄唐琴三。其一卽澄心堂物也。題名元祐三十字。洗以菊水逾清光。灌花初完撫琴好。猶有春泥在長瓜。琴聲惜惜花裊裊。花韻都浮七絃表。客彈一回主一回。千朵萬朵花徘徊。罷琴置酒客不去。花下促坐傾千杯。琴停旣無聲。菊暝亦無影。主人離披客酩酊。明月入來窺藻井。

輓王大令復二首

昨得安陽札。安陽趙大令希璜。札來始得凶耗。連篇悼偃師。更憐交友少。已愧哭君遲。涕上猶相訊。孫大昨來札。尙詢君近狀。函關定

未期。錢州。碎垢。茫茫揮老淚。西向酌親知。謂華尙書師及君。

中州民力竭。防賊又防河。屢處凋殘地。偏能惠愛多。敢期膺上計。終自拙催科。一卷新詩在。明明勞者歌。

李大令符清濮陽跨驢卷子

琴堂三月別。獨跨一驢來。面目都非是。銜胥各浪猜。詎知行役苦。安怪壯顏摧。他日傳循吏。推君利濟才。

乞友人作歲朝圖貽詒晉齋主人并綴四截句

窈窕房櫺水一彎。早春偶得著書閒。休嫌屋後峯巒峻。此是淮南大小山。  
沿街都爲歲除忙。清絕城西半里坊。卻憶諸王勤問字。未妨門有束脩羊。  
詒晉齋中一事無。幾聲爆竹歲將除。兒童簫鼓轟前後。不礙閑堂讀道書。  
日晚天街跨馬回。小疲聊復舉深杯。房廊迤左休教掩。要盼西山臘雪來。

小除日章大令學濂遣人餉酒時適寫歲朝圖卻寄并附以詩

故人念我寒餉我酒一尊。闔門不敢應。恐是催租人。催租人不來。送酒人踵至。時郭大令亦遣人餉酒及食物開顏對使  
人。汝亦大解事。主人官亦縣。騎馬日出城。百事逼歲除。猶能念友生。銜杯對盆梅。盆梅前數日承餉盆梅四種此意何可  
報。聊寫春風圖。博君元日笑。

卷施閣詩卷第十九

全家南下集戊

偶成

黃埃飛百尺。難辨馬頭人。只有雲生處。都無一點塵。  
三冬及半春。雪白不蓋地。遂令墻頭蒿。枯黃刺天際。  
欲留不留歌。贈張太守風枝。

欲留不留。廠橋西頭。欲坐不坐。橫街斜左。攔門一人。龍鍾可憐。千里萬里。將戍極邊。念爲置酒。勸之加餐。  
酒沾衣裳。淚落食料。高高三天。下者九地。一身居中。生死不易。白骨不朽。行當長征。冤心不剖。誰能暫生。  
風吹車帷。高至屋脊。三更出門。聊與訣別。

人日讌客薄。醉聞韓孝廉。崧及令弟。觀察對招諸同人。作消寒四集。因闌入痛飲。醉後孝廉兄弟屬題聽雨圖。率筆作長句應命。

一杯人日酒。醉我至元夕。君家兄弟皆可人。肯放非時款門客。款門客豈真酒狂。或者以醉韜其光。孝廉說我詩名好。比部訂交愁不早。滿堂華燈滿堂客。半不相知半相識。長安人海宦十年。屈指觴政皆居先。

閑坊冷巷行還坐。酒。酒。酒。翁都識我。卽如今宵痛飲亦偶然。坐客握手一一稱前緣。忽然牛腰巨卷擲我前。屬我醉後放筆題長篇。繪圖伊誰馬秋葑。趙詩舍人懷玉頗詳盛詩略。侍御惇崇兄弟畫中兩人顏戍削。分案讀書分盞酌。聽雨木牀三隻腳。君不見長安八月無雨聲。屋脊祇有蓬蒿橫。愁君欲聽不得聽。此景令我思江城。吾家令弟昔抱關。昨者共我趨朝還。尊羹鱸膾與莫過。先我一載還鄉山。觀君斯圖意相觸。我家亦有雲溪之老屋。雨聲琳琳如戛玉。不爾共泛吳船之百斛。聽雨層湖亦酣足。梁溪之酒傾百鍾。此樂豈與長安同。君今四十當建功。伯也亦是人中龍。縱饒有宅江水東。何暇聽雨眠孤篷。昏燈一盞簷漏重。千里百里雲頭濃。蕭蕭瑟瑟聲灑空。韻事合讓歸田翁。卷圖一笑生長風。

將乞假南歸仍于行寓種花蒔藕以貽來者戲題壁一首

雙橋口栽新柳。乞歸未遽歸。更種橫塘藕。寥寥春風不過短牆。團團明月剛滿曲廊。桃花蹊。李花隄。海棠一株香絕奇。黃薔薇。紅郁李。紫藤花牽北窗裏。君不見。月月花開主人喜。種花人隔三千里。

澄懷園夜起作

前宵風。昨宵雨。一花初開鵲傳語。樓高榻冷夜不眠。紅燭艷艷光簾前。長安道上車輪駛。只有半宵聲暫止。三更向盡橫門開。枕上馬蹄聲已來。

卽事

一屋都無壁。禽聲四面穿。斷崖冰柱瘦。高樹日光圓。便作攤書舫。愁無載酒船。幽眠正酣處。促起聽傳宣。  
十九日綺春園觀燈卽席應教

一燈迎人過橋去。忽有千燈萬燈聚。水中燈影乃益奇。百影已化千虹蜺。爆聲飛林鵲墮巢。火艷燭水魚驚逃。樹頭彎環燈若橋。赤焰儼欲烘三霄。玻璃屏風八窗列。一房燈光疑入月。持燈作街上石梁。歷徧十二空中廊。稍餘一角天光白。太乙星芒大逾尺。斜飛燈影復百枝。碧月欲升升不得。三更熾火列帳旁。酒人門酒嫌酒涼。開窗意欲待殘月。不覺幕底飛新霜。廣場棱棱千步拓。大聲如雷轟爆竹。前行低頭穿壑谷。百仞冰山穴其腹。裁冰爲鏡雪作燈。高下社火飛千層。禽蟲飛揚獸馳突。一半銀花穴中出。此生此樂安得忘。好客況似陳思王。黃金堆盤一宵擲。昇平樂事寧易得。鄙人歸田有時日。欲與田間老農說。乘船甫了復據鞍。歸路黑霰仍漫漫。昏燈入門僕驚瞬。蠟淚積冠高一寸。

花朝日作

橫塘燕驚相見。今日百花朝。花香無一片。塵暗地。愁漫天。鶯聲不來殊可憐。風連旬。霧連曉。半春豈止無花鳥。踏青又恐無青草。

春日遊昆明湖

車輪遲。馬蹄遽。十騎斜穿碧雲去。山雲穿罷入水雲。鴨鵝天半飛成羣。闌干窈窕回廊複。山作屏風亦千

曲朝陽一縷透遠紅。卻被松杉罩深綠。牽牛亭北環橋東。八窗齊開迎八風。回途咫尺春波漲。燕剪都從馬頭颺。

清明日侵曉自南城抵澄懷園道中作

幽人春夢方迷曉。催客鴉聲出林早。持燈夜待門關開。一片曉霞城上來。橫門西來卅餘里。泥滑馬蹄聲不起。揩眼春光忽逼人。五雲樓閣桃花裏。

澄懷園早起

主人枕上眠方起。百種禽聲入窗裏。西飛殘月東飛星。花香此時偏杳冥。平明略約誰同過。一隻鷺絲人一箇。千門萬戶交春風。日影已射金鋪東。

三月初四日驚聞舍弟南中之訃。因準古人期功之喪去官。例乞假南回書此志痛。卽留別京邸同人。往昔期功例去官。聞喪何忍更盤桓。斯人詎料中年隕。異事偏留老眼看。嘗學右軍先誓墓。欲同元伯一憑棺。鴿原已抱無窮感。況聽荒鷄感萬端。

廿年彈指別親闈。此日初衣願已違。敢謝入山成遠志。轉傷無母寄當歸。餐蟻縱後張長史。化鶴將隨丁令威。聞說草堂親購就。祇應分半貯斜暉。

西屋詩爲法式善祭酒賦

昨者法祭酒。索我西厓詩。西厓以人重。不在水一陂。寂寥今昔人。斷續往來水。流波照居人。前後差濟美。相公居前朝。文作一代雄。祭酒生盛世。詩有三唐風。遂令東逝波。疊鑑苦吟影。厓前通長河。厓後冠西嶺。昨聞西厓上。別立雙梧門。非云塔級高。藉表壇坫尊。六月紅荷花。清光徹天地。高低千坡陀。日有百遊騎。君餐層湖藕。我飯北江稻。西厓去人遠。疑在五雲表。流波日以深。積土日以高。他時西厓名。與嶽爭峩嶢。周孝廉邵蓮屬題羅山人聘所仿董北苑瀟湘卷子。

屢題瀟湘圖。一詣瀟湘境。瀟湘人不見。獨雁時相警。揭來得遇湘浦人。紙上瑟瑟秋將分。山樓幽風亭楚。

頌余在秋帆宮保節署八年其題北苑瀟湘圖時在秦中及題王蓬心太守仿本則在湖北今宮保已下世。回望瀟湘轉增慟。萬事尋思縱如夢。

瀕行詣韓城座師話別兼憶舊遊卽席賦呈一首。

汪于劉李汪明經焯于文學劉編修並蹉跎歲月真隨東逝波如許少年成老輩記曾賓坐縱狂歌

憂時早見扶鳩杖。賜第都堪設雀羅。與諸城相公隔巷清節亦同。差喜鄉關馳露布。元戎新已剪么磨。時姚之輔齊王氏皆在陝西授

### 洪懷園留別諸藩邸

草元亭外水粼粼。日晚軒車載酒頻。自覺漫郎饒意味。不妨要路絕依因。半春我約隨歸雁。一疏人傳批逆鱗。詎敢便尋忘世侶。報恩終擬剩閒身。



臨行張刺史鳳枝走送書此志別

蠻鄉血戰經三昔。慷慨故人多廟食。

謂軍門彭廷棟花連布諸人

南籠老守僅脫身。亦作西垂戍邊客。臨行握別淚不

流。荷校送我城南頭。東飛黃塵西掣電。不死他時會相見。

東方朔故里題壁

敢言竟比汲直。巧宦何如馬安。漢家自有法度。先生游戲無端。

抵兗州日適孫大星衍自濟寧回署即日邀遊南樓席上賦贈

東武城南古兗州。暫停歸騎一登樓。奔鯨駭浪方迷目。

時河決口未合

野鶴閒雲偶掉頭。林壑總留他日約。

時約遊濟

寧諸名勝以行促未果

神仙應妒此宵遊。試看百里賢人集。

時王石華張止原畢恬溪楊雲三王景桓劉震雲皆不期而集

會見祥光燭斗牛。

臨別戲贈孫大并索和章

時河臣以孫未諳河務奏離木任候補

少日齊名孫與洪。卽今相對儼衰翁。疏渠君苦桃花汛。蕩漿吾欣柳絮風。津吏幾時沉白馬。

時決口尚未合

詞臣

有客避青驄。

自余征邪教疏出每有京邸譏集居諫垣者必引避

十年共挂神仙籍。却外居然勝却中。

錢少詹大昕林屋夜遊圖

我携鐵杖遊林屋。此事如今及卅春。蝙蝠竅中時見日。蛟龍堆裏不逢人。竹籠貯火驚穿穴。石墨留名記

隔塵。便欲辦錢三百兩。徑從山脅上昆侖。

萬頃湖環三大州。飄然一葉忽西浮。要尋委宛奇書讀。真向嶙峋古洞遊。百里未妨通地肺。一拳先欲壓人頭。先生何事臨厓返。卻惹靈威笑不休。時同人皆至。隔凡惟先生以足力不及中止。

靈巖謁畢尙書師墓

墓即水木明瑟園

奇勳久勒凌煙閣。遺愛猶留墮淚碑。公與古人爭不朽。我思前事感無涯。篋中章奏千篇富。屋後峯巒百尺垂。便擬一年來一度。野花村酒奠江湄。

虎丘謁白公祠卽呈同年任太守兆炯

祠卽太守所建

大歷才人剩此翁。百篇稍已變唐風。因思白傅談詩好。雅與生公說法同。言外自然參妙悟。箇中兼可喻童蒙。西昆詞格西江派。只惜彫鐫語太工。

同攀仙桂無多日。得蔭甘棠已十年。差喜故人皆守郡。時魏君成憲亦擢守揚州。可容傲吏早歸田。租船卽繫祠邊樹。

築屋都模池上篇。何止政清詞筆麗。望君心跡繼前賢。

上海樞署與李兵備廷敬夜話卽席賦贈

八載重來訪素知。訝公頭白我添絲。樽前萬里投荒客。時牛太守稔文在坐。卽當赴雲南激江任。篋底千篇寓興詩。激電入樓飛一瞬。怪風吹海立多時。更闌急遞書何數。只覺樓船出浦遲。時崇明狼山二鎮會勘洋匪久未出海。

偕牛太守稔文范孝廉□至砲臺望海

澗江太守老能奇。邀我同來陟翠微。人與魚龍爭奮迅。帆從鷗鷺各紛飛。天光澄碧遮眉宇。海色青紅上袂衣。便欲乘風向東去。空濛一點著魚磯。

將發上海寄王博士芑孫

我乘松江潮。欲泊松江郭。帶人連日酒。酒醒潮已落。仙人海上忽見招。要看六月飛寒濤。搜巖剔壑匪無事。窟穴恐有潛蛟逃。時正搜捕洋匪聞中賓從閒臺榭。難得羣公政多暇。李兵備連日邀客遊吳淞砲臺及葉氏園溪南笑指白雲生。

別有故人廬此下。

砲臺觀海歌

平生頗耽奇。欲出天地間。飛行忽履北閣巔。下已無地高惟天。目光遙遙百餘里。直送青天入波底。天波合處界盡明。一縷黃霧分空青。漫天重疊魚龍色。夕照沉沉不能赤。驚雷出海聲已收。似怯惡浪先回頭。忽然激電來如箭。一點微茫著洋面。海中黑子人盡驚。十萬煙火崇明城。更從此外尋源委。上已無天下無水。冥然孤坐閣上頭。靜攝耳目從天遊。鷺絲窺客久不去。或者疑我同眠鷗。客行將歸客不樂。自覺身心杳無托。回瀾萬里生遠風。一笠飛從海中落。

李兵備邀集葉氏園小集待客久不至贈楚僧鐵舟

一千章木生回風。邀我早集斯亭中。客來不來勞久待。閣外飛樓有僧在。我不待客先揖僧。僧握客臂從

東升僧言與客成三友。身外一琴年代久。橫琴在膝欲摘絃。忽有鼓吹來門前。

吳淞江道中雜詩

前山已挂龍。咫尺雨當到。危橋面西北。曲處可停棹。長年知燥濕。語每得其要。驚雷衝小暑。所慮伏秋潦。樵人驅牛羊。亦下山北道。

所居雲水鄉。鷗鷺共生長。全家生計足。一屋一魚網。門前雖有路。屋後別通舫。還因粗識字。不斷客來往。日昨雨沒竿。池寬鴨堪養。

海居壓海鮮。日日市江鱖。江魚餐亦厭。復把野蔬擷。商量釀村酒。知近插秧月。日午餉北田。雷喧雨飄忽。村女花滿頭。因之感時節。

一村據高阜。去海不千步。兒童忽驚傳。龍蟠廟中樹。遂令羊與犬。奔走出門戶。莓苔蒙塑像。久已斷香炷。日晚吹北風。前溪雨如注。

曲處排石林。欲把海潮捍。地形西漸下。人盡住東岸。西溪形製好。曲折啓山館。漁人網魚至。各各出門喚。再轉忽已迷。坡陀樹遮斷。

生死不相遠。十屋間一墳。街衢與巨隴。吟域無由分。連廬爨煙稀。燐火飛出門。客行阻風潮。繫艇枯樹根。牛亭月白時。鬼語時時聞。

感舊

往事只如昨。回頭已卅年。瑣窗曾瞰客。白髮遽垂肩。薜月冷無恙。花溪清可憐。傷心石橋立。南北數人煙。

九峯園感舊

一雨園林足。泉聲百道來。夕陽明蟬竦。高閣暗莓苔。燕繞橫塘楫。魚窺曲水杯。古藤應識我。親見五回開。

慧山酌第二泉

自來茲泉側。水厄乃不避。竹爐煎松明。靜聽蟹眼沸。一碗至百碗。走卒苦急遞。清涼生齒頰。兼復沁心肺。童奴皆竊笑。已破往時例。先生語童奴。汝太不解意。我重在山泉。兼之故鄉味。神清不思睡。偃仰借初地。村居卽事。

對面魚梭擲。回頭鵲羽驚。貪看過橋影。錯應隔牆聲。徑小穿林入。村斜割澗成。乍涼思午睡。隨意拂桃笙。

跋陳方伯奉茲敦拙堂詩後

杜陵叟作前輩。栗里翁真替人。我從東浦酌蠡。不向西江問津。門前彭蠡九派。屋後匡廬數峯。先生擲筆而起。章水貢水朝宗。累我長吟短諷。知君後樂先憂。所爲五字七字。不減嘉州道州。力厚欲蟠崧華。氣奇直薄星辰。眼空前古後古。膽破千人萬人。

後湖觀打魚歌

橫街一雨水急流。擔夫爭道趨湖頭。漁人挾具來尤早。背上一舟蓮葉小。舟輕入水若蹈空。一一漾出波心中。大魚蹴浪高于屋。尾急觸舟舟欲覆。一舟一槳去不停。倏爾舟散如浮萍。魚多網重收難住。突有一魚飛上樹。風聲離離水聲怒。半空鳥與魚爭路。跳波不已復擲波。來往倏忽疑穿梭。忽然脫網逃偏急。水面居然學人立。須臾風急帆亦收。千頭百頭齊入舟。鳴榔港口聲何數。泊岸舟多水先濁。舟人停舟魚赴壑。我縱非魚識魚樂。

晚靜閣聽山僧鏡澄彈琴

冥冥復濛濛。簾外雨絲小。移來烏木几。屈作琴牀好。先有剪刀聲。枯僧削長爪。一松覆一庭。空外怒濤集。寥寥琴韻起。松響時參入。風遞三兩聲。禽驚出巢立。

快園雅集

雨餘蠟屐集南城。竹樹蕭疎古意生。一徑野雲疑鶴影。半廊人語雜蟲聲。間中花氣穿簾入。坐上詩篇刻燭成。莫怪比來歡讌數。承明容易得歸耕。

水閣

秦淮一雨水初通。昨日江湖到關東。妾自拜星魚拜浪。夜涼同宿電光中。

白秋海棠

牆角離離殿衆芳。空濛影不上斜陽。孤花忘到色香味。一洗俗名稱斷腸。

題金文學捧閭客窗續筆後

蹤迹山巔及水涯。齊梁久客不思家。移居誰似先生便。頰上時懸鬼一車。  
正是華年賦壯遊。靈奇都藉筆端收。小閒欲乞談天口。海外重繙大九州。  
瓠巴鼓瑟伯牙琴。弦外泠泠得賞音。不譜談奇譜淳行。就中尤識掾時心。  
屋後回環西小湖。談空時覓北街屠。謂屠刺史紳時亦著瑣姑雜記等書比鄰各逞如椽筆。爭作人間鬼董狐。  
涉上相逢眼乍青。白門仍約共揚舲。空江夜靜煩揮塵。要使魚龍出水聽。

桃花洲歌贈王文學豫

北江入海我所家。從岸北望迷津涯。焦山金山兩回抱。中有百里洲欹斜。南阡北阡路不賒。天遠水遠雲難遮。平明日射三山脚。突出一洲如木杓。樓臺空濛樹依約。樓中居人益纖削。恍似連林鳥巢着。春江綠淨磨青銅。黃鶴九子排屏風。桃花開時天地紅。桃花魚漾波玲瓏。下視十里黃花叢。其外綠柳煙濛濛。花朵盡處雲光濃。京江西北瓜步東。奇氣不盡歸魚龍。乃有逸士生其中。春來放棹春江側。載酒兩頭隨所適。看海看山兼看客。船屋奚童飭吹笛。船後箏琶亦時摘。江神江神本相識。爲我春江展如席。

小西湖雅集

舫屋三兩間。門外立一塔。天風檜上來。泠泠語相荅。案頭青綠堆浮屠。脚下十頃環靈湖。靈湖盡處大魚集。一一網出供山廚。眼前百輩奇人集。海外羈孤亦闌入。歸塗星黑雨欲來。空裏塔光飛九級。時座中有安南國遣

人成

八月初七日秦司業承業招同座師劉少宰暨戴學使均元張侍講燾茅學士元銘李兵備廷敬許太守兆椿集隱仙菴看桂并聽王樸山道士彈琴丙夜乃返

平明欲出門。一巷忽飛雨。前行及山店。雲白穿縷縷。衫裳半日嵐氣濃。不覺已入雲當中。雲中道士爭相揖。天半一亭如斗笠。秋林蕭蕭冠蓋集。林外馬蹄盤百級。樓臺既參差。老桂復兩三。前身金粟本不凡。逸榦四出陵松杉。花梢椽椽度遠帆。花底客並能清談。側聞千年枝。化作兩童子。倏忽十數年。此生彼卽死。爲花爲人偶然耳。游戲人間乃如此。天風吹客不得休。忽然招我百尺之飛樓。樓房盡處繙書坐。宿露時從竹梢墮。瓊臺貝闕驚早寒。琴韻雜雨來無端。一聲遲回一聲疾。百鳥飛集紅闌干。紅闌干外零星地。認是臨春兼結綺。五條弦上六朝山。一夕分明感秋氣。天低月黑江怒潮。過嶺艸木聲蕭蕭。琴彈一曲續一曲。坐使江月復白江天高。樸山道士翻新譜。能令人歡令人苦。我願頑仙住世間。眼空不復知今古。琴聲欲畢滿進觴。琴韻復入杯中涼。鳴蛩百種陡然絕。飛雨瑟瑟鳴空廊。三更歸路誰能見。下嶺水波明一綫。



衝泥正欲尋冶城。如雨秋螢撲人面。

蔡明經元春天花亂落長卷

我從皇初平。曾詣蔡經宅。麻姑長爪亦出迎。啖以松花及桃實。翩然一別三十年。此老白髮都垂肩。半時挈我堂北語。苦詢雲中舊時侶。雲中舊侶散八州。時間楊蓉裳孫淵如近狀宦海出沒歸無舟。洪厓仙人格較優。許脫

手板東南遊。坐君天花齋。臥看天花落。踟躕對影兩不俗。門內一翁門外鶴。

蠓磯夫人像爲方廉使昂賦

廟門斜對石磯開。一日靈潮兩度來。好屬錦鱗三十六。劉郎浦口寄書回。識力居然軼輩羣。卷中依約說三分。二喬莫更誇夫婿。天下英雄只使君。一舸翩翩下武昌。歸寧以後史難詳。惠陵松栢如南指。尙認江東作塔鄉。越羅猶認嫁時衣。花艸吳宮事已非。只有杜鵑啼血夜。江聲如哭撼危磯。吳頭楚尾路迢迢。家國多年恨未銷。咫尺望夫山上石。一般心事付江潮。一賦驚鴻謗議騰。寓言詞客本難憑。洛川終古留遺恨。不及江波徹底澄。

蔣上舍徵蔚雨窗讀史圖

三百六十日。日日可讀書。晴日客苦多。不若雨斷途。堂東堂西檐漏徹。堂裏讀書盈一尺。朝研羣經莫諸

子其外六時皆讀史。先生用目不用耳。一目驚看十行駛。客來百喚百不應。靜裏目光時透紙。驚雷掃戶雨瀉盆。何法可使先生聞。先生此時只閉門。但怪昏黑無朝暉。我今用耳不能目。目力雖衰尙耽讀。買山何不與君鄰。君日讀書吾耳熟。

友人屬題春山覓句圖

借得仙人屨。轆轤不知曾徧九州無。我慙結習除難盡。一岳遊成繪一圖。疊嶂連峯春到遲。江南山淺好尋詩。野猿相見不相識。跳上月明松樹枝。

初九日侵曉至攝山待劉少宰座師李兵備同年共遊竄高峯及紫峯谷白鹿泉諸勝竟日乃返

別山二十年。夢寐松色古。松濤已出關。迎人至江潞。江雲欲上山。雲下紅紫壁。間相激射。泠泠清梵雲中出。五色樓臺不知夜。藍輿過嶺夢始醒。海日甫上天。鷄鳴山僧揖我樓前坐。無數馬嘶知客過。齋堂小憩路轉東。鶴蓋共歷高高峯。背峯乃識峯奇狀。百轉千回不容上。齋心既久身世空。峯頂飯罷聞疎鐘。綠雲庵。紫峯谷。一石一雲看不足。桃花澗。白鹿泉。一僧一客來偶然。謂許封君兆桂及僧默庵秋風吹山秋氣深。座上別念時時侵。東南良會有如此。屈指何日重幽尋。醉中飛觴益何急。怪石扶人向空立。出山南北不復知。松下頽然一長揖。

八月十五日晚聯舫邀方上舍正澍儲廣文潤書汪文學文錦暨諸名士至青溪泛月遂暢飲達旦醉中

作

隔岸先有月。隔舫先招呼。樓頭一燈淡。欲無月裏啼。殺城頭鳥。欲浮秦。淮潮雙鯉告潮歇。城烏約客東北行。去弄青溪古時月。一船送酒一舫迎。約客未至杯先傾。前舟阻淺勅勿停。抗手菱葦叢中行。橋高百尺樓千丈。紅袖居然出天上。三更已盡復四更。天上人聲雜鷄唱。水色飛上檻。月采飛上梁。平堤南北亘無極。水月盡處交天光。荒荒城南隅。柝聲知欲盡。月照小姑祠。團團尙如鏡。我今欲問城上烏。青溪小姑汝識乎。六朝人物本如海。可有一客狂如吾。涼風吹水水拂衣。雙槳始復分頭飛。陸行爭輿水爭渡。送客未完天已曙。

廿九日邀同人至陳渡艸堂小集

陸行四里餘。水行乃三倍。登樓望江城。正與郭門背。西蠡河外通西瀉。引水入橋高數尺。秋林八月山果紅。山鳥啄墮溪流中。風吹欲出橋門鎖。鳥口啄殘魚腹果。園扉陰陰當晝開。主人不約客亦來。君不見滿堂花香客酩酊。網得一魚長似艇。

冒雨至錫山作

冥濛竹樹交成片。炊煙和雲不能辨。溪光淨處豁一橋。泉水下注聲如簫。山腰一抹人家少。山不能深徑偏杳。擡頭正喜山果肥。已有黃葉林間飛。

阮大令升基約遊陽羨山水先寄一首

五岳尋都徧。鄉山獨未遊。偶逢賢令尹。約共小句留。天外峯初現。雲邊翠欲收。年豐萬民樂。冠蓋亦探幽。

龍池寺

蒼蒼山已深。古木復回互。冥濛松樹杪。一綫日華吐。嶙峋盤百級。石碎馬蹄怒。危瞻斜壁外。飛瀑影微露。蓬蒿深十尺。已斷采樵路。雲光偶然開。石屋突無數。廚煙生胯下。岸仄窞回步。枯僧迎客遠。約共石梁渡。東西排梵籥。丹白別經注。盥手禮法壇。山精瞰庭戶。

善權洞

靈奇信無端。顯晦各一窟。高征摩蝠竅。俯視入蟲穴。攀枝禽共迅。履險螻同屈。峯峯環如螺。歷歷墮若蟄。樽壘亦奇古。甕盎別凹凸。危橋中偶斷。巨釜下先缺。導騎忽失聲。行童屢迷轍。微明空際下。怪響壁中出。石牀延客坐。了了察顛末。半响出石樓。松梢已新月。

善權寺訪祝英臺讀書處及三生堂故址

百折溪流斷。藍輿束急裝。碧山迎客遠。紅樹導人忙。道是侵官柳。臺荒倚女桑。三生益何渺。茶話此閒堂。

偶成

一度相思一舉杯。昨宵書到手難開。彎彎竹徑濛濛月。記得人來夢亦來。

偶向山中度歲華。浹旬春事已如麻。世情怪底闌珊甚。又報東風嫁杏花。  
初八日斷橋晚步

閒從獨鶴行。偶與孤僧遇。落葉忽驚飛。衝人入林去。  
南高峯上月。徐度北高峯。坐使全湖綠。都飛匣鏡中。

偶成

纔飲湖頭酒百杯。笳聲已向堞樓催。船船都載夕陽去。卻讓後湖新月來。  
與陸七嵇三游湖卽送入城

諸公虎嘯我龍蹲。踏遍松杉竹柏根。但祈兩日作一日。不放夕陽紅對門。  
城門不夜已吹笳。陸七嵇三盞到家。誰共湖頭飲春酒。德生菴裏華秋槎。

湖上作

朝看湖上山。一一雲中出。莫看湖上山。一一煙中沒。雲煙出沒不可常。雨後滿郭生青光。離離雲動山疑活。城縱界山山勢越。山腰樓閣一萬家。天半炊火紅如霞。山中望湖頭。一水明于鏡。紅樹千條罩鏡中。寥寥更落招提磬。窮冬十日湖上居。日飲湖水烹湖魚。人說客貌清而腴。客行時醉還時醒。卻愛看山復酩酊。城扉闔處興轉孤。飛出一城燈火影。

莫歸

湖頭淺醉歸來日。竹裏軒窗自在眠。不怕幽人夢難醒。夕陽紅到枕函邊。

余內直日與胡總憲高望直廬咫尺。總憲沒及半年。適余假歸。以事至武陵。與總憲遺榷同日抵湖上。厝屋又甚逼近。不勝存沒。今昔之感。爰賦一詩。哭之。卽寄謝方伯啓昆。馮鴻臚應榴。二君皆總憲同年生也。彈指人生。歲月遷。感公歸骨我歸田。并無華屋棲恆榦。自有清名過昔賢。魂魄詎應淪九地。班聯曾共直三天。何因丹旆飄搖日。又結居鄰水榭邊。時以無居第櫺厝湖上

龍井小憩

山已深。百折水亦曲。百回怪哉茲山巔。石如飛來石腹中。偶虛欹斜寺門開。憇我雲中亭。悍石立萬堆。側坐不敢安。石恐頭上頽。所幸機事忘。魚鳥不我猜。深山十月中。香已逗古梅。冥坐歷片時。泉聲殷如雷。  
靈隱山房浴

雲林信幽奇。古木互盤曲。到門途逼仄。忽復展地軸。嶙峋非意想。一石戴一屋。山僧穿飛廊。迅疾乃逾鹿。山房留客夢。山寺招客浴。詎止清我心。兼堪濯雙足。窮冬天地閉。水尙作春綠。浴罷望始驚。危樓挂深谷。  
蘇文忠公祠二首。卽呈秦同年瀛。詞卽秦所創

長篇千首恨雷同。近時學公詩者極多。不無流弊。不敢師公祇慕公。略有瓣香歸栗里。久因奇節說文忠。祠前蘋藻三時

潔屋外梅花一頃紅。擬作蜀遊仍未果。好移清夢入湖中。

只我重遊日。湖淤已歷時。倘尋良吏傳。并建白公祠。花發來時路。官饒去後思。他年商俎豆。到汝汝應知。

秦在浙中  
極有政聲

秦同年瀛觀察浙江重新淮海先生祠落成索賦

君子淮海稱初祖。我距忠宣亦末孫。各有祠堂留浙嶺。互將詩筆溯淵源。廿年何愧蘇持節。百首先嗤陳閉門。今日奠公吾自忝。掃廳擬更潔清尊。

春溪垂釣圖爲秦同年賦

好向波心築釣磯。溪風吹鬢水滌衣。不妨分作江湖夢。魚已忘機客息機。文書堆案鬢添絲。忙裏能閒樂不支。三兩桃花一雙燕。伴渠垂釣覺多時。春濃魚不厭波寒。清切真如鏡裏看。知否太湖三萬頃。得歸隨爾把魚竿。

五柳居食魚

夢憶湖頭雙鯉魚。十年重向此幽居。溪童拍手還相識。卻繞紅闌引客裾。文窗窈窕夕陽鮮。一樣湖光落榻前。添得柳絲長百尺。隨風與客拂吟肩。十一日待蔣大齊耀昆仲不至因買舟往御教場聖果寺

船船都不是。偏復到門前。別鼓尋幽艇。仍攜買酒錢。半湖搖落日。一棹破輕煙。到晚休相訪。山公醉欲眠。是日晚蔣裕之攜歌者相訪遂至湖心亭及蘇公祠痛飲醉中作

偶攜春酒至湖頭。難得春人鏡裏遊。半舫賓朋誰是主。一隄風月尙疑秋。禽魚雅識閑中趣。絲竹都飄水上樓。爛醉莫辭歸去晚。斷橋掃榻待淹留。

月夜自湧金門泛湖至漱石居

城頭吹角促客行。客醉尙戀茶香清。關門持鑰不敢下。一燈遙遙出門罅。舟斜欲趁北岸風。月影已落南高峯。高低出沒十餘里。水面飄忽南屏鐘。湖心跳浪聲何急。魚厭波寒出波立。三更歸路月已昏。剩得一星明斗笠。

壑菴訪破迷和尚不值題壁

壑菴一石寒一壑。桂子石邊無數落。菴有香桂數株種絕奇我餐松子石上眠。初日正墮山窗前。山窗四面黏吟句。

挂壁木魚搖不住。松花飯熟僧不歸。聞說南屏訪師去。

十三夜自花神廟夜歸

南屏鐘未歇。且復小遲留。月黑花王殿。春生酒嫗樓。朗吟驚宿鳥。緩步逐眠鷗。忽有千燈出。冥濛水盡頭。鳳皇山頂望江海及裏外湖作



湖水綠。江波黃。海氣五色浮空蒼。山形抱湖江抱山。大海東北仍回環。峯形南走連閩廣。百轉千回勢蒼澗。回頭一望歎絕奇。十萬煙火山城低。南峯雄奇北峯峭。中有孤峯復回抱。茅菴煮茗歷少時。海口潮上聲如馳。閒穿石罅玲瓏走。一半磨厓大如斗。前吳越。後建炎。王氣落落東南延。祇憐老樹心空早。欲問前朝竟誰曉。湖風吹客下頂峯。峯面尙挂斜陽紅。君不見。南遷怪底營作宮。上有十二巫山峯。山頂有巨石十二大皆數

十圍吳越時呼爲排術石卽此

長至日攜酒至葛嶺訪初陽臺半閑堂故址

昨訪閩古泉。今來半閑堂。小朝廷事碎如火。蘚石剝落誰能詳。初陽臺上初陽出。可惜蓬蒿沒山骨。仙翁祠屋亦已歛。鼯鼠都從石龕穴。神仙畢竟不可爲。化鶴或恐仍歸來。試問葛稚川。何似丁令威。荒荒昔人臺。落落今日酒。城中招客不得閒。地下寥寥呼死友。

由華津洞登蓮花峯

直石立作龕。橫石臥作廟。尤奇穿石樹。宛與石形肖。巉巖理斜出。阻客入深奧。彈碁形略具。伊昔誰所造。擾擾此暫停。茫茫發孤嘯。陰厓落蟲篆。絕壁出鳥道。擡頭礙峯頂。側足限石竅。寧知雲路滑。欲下心尙掉。齋心無妄念。平地冀可到。洗眼看北山。參差入斜照。

由鳳皇山半至勝果寺復從寺後尋石門及仙姑洞郭公泉升天梯諸勝

幽人欲移筇。石石先下嶺。前行三兩客。一一如墮窅。峯奇非意想。欲去屢延頸。玲瓏穿石罅。時漏夕陽影。飛樓當山腰。屋古極修整。升臺雖百級。坐處尙如井。搜奇興尤劇。屋後豁異境。雙扉斗然落。一水過清冷。迤西峯難選。欲往迫短景。空處忽有梯。延緣望山頂。

月夜從六橋歸

欲訪漁師舊釣磯。鐘聲沉水月光微。六橋行遍無人跡。楊柳居然挽客衣。

雲棲寺望五雲山并訪蓮池大師塔院

到來一谷雲。空白濕朝露。披雲尋絕磴。生翠落無數。濛濛萬竿竹。中有接天路。谷禽飛不透。怒欲攬雲住。巒岿正迷目。塔院忽回步。緇流吾豈識。重此本儒素。遺規尙堪仰。百代守其故。引泉來山門。飛雨屋上注。齋廚隨粥飯。不更闢堂戶。衆生皆簡默。勞客久延佇。清磬出石房。悠然發靈悟。

向晚由徐家村至理安寺

理安萬株松。雲棲萬竿竹。理安較雲棲。山徑益深複。高低萬綠冥。濛濛聚攔住。夕陽飛不去。歸鴉招客入。一林山鳥噴人復。相拒千回百折上石臺。嵐翠膩屋扉難開。山僧總覺眉宇綠。古佛亦臥青莓苔。陡然一片山風惡。綴壁萬松搖欲落。厓危石峭路亦窮。松頂偶看支一闌。林梢一抹野火然。手拾松子煎山泉。紅查花開臘梅破。繞屋異香延客坐。

下石屋嶺徧遊石屋水樂諸洞

風聲遞水聲。松影接天影。千盤青雲梯。百折白石嶺。孤禽前若導。嘶馬後如警。危驚天半石。截若水中艇。東西列尊壘。高下別畦町。莊嚴三百輩。欄袂悉修整。恍疑泛滄溟。一一咸引領。潏然水聲出。古樂誰更省。齋心讀銅篆。洗眼摩石鼎。欲發僧苦留。遲歸僕頻請。

表忠觀拜錢武肅王像

不爲東帝只稱臣。江左眞王僅此人。故里錦衣殊赫奕。中原棋局太紛綸。州排十四疑無敵。弩射三千若有神。依舊吳宮好花月。遺民從未識煙塵。躍馬提戈海上回。儒風早喜被江陔。年名不改唐天祐。國士能容羅秀才。使宅例皆除艸創。陌頭歌已報花開。門材百世猶全盛。時有文孫握節來。

靈巖山重展畢尙書墓感賦

江左方傳箭。天南佇洗兵。

時聞川  
陔捷音

更馳新露布。無復舊書生。

公屢欲遂  
初不果

巖巒氣未平。松杉識

人意。都作怒濤聲。

石湖戈氏園訪戈上舍襄復不值

一程趨水國。百折走巖扃。欲雪地先白。過雲峯轉青。怪禽摩絕壁。老鶴啄空汀。訪客仍難遇。空題石上銘。

小除日城東晚步

百事拋殘歲欲終。得閑聊復步城東。念沉清磬一聲外。影入歸鴉萬點中。疊港乍添新雨綠。小樓斜帶夕陽紅。道人正把雙扉關。知要堂西訪寓公。

崑山道中阻雨

時吳門友人  
已有書相促

野禽飛不透。雲氣十分濃。夕照昏如此。前山路復重。遠煩馳越使。昨已發吳淞。到恐難拘日。遙槭莫早封。

臘月二十九日澹香斜月西堂告成招陸秀才繼輅等及兒子祭詩

年除百事費支持。檢點閒情付酒卮。卻約比鄰三陸到。掃廳同與祭新詩。瓣香同奉此清才。百樣春醪百種杯。要與先生洗寒瘦。迎神歌裏報花開。



卷施閣詩卷第二十

單車北上集己未

初九日楓橋訪袁上舍廷禱

挂帆東南行。百里祇瞬息。非徒訪疎梅。兼詣幽人宅。幽人宅。傍寒山住。臘雪在門曾一顧。三條水澗今復通。依約門前繫舟樹。洞庭山人約客遊。鼓浪擬到湖東頭。吳船屈指須三宿。好插疎梅滿船屋。三鼓自木瀆放舟至胥口。

濃濛露未收。黯黯月方墮。三更欲渡湖。先此理征柂。幽人眠正熟。估客浪先破。微茫接天水。歷落綴星顆。感此一葉微。驚濤屢掀簸。披衣看曙色。早向柁樓坐。穿黑旅雁飛。聲從半空過。自胥口渡湖。

看山三十年。甫欲遂初服。閒居又經歲。人事苦拘束。竭來湖東頭。藉洗塵百斛。伸眉視初日。紅展鏡中綠。湖寬三萬頃。差足養心目。潛鱗方俯視。飛鳥忽高矚。物物各有天。忻忻遂其欲。空明無障礙。高下不局促。我亦心志怡。終朝坐船屋。何來南下客。苦欲附童僕。中坐忽告言。西南尙蠻觸。湖心遇風。

偶向篷窗臥。誰傳風色顛。情懷消短夢。身命付長年。浪已高千尺。衣纔濕半邊。奚童休股栗。險未及從前。  
謂癸巳十月

將至東山作

沿山半日行。欣此巖壑美。微覺風北來。千帆皆貼水。濛濛鷗鷺影。一半出蘆葦。亦有蚱蜢舟。船沿坐烏鬼。篷窗展衾枕。客倦臥移晷。神澹夢亦清。經時絕塵累。

暫憇東山麓

一塔高千丈。魚龍氣尙浮。灑空松柏暗。陟險鬼神愁。古佛依人臥。馴禽導客遊。面西窗莫啓。兀自濺驚流。  
翠微禪院

東山白雲起。欲與西山接。寧知飛鳥路。亦向浮雲貼。蒼蒼幾重岡。一寺出山脅。登樓半無見。蔽此松柏葉。軒窗何玲瓏。橘柚貯重疊。回廊斜北啓。庶足展眉睫。穿牖出一燈。枯僧理經笈。

客夏孫總戎廷璧約遊東山以事未果新正八日訪梅鄧尉因便詣衙齋值他出不遇兩公子留住信宿意甚勤摯爰留別二首并呈總戎

爲有將軍約。來隨估客槎。半帆懸雪月。百里走風沙。公子欣除舍。疎梅正作花。夜闌銀燭裏。留與鬥新茶。  
憶昨吳淞浦。樓船出海遲。枕戈時待旦。橫槩偶題詩。豈意萑苻澤。頻煩組練師。報恩知有在。莫惜鬢如絲。

同孫公子錦暨令弟鑲至翠峯枕流閣訪梅

昨留漱石居

客冬寓西湖漱石居半月

今訪枕流閣。川程逾十驛。勝地乃交錯。青松千丈接水隈。十步五步梅花開。僧

房盡處一株好。榦古錯落青莓苔。山凹石屋何鱗次。五騎如龍後先至。門開正值東北風。笑語吹入雲當中。客倦倚石牀。馬亦繫天井。一亭稜稜據山頂。主人敲詩僕烹茗。窗隙太湖三萬頃。

卽席贈程司理師樂

清絕程司理。官貧日課詩。心香原有屬。手板不曾持。肯作通方吏。寧爲多士師。時以課徒自給梅花三百首。風味耐尋思。

鄭司馬時泰招飲賦贈一首

剖符殊不俗。分領此山中。屬吏如梅福。

謂程司理

通家得孔融。

孫總戎父子

快談當世事。饒有古人風。臨別仍相約。

同來訪石公

約夏半遊西山

渡湖與鈕布衣樹玉同舟。因出其所著說文新附考見示賦贈一首。卽束錢少詹大昕王給事念孫段明府若膺孫兵備星衍

東山三萬戶。僅止一儒者。童年耽竹素。暇復討蒼疋。說文五百部。寢食不暫捨。蠅頭排細字。時把心得寫。茅檐兩三層。住乃近橋社。家貧長物少。書反盈兩度。扁舟偶相訪。坐久燭屢灺。口陳六書失。如水向盆瀉。



維時四座客。耳口若聾啞。二徐生唐末。不甚曉通假。諧聲兼會意。一一多苟且。強編新附字。合者蓋已寡。惟生糾厥失。證以毛鄭馬。隋晉庶劉曹。唐疏陋孔賈。陵夷南北宋。棄置若土苴。長編侈稱引。又出張郭下。方今富儒術。小學亦妍雅。王錢暨孫段。見爾手定把。倚梳贈一篇。飄風忽飛瓦。

十三日鄧尉訪梅憶昔遊寄錢大令維喬蔣文學陳尊

昔遊錢蔣殊不閒。獨我近自山中還。連宵清夢屢飛越。聞說梅放西山灣。西山灣中萬樹花。古榦鬱勃枝交叉。山中猿鶴盡無恙。豈識世事紛如麻。艸元亭坵季重亡。謂楊比部夢符吳上舍正健天末回首思崔郎。景侃閒心

檢點壁間句。蝸篆剝蝕無偏旁。湖亭三面交遠風。香氣擾入湖光中。看花歲月苦難駐。花亦憔悴無歡容。君不見。看花背花立少時。別有會意誰能知。忽然大笑出山去。峯頂落落雲分馳。

光福鎮哭徐處士堅

魂歸萬樹梅花內。家在三更鶴唳中。我欲哭君無處所。半山殘月滿湖風。

過鄧尉感舊

首春來吳門。訪客入雲榭。相邀攜蠟屐。告我苦無暇。寧知人事改。歲月屢代謝。別來山中客。已葬山花下。摩挲墳上樹。一半梅枝亞。花光縱奇麗。未肯照長夜。念寂獨舉杯。初陽出林罅。

元墓小憩

穿林十里只一鞭。花影灑地松浮天。松濤覆屋客眠穩。夢覺香氣來無邊。波流到戶聲先約。花影入波魚  
誤囑。松間客倦欲少休。且汲寒泉澗木杓。

香雪海久坐

下方蠟屐聲何急。卻惹山禽出巢立。山禽欲下客徑登。相與斃此岡三層。風吹花氣入遠空。一半上接山  
雲紅。君不見。人間清福消未易。幸是玉皇香案吏。

北行

三月束裝歸。二月束裝發。出門才十稔。抵家無百日。昨爲弟喪歸。今爲國喪出。我勞何敢憚。我淚忽嗚咽。  
揮淚北向行。程程冒風雪。

已爲還山雲。復作出山水。看雲心尙戀。照水色增愧。親朋苦留餞。臨發期敢改。前行誰與共。一僕瘦如鬼。  
初日上蒜山。回頭望東海。

過沂水橋柬族孫楮二月十二日

沂河之水清且徐。先二十日來。緩除風光春半尙未足。鶯燕見客猶生疎。參差流水兼修竹。綠映橋南萬  
家屋。橫流昨歲喜乍平。數郡創痍漸將復。時以曹縣河決路人爲言太守賢。貪吏昨已褫歸田。君不見。吾  
宗兩守皆稱職。記否趙人思順德。君兄棧守順德有惠政

別敖陽鎮二日敖山尙可見因題壁

茲山雖一拳。青出天地外。連晨走三驛。路已及新泰。瞻山仍在目。風尙送清籟。迤南方數武。蒙嶺亘如帶。再轉望始迷。翻嫌去程快。

羊流店望岱

精誠與山通。百里覺迅速。夜半岱頂雲。飛來冒車屋。冥濛雲斂處。顧視炫心目。月出斗柄東。森然衆山綠。青松一千丈。霞采時斷續。想有飛仙人。排空走如鹿。

夜半忽大風雪驚雷徹曉

三更驚雷奔。忽復雪沒膝。神區信靈異。寒暑一夕出。狂飈來若怒。激電去如掣。稜稜檐瓦落。歷歷冰柱折。思沾山後酒。屢斷門外轍。遙程瞻尤驚。一白色突兀。

將至泰安于崔莊驛壁敬讀太上皇遺誥泣賦一首

平明欲出門。青氣已四布。崔莊行廿里。木末天始曙。驚傳上皇誥。涕泣滿行路。黃縑曳三丈。急遞頒鎮戍。山崩川復潰。此事關氣數。茲方當孔道。八見翠華駐。成功告天地。神亦被休祚。今來山色改。慘戚若蒙霧。時當春仲後。急雪匪無故。神人哀痛切。井邑先縞素。微臣等蟻蝨。夙昔感恩顧。俄焉驚遏密。旬日急奔赴。山靈鑒微誠。恍若導前步。百里行不休。橫流馬驚渡。

山雲

濛濛四山雲。欲出不敢出。回瞻岱宗上。白練飛一匹。一匹白練當空馳。四山出雲圍繞之。君不見。出山爲霖未可知。何日更是歸山時。

泰山道中五首

茲山巨東方。鬱勃截生氣。虛輪扇風海。空腹入天地。其高無端倪。一半植空際。滃滃雲出始。曩若絲髮細。俄焉分道騁。寰宇悉衣被。洪荒迨今日。年代渺誰記。登封壇數尺。藉以驗興替。允哉神明區。心精默相契。山人渡海來。告我山勢尊。波面日出時。與山相吐吞。遙看不知山。謂是天有根。峯稜破空垂。倒挂日月輪。青冥一氣中。高下固不分。伊誰啓鴻濛。當有主者存。雙厓劃然開。截作天東門。

一山戴一山。重戴至谷口。遵山視重戴。高僅及社首。方知衆高積。拔勢乃得陡。山坳環數郡。元氣蒸澤藪。中虛蘊靈寶。萬古誰敢剖。天閭雖已逼。地軸亦孔厚。七十二代君。貞符藏北斗。

山形非徒高。遠莫測所屆。滄溟三萬里。石脈透海外。當其勢奔騰。顯越齊魯界。低瞻饒岳瀆。並此析支派。巍巍兼蕩蕩。克配天體大。其標難正視。萬象怵光怪。支峯皆整肅。略不涉奇態。風遞滄海濤。山前作清瀨。三更望茲峯。月出石腹內。雲容方欲展。雷雨已在背。明明神所宅。乃復遭陰晦。冰柱十丈長。驚看石厓戴。居然神斧落。厓半亦奔潰。回矚搜激電。雪月光迸碎。遂令登陟客。倏忽迷向背。清遊雖暫阻。未敢遽思退。

終當攜松明。絕壁掃蕪穢。

雪霽

日昨大冰雪。地寒天宇陰。今晨已晴和。冰雪在我心。在地或可消。在心終不忘。庶幾炎暑時。胸次餘清涼。

二鼓抵鄭州故城宿南關

居人時向女墻耕。一片東風百艸生。忽地樓臺空裏現。三更月上鄭州城。重抵蘆溝橋有懷亡弟

橋下層冰積雪寒。春明重到感無端。白鬚老吏當車立。猶是歛歔說故官。

跋金文學學蓮悼亡詩冊後

春花紅。美人結屋花當中。秋艸碧。美人悽然立花側。花花艸艸無一年。含淚永訣梅枝前。梅枝陰陰滿天雪。豈止燕歸雛亦失。巢空難居。隻燕欲回。一日百匝。飛鳴徘徊。燕行思雛復思偶。況值主人亡未久。明朝雪霽花欲開。忍覩新燕巢中來。

蘆溝折柳圖送金文學至大梁

東西南北人。皆向長安走。蘆溝橋上往復來。便折橋頭一枝柳。蘆溝橋柳年年禿。折盡柔條剩枯木。幽燕客罷客大梁。楊柳作絮飛何忙。莫作道旁枝。莫作道旁客。道旁枝。手易折。道旁客。頭易白。

萍梗篇爲友人作

不作天上星。乃爲地下萍。星宿有定位。萍梗流無停。一風吹從西。一風吹從東。萍面作艸綠。萍背疑花紅。紅旣不如花。綠亦不若艸。我送浮萍歸。頗思故鄉好。

哭任軍門承恩

槐里朱雲本最狂。藉公時復語通方。同遊愛詠新題句。分道爲收舊奏章。子去歲大考後。卽以弟喪乞假。歸都下。盛傳子疏。競相傳寫。間有失眞者。公恐又成僞稿。死友誼真逾骨肉。殤兒疾已入膏肓。久卽瘞。以是疾益亟。唐塵何止時來唁。一事相思奠一觴。

法源寺看花卽送言八朝標至夔州任

卷施一谷中。花好無不有。主人緣獨慳。花發出門走。黃沙撲面三千里。待得看花已春尾。花前旣少雙鶻。鵠花下更有誰提壺。櫓聲啞啞花外斷。白日馬足塵模糊。花光何似江南好。花氣薰人亦難倒。君不見看花偏值別花辰。走馬從戎趁好春。會看白帝城頭立。卻笑黃金臺下人。

春盡日夢入卷施谷看花

窗前十餘株。窺牖復窺街。高低拂牀榻。紅紫疊壓夢。幽人眠正熟。壓夢識春重。伊誰伴清宗。新燕昨巢棟。波光猛飛越。春半已消凍。緣階栽綠竹。一碧欲無縫。奇書堆面面。正此酌春甕。一晌魂已飛。南鄰笛三弄。

題左大令輔葛嶺嵩廬圖

北江至西湖五百里而遠。一歲上冢忙。春分及秋晚。十年遠宦嗟何及。丙舍蒿先沒階級。魚殮麥飯遠莫將。反使孤兒抱圖泣。孤山葛嶺西南開。我昨詣君先冢來。摩挲松柏一回首。拜石爲洗青莓苔。虔心豈獨私吾友。雅聆南陵政聲久。君不見孤兒倘思親。欲親傳不朽。豐碑百尺亦何有。不若好官碑在口。

四月二日法祭酒式善邀同人至極樂寺小憩分韻得月字

我前遊莫釐。正值早春月。濤聲猶在耳。迫促詣京闕。凡花幾開謝。月祇兩圓缺。船頭經花朝。馬背閱佳節。我病何敢辭。我勞誰可述。風沙眯人目。紅紫色不別。雷車時聒耳。塵土鼻仍窒。蝸廬甫能定。春去已飄忽。花開思走避。俗恐矻肌骨。偶得學士棧。邀我敍契闊。賓朋集三五。飯罷強之出。前遊雖隔歲。門徑亦粗別。桃李七八叢。紛披倚禪窟。縱談當世事。喜罷或嗚噎。側聞秦隴蜀。兵苦不得歇。至尊憂黎元。御殿每日昃。時時思讜論。何異飢與渴。開誠布條教。欲使黎庶活。柰何諸大吏。敷告尙不實。民猶困科歛。吏不奉法律。文書巧相抵。百變難致詰。居然貪欺成。不復畏斧鑕。兩湖全陝地。事變可臚列。因循及弛廢。百事待剛決。倒懸誠已久。水火救宜切。我官非諫諍。詎敢肆筆舌。幸多同志友。肝膽素鬱勃。能言固堪貴。尤在通治術。敷陳政之要。置彼事纖屑。雖爭焚諫艸。道路有傳說。吾儕究多幸。貯見盪平日。花前時時來。一醉百憂豁。送同年祝兵備曾至陝西軍營卽題其山寺讀書卷子

男兒少日貧如此。四面亂山如破紙。仍無一屋可蓋頭。暫借僧房作棲止。僧房似寶排山麓。夜半雲奇欲穿屋。林空無人竄驚鹿。山鬼依微伴宵讀。扇門不出眼界空。意見不與時雷同。丈夫豈肯忘世事。四海九域環胸中。一朝山雲破空去。人亦公然得奇遇。山深幸喜住十年。不爾何來濟時具。君不見。殷深源。房次律。畢竟讀書無本末。君今上馬能殺賊。下馬檄書成頃刻。亦知平生饒素識。召對尤蒙賜顏色。散關襄峩去天尺。一賊不除歸不得。露布期君在朝夕。濟時已了倘欲還。仍作山中讀書客。

偶成二十首

我聞荀生言。善惡皆有性。忍于殺人者。乃反惜物命。此非性之真。轉展惑報應。仍緣薄滋味。可自託清淨。百僞寡一真。吾心湛明鏡。

我昨謁達官。先有後堂客。思陳天下事。四坐皆簡默。移牀前復卻。日影去階尺。寧惟言不省。反欲斥狂惑。

朔風吹橫門。檐瓦響歷歷。中有揮塵人。豐貂饒菜色。近時士大夫蔬食者十有六七

廣場三十頃。乃在池以南。近移居四華門外南池關帝廟自非土偶居。卽作木佛菴。土功何煌煌。香火積一龕。日與神鬼

居。禍福念不參。陰陽縱回翔。柰性所不諳。攤書梵篋旁。相與同沉酣。

一身雖不費。事有大于此。何因腎與哲。僅自計生死。端居勤學道。民物寧可恃。驅馬出北街。殷然念朝市。八紘誠已廣。所見乃尺咫。欲貢出位言。愁呼妄男子。



千金構亭臺。百金施繪采。天公矜物力。不使成遽毀。前門方逮訊。後戶已遷賄。複壁不匿人。惟應穴金在。主人雖已易。朱戶仍不改。春半燕子來。啁啾舊時壘。男兒不出門。出門路四岐。對面卽太行。途危不逶迤。裹糧思長征。白日忽已西。揮汗走不停。百里或庶幾。我寧遭豺狼。不逐狐與狸。

承平百餘載。風俗漸喜誇。物力苦不多。踵事而增華。我頃讀風詩。頗願刪木瓜。苞苴之所興。禮節日以奢。君子慎厥初。百事除萌芽。

遊魚性喜沉。林鳥性喜浮。人生居其中。渺不克自由。迴飈吹飛蓬。旋轉何日休。自非金石性。皆逐流波流。東海雖已廣。何能積沉憂。庶幾三神山。可與逸客遊。

人生一世間。駒隙影易度。飲食與衣服。詎云皆細故。所惜士大夫。視同經世務。不然營土木。樓閣極回互。平生名好客。惟見揖樓護。落落張伯松。望門先卻步。

束髮事結交。相知本難得。馳驅三十載。已寡素心客。稍能知大義。半死刀劍側。精魂歸大漠。時向夢中識。昨得插羽書。憂仍在西北。沉酣非我志。藉以遣晨夕。

縛茅作一亭。正面微向東。四壁盡斥除。依傍庶一空。侵晨卽披衣。陡覺曙色紅。社日旣已過。徧野饒春農。攜編省芸鋤。勤苦理則同。倦憩亭北隅。引領眺澤宮。他時開八窗。藉以通八風。

師臣者三王。友臣者五伯。逮茲秦漢後。視下比廝役。長孺前正論。天子輒變色。惜哉公孫宏。其性本便辟。庸儒司國柄。何事足裨益。田蚡暨衛霍。半又起外戚。當日嚴憚人。庶幾惟汲直。寒暑飲食中。所獲本微恙。忌醫兼諱疾。自恃一身壯。天時日乘除。精采忽不王。陰寒入筋絡。危至莫名狀。遂令皮毛疾。惡乃攻府臟。和緩失色啼。庸醫又何況。

孔明相巴蜀。貴在飭綱紀。斷獄斬幼常。時時面流涕。古來真將軍。親愛法不廢。所以百萬師。常若身使臂。桓桓司馬法。無事出奇計。恩多不能勸。用法乃始勵。莊賈後卽誅。庶乎知此意。

依艸而附木。自信不如此。平生戒受恩。盍自賢者始。伊余少連遭。本不盼榮仕。遭逢況逾格。業已被驅使。兼之凜慈訓。詎敢背尺咫。吹律暖不回。其人已心死。

平生何所慕。所慕在同調。三川恣沿洄。五岳寄歌嘯。青雲忽緣履。白日斜壓帽。側聞唐太尉。勳業繼周召。功雖積山阜。事往何足道。只惜平泉莊。生時不重到。

疾風走空谷。奔此霆與雷。鬱鬱松杉姿。高幹罔不摧。一朝營華居。悼歎無良材。良材本無多。大匠意不回。我欲從唐虞。先借臬與夔。開誠而布公。一世識所歸。君看參天枝。夫豈旦夕栽。

操持本不優。又欲守成例。遂令一世才。受制幾胥吏。危疑偶相值。苦乏經遠計。盈庭皆雷同。誰肯獨立異。雷同心始愜。獨立遭所忌。根矩兀傲人。英英動心氣。

鷹隼善搏物。尙懼鳳鳥嘯。豺狼欲噬人。道恐逢麒麟。今乃知不然。麟鳳性益馴。積骸雖如山。委以不見聞。轉于水火中。救此至不仁。或云西方法。祇乞見在身。羣生究何辜。冤痛杳莫伸。

少年頗耽奇。氣欲吞名山。有時驅樓船。入海不願還。倏忽三十年。塵土冒鬢顏。顯晦亦偶然。山水興未闌。著書高于身。準待同志刪。要皆真氣存。足訂懦與頑。興至欲舉盃。天風響禪關。

送陳太守熙藩至貴州卽寄馮侍郎光熊吳兵備超暨程太守國靈諸人

五年我已別南雲。又向金門見此君。幾許故人皆抗節。謂彭廷棟花連布兩軍門無多健吏亦從軍。張太守鳳枝近以事發新驛工

愁吳質官先罷。垂老馮唐力尙勤。珍重雪厓亭畔月。好封書札慰離羣。

爲法祭酒式善題漢晉人畫象

東國奇男子。重瞳是故人。偶然敬一足。天上動星辰。

右嚴子陵

百千儔類中。乞食亦一等。我欲拜督郵。琴心先不肯。

右陶淵明

書事

憶昨倉皇際。防生肘腋憂。何嘗動聲色。先已決機謀。訊鞫歸藩邸。傳呼出殿頭。縞冠纔幾日。褫服作纍囚。

斂怨知何似。茫茫八極中。干戈兆秦楚。珠玉罄南東。逼迫歸邪教。搜求過正供。明明祖宗法。百計壞淳風。  
全家俱內侍。甥舅暨婚姻。推轂歸子季。分符引所親。病仍升鼎鼐。敗亦繪麒麟。日晚塵如織。高門接要津。  
尺五城南第。經時締構崇。閣摹元武闥。人出上陽宮。金屋參天半。銅山穴地中。是誰搜複壁。珍蓄頓教空。  
漢廷誰巧宦。賣友得呈身。不是懷中奏。難成坐上賓。商量最高秩。汲引幾私人。附傳他時好。崔倪倘後塵。  
怙寵真逾昔。辜恩遽若斯。小車穿殿過。隻騎繞廊馳。地密誰能舉。天高倘未知。監奴益無忌。通籍上軒墀。  
屈指承恩盼。南頭一侍郎。祇緣新歲近。催送侍姬忙。粉墨乖清議。銀黃奪舊章。浪傳收騎過。失足墮匡牀。  
火城三十步。煙燄欲薰天。故相揮門外。真王拜轎前。幾人容接膝。同列敢隨肩。一事尤奇絕。曾豪願執鞭。  
金字書恩地。由來在賜塵。憑人說鷄狗。堅自乞貂蟬。詞筆慙三榜。圖書冠一船。直廬清切處。莫謂少流傳。  
誰說台司重。真憐骨相輕。上公偏下視。直級亦斜行。偶舉遺忘事。時矜聰察名。猶應勝齊虜。五鼎食非烹。  
單車催上道。特敕不隨人。奏艸除元惡。爰書比叛臣。脅從先股栗。判吏乍眉伸。畢竟能行詐。題篇炫鬼神。  
賜盡圓扉日。無聊舉百觴。攀龍知已後。牽犬歎偏長。西市鳴鉦急。東原啓土忙。恨無朱椽在。親葬董雲陽。  
爲法祭酒題移竹圖

一竹綠一窗。十竹綠一牖。尋常百竿竹。能使雲水皺。雖然竹性北。不宜榦葉縱。具清蔥稀。先生愛竹識竹性。先引活水周堦畦。豈惟竹下流泉迸。竹裏白雲圍半頃。穿廊戛牖響不停。嫩綠都浮碧天影。廣文先生

首藉盤。京俸苦薄無餘餐。長飢婢僕尙林立。一一瘦若青琅玕。先生暇日緡僮約。婢未裹頭奴赤腳。擔土汲泉前復卻。一亭誅茅泉一勺。亭外更須營略約。一堵一兒顏戍削。喚取筵前侍杯酌。君不見。何時新筍出一林。我欲載酒來相尋。

哭管侍御世銘

半生每自誇龍尾。晚節憎人說鳳毛。獨有上書心事在。不教風節並錢曹。聞先生客秋欲上封事屬艸已定遽卒莊刺史所尙及見之錢

曹爲錢南園曹劍亭兩侍御

哭董太守思駒

玉杯珠柱書難著。鳳髓龍筋判獨傳。記得白雲溪水漲。凌晨送上潮江船。君回里中匝月由浙江水程赴潯州任到官甫七日而謝世

自勵

寧作不才木。不願爲桔槔。桔槔亦何辜。頰仰隨汝曹。杈枒適當時。旋轉如風濤。高原多低枝。感汝汲引勞。一朝時雨行。棄置眠蓬蒿。

寧作無知禽。不願爲反舌。衆鳥皆啁啾。反舌聲不出。豈繫果無聲。無乃事容悅。依依檐宇下。飲啄安且吉。何忍視蜀鵲。啼完口流血。

涼夜

艸蟲忽無聲。人倦鳴亦倦。疎螢夜不飛。悄立蒲葵扇。  
長廊不燒燈。夜久佇殘月。秋風幕地來。十二簾齊揭。  
三更涼意多。蒲葉響回波。斜界龍樓影。游魚不敢過。  
暑氣夜不收。移牀入林隙。帳頂明一星。森森知大白。

牧牛詞

門前黃牛老。牧兒甫襁褓。兒年四五卽飼牛。牛轉惜兒年過小。六七歲甫交。兒肩及牛腰。昨年上書兒八歲。兒足居然跨牛背。飼牛已了仍牧牛。牛知兒心喜出遊。登隴涉水無時休。半年送兒入村塾。半歲書從牛背讀。兒思阿耶牛憶犢。卻鼓長鞭入牛屋。牛背下來書爛熟。

種魚詞

祖遺十頃田。乃在城門邊。低窪不堪耕。卻引河水流濺濺。一船淤泥兩船重。肥土出魚何必種。南邊菰蒲北菱葑。更灑浮萍作魚俸。波面旣養鴨。波底復種螺。昨宵一雨通北河。隊鴨更挈成羣鵝。小時魚苗怕鵝鴨。魚大竟同鵝鴨狎。掉尾時時欲相壓。賣魚歲入得萬錢。不羨鄰舍耕原田。君不見。原田遭荒無六穀。豈若魚池歲常熟。

畜鴿詞

老翁誅茅作一堂。東西南北皆鴿房。老翁無妻有女郎。引鴿入室還穿廊。朝來糴得新春稻。鴿剩方令女郎飽。鴿欲出房先卻掃。老翁呼鴿皆以名。好在一一能承迎。翁倦鴿亦眠無聲。休嫌養鴿形神敝。與鴿居能助精氣。閒上翁衣立翁臂。君不見。老翁龍鍾女遠適。死仗鴿羣爲弔客。

養蠶詞

飼牛須小兒。飼蠶須小女。小女纔上頭。靈明已如許。堂中一筐復一筐。屋左屋右皆柔桑。挑桑作蠶衾。挑桑作蠶褥。蠶食蠶衣無不足。閒來習靜深閨裏。一種心情更堪喜。與蠶同眠復同起。蠶行作繭女嫁夫。裁繭作女身上襦。君不見。養蠶雖勞得蠶效。拜得馬頭娘上轎。

寄石太守韞玉

聞說東川守。騎驢過百城。書仍寄旁午。地未塞夷庚。啓事人先悚。君以川匪曲折作啓事致成親王王卽以上聞登壇衆盡驚。巴渝兵火地。何以慰疲氓。

雨歇

高下窗櫺竹柏生。南池雨歇近三更。夜涼殘月清無寐。聽到秋蟲第一聲。

卽事

攜尊訪幽客。三至不一遇。門前秋樹好。樹下石堪據。涼風西南來。竟爾挈衾具。近刪詩不作。頗復減思慮。

惟于人事外。時得少佳趣。白鳥笑客狂。翩翩入林去。  
朝陽出偏遲。昨夜路仍溼。車行三里外。已有暗香襲。幽人邀客住。一屋大如笠。平鋪波萬頃。高下見塔級。  
居然空色相。顧視尙難入。萬朵白藕花。鶯絲何處立。

讀書倦後偶題齋壁

蕭齋賃三間。長日渺何事。因無用世心。益堅傳世志。行裝本無幾。并疊陳篋笥。所居幸深遠。熱客無一至。  
中年驚已過。盍扣囊底智。不見七十翁。辭官課奇字。時正寄書錢少詹大听索所著聲類

遣興

千杯百杯皆已空。昨者醉夢殊怔忡。承天之高豈一柱。受地之命惟孤松。孤松流青柏流翠。冷眼看人百  
年內。當前何事尙營營。入後有人思潰潰。  
堅持一念皆可傳。瓦硯木榻驚齊穿。丈夫自信不役物。方寸以內嘗湛然。性靈自足供抒寫。美醜都看入  
陶冶。三千里外賦歸興。十九年來忘兀者。

後遊仙詩

地在天中見可眞。半從高處望紅塵。冥濛似蟻還如豆。都是三千世界人。  
誰打冷泠澗底鐘。月明人宿第三峯。朱符夜半催行雨。臥聽天龍喚地龍。



詔集周秦漢宋儒。寓言曲筆勅刪除。修成三十三天史。一字都無梵釋書。  
月午濤聲響怒雷。滄溟盡處覺屏開。誰憐天外花如海。只我騎鯨一再來。  
兩雨風風春事休。誰言上界總無愁。可憐清淺銀塘水。不穀天孫日飲牛。  
碧虛景色太蒼蒼。日月從無背面光。乞取火珠三百顆。凌晨先與挂明堂。  
爾許遊蹤向客誇。偶隨漢使泛星槎。九天九地行都徧。輸與仙人萼綠華。  
作賦何須定馬枚。偶披淹滯出塵埃。詞人下第文人老。流落都歸天上來。  
天田近亦種桑麻。略遣仙人識歲華。偷住碧虛三十載。日紅從不到窗紗。  
可是東皇意見殊。上方日日有遷除。神仙自恐無才思。偷讀人間未見書。  
清虛一別事茫然。消息誰從下界傳。聞說白榆天上樹。夜涼時亦噪秋蟬。  
呼吸疑通下界潮。天孫機畔水迢迢。月中仙桂如堪斫。先與裁成獨木橋。  
不用爐峯向上薰。四邊香氣自氤氳。生來著色屏風好。檢取嵩高岱頂雲。  
神仙多半是中年。白髮從無挂兩肩。更與種桃園裏異。天街行徧少廚煙。  
天河迢遞隔天關。露氣雲光日往還。不放雙魚住天上。怕傳消息到塵寰。  
踏得星光顆顆青。撥雲時坐白沙汀。天街一事偏惆悵。可惜從無疎雨聽。

獨構茅齋靜見聞。年來四氣總難分。偶扃北牖開南牖。已覺漫天盡火雲。  
百年一瞬夢何曾。超劫先居嶽上層。飛下九天三萬里。卻驚足底日華升。  
欲踏雲梯第一層。生驚石礎潤難登。冥濛下界三旬雨。引得靈河氣上蒸。  
雲生雲滅望初窮。知隔黃塵幾萬重。獨占一天誰與共。兩三蝙蝠數株松。  
閒來多是坐忘時。不讀丹經不賦詩。怪底東南雲似墨。書仙半日偶臨池。  
昨宵騎鶴下蓉城。一舉千杯醉未成。蒼狗白衣都不管。隨他足底亂雲生。  
要從天上捉迷藏。銀漢紅牆界畫方。粗服亂頭編一隊。董雙成與杜蘭香。  
誅茅都在白雲巔。學道心清自不眠。抽得地坪三四尺。倒呼明月到床前。  
白楊種不到天門。自詡飛仙萬劫存。要向天公破陳例。凌虛高築醉人墳。  
雲林一到一徘徊。選勝頻同逸客來。構得山亭要奇古。剝殘星斗種莓苔。  
天邊甲子記依稀。宵半晴光已四飛。齊向玉虛稱賀朔。曉霞紅作上朝衣。  
北出雲門磴數盤。天風時一凭闌干。因看太白峯頭雪。始識棧棧下界寒。  
東南一抹是揚州。天外山排十二樓。欲趁新涼看滄海。月高吹笛下雲頭。  
偶得東皇食料單。烹龍炁鳳亦全刪。清虛自有餐霞法。東海靈芝進一山。

玉軸牙籤散不收。偶逢閒日亦勾留。名心畢竟銷難盡。檢得奇書作枕頭。  
疎星三兩逗河津。新月如船欲載人。便擬裁帆向東去。麻姑傳說海揚塵。  
行童一輩隨徐福。避世千年住武陵。華嶽峯頭毛女笑。一般鄉里各飛升。  
白鶴峯頭到偶遲。三生一笑本難支。何妨背面仍分手。萬歲千秋見有時。  
天然顏色勝吳娃。住近西池阿母家。養得靈蠶大如虎。也應喫盡佛桑花。  
偷將暇日闔華筵。一輩誰如張老顛。只自愛看塵世界。倒騎驢子上青天。  
玉皇香案住多時。慧業偏教上界知。惹得洞天三十六。都來乞我作新詩。  
雲腳微黃雨腳青。望中日腳復瓏玲。前頭去海無多路。且借天腰作暫停。  
七夕偶題寄女紡孫

匝月都居水上頭。夜涼雲向竹間流。輸他百鳥啼春徧。一箇吟蟲欲占秋。  
層層暝色上閒廳。簾底繙書手暫停。買得一瓜如斗大。豆花棚底祀雙星。  
花氣衝廊竹塞門。全家應復坐雲根。閑將故事從頭說。壓倒符孫與胙孫。  
佳辰偏要耐心腸。曝過奇書曝畫忙。第一莫將花染指。預防紅色汗青箱。  
宗崔月令手全鈔。誰似吾家幼女嬌。莫證瓜期是初六。怕他烏鵲再填橋。

江南人皆以初  
六夜爲七夕。

神魚曲

大魚立水長一丈。昂頭看船不相讓。船撐欲近魚忽飛。白浪溼盡舟人衣。抽帆追魚魚不及。夜夢大魚波外立。明朝風浪急。護持咫尺看我成龍時。

神狐曲

狐強神弱爭一屋。狐悍操兵穴神腹。神逃荆棘不敢言。白晝狐枕神龜眠。藝神訴天狐始悔。爲神不終願爲鬼。君不見重新社屋迎故神。畢竟狐尙居承塵。

有饋蟹者戲答

萬羊太尉唐代。萬鴨詞林本朝。若許各從所好。願烹十萬霞螯。

偶成

眼冷心空日。長安始易居。三更池閣上。眼對白芙渠。



附鮎軒詩目錄

卷一

機聲鐙影集

古今體詩一百一首

卷二

采石敬亭集

古今體詩八十七首

卷三

黃山白嶽集

古今體詩五十三首

卷四

長淮清潁集

古今體詩四十一首

卷五

桐廬林屋集

古今體詩五十九首

卷六

鍾阜蜀岡集

古今體詩八十五首

洪北江詩文集

卷七

茅峯攝山集

古今體詩八十二首

卷八

天台雁蕩集

古今體詩六十一首

附鮎軒詩卷第一

機聲鐙影集 十三至二十歲作。

元夕侍母坐命作

阿姊邀題句。慈親偶破顏。十年風雪裏。始覺有春還。

附塾篇

送爾書堂去。窗疎尙見星。母勤三歲績。兒受一年經。影小扶簾入。聲長隔院聽。敝衣經數補。莫訝未純青。

驅兒篇 補癸酉歲作。

余八歲。自塾中遣歸。吾母抱余泣。云云。及稍長有知。遂作驅兒篇。以記母語。

東家驅兒不使讀書。兒跪告母。母驚兒呼。西家驅兒不使入塾。兒跪告師。兒已受扑。入告母。出告師。孤兒不食。淚若絲。牧羣羊。牧羣豕。孤兒寧願讀書死。君不見三尺孤兒亦人子。

歲歎篇

十三知歲歎。十四忍朝饑。母病逋師俸。兒長著父衣。瘦憐親串識。貧覺館僮譏。冷巷歸來晚。書聲出破扉。

精衛



精衛精衛。生於海東。朝銜西山石。莫投東海中。力不自度。凡禽笑之。精衛精衛。勞无已時。心雖勞。志不改。塵飛揚。在東海。

正月十三夜至前橋訪姊二鼓始棹舟還

月午都將歸路迷。蜻蜓舟小住前谿。夢回三處尋蹤跡。影落水南魂水西。

夜起

不寐三更後。孤行衆竹中。夜光非借月。暗響不因風。影逐棲樓燕。肩差倚井桐。縑囊私曷句。未敢付奚童。

詠史篇

運去矣。籍若何。八千人散漢一歌。時至矣。勝亦武。百二關亡楚三戶。噫吁嘻。秦明月。漢大風。恨有豎子無英雄。

母命詠月

乍覺冰蟾透下力。旋聞花漏入三商。此時金粟欲無影。徹夜玉繩微有光。眼底樓臺空浩渺。秋中節物自清涼。翩翩歸妹西行好。莫更拈著怨有黃。

遣僕篇 先君遣一僕以歲獻遣去。作此送之。

影小如余瘦。形疲覺汝饑。青蒿憐故食。黃葉補秋衣。炊冷泉通竈。眠遲露入扉。舊巢猶苦戀。清淚滴依依。

同蔣十二阿定登太平寺浮屠

君從城北來。覓我城東路。松花一枝折尚新。知是卜家墳上樹。東門橋邊七層塔。君上一層心轉怯。屏顏紅坐綠蒲團。怪我偏將塔鈴踏。

閨思同蔣十二賦 晁花字

簾明知夜起。開敞看朝霞。影瘦只疑鳥。顏春欲誤花。情尤耽諷詠。意解惜年華。墨瀋留嗔頰。牋紋印指叉。庭隅垂竹實。牆隙隱匏瓜。穿樹鶯何急。巢梁燕乍譁。都嫌漏消息。不放入窗紗。

郭北篇

辛巳歲。洪子讀書郭北鄒翁家。翁憐其貧。欲以女妻之。聞有所聘。乃止。洪子感其意。作郭北篇。

兒家城東偏。翁家郭北隅。附翁錢一千。伴翁兒讀書。讀書書何多。翁言兒大好。枉有七八男。無如此兒嬌。翁言欲塔兒。設此堂上尊。十三名家息。十五廉吏孫。兒言苦濡澁。座客顧告翁。強自致一詞。柰此兩頰紅。兒宗實蕭蕭。母淚復縷縷。前織一匹縑。已聘貧室女。門前田十雙。屋內錦十箱。翁言雖至誠。厚意固不當。清明後一日得蔣十二阿定江西計。

惜別河干尙縱談。蜻蜓舟小水拖藍。春光乍到一百五。慧質肯過十二三。髮綠挂窗留鳥愛。顏紅入鏡識花慙。明晨哭爾西郊去。酒滿銅瓶筍滿籃。

南樓夜宿

後牖穿明月。前樓看曙星。水分三面綠。天入一隅青。影暗藏書幌。魂驚貼畫屏。眠遲偏易醒。警夢有檐鈴。母命口占送從母歸芳茂山故宅。

巢成好挈孤雛去。羹盡難依邱嫂居。裁帛寄親千里外。時外王母就養江西官舍未歸簪蒿隨姊十年餘。谿田此日通漁舫。鄉夢全家上鹿車。只有諸甥偏戀母。櫻桃花下遞牽裾。

初三

初三花發檻。初五月窺門。樓小難藏影。簾重不隔魂。蛛絲黏鏡溼。鼠淚滴燈昏。笛憶參差響。書摩宛轉痕。病中作。

病怕春光到眼前。未尋鐙火已孤眠。囊中自有空明月。身外都成浩渺天。偶憶紅顏思覽鏡。慵梳綠髮任垂肩。顏生衰早終生天。誰向黃塵羨永年。

樓居

只覺樓居好。簾鉤靜裏斜。頽牆只三尺。春影過人家。

破曉

破曉簾前望。園荒綠欲齊。春知來路闊。天覺過牆低。驚筍有時折。野鶯無數啼。萋萋一坡草。踏爾過橋西。

中井鄉歌爲鄒翁賦

山花只入房。山燕只棲梁。一春綠竹不過牆。一生遊魚不出塘。誰來丈人家。北郭瘦李西谿楊。誰和丈人詩。南巷狂沈東頭王。丈人十雙田。歲得千斛糧。丈人一陂澤。歲牧千尾羊。嫁女不插花。娶婦但識桑。人間有此太古方。丈人不出中井鄉。

擬古豔詞

夜扇開幽影。春燈卸別輝。林花送愁去。棲燕抱魂歸。坐久風添陣。更闌月有圍。剩寒回繡幕。選夢入孤幃。  
寄大興朱編修筠

壬午冬。在友人處讀公古賦數首。愛不忍釋。又聞公愛士。遂作此寄之。

昭陽歲涂月。公文傳手鈔。聞公學昌黎。興極乃欲號。昌黎善爲文。乃不識李翱。昌黎善爲詩。乃不值孟郊。我生十年學刺嘈。慈母訓我窮風謠。哦詩切雅賦切騷。世哂才士如秋毫。君不見公文足戴北斗杓。我筆亦傾東海濤。

省蔣十二墳

爲種一枝柏。流青入夜臺。攀條盡西向。記爾未生回。

芳茂山省從母

小築谿深處。都憐補薜蘿。亂山開戶遠。秋月閉門多。衣冷親添繭。燈昏乍拂蛾。遲眠貪久語。不覺夜全過。  
二月十三日夜乘月出城至小東門橋迷路三鼓始反

橋南未有人。橋北盡春墳。轉向危橋立。聽鍾別夜分。橋心暉暉月華滿。魚影過驚人影短。三更倦立倚孤  
桃。燕子識人來處遠。

藥裹

藥裹猶餘病裏身。三層閣小住幽辰。風簾白墮棲魂燕。花徑紅遮入夢人。往事雨昏勞把燭。此間天遠定  
無塵。蕭郎指爪愁都落。莫向閒中說好春。

午睡

一樹藤花六尺牀。飴簫聲遠繞空牆。幽眠乍起渾無事。新月在天春晝長。

題阿房宮圖

一百萬卒長城中。四十萬卒新安東。咸陽閭左已盡發。餘者內築阿房宮。小刑鞭笞大刑族。趣就咸陽萬  
間屋。連城跨渭百里餘。日月光窮許然燭。秦家築城非一隅。秦家築宮連百區。雄心一世至萬世。束縛黔  
首常安居。可憐絹粉今淒瑟。焦土星星野螢出。版屋祠荒賽百蟲。阿房賦冷吟殘蝨。噫吁嘻。愍儒鄉。火一  
日。咸陽宮。火三月。君不見。楚人灰紅秦燼黑。漢家龍興由火德。

芳茂山夜宿

節物無端五月前。喧聲徹夜擾幽眠。雷穿石壁都成窟。雨挾谿魚欲上天。深洞三時寒地氣。斷山十里接人烟。清閒不復營餘事。靜把元經曉夕研。

樓高

樓高笑語輕。飄樹復驚鶯。衫袖春風轉。房櫺曙色明。禽迷窺鏡影。竹隱上梯聲。幾日園梅發。疎窗綠綺橫。過潘二振煥故居書示其猶子尙基。傷春曾記款朱門。一樹桃花一酒尊。苦憶君家狂阮籍。幾回花落與招魂。

園居

十里巢禽樹。春深客到初。上樓人影瘦。滅燭雨聲疎。隔歲書猶讀。齊年髮共梳。庾郎貧正甚。同此食園蔬。杏花樓春望。

把書時復上層梯。愛看春濃柳覆隄。不惜工夫待殘月。藤床移向曲闌西。

初生十五六

初生十五六。如犢甫離乳。車旁隨母走。相距不數武。誠知芻秣好。未識誰是主。忽報上齒生。勞勞駕車苦。初生十五六。如鳥始出巢。毛翮雖未強。氣已凌碧霄。一母將衆雛。飛處不欲高。朝出莫共還。稍知念劬勞。

初生十五六。如水初離源。到海尙有時。流聲已喧喧。洪纖悉包羅。意欲長百川。冰夷尙相嗤。何況鮪與鱸。初生十五六。如月始離海。彎彎雖無多。九野識光采。延回到中天。河漢色已改。太白出較遲。何能久相待。

小池春漲

昨宵驚波來。漂去所著屐。下牀方欲索。摸得一雙鯽。

雲谿春詞

欹枕蓬窗聽雨眠。記來前事當遊仙。銷魂一曲雲谿水。坐閱春光十九年。憶別城西爾許時。強邀相見出偏遲。生疎樓閣生疎意。却耐渠儂百日思。樓上紅燈影接天。更闌催擺賞花筵。半酬只說沉沉醉。吹笛聲中自在眠。疎窗三面綻薔薇。乍暖欣看試袂衣。忽地絃聲落天半。趙家樓上紙鳶飛。銀燈影裏說元宵。踏月欣從女伴招。攜得合歡何處放。半坡春水葛仙橋。短短疎楊綠未成。溪流闊處有波聲。臨河亭北開圓牖。買得銀鱗便放生。相逢剛及上頭時。百種聰明不自知。憶向瑣窗談故事。比來都已入新詩。方書繙徧日偏長。四月陰濃葉亦香。正是日來垂手處。滿欄梅子一齊黃。尋常鏡匣傍簾鉤。筆硯拋來懶不收。却恐被人窺楷法。故揉牋紙擲床頭。

新開池館曲廊邊。拜月人來月抱肩。一度逢人作莊語。偷開笑靨百花前。  
錄罷仙人肘後方。小疲時復倚回廊。學來百種玲瓏語。反覺鸚哥舌本強。  
約伴同遊出獨遲。半宵偷謁社公祠。王孫古巷行將到。記得嘉名在楚詞。  
城東烟景劇參差。玉局堂前花百枝。行到硯池剛欲歇。暗中扶柳立多時。  
一度登樓望若仙。忽驚帆影逼吟肩。生來不識天涯路。卻問春江在那邊。  
石徑玲瓏漬古苔。堂扉斜對小池開。花磚南北皆知數。立盡三更夜月來。  
山莊春半踏青無。處處危橋藉柳扶。獨向回廊看新月。任他女伴隔河呼。  
平頭艇子櫂雙枝。畫板平鋪上岸遲。却訝海棠陰覆屋。六年不到晏公祠。  
幾日西頭戶嬾開。却從仄徑上層臺。無端一片落花過。兜起昨宵春夢來。  
把書時復到吟堂。病久應愁學殖荒。一事乍教開笑口。親聞家舅譽韓康。  
比來多分識春愁。不遣雙鬢上小樓。只有畫廊雙燕子。飛來飛去看梳頭。  
愛向閑亭自煮茶。壞牆北去路交叉。鄰姬怪底時來往。籬角先開姊妹花。  
水明樓上晚涼多。摘得新橙手自搓。閒倚石闌談往事。忽驚天眼裂如梭。  
閒愁誰復理衫裳。書籍拋殘滿曲廊。只有畫箱親自鎖。不知何事費提防。



八字分明記肯差。盈盈十五說年華。無端欲索生辰禮。一盒秋窗染指花。  
兩株仙桂倚閒廳。幾日迷藏捉未停。同是曲欄何處躲。欲將纖影貼門屏。  
朝來小婢却頻催。曉日三竿戶乍開。一把鬢絲梳未得。傳呼阿母過房來。  
苦雨連宵夢不成。臨街樓上盼朝晴。春泥一巷深三尺。偏認東來蠟屐聲。  
居然板屋仿浮槎。六六文窗刷絳紗。何事五更籬已捲。欲乘殘月看疎花。  
尋常不肯款書樓。却爲花香少滯留。猶憶兩重門內事。一聲靈鷲惹回頭。  
小閣新懸蛺蝶圖。年除不更貼桃符。宜春帖子催書過。好代堂前拜紫姑。  
商量誰可伴青春。二月花枝二十人。攜得鏡臺何處去。杏花樓上度生辰。  
園扉東去闢書堂。不遣簾櫳透日光。奇福却教消受盡。百花香裏貯匡牀。  
病來仍不廢吟哦。紙做閒教小婢摹。欲向人前詡師法。強將難字課鸚哥。  
一句纔歇雨廉纖。臨水家家喚卷簾。剛是日西勻面了。龍舟已到白雲尖。  
詩社年來不暫停。秋蟬吟後詠春星。憑他百首堆吟案。只許蕭郎有性靈。  
識字先憂命不辰。頻推甲子恨梟神。羨他阿姊生來福。已遣羊車嫁璧人。  
別來相見較矜莊。一卷華嚴禮法王。添種碧桃三兩樹。攔他春夢入閒房。

攔街報喜有紅箋。返棹匆匆泊岸邊。却被校官傳釋菜。替簪花朵出筵前。  
清修只有燕鶯知。背客從無一語私。我本學仙卿學佛。十年端愧說相思。  
一春心事訴花枝。猶恐花枝笑客癡。誰向樽前按檀板。聲聲譜出惱春詞。

獨酌謠

獨酌謠。獨酌無所好。生來菖蒲花。不解向人笑。阿三爲我提壺。阿二爲我行沽。風吹門開。胡蝶自來。揮之不去。落我酒杯。一杯邀春風。一杯待明月。嘒嘒嘈嘈聲不歇。市上人催酒錢切。  
獨酌謠。獨酌無所知。離離春心開。飄飄若遊絲。山風爲我披襟。百舌爲我行吟。樓高三層。月不得升。燐火飛出。光明若鏡。上樓鐘聲三。下樓鼓聲四。冥冥濛濛飛雨至。蝙蝠嚇人還展翅。  
獨酌謠。獨酌無所憂。天邊開八門。地上列九州。三江昨餉鮪。百粵復饋離支。何曾開筵。日食萬錢。邊令之腹。無其便便。一石亦不多。一斗亦可已。琳瑯瑯樂聲起。勸客高眠洞房裏。  
獨酌謠。獨酌無所待。劉伶及杜康。倏忽渺千載。北斗爲我持杓。列宿爲我鋪糟。花開如盤。勸客盡歡。出飲市上。萬人圍觀。牛醫旣可招。狗屠亦難捨。朝朝夜夜心自寫。狂藥醉人無死者。

亦園卽事

名園都枕郭西頭。乘興聊爲三日留。銀燭樹寒人病酒。紫薇花發月當樓。閒禽自欲當軒下。秋水居然奪

戶流。小坐石闌聽一曲。謝郎含笑李郎愁。

雙船行大姊命賦送楊氏表姊歸芳茂山。

儂家住橫山。生長山橋東。昨日出賽神。忘却拜社公。來時船頭雨。去時船頭風。儂家住雲溪。生小繡古佛。歸寧無一程。返棹不終日。來時半帆風。去時半帆月。雙船遙遙何處分。出得小溪當水門。姊行持香妹持燭。同向晏公祠內祝。

將至崑山訪從叔縣尉

百里初看束急裝。白家橋左趁船忙。春山一路題詩好。阿姊先爲製錦囊。

崑山登文筆峯

山風昨夜穿窗破。落月一峯床上墮。起來失喜闢北扉。雲氣縷縷穿人衣。林梢四面天光出。破曙看山始親切。牀頭拉客客不騰。乘興攜屐還孤登。褰衣只向山岡上。峯勢離人忽千丈。前行百折出樹梢。平視正對中峯腰。誰言峯勢高疑絕。一塔從空復飛出。峯臻一層塔七層。僧老爲別長明燈。坐來足底雲生滅。萬瓦鱗鱗恍居穴。樓頭酒人知尙眠。詎識客已臻山巔。君不見。十年平地居局促。此日登山願粗足。西南一抹欲望家。卻值海上生紅霞。

虎邱

七里塘邊路幾叉。到來爭欲詡繁華。萬家燈火千人石。一帶樓臺五色花。別有名園貯聲伎。愁無隙地種桑麻。龐眉書客蕭閒甚。只檢疎闌自煮茶。

無錫道中

漁舟還趁峭風開。臨水梳頭照百回。却過望亭三五步。九龍山影上帆來。

飲第二泉

第二泉邊過。無人約客遊。野花催上岸。山鳥喚登樓。別路月初好。全湖雨乍收。更殘到家早。先慰倚閭愁。放歌行

梟不入。曾參居。棘不生。孔子林。借問棘與梟。寧知聖賢心。伐檀削跡。見惡世人。禽獸草木。知識獨真。魯東門。訪爰居。弔戎夷。海鳥饗太宰。國士無一衣。仰天出門忽大笑。誰是至人誰不肖。

春日贈鄰東王叟

屈指經旬桃李辰。貧家巷裏不知春。三間老屋四圍水。兩面毀垣千尺塵。結客孔融先下世。破家張儉尙依人。惟應寂寞墻東叟。甕牖前頭許結鄰。

贈唐上舍鵬

五年頓有三友。謂東鄰湯進士大奎。一巷分居兩頭。六時梵唄雙刹。卷東西皆尼菴。半夜書聲小樓。

來從求仲羊仲。交到元方季方。陳留兼有小阮。蜀郡本少他楊。君兩從子皆能文。余家自歙縣遷常。僅止兩世。

偶成

曲曲房廊映水隈。魚苗五色上波來。當窗正欲鑑春影。一樹好花頭上開。

曉起

日光搖不定。窗外有桃花。漠漠分紅影。冥冥逼絳紗。露笙鋪幾日。風笛起誰家。只有閒鶯燕。猶能識歲華。

鵝鵝詞

西鄰有棄婦者感而賦此。

春朝晴鵝鵝。喚婦如有情。春暮雨鵝鵝。回皇逐其侶。陰晴一日寧。有期鵝今逐。婦何處棲。雨急祇繞雄。巢飛人之無良與禽異。險阻不離安樂棄。忽構一巢居別地。西鄰棄婦真無辜。入門拜姑出拜夫。臨別復聞啼鵝鵝。君不見禽雖不言對以臆。逐婦歸須有時刻。不若人行死生隔。

春盡日騰光館賞牡丹

谿上誰開舊草堂。春殘先爲賞花忙。調脂金鼎儼同味。承露玉盤饒異香。百計可能留豔質。萬錢爭與買年光。寧知別有關心客。倚徧東風幾曲廊。

行雲

行雲欲升天。流泉欲注地。同焉出一山。由來心跡異。高高下下一日中。水氣轉綠雲光紅。朝雲升天莫歸嶺。只有流泉去無影。君不見。作霖他日徧九州。努力倘逢東海頭。

偶成

闌干高下飛胡蝶。花影都從紙窗貼。樹頭接雨青數層。魚尾閃波紅一捻。春慵晝永誰相省。幾陣簾前笛聲警。鏡面屏風八曲垂。玲瓏照見茶甌影。



附結軒詩卷第二

采石敬亭集己丑至壬辰

依綠亭得句

雨止修竹間。微風起天末。呼童卷疎簾。面而看山月。

汪生彥和出元人畫二十幅分賦其五

君不見竹冠布衣位至尊。漢家丞相非高門。驪山罪徒滿闕下。鯨面盜首王皆眞。當時入關佐天子。三傑首數韓王孫。留侯儒者固益上。詎與刀筆同時論。秦凶竟從趙高匿。楚虐幸有項伯恩。英雄歸漢有本末。丹青照水顏疑神。平生折節黃石公。我懷馱有滄海君。咸陽原爭鬪豎子。冥冥者鴻竟離羣。始知高視出一世。四皓未免趨風塵。留侯功成卽乞身。心所師者眞其人。赤松黃石何足云。

右留侯歸漢圖

漢家龍興及三世。高論六籍搜根株。濟南碩儒老猶在。遐算未斷神疑輸。誰何作圖貌奇古。牙齒剝落身須扶。當時秦王厭章句。生也幸得逃其誅。乾坤非常爻燔禍。灰燼尙欲生眞儒。峨峨執經門大夫。太常子弟秀者儲。尙書大傳世有本。乃謂口授勞咄嚙。千年此論出安國。夏以隸佐亡。蜩書我褒不目紫奪朱。兀



兀起坐重披圖。還憐真本生已易。斷篇何止將蒲姑。

右伏生授書圖

君不見、輜涼夜半離法宮。豪桀擾擾黃塵中。原嘗春陵有家法。殺人亂世非英雄。誰何要間佩兩龍。短裘駿馬羞雷同。報仇結客盡一世。末路顧與曹邱通。我竊嗤此田舍翁。兀兀一飲還千鐘。於虜男兒不種東陵瓜。有酒亦澆劇孟家。勳名生在死卽盡。姓氏肯使餘人誇。披圖憐君重然諾。廣柳車來容束縛。一生幸免罔頭蟲。令人千載悲丁公。

右季布任俠圖

挈壺失官晦朔忙。閔位不復歸明堂。專家歷象乘灰燼。日角月齒憑荒唐。伊誰守官柱下史。兀兀不語悲張蒼。綠知威水復不久。早奉定歷歸興王。披圖黍米繪極細。如彙六歷分低昂。百年星紀互得失。譚天口屈猶能張。扶風著書首堯典。裨晝益夜差五商。銅壺箭復減高密。迫促日馭無輝光。我從太初引之長。稍減陰歷還歸陽。誰推北辰定天紀。復需南正司總章。天人當日理本一。古幾至德來鴻荒。君官柱下得幾載。聞見猶勝落下黃。何人更論五德定。漢興可以追軒皇。

右張蒼治歷圖

洛陽少年真可喜。長沙上書思治安。致君堯舜固盛事。不問宰相皆材官。霸陵思治讓復再。德薄何能四

三代。此時一官次鄧通。憔悴日值甘泉宮。無端鴟鳳引作侶。坐使譖譎來南中。君不見。南中還留屈原宅。千古萬古傷卑濕。斜陽何必鷓鴣飛。弔古寧同楚囚泣。季文重道不重儒。孝武重儒誰上書。可憐牧豕亦作相。殿上挾策羞吾徒。如公年命關世數。經術寧同太常錯。卷圖不忍見橫流。中有沉湘一篇賦。

右賈誼上書圖

山行

巖腹藏月華。幽房露虛白。山雞識天曙。過嶺噪林隙。斜輝不沾衣。十步見履跡。回瞻怯叢莽。頽視出泉脉。暗水復百重。微茫下岡脊。天光被原野。星景定川澤。宵露此一時。秋陰萬家宅。征衣冒幽險。居人昧昕夕。荒荒邨犬鳴。勞勞感行役。

對月

銅鋪蝕月月不流。曉星對戶如凝眸。此時鐙影薄於紙。金鴨爐中瑞烟死。東家西家夢蝴蝶。孤客夜長聞落葉。何當反影入潭底。喚起老龍吟海水。時已三月不雨。

秋分同黃大景仁賦

晨光初次角。林木總含商。感爾淒然意。能令秋氣揚。竹廊雙燕引。石磴百蟲涼。此日單衣客。行看怯曉霜。開黃大景仁自湖南歸阻雨不見卻寄

纔把征帆卸落暉。谿南谿北悵睽違。無端一夜瀟湘客。帶得蠻烟瘴雨歸。

初十夜雲谿憶蔣肇新弟

薄暑不成寐。寂寥踏谿路。疎鐘出林幽。銀蟾約波素。曾從三徑客。白袷愜幽步。勝景不可追。夕汀滿涼露。

歌坐

荷盤帶露傾年光。晚螢照客愁舉觴。此時不飲亦不醉。水面葉觸波聲涼。圓針初拈唾絲滑。五花無聲蝕羅襪。文奩妝罷知幾時。一綫蟾光上華髮。吳謳越謠不得長。罔罔起舞難成行。此身萬事不可待。明日有酒誰能狂。

遊顯慶寺次韻

晴鳩聲裏度危亭。平遠風吹酒面醒。古寺踏歌春黯黯。亂山入夢晝冥冥。林泉未改幽人素。雨露偏滋小草青。爲語藥闌消息近。好攜蠟屐叩禪扃。

勸學篇

秦虜蕩六合。詩書死灰色。蠹魚類窺人。千載不一值。後來羣師儒。沿流逞逆億。微言旣中絕。古義墮井黑。大雅卓不羣。小人儒遁墨。我襄鷓鴣志。遭此蟾蜍蝕。聖學苟不頽。行將何致力。

蔣青曜齋頭掘地得古棺索賦

江濤翻沙作平陸。又剗離宮築城郭。城郭千年有廢興。茫茫別夜初歸鶴。鶴歸幽怨尋人徧。古屋經旬動雷電。怪事曾傳出漆鏡。羣公暇日誰經見。主人花發不敢看。主人掘地得古棺。望之卻走不得近。古物出土光流丸。向我秋齋告奇字。謂我頗觀前史志。篆鼎苔文不可分。百劫記得蕭梁事。冢破空令舊苔補。落月陰寒動裏古。紫燕重逢識舊人。白楊既死依黃土。豈惟坯土愁難保。建陵一一生秋草。野燒曾傷寢殿基。摸邱便發蕭陵道。六代相看祇莫朝。美人金粉亦應銷。蠶花古巷初歸樸。土木平時罷作妖。留傳遺物誰能識。把玩空增後來惑。梁苑螢飛又幾年。蕭家麥飯虛寒食。樂游原畔客初回。何處西風少劫灰。齒冷玉魚歸市上。心傷銅雀出蒿萊。書來索我題詩急。齊諧志怪誰能襲。露井秋桃正作花。蕭蕭莫向閒庭立。暇日搜篋中得楊毓舒所贈詩卻寄

閒搜篋中十幅字。先生作論尤激昂。銅鞮伯華不可見。遺直一語歸今楊。十年家隣市橋口。憔悴誰憐貌衰醜。虬須苦隨童子試。破帽襤衫縣中走。先生功名亦知止。先生貧賤能有恥。當時準經三十娶。已見哦詩出才子。蓬萊觀中宿儒在。經術還看棟梁待。先生著論空萬言。幾見微名上邑宰。乃知古人真可師。授徒築舍非無爲。秦延師說有長處。尙欲從君定指歸。

題畫

高人策杖來何早。一徑綠陰門巷曉。時見幽禽上下飛。落花滿地多於草。

雲谿步月同蔣三星曜

故人喜相見。攜手同幽尋。蒼茫隔谿月。早墮桃花林。不到遠公寺。誰知春草深。徘徊弄清影。君去重孤吟。雲谿泛舟憶蔣氏舅仲

憶昨春星大如斗。置酒花前夜搔首。餞春筵上一歸來。君亦江鄉客行久。我棹吳興舴艋舟。夜深重過水明樓。傷春何似悲秋好。一夜涼颺落葉愁。

江口見月

騎鯨江上客。曾憶謝將軍。江月長如此。青山不見君。偶來欵短棹。長嘯激秋雲。薄莫蒹葭外。哀鴻不可聞。青山謁太白墓

騎鯨醉月不肯留。死後却葬青山頭。青山無人幾千載。薛月松風苦相待。我欲發語驚鴻濛。詩成還輸白也工。笑謂先生安得死。明星在天月在水。直須痛飲齊悲歡。大地何似杯中寬。調羹著袍未必喜。知公不死長安市。夜郎去去愁瘴烟。知公不死南荒天。公乎公乎死亦達。不見世人皆欲殺。胸羅文字不博餐。下筆神鬼誰解看。公乎坎壈有若是。我輩自合號饑寒。君不見。杜陵叟亦太寂寞。死葬騷鄉掩詩魄。耒陽屬甫此屬君。不信名山會成錯。臨江略試犀角然。水族不足窮奇觀。此間地下真五色。謝眺文章謫僂筆。湯湯日夜流無窮。當年爾去波濤中。波濤瀕洞一千丈。怯爾文瀾不能上。噫吁嘻。滄桑陵谷今古愁。太白入

月江西流。安知千秋而萬歲。浮者不沉沉者浮。君不見江流逼岸無三里。會見青山沒江底。一杯酬爾倘有靈。捉月仍從水中起。

歸安陳上舍文川餉甘鞠并索詩

竹柏葉大松風幽。曉雲如山積不流。空齋十日禪意寂。老鶴舒掌似有求。連朝茗椀太無色。江水苦渾茶苦澁。傾盤惠我鞠百枝。煎向甌中作深碧。此時卻憶吳儂家。高閣日烹顧渚茶。江頭作客不歸去。山雨開徧棋盤花。

雜詩

太虛積雲氣。高與嵩華平。天風吹其間。幻象指顧呈。士生鮮實學。何苦爭時名。寒螢值深秋。三兩參疎星。前生是腐草。顧影矜微明。人生無百歲。百歲亦電威。風前矜華姿。愁中抱枯骨。本無松柏性。旦旦斤斧伐。中虛鬼氣深。內實人理歇。不見嵇中散。養生昧真訣。

黃雲蔽四野。中有孤飛鴻。行行不敢下。怯此虞人弓。三日不得食。憂心常忡忡。道逢蒼鷹使。分食悲其窮。聞言鷗鷺肉。三歎不敢充。雲霞作羽衣。冰雪爲心胸。饑當啄寒蟲。渴當飲朔風。立譚卽相契。刳頸酬生平。男兒處身世。恩重命亦輕。所苦張陳交。言言誓神明。失意一杯酒。禍兆五鼎烹。

縞紵何足樂。吾憂溯晨星。

積憂思舉頭。積響思傾喉。士生本歌哭。何以嗤幽憂。工容瑾先獻。作苦瑕易求。我行別鄉閭。親友牽車留。既知不可挽。一語贈遠遊。旨哉百鍊鋼。不若繞指柔。

黃雲如車輪。吹墮郭北門。霜蹄與短轂。碾作十丈塵。塵飛值浮雲。莫遏東歸心。東歸亦何意。咫尺願作霖。作霖會相保。棲汝在弱草。

人生處貧賤。譬若星夜行。雖無迷途憂。終苦無光明。夜長何耿耿。中有蟋蟀鳴。蟲鳴愁宵涼。客行愁途長。途長有如纒。淚下沾衣裳。誰持明星歸。化月生光輝。

百年不長在。君誤亦已再。少日師神僊。黃庭肘間佩。繼復學擊劍。頗思厲鋒銳。精神如懸毫。用之穎稍退。微明不自惜。行見月逢晦。將持養生篇。吾以習吾昧。

浮蘋從東流。桃梗從西浮。剛心苟不渝。終會大海頭。所苦對面間。有若萬里修。愛君屋上烏。彈君林中鷗。嗟予寡兄弟。隻影吟風前。亦解耒與耜。恨無南山田。饑來出門去。舉足任所便。高堂盼遊子。有若農占年。浮雲闔須開。一望東南天。

南昌亭

報德何因此獨輕。當時恩怨愧難平。沛中亭長須臾起。會見王孫五鼎烹。

下馬亭邊夕照低。英雄身世本卑棲。陳平糠覈還憎嫂。尙說南昌亭長妻。

古檜行在太平使院古府子城上。

城頭古樹記以百。非宋非元李唐植。森森古檜蟠空蒼。奇氣矯作百夫特。黃昏過樹雷雨青。白晝擎人爪。牙黑眼經百歲若飛電。身閱四朝猶過客。霜磨雨洗遺蹟盡。剩有創瘢餘徑尺。子城峨峨樹歷歷。建炎年

中惡氛逼。

建炎中將軍陳湮死此

一呼落日兵四登。百戰孤雲氣逾直。將軍白馬當樹立。砍劍劍摧砍刀澁。風雲此

日總削平。穴腹猶容怪蛇蟄。主人愛樹識樹性。不遣虬枝剛相擊。南枝使南北使北。以松歸松柏歸柏。

是

古柏壓松上幾折至是爲剪其旁橫枝

樹老枝柯總有神。時清冰雪皆生色。余生好奇奇不屈。陡然見之意亦嚇。摩挲撫樹

三歎息。此樹心空壽金石。

立春日訪蔣大肇新

問訊諸中表。浮雲作客頻。欣逢此時月。猶憶未歸人。予亦昔懷減。君應白髮新。夜闌茅屋裏。爐火坐生春。

雲溪卽事

酒場吟地幾年留。鐵笛曾邀清夜遊。今日風光總無恙。水西明月水南樓。蕭瑟秋光滿畫圖。幾株風柳水平鋪。他時賀監歸來日。祇向君王乞鏡湖。夜坐憶舍弟清迪弟出嗣季父後季父亡餽口于人。



九原吾叔不可作。汝更弱齡如我長。饑驅別家不得意。十步九蹶呼高堂。人言渠面若兄面。黃犢初生虎爭健。寄食韓康命已窮。子與弟少育于舅氏承家阿買人爭賤。居無一椽食無繼。窮冬出門布袍替。汝行年少何足憂。寧知母也傷予季。在昔吾祖居新邨。百年古歙稱高門。倉庾豈默富親族。徒隸亦感吾家恩。十載并州政聲起。窮邊民富家如洗。先曾祖守大同有德政里民建生祠以祀遺愛空留君子津。傳家惟剩先生履。貧來親串何足多。昔時受恩今反戈。朱門大第亘山立。短褐欲進遭其訶。飄然一身謝家末。識字還憂不能活。殘衫破帽驅出門。手把遺書爲嗚咽。辛壬癸甲遭鞠凶。先王父王母登諸叔父皆相繼沒生者更瘁饑寒中。愍孫不死亦天幸。覓食自此無西東。豈意飄零涉江沚。執友還憐故人子。負米聊容廡下春。傭書俾住城南市。當年剛小跳躍同。兄也讀書無汝聰。蓬窗經史空滿眼。使汝廢學傷哉窮。君不見六棺未葬將誰俟。兩兩衰宗老孫子。一寄兄肥弟瘦書。黃昏淚落悲難止。

初月

墻頭開薄暝。樓上試新黃。乍闢簾鉤影。微生匣鏡光。水程紅燭暗。天路碧雲長。欲拜風差勁。添衣下北堂。

殘月

啼烏頻訴我。織月又如鉤。霧慘欲沉水。光微不上樓。誰同前夜看。行引盛年愁。客感不成寐。蕭蕭竹露流。

古風

朝行看蟻門。夜夢入虎穴。微中一爲緣。默處神已泄。細火燒枯腸。中虛不知熱。匪伊金石固。夏恐肝肺裂。百態罔敢呈。至人味生感。

門雞行

灌園老人食無穀。家留一雞啄人粟。呼兒飼雞雞苦飽。飽食雞飛兒受撲。灌園老人住無屋。秋雨穿墻漏床足。墻傾日引隣雞來。矮屋疎籬看爭逐。家雞飛鳴羽肅肅。采不外馳精在目。隣雞據地有死心。陰血四周冠怒束。微生偶然亦當局。顧禍翻憐殺機伏。屋上啼鳩看欲癡。草間螻蟻驕難捉。家雞飛鳴衆雞怒。歸引羣雌夏呼族。雄來成隊雌挈尾。爭礫雞毛洞雞腹。人生快意縱一觀。寧知強者弱之肉。老人呼兒掩蓬戶。雙淚階前抱雞哭。得失應知感塞翁。安危何事看蠻觸。君不見。屋外連邨菜甲黃。年來雞啄菜多荒。衰齡爾亦忘機好。臥看青山下夕陽。

洪烈婦詩

夫爲洪。妾爲葉。夫名志達。妾家歛。夫何爲。書在篋。妾何爲。絲在匣。郎前還顧妾。眉行不離睫。一朝夢破金鼓聲。鏡中弔影花中泣。妾行不下堂。下堂死生隔。十步十不忍。一行一嗚咽。兵言欲生不欲殺。白刃差差繞三匝。夫死乎。刀在頰。妾免乎。兵在靨。不死溝渠死山峽。碎身示汝全軀法。郎魂歸。年十七。妾魂歸。年十七。七。霞冠羽衣魂欲活。里人作祠斂神魄。神告汝。貞凜汝節。客死淳安家歛州。九原魂魄悲難越。於虜皇天

搆難猶未歇。有田不耕走倉卒。妾死因夫夫死兵。一門大節差堪匹。人生忠義寧有激。蹉跎失身很難說。他時重過里門看。後人無愧前人烈。

歲莫雜憶

盛處士瞻

問訊先生疾。相逢涕淚頻。言將告良友。及見汝成人。與先君子交最善風雪遲眠夜。須眉入夢真。應憐猶子遠。誰更尉長貧。

盛處士曜

先生能嗜義。破產未爲貧。樂志陳離坎。傳書愧甲寅。先生無子。開闢肆於市。酒人朱亥近。高士井丹隣。一訪西頭市。匆匆又浹旬。

侍御舅氏

爲定依人計。當筵不舉樽。一書貽日下。百里走師門。親老原難別。途窮易感恩。白頭期望意。豈歎在高軒。大令舅氏

半里雲灣水。波光映閣東。脩然讀書塢。清絕使君風。夢繞疲驢外。春殘竹馬中。誰言甥似舅。行跡共飄蓬。

十一叔縣尉

四十須眉富。臣家叔不癡。吏尊輕縣尉。俸薄比經師。數口拋三地。微官轉四時。自昭文尉調吳縣。更調崑山。江南芳草路。及此賦新詩。

楊大毓舒

百里澄江路。波清見汝心。貧無一椽隱。交到十年深。臨別曾沽酒。牽衣欲賣琴。與君門巷近。爲慰倚閭吟。  
分題蕭士雲所繪離騷幃子

筆頭蕭蕭如有聲。水勢忽壓巴陵城。湘花豔心覺春重。楚女照水知波晴。神雅晝飛日沉采。騷人不來魂已在。餘紈更乞理心神。珍重秋屏寫山鬼。

元夕詞寄里中諸子

月出春城霧氣消。客中情緒是元宵。沉沉一樣尊前月。不及谿南挂柳梢。

剛條門巷對谿流。百舌春來噪不休。劃斷雲溪春一曲。蔣家明月趙家樓。趙大懷玉。蔣二青。曠。皆居雲谿。  
路入楊園春正賒。風光多被女牆遮。一條芳草王孫巷。綠到橋南是董家。董秀才。沅居玉梅橋。  
留客橋南縱茗譚。滿谿谿水碧於藍。更殘不放春城鎖。吹角還知待左三。左大治。曠弟。居城東。

除夕

漫天霜雪朔風涼。客久驚看鬢亦蒼。逝者如斯誰惜別。酒行以往總思鄉。無多苦語憑南雁。不盡名心爲

北堂猶有天涯知已淚。緘書欲寄夏旁皇。

元夕觀舞榭

魯酒客不醉。吳歌聲漸泐。如何當筵上。絲竹轉幽鬱。傳呼雙吳兒。階下立屹屹。舞態猶逶迤。歌塵尙坳埒。一呼心魄蕩。壯士膝俱屈。雙矛白差差。巨及峙屹屹。圍場一何徑。先標里中勿。霜銛試心及。神理不問悲。然隄鶴初起。譬若泉始沸。千奇悟一正。轉展不見詘。四座爲低昂。兩軍信奇崛。彼龍睡初穩。此龍領夏拂。雷驚偶呈半。蛻飲不見訖。奇成鰲足斷。快比鯨首剗。行爲水崩注。止作山岬吻。方驚堅城摧。詎料殺機歛。擇術匠亦然。傷人唯恐不。鼓進氣不落。金鳴陣猶倔。技終作楚歌。座客顏色艷。燭燼暗不光。朱圍看成黻。萬物理獨至。千夫勇難乞。終坐欲措詞。神癡口先吃。

觀魚亭

縱壑原多事。誰云江海寬。宵殘數驚起。只自厭波寒。

桂樹行寄大令舅氏

君家桂樹蔭數畝。雷火銷鑠枯其半。幹老猶穿闔闔雲。花開直到堂東畔。曾聞此樹二百年。時衰時盛皆其天。窮冬有時亦作蕊。異事往往人流傳。南省歸來氣烜赫。爲外從祖芳洲白玉堂開置賓客。星欹月落客不眠。露重時聞花歎息。阿新表兄十齡索梨棗。花下憐余猶在抱。摩頂相看意默深。寧知轉眼成年少。殘冬遠

宦趣束裝。鐵鎖卻合平泉莊。

男氏令德與

花時偶向古壙過。馥郁猶作兒時香。甲申相傳此花白。卻值銀城罷

官日。堂開驗取看花人。阿新作須予十七。爾日相看尤跌宕。文章綽波瀾壯。酒酣顧我久不言。指樹爲

公作宅相。隨花北開怡老堂。彌甥出入咸奉觴。深秋驛使嶺南至。荔枝紅傲巖花黃。六七年來事非昔。桂

老香殘土花蝕。一作招魂楚些歌。蕭蕭大樹悲無色。

外王母與太孺人之喪

人生幾何花滿眼。對此唯嫌酒杯淺。三

度摩挲已白頭。使君堂上生秋蘚。當時羣從六七輩。阿新別我客江館。秋到偏吟招隱詩。花開翻讓遊人

看。此樹經年生計微。重來樹亦笑人非。何時更向花前醉。一訴君家全盛時。

古柏太平使院分賦園中草木

不知何年樹。尋根不能到。枝低馭鶴借。心空百蟲鬧。物性謀安居。催君路旁倒。

斑竹

春來爆竹聲。災及松與竹。寧知枝柯上。斑斑總成玉。莫待春雷鳴。龍孫先徙族。

薺菜

食薺味苦酸。食薺饑苦併。青青一畦菜。味與蘿蔔永。愁看三月三。挑殘不留影。

池草

離離千百種。種種出池沼。深知造化心。無名爾偏好。一與春風緣。還應作小草。

尋三元洞因登妙遠閣題壁

老僧竹屋臨空嵌。隻影不動蛟龍饑。鐘魚一聲夢初覺。能使風聲水聲約。陰房夜冷石骨青。神靈帶雨來聽經。卽看岸勢高于屋。春水生時手堪掬。我行涉險愁無梁。老僧穩坐江中光。終嫌禪性滯江性。目所觸處無空蒼。名山結廬此第一。脫有風濤百不失。消沉閱盡往來帆。總覺輸他一磐石。

壬辰元日立春

羲和鞭日一何駛。帝恐崆峒移甲子。天門夜半奏歷元。以龍紀年德在水。東龍不銜北陸尾。三百六旬從此起。僊人一笑春初蘇。當春開筵名燕喜。百年所見亦僅此。元日立春書太史。

春日

白日看雲坐小齋。閒無一事入幽懷。林禽告我春無恙。小樹依人影亦佳。病酒心情愁柏葉。看花消息到芒韃。離居一倍風光好。閒煞城南十字街。

與黃大景仁夜話

已識半衣賤。還驚馬齒加。新春同作客。多病歎思家。山色連晨雨。江聲入暮笳。吳鉤三撫罷。相對惜年華。

偶成

客行持鉛刀。利乃勝金鐵。持之十數載。懷懷懼虹霓。匪伊鋒刃良。所欣不能折。心空聽螻蟻。萬牛齊鬪穴。

末俗爭雄心。聖人抱雌節。

送陽羨萬應馨歸里兼寄趙大襄玉一百韻

束髮事結納。所交盡老醜。茫茫視六合。投刺頗不苟。閒身薄監廚。借面寧哭輒。街西翁八十。

楊笠雲先生

重我

似瓊玖。爲言君子交。種苗先去莠。我時感其語。背誦不徹口。平生交屈指。三人數成耦。趙生紀丁卯。楊生

紀乙丑。

舒賦

黃生己巳歲。

景仁

論年處其後。與之三子交。登堂俱拜母。楊生棄經史。謂欲處瓊牖。經歲不一出。

戶外狸跡丸。生平重天倫。家庭樂斯厚。德曜識大義。聘至職箕帚。晨昏偶過從。足跳面嘗垢。我時規生失。

捫蝨衣始卸。與生里閨間。重生比瑩琇。時時道予病。語語皆壓鈕。兼能新機關。不使故習狃。出門望雅巢。

知生宅邊柳。趙生處羅綺。不解事矯揉。豪門苦屏跡。偏欲結屠狗。窮經辯亥豕。讀書究蝌蚪。有時四座上。

譚空氣爲嚙。挹生汪洋度。百川總能受。狂奴禮法脫。藉子作關紐。憶昨設廣讌。酒陣肅刁斗。生宰季氏費。

我司孟孫邠。忘形三齋後。劇陣屢勝拇。快若敵王愾。巨鬯錫一卣。又如玉斗讌。惠一生羸肘。壯哉秦雖雄。

爲趙王擊甑。生詩夏近道。水清魚惻惻。五言築長城。不遣戎馬蹂。如升岱宗立。一覽笑螻培。造物忌同調。

分遣南北走。窮遊困逆旅。作書抵太守。

沈太守業富

猥將片長揭。至此覓升籟。窮冬憶親串。恍若兒戀襪。於虜

黃公覆。亦復遭衆掙。狂來入酒肆。夏遣紅粉話。因饑聚師門。

朱笏河先生

吐珠作才藪。天涯知己樂。頓改顏色

愀。譚言偶抵牾。南東別其畝。繼還出肝肺。持刀欲親剖。生時作一篇。恒華勢偏隄。偉哉古錦囊。十年心血



嘔生才富集腋。我才慙敝笥。微嫌神太焦。理或不能壽。嗟嗟三子交。離合無不有。貧病予總同。疎狂爾皆不。頗羞儒生酸。意學勇夫赴。此歌彼卽哭。我唱子能唱。綠嗤火牛縛。俗訝雪獅糅。有時發大言。忘身在杵臼。趙生體微弱。楊生色微黝。依依寸草心。爲隣結薔葇。君從何方至。一見氣抖擻。隄籠處已慣。新詠成一篋。黃鐘在東序。焉能寸莛扣。如陳光明鏡。矚日到矇眊。終當兕出柙。暫見龍在湫。劣魔競摩壘。藉子作扞。振貢之入玉堂。謂足俾我后。抑聞韋布樂。何必結纓綬。凜君意氣盛。訝君昏莫叩。君言昔尊人才名重山。阜君先人舉丁巳鴻博弟一官翰林衰年早見背。零落成不偶。惟餘貯書富。四廚逾二酉。蘇頰風有父。無忌酷似舅。君爲儲畫生甥。我意終勸君。歸家理葱韭。前堂種松鞠。後池插菱藕。土風山名茶。勝境湖結茆。閒身一聳立。快若脫械杻。相期臘雪前。來遊備乾糗。山蔬及邨芋。一醉酌濁醜。君謂僕言善。向我覓良友。我敦古處交。爲一數某某。君歸倘過郡。先揖趙生否。予登峯六六。時將借學使遊黃山望子在庭廡。君言春山青。稱此笠伊糾。我愁博徒去。撇我飲春酒。春盤鯉堪煮。春蔬麪堪漉。人生數樂事。寧復居此右。恨不從子歸。悲哉魚麗罟。季布恥作髡。食其人。罍飯無糧乞仁祖。有酒貫武負。悠悠薄俗交。成工上其手。謂我衣垢敝。曷不少忸怩。幸師金人銘。括囊尙無咎。君時聽縷縷。歸心已先誘。君嫌識子遲。我曾耳君久。新交雖可樂。故交尙回首。書疎憶楊趙。客愁慮黃九。生平友作命。婉孌不到嬾。因君寄新詠。俾若覆醬瓿。爲言苦著書。欲以傳不朽。雖然見結構。或尙少糴漉。終當致全力。十絲成一縉。傳之使後世。知山有培塿。兼期遞消息。一爲慰黃耆。定知屢空

悲無米實甌甌。

憶城東元妙觀古松

城東古院計以七。靈境歸僊不歸佛。院中喬柯計以百。古意歸松不歸柏。陡然七尺橫路岐。細看疑蛻蒼龍皮。左家兄弟皆好奇。淺醉來坐雙狻猊。我行來遊日嘗再。對酒看松有深會。十年學得種樹經。草木蠹朽咸乞靈。籬頭小試苦無驗。無乃欲速戕其形。松根老人識真意。草木相持此生氣。半死桐心苦鵲巢。全虛檜腹因螻蟻。此松得土氣最先。偃臥猶足支百年。振苗助長古或有。異事慎弗陳吾前。君不見筆架山前響春雨。謾謾時聞作人語。輸爾支頤道上眠。斧斤不到棲神宇。

送江都汪中歸里

汪生手攜萬言策。賣書橋下曾相值。公然出語爭鎔銖。白眼逢人百不識。爾來對策何豐腴。紅綾本寫君唾餘。君言此事本偶爾。三載一至慰倚閭。撐腸拄腹苦無驗。手把奇書易長劍。去歲君盡以書籍寄仲則處易長劍去報。道將酬國士恩。不逢知己才猶斂。官書堆案日不移。君昔樂此言不疲。君前客太乾坤一身任驅策。親在詎敢言非宜。我今勸君歸計速。樂土何如反邦俗。他時好結竹西隣。白晝從君借書讀。

牆上蒿

牆上蒿。一旬高一尺。回身視根株。知君不能直。

壙上蒿。三春蹶綿延。若非年命促。那不愁刺天。  
壙上蒿。結根當白日。寧待霜與霰。節枯由觸熱。  
壙上蒿。乃界東西隣。成陰苦無多。爾處欲市恩。

青山紀遊

曉日挂絕壁。沿谿溯松聲。流泉合諸山。下向百畝傾。茅籬八九家。麥隴左右橫。足知賦稅外。尙有開田耕。  
老翁七十餘。手足尙喜輕。頗感造化功。一雨亦久晴。東巖有化日。聊以終吾生。

造物無棄壤。山險作雁田。陰蘆風蕭蕭。鋤入雲水天。荆棘穿我衣。草露滴我肩。一念昧素機。百態逞所便。  
明明人子身。忽墮豺虎前。披衣偶忡忡。心如月初絃。

谿回日亭午。崖轉天去尺。浮雲態紛馳。千里一改色。各褻東西志。微願不克適。心空半潭綠。漾此峯影碧。  
宿羽不可追。巖花笑行役。

空山節候晚。桃李初舒芽。流泉清淺中。祇惜無桑麻。墓古子姓盡。生意并作花。頽光入永夜。顏色誰解誇。  
人事總如此。歸途溯平沙。

四山合一澗。中有毒霧黑。回飈蕩深徑。松子積一尺。陰崖走妖氛。絕頂結晦宅。造物自隱忍。阻險俾養慝。  
自非光燄竟。雷火不敢蝕。巖空少留雲。林深渺停翮。我行憂境阻。欲假神鬼力。晏景不可停。咄哉蕩心魄。

當僦道中

稍稍雨灑塵。微微轉春氣。平原三月中。穠花豔天地。閒雲翳東至。春空亦微膩。游蜂與蛺蝶。後時識真意。所居異鄉國。微覺風土異。郊原計尺寸。物力多所棄。遙遙東歸心。欣看麥成穗。日出廬井喧。流光照虛晨。山田極柔桑。尙有無衣人。孩提率牽袂。苦語出性真。我哀道旁辭。感激爲重陳。造物息百年。未補一日貧。慘舒各殊抱。何以歸真醇。桑榆苟堪耕。此輩非游民。

南陵道中

卅里南陵路。藍輿古道閒。怒雲生怪樹。濃綠鬥層山。麥氣松杉入。禪心鳥雀嫻。還因去程急。未及訪玄關。

遊水西登烟雨亭

一水阻洄勞送迎。一石隱伏岡巒形。穠花遮馬不得過。駐馬下數山花行。十里復五里。乃至烟雨亭。是時尺五堆春陰。咫尺不放春山青。頽然倒影照虛壁。不雨常覺烟冥冥。風光千百年。闊遠無近情。逢山問山百不識。蒼翠複處難知名。吟聲落水開青萍。清切倒喚遊魚聽。謝公吟詩景猶在。好句剝落如殘星。沙洲芳草晴。沙岸桃花明。人生好景不久駐。遠夢忽送風塵醒。

三月十五日柳山道中

青草都愁石路幽。馬行真與雁行儔。百年親在還行役。三月春歸感去留。好景總思前路轉。名花行抱盛

年憂。此身作客初千里。鄉夢依然共水流。

文家宗祠看牡丹待同人不至

文家宗祠在何處。三十里爲停驂來。官廚待客久不至。下馬淺步尋蒿萊。桃枝兩行綠成隊。細數猶憐牡丹在。野人屋外出不窮。不看花枝看旌旒。晴鳩一鳴春夏長。兩兩點入花枝旁。閒雲白日偶然失。相與屋角愁年光。憑闌坐深客初至。草草看花畢春事。斜陽官道閭無人。重夢谿南白雲寺。

休寧道中

郊原四月雨。麥氣生微涼。蔬花與來牟。千里混遠黃。父老亦有言。孟夏刈薊忙。晨光赴東菑。晏景來鹵莊。茅籬出烟火。飯熟待早嘗。計往望始奢。取今願初償。兒童讀書歸。拱立伺旁道。青青隴頭梅。裹衣試取將。懸耒會有時。與子休驕陽。

附錄軒詩卷第三

黃山白嶽集壬辰癸巳

齊雲山阻雨

客心已馳黃海雲。天意還留石門霧。信知幽壑夜難涉。無乃山神期欲誤。香爐峯低五老高。十里雨腳嘗  
周遭。禪心入石孕奇理。虎氣逼夜森秋毫。名山遙遙數佳客。佳客曾經舊題壁。黃大景仁有戊子年題壁詩在道院茶香隔  
座許暗探。事冷他年費重憶。連宵官鼓破客眠。對此那不思久淹。吾嚮行止匪所料。咫尺自有神明監。明  
當出山訪行蹟。瀑布珠簾淨如拭。後隊還吹羽客笙。前旌欲宿幽人宅。

將止小谿遇雨

晨陰連衆象。雨勢薄炎方。絕巘風雷合。高原草木長。廚荒依斥堠。馬病厭津梁。一夢藍輿足。山花笑客忙。  
葉嶺

巖峯峩峩百尺身。刻削極處歸真淳。地靈草木識山性。石骨自瘦膚仍春。摧朽星辰動陰魄。元氣冥然室  
生白。信知太古縱森峭。那得良工恕斤尺。

唐塢

我行出谷常背日。荷葉如錢繞田出。苗荒不及野草青。穩望秋收老蓮實。野人無事愁日長。簞笠出戶鋤懸墻。田家生事尙如此。安得愁風復愁水。

山坑

山根竹雞啼向晨。催客遠夢辭風塵。柔桑翳邨出朝日。春水對戶思幽人。山川西來忽平曠。錦石都隨亂流漾。三家飛雨屋上鳴。四月桃花谷邊放。

雷津

東行出險常左顧。如夢谿山忽無路。炎天徑有黃葉飛。春水人知白魚數。薛蘿深門帶濕開。似訝空谷喧驚雷。山深往往厭車馬。日午誰看官長來。

從焦邨人黃山至慈光寺宿

歌晨雨無極。浹晦火旣濟。登壑有戒心。違原陟危理。巖紆氣森森。谷虛水瀾瀾。同茲登陟志。難令僕夫喜。青冥怵猿嘯。曠黑蹈虎履。山川夜氣足。素景沉不起。感往詎有窮。陟今遂難已。瞻峯僅前路。入寺或數里。勞生苦無暇。明復戒行李。客感一飯蒲。門荒百年杞。

自慈光寺下山二里浴硃砂泉

南郊鬱炎理。黍谷紆涼氛。真疑造化力。不足齊冬春。何茲坎離交。振此水火原。法良自不流。集渙罔測源。

巖澗理固殊。覆釜狀亦全。互疑百神居。湯沐錫自尊。留茲北戶積。盪彼南風薰。含氛不停扇。轉垢詎止輪。尋源有同愛。勞賤固不分。流香沐幽叢。積潤歸山根。調停果誰司。頗感涼燠均。我觀寒暑途。陰陽積勞薪。晨曦不停阿。夕馭詎息津。頽光燭流膏。元氣固不存。明明鑑止水。外爍由中溫。沉痾亦當捐。滌煩庶歸淳。

文殊洞

履危信千殊。積駭非一狀。晨遊藉僧侶。夕止託神貺。孤生寄危磴。一轉一翠幃。諸峯漸莊嚴。雲霞聳奇相。千繩束一縷。步窘不得放。差無虺蠶懼。已見星緯上。束炬人巖竇。捫壁類古壩。聞呼數前踵。怯響屢後望。峯形覆空釜。口缺人遠亮。翻疑造化力。至此斷心匠。留茲胚胎質。攻鑿至久曠。陰泉滴虛房。乳香流佛藏。持梯抑何晚。升陟固不讓。憑崖步初懾。出竇神始王。回瞻北斗光。空濛永相向。

文殊臺望天都峯

茲峯九百仞。積厚撼地軸。青冥阻元氣。久視眩羣目。危峯閃虛聲。冥雨隨所觸。回飈蕩遙紫。倒影虛衆綠。東南此分際。層累不厭複。元黃彙江海。一氣轉澗谷。云茲出雲霧。藉以被慘黷。虔衷合神符。忽值峯頃沐。連陰阻卑眺。展昧引高矚。我尋輿地志。藥物此最足。明霞積松膚。華星綴芝肉。遊蹤契元朮。居人餉黃馱。陰晦理鬱盤。宵分展幽燭。靈區尙能駐。徒侶不更速。終當上孤雲。冥心契亭毒。

夜宿文殊院



客行無朝昏。百里積芒屨。遠阿詎成厭。履崇信非遽。名標恣屢盼。猷妙寡衆譽。詎少一寸陰。卑生諒難據。枯蓬逝東轉。陽烏慘西馭。猷鶻不一鳴。孤雲總成去。犇湍響初雜。巉巖觸成仆。居人持火照。洞黑訝虎踞。回崖出深林。冥坐悄衆慮。峯明佛鐙見。院古菽黍具。猷寐不敢言。晨將戒徒御。夜起登蓬萊。鳥看日出不見一名。僊掌峯。

成此猷往心。孤猿屢窺戶。聞鐘念初覺。出寺僅數武。沉沉壑光斷。荒荒白雲阻。昏晦持一鐙。幽林變溽暑。流星掌邊下。宿羽巖際數。朝霞信清華。殘魄虛卓午。坡回屢心掉。峯中始軒舉。盪此衣袂雲。還成吳會雨。沿韃草抽蔓。絕壑風振緒。亦感筋力疲。孤筇設迎拒。誰行深谷中。冷冷出踈語。

蓮華洞避雨

雷鳴山幽幽。電轉谷爛爛。峯前十里雨。引勢殊未散。韃餘鳥道喘。路豈猿穴憚。棧巖此其一。盤礪理孕萬。頗疑雨工居。陰晦若未旦。流雲聳虛聽。交枝阻幽盼。詎寡向日心。愁霖已成慣。昏霾悅山性。塗泥積神歎。去惜蕙草衰。留成白雲縮。單衣念徒侶。空谷屢犇竄。中峯雨稍微。攀條上孤幔。

冒雨登蓮華峯

薄蘿無天風。積氣晦一山。鳴泉不知方。出步冒險艱。去景炫谷中。留猿響松間。稍霽卽復蒙。但覺草露環。流雲合山崩。激電與谷還。中峯束諸標。呼吸競一關。驚枝不留禽。振翮響已殘。回崖雨初昏。絕頂日復殷。

荒荒阻東南。沉沉盼區寰。名都以歸天。帝命不敢盼。止壑內景虛。出表外象殫。羣生有芟除。芝草簡不繁。回瞻鬱千盤。徑絕不得攀。獮升信堪憂。勇退誠知難。

自文殊院下雲谷寺別休寧戴霖

臧巖尠流光。出壑寡積陰。涼暄本難齊。草木各有心。峯明炫朝芝。道濕茂紫葎。感此向背途。感欣頓殊襟。不惜巖岫回。成此灌莽森。十里遠深湍。引領望遠岑。余褰鬱紆多。吾子饑渴深。積瘁已浹旬。寒暑詎不侵。君其表藥物。贈遠余所欽。途長入雲荒。景慘帶谷沉。明發各異馳。誰可慰積忱。遙遙寺門鐘。沉歎勞相尋。發雲谷寺

豈不願積淹。離陽不停晷。君看密葉上。陰陰候禽改。朝霞綴春鮮。夕景被夏采。深茲曩哉念。復恐後者悔。觀魚入幽壑。看鳥擇爽垲。峯離自成嶽。川斷不入海。以此望遠心。山川庶能待。前門戒五兩。慘戚僕夫殆。奇標信觀止。孤懷有專美。

慈光寺觀明鄭貴妃所製袈裟

老僧破衲生春風。褊褊如雲降九重。九重鬼神識真意。監織萬縷霞光紅。霞光紅逾出川日。內府珍奇此其一。三番宮女催繡遲。一騎中官入雲疾。萬人集福歸一人。神器已曳空中陳。祖宗朝曆自有法。欲假佛力回明神。嗚呼乾寧宮中職何曠。天地兵戈開甲帳。東南織造苦不支。一半今歸法王藏。當時恩重煎孤

僧諷經朝夕啓大乘。披衣入座祈冥福。日月已暗長明燈。滄桑一百年。遺物猶久存。黃封鄭重貯匣底。尚  
謂此出深宮恩。我謂陰謀本無用。玉合銷殘字龍鳳。建業山川不出雲。洛陽宮殿今如夢。劫後袈裟未作  
灰。嶺雲窺戶野猿猜。長生枉向空王乞。不見秋風思子臺。

黃山松歌和黃二韻

於虜恣匠不可逢。擁腫拳曲無春容。乾坤一氣轉巽艮。斯石爲石松爲松。松華不承霜雪餘。石妙欲出膚  
腴中。中臧元氣蘊雷電。火土石皆從同。神祇千年愛護一介則集吉剝則凶。吁嗟靈境與世異。太古本  
遣九泥封。地靈藥物溢丹井。帝憫黎庶遭鞠誦。中橫巨石忽裂一。精液已漏無由縫。卑枝無言入樵斧。合  
榦已破纏交蹤。流傳世人不解愛。詎有蒼翠蟠心胸。裁枝屈盆恣糅矯。輦石劓骨工磨礪。山川一朝物性  
失。光怪已去神不從。其餘巨者庶免劫。肌理入石無初終。山花分紅極窈窕。幽草判綠何蒙茸。含苞不虞  
神鬼洩。落實分遣猿獫狝。我知畫筆不得到。只有顯晦無春冬。驅除極感造化力。早以魍魅投寒空。陰崖  
點入勢益陡。南北向背皆從峯。根株偏能孕靈藥。牙爪誰識非真龍。我行十步卽一憩。樹亦接引如朋從。  
理奇終恐化作石。轉運始信非人工。

同邵進士晉涵尋益然大師塔不得

大師裹足褊襪衣。佛手曾殺千熊羆。飄然來歸竹牕下。野鳥入掌呼晨饑。浮雲白日忽一轉。粥魚聲長鬢

毛短緣牀鼠怯劍氣腥。隔竹猿窺箭瘢滿。旄頭星落白虎傾。亘亘宇宙當銷兵。海濱招魯豈同調。午日弔  
屈斯平生。於虜男兒生爲冤禽死作佛。生憶名山死歸骨。天都成雲盪胸熱。上升爲星下作石。枯殘姓氏  
何足惜。自與此山同始卒。

贈邵進士晉涵八十韻

伊余少遭疾。廓焉昧趨承。聞言善可師。百里欣擔簦。夫子導前路。笱河先生。饑翅摩秋鷹。陳編始相習。衆義恣  
轆轤。迷津不逢沮。浩海愁難溯。夫子謂我言。師友善者登。予時學括囊。賢勸惡則懲。所欣君子交。循階竟  
堪升。窮冬遇霜雪。百物志已凝。君乎遽唯唯。賤子慙僂僂。專家愧墨守。昧理咨疑丞。沿流築卑堤。引梯導  
初層。譚言偶微中。譬若矢射弰。貫珠何纍纍。古義若引繩。頗感四座中。百問亦百應。我竄其如何。易炭更  
置冰。自從烹平來。經史毒霧蒸。新蕪暨陳莽。誰雍千畝芴。鄒愚竟闕魯。薛恥欲長滕。秦氛更臨晉。宋虐竟  
用鄧。推之興廢源。楚失齊亦曾。觚亡不存醴。鼎廢空留鬻。尋源昧先河。識小矜于登。堆甸富陳言。得一卽  
自矜。爲儒競綿叢。守官昧殺蒸。不審涓滴微。遽謂滄溟增。如聽十五絃。小絕由大扼。殊軌偶相值。遭此震  
電馮。嗟嗟百年餘。其道若土崩。列宿爭天躔。蟲飛更曹曹。餘姚暨四明。月晦置一燈。作論偶抵牾。歷今無  
殊稱。志乖理則合。千穗彙一塋。後來羣師儒。卮言競鈔謄。私爲一家說。遑辯淄與澠。宗規旣守株。勸義若  
裂繪。不逢朱絃彈。瓦鼓還鑿鑿。逮今遇吾子。匪伊異人勝。乾坤師儒席。位置理亦應。憶予甫成童。授書契

顏曾平生師友誼。誨語常兢兢。因端更推委。所苦常無徵。如星列諸說。誰作旭日昇。惟茲爾夫子。平時亟聲稱。欲恃意氣隆。作論擬闢僧。蘆蒲及菰蔣。妒此蠖角菱。終嫌毅力薄。十載少所憑。抑聞爲山卑。道在如月恒。寒蟲晒陽雁。晦羽悲羣蠅。啾啾覩百鳥。斥此垂天鵬。君子審所自。不懼世俗憎。岱宗從東來。羣山失峻嶒。途長有如年。詎敢跬步凌。我裏一篔土。欲補邱與陵。使彼後世言。淮水支分凌。逢君記前時。退若無一能。汪汪千頃波。久之不改澄。人言大羅天。羨子健筆凌。君時一回首。引領瞻觚稜。回帆擬著書。鈔殘剡谿藤。枝條千百年。貫之以巨絙。有時一傾吐。譬若火上騰。童牯競癡黠。俱欲磨以肱。聞言舌不下。几在詎敢凭。回知誘誠善。連少間可乘。謂宜藏名山。後有作者興。我欲書緒言。愧乏一束縷。不然別君時。置之在行滕。秦蕪日以深。見此觸石鯨。炎飈日以酷。見此鳴秋螿。風裁此吾師。敢云誼則朋。相期事黽勉。道統開雲仍。我觀古師儒。好修嘗受初。後來成醜正。規員競磨棱。含沙旣沉骨。切膚詎知癩。引獸俾決籬。貪魚致亡罾。終當憂迷途。曷不大道陞。我欲家置喙。苦裏誰共饒。一綫苟有在。誓當廓之宏。君子有贈言。鄙人謹服膺。

次韻

邵晉涵

夏安月在塞。辰輪三角承。我初來姑孰。夜解雙縞箠。是時月生霸。霜氣搏羣鷹。見君廣座中。風飄幘車轍。詞源沛溟漲。泝卻海可測。探裏出歌詩。古樂三階登。用陔棧以間。克壯鼓得懲。異才蹴挺出。軒鶴從

朝升因緣比舍居。朽著占合凝。予方病啓窳。旅魄愁僂僂。縱有鏗鉉音。不得喧聾丞。君持五色筆。解贈三花層。引綸貫史事。往若矢決弮。繼徽準經義。古訓相糾繩。聞言自跡屑。瞪目不敢應。徐觀謙謙裏。舒卷一幅冰。矯然秀楚質。不遺薪與蒸。吁嗟瓜園後。大道理榛芴。火燎勢中裂。川沸氣上騰。淹中述游夏。棘下保杞郇。枕膝授菱滋。祕義得未曾。栗階不泄事。誰辯菹醢胥。張圖味東西。木豆雜瓦登。秦延廣師說。煩言亦可矜。敷陳若稽古。志豈邀祠蒸。高密彙羣言。屹若堂墻增。中聲定律呂。候氣得互摑。誰傳聖證論。異議相削馮。清言繼鸞起。防涖俄騫崩。冥心從臆決。謠語終嘗嘗。蠖老自纏繭。蛾昧欲撲燈。班生譏祿利。揚子嗤名稱。變本彌加厲。一決頽溝塍。陳言強皮傅。百手爭鈔謄。汲古資深源。曷不泝淮澗。飲必戎菽稷。寒賴裘葛繪。六經出土苴。絲竹綿清鑿。百心挽之東。獸力健者勝。束身絃誦間。撾折理亦應。逡躔正昧朔。圭欒傳高曾。旦亡利牯脫。夕惕懷冰兢。不逢澹雅才。微言誰與徵。闔闔春風來。朝日丹霞昇。江南山水窟。烟蘿被盤脩。青山破風雨。暝色延枯僧。西峯屬東阜。分簇尖尖蕩。跣足踏流泉。蟠木曲作馮。鑽窮蹊轉仄。石仆徑絕恒。長松落鳥嘯。草潔無棲蠅。援膠跨長脊。巨獬拔海鵬。歸攜素石一。獸愛人所憎。去作黃山遊。氣欲超峻嶒。黑雲壓素練。深澗一木菱。山花大如拱。俯引松拔陵。縣霤穿青崖。別竇通陰凌。躩空隻手易。絕險一躍能。夕陽開天都。灑氣浮蒼澄。諸峯梳合杳。爬剔瘦骨凌。別尋蓮華遂。華應峭出稜。敲枝下勾曲。絆足疑藟藤。急雨侵回轡。瀑卷版斷絙。沿溝下雲谷。迅甚快馬騰。悔不老巖

岫枕石拳其肱。逝將遊十嶽。志在力可凭。知君兼人勇。果決超先乘。願以嗜學心。望古道然興。與君結  
綢繆。投貯報以綾。今君賦歸省。殘暑收絲滕。吟篇溢篋衍。光彩輝文鯨。江蘆繞紅菱。岸柳嘶涼蠅。秋風  
已可襲。矧此別友朋。川衢愼起居。執袪語頻仍。恭聞蒞人言。好學爲社祊。山川豈云遠。吳越一葉棧。伊  
余陳檢律。結體多疚癘。遺文思網羅。穆漏張缺罨。期子事箴規。引我從善陞。在遠謚日篤。內鑒同祇儻。  
泰岑積土埤。基鞏業自宏。物恒垂典訓。君其縷厥膺。

十九日遊齊山偕同幕諸子

吳生頭蓬髮偏寡。五旬一出如犇馬。厭煩不隨朱履客。逸興早弄僊壇瓦。東郊堤長竟三里。列騎傳餐走  
其下。須臾合隊簫鼓鳴。濃綠山光淨郊野。羣公翩翩盛裙屐。賤子悠悠愧都雅。青山正銜郭三面。當杯不  
言我心寫。半坡盡隨巒氣入。高閣總與湖雲瀉。沿谿草暖屐齒回。出屋花濃袖香惹。茶杯當窗客思靜。我  
行看山願求假。捫碑自同蟻升木。伏險人驚鼠覓社。愛山山亦識真意。合影回光向松根。山僧勸客顧不  
停。獸木瓢傾復難捨。瞻西白日忽不駐。古栢含蒼谷流赭。歸路誰憐匹馬遲。一堤楊柳風瀟灑。

遊九華止一宿葬

西沛百里江。東照十里郭。巖光溢郊野。黛色轉澗壑。侵暝走山店。馬首青欲落。羣峯勢中斷。深竹補翠幙。  
石頂一寸光。離雲自噴薄。愁霖甫歸澗。山月已在閣。草香聞鳴蟲。松聲契歸鶴。心期東走岱。誓欲南赴霍。

愁無裹糧具。十載空宿諾。茲山暨黃海。數郡秀盤錯。對此石骨逾。危峯憶蓮鍔。歡游念旬日。久與猿狖搏。孤筇半生事。寧勞四禪縛。齋遲殿前磬。暝戛巖際鐸。撫枕不得眠。雷聲殷遙嶂。

自一宿莽至中峯

踈鐘動蘭若。日華在朱樓。睠言視吾徒。明發不與儔。出屋始見山。啓戶礙碧流。延緣上層阿。竹密阻且修。寧知高峯雲。出處尙未謀。回瞻及林泉。一金碧稠。居人香火心。列屋無平疇。雲仍五百家。晨鐘炊烟浮。朝餐款伊蒲。一飽未易酬。五月山氣涼。江聲拍林陬。誰能持回光照。此絕壑舟僧臥不復言。長廊繪滄洲。天臺

中峯抗佛殿。累累數百級。人攀鐵鑱竟。千尺復起立。飛泉走巖竇。龍臥未敢汲。初程事牽衣。猿獮步難入。同儕去百步。顧視不可集。履石石欲下。轟瀑勢踵及。勞生幸出險。且復眺原隰。人言天都雲。百里光可吸。支筇暫思憩。復與孤僧揖。山月出白扉。盤飧幸粗給。僧雖資半被。骨冷起膚粒。林深巖氣重。蒸此簷宇濕。空山五月中。水寒蟲尙蟄。挑燈夜難寐。窗戶坐補葺。聞鐘百年心。披衣出遊急。

東巖

拔勢飛鳥外。形奇覆樽壘。肩輿折層梯。客到花亦開。僧房壁流泉。石屋架古梅。回瞻百尺餘。乃動隱隱雷。諸峯漸沉西。巖雲怒飛回。一洞不獲升。千佛合講臺。山僧諷餘經。流霞燭深杯。驚看爆竹光。百丈飛紙灰。



巖花與之俱。飄飄蕩林隈。餘景綴北窗。激電復苦催。卽欲東下險。看雲尙徘徊。問蹤倘能留。把卷觀石苔。  
九華道中

近郭郭亦青。山光雨難晦。征衣山翠厚。顏色飛鳥愛。肩輿入深林。餘陽復曖曖。炎天異昏霧。高阜互向背。  
升中忌前顧。折級戒勇退。行李復載途。勞勞感負戴。平生夢五枝。十載始晤對。偶與閒僧俱。孤吟出流壑。  
半畝

半畝園前松竹虛。憶從江上慰離居。僊人閣冷棲靈鶴。遠道書來落蠹魚。臥病九秋勞問字。薰香三座惜  
牽裾。窗深不貯能言鳥。枉自傳牋及小胥。

曉泊當塗

曉色入深港。停橈問古原。人稀楊柳密。邨僻鶴鵝喧。不雨思祈社。無年學灌園。朝歌爾何意。隱隱度崇垣。  
塗行遇雨因止白馬山

不信龍山雨。還隨轍跡東。怒雷轟白馬。急景亂殘虹。天意成嘉穀。農心契晚風。匆匆駐征騎。與飯芰荷中。  
八月十四夜病起看月寄趙大襄玉及里中諸子

憶從出谷攀楊柳。匹馬西行渡江口。半月羈人白板扉。三年作客黃藤酒。涼秋八月庭草荒。山月照面凝  
顏黃。堂深咫尺不敢過。時復蒼鼠窺長廊。客有吹簫聞擊鼓。中座聽歌氣如虎。紅燭如山月不流。花枝照

眼方亭午。夫君自昔擅佳名。謝家賓從羣有聲。暖風邃起蕭王里。夜火人歸泰伯城。城頭戍鼓催殘漏。漏盡還應續清晝。置酒堂前縱客譚。題詩扇底矜篇秀。五夜江聲擾客眠。烏啼歸夢自年年。途窮久遭鬼數齒。室靜那得狐憑肩。西隣刻燭嫌宵短。我惜寒蟾夜行緩。千里誰回落月光。一壺且遣深杯滿。中秋病甚借黃二景仁飲

白駒抵隙先回戈。蝦蟆食影騰巖阿。銀輪椽斧聲未絕。破碎光欲舍山河。星衢無雲極韜采。列闕四遣新霜磨。人間華燭不留影。天戶乃輸金作波。餘光延緣照深室。顧視清切捐煩苛。巡檐乾鵲噪空閱。挂壁葛蔓纏交柯。顏山忽落一片影。絡緯滿樹秋聲多。檀槽拍板夜不足。啓戶誰聽勞人歌。金陵酒道重山積。兩歲過訪頻遭訶。榻來江北復逾月。寒鳥徒木蟲離窠。承君攜壺尉離疾。飲卽不醉心先荷。挑燈對君飲君酒。酒半惜我遭沉痾。人生少年不足慮。遠夢幾夕勞穿梭。長歌聲煩短歌促。對影起復三摩挲。江頭銀浪飛昨夜。信使咫尺愁難過。高堂加餐問未得。不寐輾轉遑知佗。感君興發猶吟哦。新詩百篇韻不譌。東方欲明奈爾何。努力且試金叵羅。

### 十六夜歎坐

我胡不樂入復出。無酒空辜少年日。張燈博塞無一錢。日入祇聽江聲眠。狂蹤還憐舊濡首。十年萬事無不有。自謂聞歌已後時。誰憐不飲過重九。中座倉遑竄朱履。客不逢時同鵲起。遠道衰人索鯉魚。經旬多

病餐荆杞。歌聲不長客不豪。東面月出墻頭高。巡檐幾雙白蝙蝠。照眼尺五黃蓬蒿。於虜歌成客何悄。月入空林照歸鳥。夜火城頭戍鼓鳴。寒潮江北行人少。須臾起舞光婆娑。百年此夕當奈何。人生會見金樽滿。只憶中年哀樂多。

江上寄遠

苦憶澄江赤鯉魚。風北吹浪夜徐徐。驚秋簾外覘辰角。惜別河梁指斗車。天遠幾州樓堞見。潮荒千畝荻蘆虛。愁心黃鞠籬前酒。不爲征人致蟹胥。

出郭園亭數畝寬。芙蓉照水若爲看。檐虛鐵馬當風檻。淚爲銅人卸露盤。飄泊梗思齊土偶。蒼皇橘化楚枝官。心知未卜瓊瑰夢。幾日堂前減客餐。

登八卦城樓懷古

海客秋驚病眼蘇。江城西上眺平蕪。頻年蘆荻生高壘。往日旌旗入小孤。天險幾曾供飲馬。山形依舊繞飛鳥。遺文虵鳥誰相識。落日征人按昔圖。

登大觀亭憶蔣大肇新

北斗照大江。江回斗杓轉。蒼蒼沙岸淨。落落長雲展。海客驚氣秋。踈簾夜難卷。褒哉念羈躅。渺矣良會鮮。離居隔年月。吾黨念狂狷。飲水共一江。誰知道途舛。君愁鄉曲譽。我愧賓座選。千里對客燈。寒光耿苔蘚。

華年事文史。獸處非所善。風潮警靈鳥。夜析吠邨犬。何當山月輝。裏人淚初泫。

安慶清水塘弔余忠宣

野人告我清水塘。日莫塘邊屢回步。雉堞丹樓不見人。坊祠碧瓦同寒戍。殘碑無文首函鐵。傳有中書舊時血。報道潮聲入小孤。靈風夜火紅旗掣。烏虜江潮翻黃海。潮紫海上琴隨伯牙死。秦不華姓伯牙。晉台氏家。僮抱琴從死。愛子同歸北闕魂。老臣尙曳東華履。當日承明踵後塵。和州遷謫感羈臣。崇碑欲紀先朝烈。簪筆誰歸後死人。

自集賢里至大龍山寄別邵五晉涵

集賢里中何所俟。忽憶吟聲越都市。秋光照眼炫客行。驚馬欲墮寒塘水。大龍山高不出雲。小龍山北侵斜曛。人生道路不成別。明日饑寒解念君。

舒城九日贈黃大

少賤猶能役親衰。不近名。避人來九日。爲客起新正。土俗寒偏壽。天心雨亦晴。無嗟村落酒。一醉感秋情。題練潭館秋月樓

野鷹圍場徑十里。野鷹落處飛樓起。長川如練不能回。動送征帆越江汜。臨波館前行客集。嘶馬渡波人尙立。樓高擬眺月初升。幽輝正與斜陽及。

歸燕曲

浮雲急景須臾變。江水南頭送歸燕。燕燕辭家北向飛。客行猶是滯征衣。幸全毛羽非人力。得傍關山便息機。飛飛訴客飄零苦。近海樓臺三易主。御史空堂夜鵲棲。將軍大樹樵人斧。重來空館雨廉纖。子弟江南白髮添。尋徧念橋歌舞地。幾家恩重爲開簾。開簾入幔誰相識。莫更淒涼說寒食。黃土成雲葬美人。青袍似草憐孤客。感今歎息重依依。舊侶梁園亦半非。尋常歌館侵花館。落日簾衣間舞衣。當時相見張公子。自謂平生總如此。百徧歡呼射獵場。崇朝走馬城西市。重門六月降嚴霜。鬼瞰空庭鼠嘯牀。輸他野雀全冰雪。記否征鴻有稻梁。一季一度還相見。顧影梁間自生羨。詎料悲秋識者稀。傷心久客逢人賤。聚散無端感昔緣。短書憔悴倩誰傳。應知桃梗流無定。海外相逢更黯然。

臯陶祠三十韻

黃屋衣裳古。朱軒日月中。九共誰第一。四岳譽僉同。大澤思神降。元臣翊運隆。陳謨歸至道。弼教本和衷。職亦勤虛聽。心期闢聖聰。曰稽符二典。欽若佐司空。永執刑無赦。羣推法至公。瘖丞初立禁。瞽瞍願持躬。瓜削看孤立。螽強敢內訌。罔朝天屢薦。三殺帝無功。父子許謀合。君臣精一通。神方歆石紐。禪已謝諸馮。雲鳥搜官紀。山龍仰法宮。趨庭原震肅。網俗自恢洪。唐傳留吁咈。羲篇續旅豐。勳將十世宥。律本累朝崇。六蓼亡何忽。蕭曹創豈工。遂令常叙失。已見簿書叢。漢典頻傳赦。流民屢致恫。以威能克愛。惟嶽始興戎。

世系差僂李。家聲混伯蟲。甄衰封未續。布起跡猶雄。禮樂雲孫守。墳祠木德終。荒原餘廟貌。古壁繪青紅。揖讓熊羆虎。森嚴松柏桐。訛方夔一足。業比舜重瞳。歷殿思成績。瞻筵沐古風。居人留宿火。行客薦新醴。氣已殊光嶽。聲還振賸聾。徘徊有餘歎。五百見窮窟。六舒道中裏古。

駐馬誰傳英布鄉。連雲古冢接層岡。將軍下策虛歸魄。亭長高臺早進觴。三戶遺民悲義帝。中原羣盜竊真王。時危莫自矜皮骨。隆準相看只據牀。儒學東岡。舊傳有九江王英布墓。按漢書英布死鄆陽。茲鄉史

突。暇聞州志。英山復有布墓。蓋好古者爲之也。志載有樊噲墓。亦非。

移家豐沛識真龍。龍起先看荷盾從。禮樂悔令元子嗣。河山初改仲甄封。興王恩怨餘羹頰。土俗謳吟尺布縫。猶有藻蘋堪薦處。荒岡車馬自從容。

胡廉使季堂地封兄嫂詩

皇帝御宇叶睿圖。季治天下光風敷。慈寧壽考依古無。聖德及嶽嵩山呼。乾闥坤圜歌載塗。轉轉殿殿仰聖模。臣職欽恤臣官吳。沐浴頓首陳烏烏。帝曰俞哉倫紀扶。父官宗伯臣幼孤。三兄兩嫂逝忽諸。臣孤無兄嫂是舖。四齡鞠育難未紓。狐來跳梁鬼嘯除。嫂前勸之讀父書。蒲筵在南服北醪。一束五兩早夜儲。臣宗無人日荒蕪。新鬼故鬼小大殊。妥以松柏覘以撫。猿鳴三聲淚俱枯。曾言事翁未事姑。饋醢酒醴黍稷。

稔。茅萑薜蕭。鬢莫蒲。壁畫福浴。兼庖廚。暢曰以榭。杵以梧。十黍爲蠶。十桑銖。內則瑣息。晨夕需。其甘如薺。詎苦茶。百年女史。乏董狐。彤管有煒。思賢姝。伊前得姓。早嬪胡。中道奄忽。天無辜。卅年守節。節不污。予手枯。据口卒屠。憂能傷人。恤恤乎。貞魄渺矣。六載徂。臣有身體。有髮膚。臣不報德。臣愧拏。粵稽在昔。禮守株。不撫不問。行路如。爲位而哭。君子儒。罷舉制服。眞吾徒。以德報德。始合符。恭逢錫典。慶有孚。赫赫弈弈。光泉途。榮以翟。菲佐以襦。臣媿瞑目。臣心舒。臣官外臺。奉職踈。蒙常錫類。報厥初。王言如綸。金石模。臣職三復。臯陶謨。

贈湯大令大奎卽題吟秋圖卷子

使君四十年正強。六年令尹官大梁。哦詩先按舞文弊。折獄早擅譚經長。吟聲滿堂意超忽。小吏抄詩腕幾脫。忽然好句落袖間。猶飽羊脾口流沫。圖中使君詩思揚。杲杲白日明秋陽。寒蟬抱枝思同永。歎鶴咽露聲俱涼。長身修髯美無度。松下非君置身處。老屋谿山北望深。柘城士女南歸慕。我謂使君德在人。滿意何不圖陽春。商聲近殺古所戒。疑似無乃傷吾民。使君軒然意殊俗。春凝于秋志初肅。詠罷寒桃露柳詩。秋光偏向衣裳綠。

雜詩

晨風集悲鳥。朝日鳴哀琴。哀琴曲難和。君子有逝心。不惜反覆彈。所悲非好音。停觴仰天歌。浮雲晝生陰。

廐馬振鬣號賓徒。各沾襟。明明喬松枝。化爲枯樹林。明明朱絲絃。徽之以黃金。

積思登高樓。樓高亦無見。北陸慘積陰。浮雲生四面。所思在鄉邑。何處屬吳甸。遊子忘歲時。誰知屢遷變。閒居數儔侶。詎無所深眷。我友亦不遑。仲冬在異縣。

曰余寡時慕。將子欽前修。邂逅風塵中。匪爲一世籌。壯志皎若霜。言遲睇吳鈞。垂聲結長虹。撫裊映清流。君持磴磴節。無乃兒女羞。我無區區心。何以賦遠遊。

今人匪至愚。古人匪天亶。憂思徒匆匆。胡爲損餐飯。君看西馳日。去者當復反。後有萬世來。誰云我生晚。陽春二三月。桃李當華滋。離居撫然悲。何以處盛時。衆芳各爭妍。前路安可知。諒非殊尤質。造物寧默私。回飈集空房。中有憔悴姿。盛年不自惜。日暮將何之。

昔余慕清華。未嘗廢犇走。聞言京雜客。年命亦有偶。一自罹風塵。棲棲笑生畝。致身苦未遂。預恐成老醜。落日窮巷中。流光照虛牖。持編映簷隙。妻孥哂其後。朝盞不盈餐。夕枕詎貼首。苦覓後世名。其人骨先朽。讀宋寶祐四年進士錄作丁亥年在崑山徐秀才克莊家見之

徐生手搆一幅紙。遠望字色昏如夢。爲言上有信國名。指畫摩挲出鸞鳳。淳熙以後西日淹。得士乃復如吳潛。百身欲贖汪制置。一語可羞留夢炎。公時策名數尤異。落筆居然有天意。已辦厓山後死臣。趙家塊肉初投地。祖宗當日稱得人。五色雲見尤非真。史家譌謬固不改。坐使咎殺誣名臣。公名首傳集英殿。玉



哲豐姿衆尤羨。蛟螭誰幸踵後塵。姓氏皆能以公見。名傳不亡紙不亡。至寶示世無珍藏。轉憐易置置匪偶。爾自天題處猶含霜。陵谷滄桑代皆有。黃冠更夢傳龍首。二十餘年世事非。一名天地寧相負。白髮簾前舊考官。慶元歸去亦泥蟠。江南求士無人薦。不愧門生傳裏看。

附鮪軒詩卷第四

長淮清潁集壬辰己巳

自淖水入淮半日至潁口

淖水流不歸。長淮極天靜。我行發舒六。十月至清潁。潁尾清我心。潁歌行復警。嚴霜岸頭重。積勢落潁井。古樹啼鷓鴣。聞聲不知影。稍稍上初月。戚戚聚浮梗。曠野無人居。揚沙極千頃。中原此開闔。寥廓少翳屏。行當苦寒月。棲畝寡實穎。星辰肅中宵。行客畏短景。踟躕冰雪意。兆始心已領。百里不可休。客程同蹶挺。泊舟潁上縣見月

蒼蒼邨樹合。月出斂腳斷。古屋儼覆甑。昏帆迫頽岸。長淮影猶及。清潁波始亂。照此千里心。淒涼視星漢。寒沙聚人語。徒侶或犇竄。稍苦擊析疲。嚴程詎更換。霜寒衣袂重。百里寡薪爨。孤客起夜吟。寒光亘幽幔。波流去不反。音響助淒惋。歌長竟誰聽。夢醒各已半。

昭靈宮祈雨詞

阜陽水國當河衝。潁汝作會淮作宗。淝茨渦泲柳潭從。六水闔絕流成壅。二水瀆洞聲洶洶。導水與水合。則漾。多時狂飈捲老葑。鱉曳蝮尾牛身鱗。尉官鮓鮪文胥鱒。三足六眼趨繒纒。蝦須倒垂尺五濃。張鱗奮

沫敢肆縱。淮神怠職。耄且憊。俾繇治水。竟罔庸。祠官屢沉。圭璧琮。帝怒下遣。電目矚。命截左耳。投荒凶。青冥赫焉。念鞠誦。割壤千里。頌龍封。龍君甲族。匪出對。戴以虬角。紅綃籠。前身作令。儒者容。宮中九男。立而升。魚鱗著身。爪縛胸。龍服被體。何雍雍。髯翁守州。德望顛。作碑刻石。謬致恭。心知其奇。不欲攻。春享秋享。陳鼓鐘。瓊殮玉。饗酒百簋。三歲特間。一歲縱。云官敬神。神惠饗。沙潰潄流。俱淙淙。頽森龐。蠶臚。霧靈。神實有術。能彌縫。當年闢宮。豎楔樞。越六百載。猶崇墟。披圖揭來。值杪興。怪事咄咄。欲起訟。無何靈官。鼓逢逢。神欲索食。覓里壘。側聞災荒。懼尤兇。麥枯而腓。樹乾終。其雨其雨。思靈零。神縱有食。慙禱饑。我來龍穴。追龍蹤。將巫祝。辭里具供。有禱而應。斯真龍。

歲暮急葬歸里率倣述德抒情詩一百十韻呈大興朱學士

獸客星回紀。長歌漏轉宵。巢將辭越燕。跡本類吳藻。草木心寧死。山川境屢遙。躊躇寒暑易。承疊宿離昭。月令先嘗稻。園官已薙菽。回瞻將集霰。頗怯已涼臚。生計覓緣木。游蹤諷荷蓀。未從箴尹戒。先向兆人泐。惜別當茲夕。銘心匪一朝。輪還開芻爽。嶽首覩嵒窈。姓識南離曜。名隨北斗杓。無雙才已擅。第五譽尤標。早著金門籍。遂趨紫禁朝。黃鐘八風正。玉律四時調。內苑親書敕。中官屢賜餽。門聯兄弟戟。葉擅祖孫貂。職本司青瑣。班皆近碧霄。衡持分五雀。鵠設中雙雕。暫輟詞臣筆。來登使者輶。載書聯十軫。導節建重喬。首以專家學。同賡盛世詔。經猶疑漢壁。論欲出秦燒。積器歸鎔冶。儲才任琢瑀。人文原冠絕。土俗懼輕褻。

獸力將持鼎。中聲屢辯讜。篇留三殿壁。禮議百庭燎。六籍資根柢。羣儒彙穆召。叔孫終拜雅。季子願觀節。  
漢運開文景。周興啓誦劍。門闈欣集胄。廟寢更懸諄。已有同聲應。咸回捷徑轡。好奇寧破冢。著論述園橋。  
義切旒垂瑱。言繁袂侈綃。蟲魚猶闕略。蝌蚪孰摩描。識字愁皆誤。遺經欲並彫。文當增楫楫。職敢獻芻蕘。  
時奏刊石經 議黜孫炎黼。功旌向栩幪。檀梨原雜識。萊棗待精救。洪範寧詳圍。輸入未注掣。音非離跡象。言或  
誤風謠。滇滇源思正。閔平寵詎邀。書亡傷木簡。韻失亂言籥。釋草偏驚疎。持衣欲澣綸。工師難教巧。心匠  
盍深樵。禮曲毋喧狗。辰嘉幸捕梟。朝因庠序重。俗恐姓名剽。志豈思求祀。功還著不裊。天從牛宿兆。川向  
尾閭澆。聽匪無充耳。言當置視瞭。商棲阿閣鳳。未假泮林鴉。夫子方垂矩。諸生各建幪。才原掄上下。質本  
辯莊佻。雖禘全蒸蔚。明堂半體筮。卑心同啓牖。高會幾升廩。史筆難參夏。書篇或受量。何期翔鸞鷲。亦俾  
寓鷓鴣。臥病心難守。恒饑面苦飭。九三林卽鹿。十二草衰蕭。本乏當胸鑑。甘成折足寮。程能唯粥粥。出語  
任曉曉。亦感飛而食。時還歌且繇。中江縈咫尺。南嶽望周繚。虎節愁逢魅。犀鐙或照蟊。野花顏種種。卮果  
實鹵鹵。語愧能言鵠。行遲獨足虺。齋糧惟飯朮。采藥尙名菴。徑窄唯容屐。峯升更製襦。屢陪登陟險。私喜  
勝遊饒。駕每憐騏驎。車寧載歌僑。年光看電轉。爲客匪蘋飄。邑小絃歌古。途長旌節搖。名區饒杞梓。多士  
比瓊瑤。有象將趨古。無方可止囂。里流烏鰂券。鄉有墨尿驕。谷信愚公徙。山疑衆煦漂。飛蓬根豈直。佳種  
穗元刊。一再風初警。紛紜俗屢刁。師門雖戀棧。畏路敢揚鑣。重以高堂疾。兼之予羽瞧。行將捶瘦蹇。歸卽

趁輕橈。去住皆承澤。裴回尙致招。感深徒惘惘。溯別自迢迢。已卜先人壤。當還舊宅僑。蒿萊仍待剪。松柏懼先凋。痛切周虞殯。歌聞楚大招。冢中銘自古。曾爲先人誌墓篋底蠹難銷。書卷終歸兆。衣裳欲設衷。移家從地歛。置塚傍湖洮。蓬室先孤范。蘭臺未受超。遣雛封始就。君子澤寧消。鑲羽猶存翮。離弦乍反韶。人爲推甲子。運或值元枴。眇矣孤生蒂。悲茲未秀苗。師恩營飲啄。色養遂箠瓢。苦志憐張逸。名篇送應劭。敢幾堂闢。奧先認樹爲招。止目窺全乘。覃思獲數條。余裏方若戚。衆口抑何哨。總覺蜚輪捷。寧同雀競越。夏臆橫蟬。竦寒牖。挂蠹蛸。永守三季艾。忘稽四月蓼。盡期心出竅。不愛斗無料。養志壘陳坎。酬思劍出橈。行須懲畫虎。歸及見迎貓。傳有膏盲守。言還肺腑要。臨流無玩水。大海願分潮。

山行

昔我不樂思幽眠。名山讀書歲月遷。明明此言挂人耳。皎日作誓心神鑄。山靈有約故不爽。春夢吹我來谿邊。名花馱憐後時至。光景已覺非新鮮。空山沉沉集往意。白日杲杲愁百年。人生買山安有日。僻壤棄處皆堪田。還思親在不克遂。欲徙雞犬來晴阡。看山一言願相約。吾誓與爾無間焉。

夾山館明洪武中設戍于此以衛鳳陽。

鐵鎖亘地維。金臺固山輪。雄瞻淮服奠。秀攬江介錯。絕險此一隅。巖形恣鑿鑿。幽屨旣重置。繡壤始平拓。附蟻徑已升。棲猿樹難托。泉靈蘊真苞。澗響撼虛橐。維南時天險。立表著神略。起脉引伏流。陰林阻炎爍。

危茲谷神徙。險絕成壘削。文成計苞桑。英謀尙依約。埋垣斷兵氣。篝火警棲鵲。遲回下平岡。暮天吹雨脚。  
寄鉛山蔣編修士銓時主揚州講席

我年十五知讀書。廓然二十東出遊。東遊見君壁間句。一室偃臥三旬留。當時止識詩句好。欲訊君名識君少。客有傳言姓字真。生今恨不知名早。君辭承明得幾載。我復饑驅客江表。先人薄宦空數州。愛客囊傾室難飽。相知敢謂異存沒。屋冷烏啼跡疑掃。門徑猶紅手植花。殯宮自綠心傷草。一生豈識劉孝標。岸然爲著廣絕交。芒屨引入使者署。蹴破世論容蕭騷。循河先生吾徒零落有誰語。豈意逢君復相許。病馬投閒感牧芻。哀禽入夜傷毛羽。君詩軒闔非一體。君貌蒼然具憂喜。貧賤相看總路人。途窮歸命緣知己。離堂夜半酒乍傾。我瞽身世非忘情。譚深不盡百年意。努力尙期身後名。握手相知各草草。明日饑寒復難保。百計終慙奉母疎。一生忍謂依劉好。憶昨高堂念客寒。蹇驢風雪勸加餐。羊裘奚奴復付質。去冬余急葬質羊裘贈行雞黍拜母欣承歡。識君三代總好客。才調諸郎復超忽。有日重尋竹徑人。無情不問揚州月。兩度書來問塞鴻。故人踈節爲飄蓬。應從秋月思元度。更向青山夢謝公。

附原贈作

蔣士銓

鐵崖樂府容齋筆。萬口爭傳洪亮吉。誰知二十五年身。一領藍衫尙垂翼。尙書五世爲清門。幾人眼識司空孫。三冬足用信天稟。四歲早孤稱稚存。訪我蕪城說經地。開閣延君感君意。衣留黃海萬峯雲。篋

守冬官一篇記新詩光恠森寒芒萬鈞入手能挽強月斧雲斤鏤肝腎出入韓杜爭軒昂卷軸填胸字難糞學士愛才心獨苦謂竹均先生爲憐松柏少青邱特贈泉刀買黃土堯夫元振誰與儔戴暨丁廣難復求悠悠富貴豈足齒寒潮欲打空城流酒波亘亘射眸子風雪殘年渡江始明朝馬鬣寫新阡別酒三巡君可起

次韻

彭元瑞

以硯爲田耕以筆。失得隨人歲凶吉。男兒貧賤慎所因。莫假俗流生羽翼。洪生投試款我門。甲乙肯附榜末孫。補考例附三等。茲特置一等。手持半減一刺字。主人罷去留書存。謂竹均前輩使者堦前幾尺地。吐盡胸中千古意。落筆根源篆籀文。滿胸堆塞娜嬛記。哦詩作作更有芒。寧失不工句必彊。殘脂剩粉此間習。得之足令氣激昂。畫地作餅那可糞。何人下士知其苦。我嫌令甲不敢留。食汝安得乾淨土。袁二標格今無儔。謂春圃意氣鍼芥知相求。必能爲汝讀書供。此士詎比錐刀流。作詩代簡蔣夫子。介紹其間自君始。兩君不能致一客。故人可以三歎起。

次韻

錢維喬

丈夫家貧一投筆。豈曰無衣安且吉。誰能豁眼出雙丸。立使登天生八翼。故人陋巷席作門。窮經有若雜誦孫。頻年犇走挾書策。歸來寸舌誇猶存。大江左右掄才地。使者憐才發真意。中緣三徑作曹邱。各

寫長歌當奏記。我昨夜見春星芒。頭顱加長學不強。東風打窗氣浙瀝。曉電墮瓦聲低昂。故山黃鵠不可賚。命託蒲颿敢言苦。亦知雞肋是人情。便得豬肝豈吾土。與君負米爲朋儔。劍氣何意識者求。人生磨礱在千古。富貴真作閒雲流。作詩西江剛才子。愛君拔君自隗始。邢溝烟水暮潮生。聽子清吟鷗鷺起。

自穎水入淮

我爲穎川謠。忽與穎尾別。君歌月暎清淮流。不識孤蓬已飄雪。長淮岸頭柳樹斜。短棹繫岸驚棲鴉。可憐人鳥共淒絕。天水闊處難爲家。操舟者誰北風勁。十五吳姬寄身命。風波到眼不識愁。妝罷只照長淮鏡。淮口阻風戲贈吳二蘭亭

同行十舟總值風。風吹一舟住南岸。草頭白浪高接天。反使驚禽入舟竄。五更顛風吹向晨。吳子作詩寄餓人。僮僕饑瘦不敢語。賦命本薄人何憎。我舟如山集官渡。倉卒誰能更相顧。始知生也善諷嘲。作者偶值蛟龍怒。

渡淮

長淮千里何溯洄。遠自桐栢之山來。洪纖巨細絡諸水。彙此四瀆通八垓。東南巨浸古所說。原野氣盡巖巖。巒回。傍淮田下賦亦下。生計恃水無餘財。長年拏舟送行客。楚女擊楫中流哀。雲浮三時蚌開合。水結五



色龍胚胎。陽嘘陰吸。有至理。水上白晝。層宮開。要令幽險。各有所造物。大矣何容猜。全淮得失。繫吳楚。寶濟萬馬。曾銜枚。王公設險。古不廢。破石置守。高崔嵬。牛羊在野。牧馬散。淮水蕭瑟。山童咳。下流河勢。苦相奪。二水若合。坤輿頽。支祈力屈。匪至此。河伯好事。同臺駘。至人視世。本一轍。險絕不異。坳堂杯。朝帆開塞。雨迷浦。莫雁戛水。陰成堆。好風明日。送舟疾。可至禹廟。傾尊壘。

禹廟

禹都安邑。今有墟。亦越五載來。省徐南。巡重瞳。兆權輿。衡嶽闕。遠非人居。龕山作國。淮所豬。會水爲澳。戴石岨。乾坤赫焉。集衣裾。帛纁黃元玉。瑤璵四岳九。牧行銜銜。我稽職方及州閭。九千六百數已餘。要荒胥爽。感化潛。亦職玉帛同。越起。來同翩翩。合萬旟。疇若朝日輝。瓊琚明德遠。矣衆所懸。夏小正。刊月後。余實集萬國太史書。予嘉乃功。有獎譽。享以歲。衛以周。廬誰何。牧豎矜智。謂掘強溝壑。同蠱蠱。終洿其邦。作厲虛。汪芒大人跡。迂俱。天軒地闔。行步趨。帝資其血。成川渠。崇崇者陵。骨難昇。尼山讀書樂。只且千年能。詳骨專車。博物詎止知。夔魑。峩峩鼎成。誰敢舉。惶惑百怪。行人吁。夷堅誌之亦款。歎。白日屏息。冀子寤。侈哉黃檗三足。挈好事。河伯煩吹噓。稍恥刻畫來。鯨吐。男丁女壬。生剋除。頽然空山。夢其初。一首九尾。勞卷舒。服妖德。聖顏則好。留之三日。非躊躇。呱呱者。生實國儲。狐鳴涉波。牽子祛。後此一紀。能歸予。白魚身長。倩悞悞。偃行而前。若籬籬。晝昇白壁。夜揭檠。三來闕家俗。都祛。太室卽立。神人胥。民顛于巢。下則漁。予口卒。

瘖手拮据。熹熹赫赫。天地爐。十日照野。枯櫟櫨。滔滔者流。其涸諸。鰲輸其首。難始紓。龍軒其類。不足屠。神  
知逃誅。值孟涂。女媧華星。綴衣袂。束縛烏鵲。羈蟾蜍。佐子木德。相誅鉏。淮流湯湯。未澱淤。台桑猥積。而崎  
嶇。豐年厥惟黍。與與登高曠。瞻裏古墟。大水作瀆。小水澗。快如挈餅。注澗澗。酬功欲陳。水土苴。大哉非禹  
吾其魚。

擬唐塞下曲分賦

鐵騎三千夜不停。郵亭歷盡始邊亭。沙場明月光如雪。上馬都看大將星。  
回鶻潛師夜襲唐。軍中歌舞走倉皇。健兒狎客身都死。誰向臺前辨國傷。  
將軍三箭有威名。詔統偏師出右營。昨夜凱歌齊唱捷。中原萬里馬西平。  
莫鼓轅門尙未開。援糧三路羽書催。軍中博局休輕戲。恐有兵從地道來。  
從軍十五戍三關。卽次君恩重若山。昨日使回同寄語。寒閨不許盼生還。  
射獵原南久不歸。邊城昨夜有霜飛。微寒索取狐裘著。一半征人未授衣。  
戰鼓沉沉戰卒傷。營門羯鼓更催觴。三更宴罷餘梁肉。反使烏鳶食國觴。  
屯田詔下少人家。白骨皚皚萬里沙。誰遣春風過塞北。十年戰地盡桑麻。  
射虎翩翩右北平。生來李廣殉功名。將軍廣食征人喜。躍馬原頭伺賊兵。

玉門關外曉霜寒。白草黃沙路鬱盤。有詔征人齊解甲。狼山祇取地圖看。

陳生漢陽自楚南歸以臥雲僊子圖索題

陳生昨來客北衙。楚語對客常嗟呀。飄然六合無室家。遠夢忽幻雲爲車。顏枯想寂夢則賒。白晝數死窮幽遐。瀟湘沉沉月交加。十年夢斷楚水涯。愛而不見古所嗟。繪爾靈匹餐朝霞。按圖以索願恐奢。洛妃楚女來些些。美人南國訟鼠牙。誰爲閒情壁微瑕。歌詩一篇須拜嘉。彤管有煒詩無邪。

全椒宿江氏園亭

到來芳草莫。梁燕語前期。朱門風雨黯。南樓晦朔移。寧知遙夜酒。復此酌前墀。蠟淚紅暉永。芳尊綠意離。塵封夢猶澁。波響意如疑。莫下聞歌淚。吾生亦已疲。

署齋東隣

夜長漫漫星爛爛。老嫗哭子常及旦。尋聲隔竹慘不窮。原野蕭條若絲散。喉枯入夜不得高。對此三夕爲憂焦。哀音慘埋壁間火。尸氣亂薄墻頭蒿。我行齋居理不怵。亦覺陰森動心魄。城頭鼓罷荒雞鳴。荒翳還遲日東出。嗚呼哀樂理本均。安得對此無酸辛。編書堆案勿復陳。東壁倒置新死人。

遊醉翁亭

一成坯。再成英。一再曲折山以名。注川曰谿。注谿曰谷。谿行谷行水聲複。蓋與背山始入山。水聲已往何

時還未登醉翁亭。先繙醉翁操。山禽飛還水禽噪。言尋醉翁石。更誦醉翁文。醉翁賓客不可見。山石欲雨  
谿生雲。咄哉文字亦有靈。能使此山此水無餘情。我觀翁時植梅喜且驚。猶復夭矯屈曲如龍形。春風蕭  
蕭壁間琴。脫千百載無知音。吾知山悽欲謝巖桂色。水咽復斷蛟龍吟。醉翁琴。琴喑喑。乃知醉翁待我成  
古今。我歌一篇翁賞心。滁山高絕滁水深。

贈吳秀才蘭亭

吳興四十無良朋。讀書千卷羞名僞。上官知名詢邑宰。一語偶及先生憎。雪谿谿頭尺深水。忽然長羞別  
妻子。把書數籠躬苦辛。低頭作客事世人。世人聞言共相侮。先生於俗未言苦。求友三時感寂寥。縱譚一  
夕窮今古。衙齋日出多晏眠。先生著屐哦詩箋。人歌匏材與爲隱。我誦葛屨箴其偏。歷陽南來共旬日。數  
見明珠筆端出。私門總欲輕腐儒。公論誰能賤經術。先生雖偏意豁如。前路謂我休躊躇。眉低於身何日  
舒。努力得閒還著書。

黃大景仁過訪作

十日不束帶。束帶爲故人。艾家橋下騎馬別。過眼已覺無餘春。男兒在世空作客。把臂兀兀羞儒巾。我爲  
書記纔一月。已被青霜減顏色。興來解髮還讀書。肯學兒童事修飾。朱門沉沉酒肉堆。枉殺落花埋古苔。  
臙邊靈轍三日餓。一語不出防嗟來。君知我愁憐我病。走語倉皇不能竟。雀鼠山花本合巢。螿螿井李還

同命長安少年君弗嘖。一生富貴能幾旬。看雲已見白日昃。照鏡自覺朱顏新。江東風光復遲遲。江東櫻  
筍行可思。吾徒行樂有終始。莫恨不及春風時。春風芳草梁園改。全盛應貽後時悔。勸客休嫌夜漏遲。埋  
君尚有青山在。綠鬢婆娑照眼明。花枝須看酒須傾。杜陵忘情任榮辱。李白與爾同死生。送君歸。視君影。  
烏帽欹斜玉鞭整。客裏爲歡事莫遲。高堂白髮行應省。我客南州無世名。故園有夢且歸耕。男兒終自戀  
知己。手把君詩縱復橫。

寧國使院望敬亭山

曩遊不可追。茲山亦秋雨。郡城復蕭瑟。悽碧照簷宇。理賞感鬱陶。塵遊詎矜翽。萋萋值時卉。晰晰警羈羽。  
久客中路遠。褻人蹶行踬。微衷匪無願。緬此前慙矩。登陟理有窮。淹留念誰取。歡塵旣星散。愁蹤匪蘋聚。  
朝吟眺孤雲。暮烟瞻斷縷。徒倚佇後來。孤衷酌邨醪。

題南樓

東山罷絲竹。南樓起文讌。風雅嗣哲孫。謳吟滿芳甸。郡齋固清暇。相賞有羣彥。守寂境已淹。忘遊跡欣便。  
陰陰藤葛阻。鬱鬱芳杜薦。香草彌可思。賢蹤苦成羨。淹留文酒會。幾微哲人見。存沒感世殊。陰暉誠朝變。  
心空山水性。神驚去來電。風樞散秋光。踈英落成片。誰能知傷心。更殘入簾燕。  
欲至北樓不果兼憶黃二

讖公樓上月。復此愁中敵。春蟾已抱肩。秋輝復盈掌。層城倚危構。聳嶂結幽幌。露檻夕已迷。風軒杳難上。非無千載慕。後至已惆恍。絃疎調疑沉。屏虛夢成曩。移輝識前影。吹塵續餘想。松竹一徑深。烟泉四時賞。徒勞企英躅。復此念吾黨。幽區既神契。靈蹤亦虛往。

自涇縣至旌德道中作

井隘山左旋。鬼門日西伏。犇壑無徑波。危途有欹軸。綠邪枉矢注。蹈險脫輿輻。草暗夕已成。雲荒渺難宿。前暉尙傾樹。後響忽犇谷。車馬此寂喧。山花厭更僕。清笳發山半。戍火候茅屋。曩逢春雨深。茲來夜程蹙。悽泉墮山果。驚羽集巖竹。履坦亦有期。遵途愧難速。

度暈嶺

西陸謝日威。南行厚坤軸。積勢亦有基。尋蹤戒沿麓。人隨候蟲至。氣與秋澗肅。寒暑理不岐。犇馳念常速。華心入秋陽。慘序臨晦谷。炎衰委時卉。露澹逗巖馥。以此持贈心。傷茲遠遊目。黟峯阻中眺。歛嶺斷平陸。迅羽祇弱飛。棲猿訝卑宿。雲迷去峯迥。翠阻來岫複。履盛跡已虞。升中勢猶蓄。頽光尙綠徑。驟響匪習木。蒼然見山城。藍輿下巖腹。

題錢文敏墨竹

琅玕之竹三尺長。繪圖蕭蕭天雨霜。秋官下筆真宰泣。刻削幸有生機藏。半幅陰雲互回合。半幅長風振

閨闈老蛟玉骨木凝重。怪龍三須倒生頰。筆端天矯不自持。入夜細響生折枝。我時相思每一訪。屋北卷簾欣見之。蕭齋索句題公畫。我已題詩壁間挂。我詩公畫俱憔悴。腹痛思公昔年話。於虜執事非足稱。公也累累垂英聲。平時儒者負經濟。上馬殺賊來邊城。邊城缺莽尤無極。成功繪圖呈帝側。三時既見獄訟平。旬日更致苗民格。男兒功成氣軒豁。顧盼萬里流華日。歸鞍兀兀賦新詩。襟袖翩翩蘊奇術。十年瓜削據瀧堂。郎吏屏息趨公旁。西臺赦下額手慶。始知公力回穹蒼。公恩於人若山重。章疏流傳入歌誦。栢棟深憐一世才。鳳麟未竟平生用。得公粉本猶可誇。憶昨御題金盞花。雲霄天語偶惆悵。水墨拂拭生光華。我觀公畫頻回首。愛士如公復何有。君不見。渭濱千畝富奇材。尺寸恨不成公手。

登郡齋南樓襄黃二景仁作分韻得覽字

如何久行役。值此時序慘。寒雨亦淒其。山城復昏闇。窗虛頽宿列。樓高夜潮撼。歡緒悵景淹。華年怯波閃。非無褻哉志。念子猶未敢。憶昨江上亭。徘徊祛重摻。徒深三載約。撫志驚冉冉。迢遙別鄉國。抑鬱避讒諂。秋至候雁鳴。隆冬雪霜糝。百物皆裹居。勞人自衛感。雖餘文史富。心跡倦披覽。默客途路艱。默愁衣帶減。我行仲冬月。別子執鉛槧。千里何蕭條。平原極葭葦。狂飈振肌骨。凜冽清曉犯。身謀既難遂。榮名亦俱澹。君如念朋儕。清修以爲範。九矣君子心。臨風歎流覽。

歲暮歸里別沈太守業富李大令廷颺

陽冰篆當論。容齋帖姑孰。是州山水鄉。往事賢惹牧。幽桐繫華組。元林嘆舟楫。秋雨鶴抱關。春暄吏持牘。微吟或綠樹。靈響尙傾谷。遙余憶前徽。惟君繼英躅。遂追物外賞。屢念塵中築。游聲固淹雅。勝景本殊俗。始節餌柏松。初心喻麋鹿。頻留迹成戀。欲去情匪速。偶作勝地謠。瑤華恨誰續。臨發沈生在。廷以詩贈行。賦此志別。

歲既不我與。明當復邁征。浮雲欲何之。且指東南程。倏忽三載淹。遲回念前盟。矯首桓公臺。引領眺北城。野景肅以淒。四序各告成。嗟哉游子心。愧勿同蚩氓。卽欲從此辭。感子送意誠。吾曹勤讀書。亦猶農之耕。復恐耒耜銛。損此草木萌。陰陽蓄諸土。冒概理則榮。臨別贈一篇。子以貽友生。

寄汪孝廉端光

我昔約遊湖上山。值君此時復不閒。采菱雙漿送君返。裊裊碧波紅日晚。回船欲向湖頭居。得錢日買湖上魚。嘉興白酒亦供醉。興至懶曳候門裾。踟躕此意何可得。我奉親言始爲客。寥廓君饒芋栗田。風塵我祇蓬蒿宅。我慙短翮常失羣。別袂與君不忍分。君歸我復不歸去。去訪橋南揚子雲。謂揚秀才芳傑

立春日

頻悲寒序促。那復值茲辰。人意憐遲日。吾生重早春。川原看氣始。草木辨根陳。白髮還多病。踟躕強飯身。江陰遇邵大辰煥。



念與酒徒別。勞勞車馬間。風塵嗟鬢短。夙昔夢身閒。我意賤投閒。君才學閉關。從茲著書急。無復出名山。  
題朱子久邨居圖

君家山田圍綠池。蹲鴟千畝富不訾。夕陽野影散籬落。細細卻受東風吹。君家牧牛奴。不識後與前。牛犇十里或五里。尋著只在君家田。綠池水澆紅芙蕖。綠池水生紅鯉魚。池邊茅屋主人出。短褐暇日周田廬。君踰千億猶能儉。我得百錢應自斂。雖分菽麥未云智。得食糠粃亦嫌忝。憶昨嚴寒久絕薪。長饑高臥門常掩。祇令妻子識廚荒。不使高堂知歲歉。君儲千斛欲相贈。恐我貧來益持檢。寒窗聊復手君圖。坐對水田波激激。男兒心計亦最工。恨少黃犢趨春風。

除夕無米適族人饋薪炭至

囊空無復計饔飧。白髮相看有淚痕。漸典葛衣知歲冷。遠勞薪炭起春溫。風塵多事留吟骨。涼煖關情感哲舅。慙愧饑烏隔林住。十年啼不近朱門。

附鮎軒詩卷第五

桐廬林屋集己巳甲午

項生詩生名森

項生居雖在城邑。土室讀書常畏濕。一念癡隨蠹魚化。百歲昏同候蟲蟄。平生經籍笑充牣。妻子饑寒坐啼泣。無田耕硯亦已窮。生徒資糧復難給。隣烏三日訝烟爨。雞犬眠階寡餘粒。風霜入屋秋已凍。窗戶尙少茅萑茸。生時萬古恣冥搜。絮被中宵或僵立。著書雖自窮迹象。雅志不復工篇什。方今經學大昌盛。已闢四庫搜遺集。諸生濟濟七百輩。各付陳編日抄輯。朝廷大儒坐石渠。天下羣彥皆引汲。翁卿經樂次君禮。謂邵會元晉涵戴孝廉震手執專經後先入。生今著述非一家。萬象盤回互收拾。名卿知生薦將及。努力蓬窗勤講習。

廟東災

廟東災戒工作也。

小兒攔街言。火雞飛上天。紅星兩九墮。火雞復生卵。燭燭燻燻神祠火。廟令夜呼神擊我。一石水。半石泥。救火來。升天梯。縣官救火急救人。里巫救火先救神。救神遲。神臂落。剝膚之慘。神所樂。前年神語致廟祝。

前堂後寢匪我福。有茨有萑築茅屋。君不見西頭之廟尙斲椽。北廟買盡城南甌。烏庠一方甌。一尺椽。愚民姓氏寫未完。典衣三處輸神緣。

蜡祭失

蜡祭失。正淫祀也。俗尙五通。祀以爲蜡。

迎猫復迎虎。紈如太平鼓。妖巫坐堂中。八蜡變五通。迎神幡。不須長。高插燭。低插香。神居矮屋臨水旁。有時雞來啄周遭。犬來坐堂皇。兒童擲輒高過墻。巫前致詞。神自貶損人不知。福女祿女。無暇營其私。華堂五間列五筵。東西南北及屋前。拉拉雜雜鳴神絃。此樂與君同百年。百年長。一夕短。神留總角尙未綰。金爐吹灰墮銀盞。

洪源謁祖墓

五世還支子。全家問慙孫。野花生墓闕。古栢及祠門。樸塞吾寧忝。淵源系覺尊。所親欣絮語。燈火入前村。白首吾宗叔。黃眉入室姑。未嫌新禮簡。記取舊名呼。歷寢書留几。開筵酒在壺。爲言居處僻。燒筍出山廚。書堂三十楹。列坐盡橫經。樸學傳家久。鄉山照眼青。劈池栽石筍。裂幔出風靈。絕憶陰厓北。春濃霰亦零。重來攜弱弟。此別念衰親。山果紛相贈。谿茶采尙新。封書因問叔。勸食爲依人。儻復移家返。應知未厭貧。

發新安江

帆走百里風。收帆日初午。檣隨山翠轉。海絕數聲櫓。江蘋雖可拾。清鯽已厭數。自行新安江。罷思瀟湘浦。瞻峯百回仰。看水終日類。舵樓起清簫。深村出漁鼓。林紅匪楓柏。草香過蘭杜。卽景情已欣。思家念稍阻。崖窮樹猶復。川盡烟復補。寄語新安人。江行未爲苦。

七里瀧阻風

我行發新安。三日挂帆幅。南風吹急雨。蕭條傍東麓。東麓祇百家。舟檣共棲宿。魚蝦成小市。禽羽來棲竹。朝飲顏不歡。莫歌聲復促。遠思嚴陵隱。近憶臯羽哭。斯人旣徂謝。遺者唯石屋。遙遙東西臺。樵夫自爭逐。江山感幽顯。風物互淒肅。解纜候轉風。還看去舟速。

富春郭

富春城樓樓跨橋。曉日已入錢塘潮。罟師張網集橋外。寸鯽尺鯉來迢迢。人來縣中不識塗。乘船進縣輸官租。城門朝開出鴨鳧。綠水蕩漾遊菰蒲。宰官舟船泊江口。昨日隔江迎太守。行僮烏帽倚舵樓。候吏黃須立沙阜。收帆入郭開打衙。驚起白鷺飛蒼雅。平鋪萬瓦不得見。樓角蟲處知人家。眼中楓樹十餘里。白石參差隱還起。停舟沽酒復遠行之。字江流去如駛。富春城郭天下無。富春邑宰舊識吾。作詩却寄君莫出。宰邑知君未旬日。聞邑人汪宰斯邑

泛湖至五柳居小憇

西湖湖水清且泚。吳儂顏色湖波似。我愛回塘三百家。開門只飲西湖水。吳儂飲水復食魚。客來欲傍吳儂居。南屏山色波中綠。傍水尋山策蹇驢。

湖心亭看月偕汪大端光

汪生東來詩愈美。只惜遊山非性喜。湖心亭上三更時。一雙青瞳解看水。湖水綠欲愁。載君向西洲。扁舟來往二十里。君與明月同沉浮。

萬花樓看芙蓉

萬花樓底花無數。白玉闌干紫簫度。回塘歸燕已驚飛。卷幕輕鴻忽回顧。海棠春花不及秋。新月自遯殘時幽。簾空一畝芙蓉色。日莫踈香上曲樓。

孤山

日日狂吟不知足。林逋祠旁一間屋。處士當時只種梅。先生去後誰栽竹。苦心傳世欲誰知。尙有橫斜七字詩。千載園林休斧鑿。世人作亭同放鶴。放鶴亭側復出一亭頗礙觀眺。

寄楊秀才芳燦景仲

十五二十不可當。羨君一門雙鳳皇。卽看骨相已深穩。坐覺毛羽生輝光。去年前年識君再。今年看山復同載。喜君交友絕畛畦。共道狂歌越流輩。儷青妃白世亦工。眼底長句唯汪中。近刪諷詠事經訓。只有黃

子稱人雄。君兼二者。或未暇兀兀。孤軍已方駕。龍阿出匣。競門鋒。雷電繞身。猶角射。比肩令弟。真奇童。白日跳躍青。兩瞳朗吟已解。獻康樂。著集那肯偷。江東檀楠杞梓。期成用造物。于材自珍重。枯朽寧無入世心。千霄未識何年種。少年筆力尙排偶。前路饑寒復殊衆。著述湖山願豈償。犇馳歲月愁相送。各有慈幃白髮新。狂吟負米尙酸辛。誰回南北東西轍。見爾嶽嵒歷落人。

包山寺

沿流息疲蹤。出谷轉清嶂。林長旣丰容。寺古復幽鎮。延回橘柚色。淒颯松柏韻。餐翠禽鳥腴。墮紅谿澗潤。山僧移室火。行客戀香燼。止宿黍未陳。絕糧顏豈慍。金幢榻蟲篆。石級陷蟻陣。古佛驗始龕。洪鐘試初響。僧修具清刻。禪行孰精進。拾果竹几盈。汲泉山井近。眠遲虛梵漏。寒早識霜信。明發臨孤潭。殘蟾復深印。林屋洞

石脉引丹砂。巖形露元壤。幽奇徵道錄。恂悅絕塵賞。盤渦旣深入。覆釜不獲仰。微腥恍來蹤。捫黑撼虛象。憑湍同矢注。轉徑識虵枉。不惜口耳濡。怯此腹背響。行童持火照。驚我落千丈。萬竅爭鬱盤。幽聲盪虛漿。巢溫盡冬墊。跡巨或修蟒。金庭玉柱間。風輪自森爽。昏崖通地肺。靈跡拓仙掌。至此阻展筇。微窺見几杖。非無悠往志。轉惜牽世網。呼吸靜有聲。陰陽孰能想。泥塗久昏翳。谷口始虛朗。勝景未可窮。鐫名繼疇曩。

洞口有順治  
六年人題名。

大風自包山放舟至石公山遊畢渡湖抵莫釐峯僧寺宿

湖波連日吹黑風。雨意已在西高峯。狂蹤大笑出深洞。挂席欲至東山東。同行篙師不習船。乃以性命輕重泉。布帆三幅破兩幅。縷縷看向風中穿。石公山色落我眼。笑我咫尺何不遊。舟人苦辭日曠黑。不語攜屐登沙洲。石公山居石樓末。頽視蒼莽遼闊。扁舟徑欲乘宵去。一葉真如向風脫。虔心禮佛禱塔燈。九級照見波千層。我生譏嘲匪同調。歡喜只任同舟僧。同舟之僧來複山。半生冰雪鍊玉顏。禪心定山不定水。指顧失色狂風間。趙生新來左耳聾。目瞪不覺翻蛟龍。祇愁雪片濕衣袂。欲假酒力將寒衝。命輕舟小危一髮。港轉風收上寒月。傍山十里枯菡萏。幽境清涼照魚窟。湖山夙業尙淹留。蹤跡平生學渚鷗。兩日風狂三日醉。四更月出五更遊。

石公山

放舟來孤峯。展眺陟林杪。金鑑無陰晴。山雞昧昏曉。孤生疲竹杖。沉想入烟篠。視此一徑雲。遙遙去窮島。坤輿此微缺。石理側生巧。悟彼積勢奇。還看出林矯。危峯墮鴻翅。怒石刻鷹爪。履險跡屢傾。遵途意猶掉。莊生世緣淨。向子息機早。闢館樹橘橙。移舟販秬稻。園林尙堪宅。雞犬移自好。心賞撫碧苔。離蹤戀紅蓼。頗寔著書願。暇卽事搜討。此意孰與償。名山鑿幽抱。

莫釐峯

賞心殊不借。清晨登茲峯。晴景開遠林。嚴冬自春容。入寺尙履霜。及巔聞曉鐘。駭浪昨莫消。平波鑿千重。遙睇縹緲烟。近瞻東麓松。寓興無累懷。振跡鮮繼蹤。波平出湖田。千畝橫亦縱。沙戶復茲頓。茅籬間山農。詎必風土優。山水秀所鐘。頽仰六合間。頻拓萬頃胸。念隨飛鳥沉。思與湖雲濃。顧視待道流。佳景竟不從。茅齋樂羣憇。山果紛客供。稍留下蒼厓。視此玉檢封。

租舍

踈籬插棘護霜筠。租舍聊應絕市塵。稍喜歲時容坐客。未淳風俗愧居人。鄰童汲井窺南牖。老母梳頭拜北辰。粟米價騰生計少。笑看八口未憂貧。

雜詩

馬卿窮買賦。邢邵老作牋。丈夫非爲貧。肯作無用言。馬周客常何。封事草數篇。一朝天子知。不復歸窮軒。遇合固有期。賓主亦大賢。持此語世人。多謝俗子憐。

流波終無停。征禽詎知閒。欲以志念疲。矯此木石頑。夙抱一世心。壯歲復阻艱。東瞻織阿生。西征落霞殷。蹤跡千里餘。塵土犯鬢顏。我友亦告勞。去冬歸雪山。心跡各相審。勞勞寄塵寰。憂來非區區。白日忽匿采。一葉墮素波。遙遙亦歸海。感此去志堅。驚濤庶能待。丈夫櫻世務。百折不詒悔。立念非一時。沉吟自年載。瞻焉念儔侶。耕也任饑餒。屢空跡縱疲。遄征業寧怠。



陰陽迭回環。四序猶鱗差。草木各未萌。何歎苦後時。才短而志長。是用世所嗤。孤松託巖阿。成棟斧未施。結根百代前。詎炫一世姿。當其隱顯周。造物爲求知。智者尙遐觀。愚者空爾疑。

前車揚薦牘。後軫載謗書。丈夫名知人。何以朝莫殊。留如握中珍。去若濁水珠。識趣固不堅。因人以步趨。掩抑達士懷。尺寸詎可拘。賢者尙復然。何況一世愚。

一裘值千金。毛羽豈足供。一食累萬錢。珍錯亦易空。履盛不自持。何以處勢窮。俗奢示之儉。卽始訓有終。誰爲生民謀。一矯吳楚風。

客有雍門琴。未逢鍾期生。不審託業卑。歎欲操正聲。合樂而殊歌。哀音而激鳴。一彈賞音稀。再鼓里耳驚。持謝一世。人辛苦難自明。琴聲誠未諧。藉洗笛與箏。

古賢樂簞瓢。昔聖廉一介。信哉百世師。取與夙所戒。清修旣不飭。多藏以爲快。陳平節尤累。戴聖儒復敗。人慕莊周通。吾師伯夷隘。

陽氣發不收。桃李冬猶花。窮辰雨雪稀。麥隴未出芽。側聞深村民。生計資魚蝦。何能待來春。米價已踵加。客子念歲時。顏色不復華。憂來本無方。非歎爲室家。

落葉不還樹。流波不還源。只有同袍人。千里識本根。念我蹤跡疲。問我衣裳寒。感子珍重心。昨一傾肺肝。久客頽兩眉。顏色爲不歡。冬窮春復萌。與子歸江干。

初泊揚州

作客頻爲江上行。寒城鼓角聽淒清。星躔已見妖氛歇。謠俗欣傳米價平。南下舳艫思就熟。東來盜賊敢偷生。邗谿谿畔經年住。寂寞愁聞歌舞聲。

送汪秀才中至寧波度歲兼寄馮兵備廷丞

宵從董相祠前別。酒向歐公堂上醒。南去租船愁短景。東行倚劍看疎星。眼中吾子容千輩。肘後奇書繫六經。閒說馮唐更招客。爲言王粲正飄萍。

寄大興朱學士三十韻

海內朱公叔。名篇著絕交。幾人猶按劍。俗黨異投膠。惜別旬時久。傷貧歲月消。封書曾懇懇。待遠尙營營。夙者蟬無翳。茲來鵠有巢。殘編依甕牖。舊寢貼堂坳。徑喜蓬蒿隱。門從薜荔敲。經營心屢折。生計手頻抄。幕府稍陳乞。賓僚解獻嘲。信知供刻畫。誰可避喧呶。宦食嗟尤窘。儒經欲漸拋。艱難思一第。往昔夢三爻。旅館魚彈缺。朱門肉委庖。延回凝望眼。去住憶同胞。

時舍弟欲往六合

淮堰聞防汛。潢池已就勦。祇須歸耒耜。不

必事鞭鞘。祝祭虛沉馬。驅鋤竟斬蛟。流民咸返室。新宅記誅茅。世總欣仁宇。吾真感樂郊。撫膺同季路。行脚類申包。客思飛蓬末。鄉心挂柳梢。住應謀粟米。行欲理芻茭。戚戚能廉蚓。依依久繫匏。錙銖寧世蓄。溝壑竟天教。連塞鹽車驢。才輸織室鮫。賦詩憑雁鯉。懷舊詠嘯蛸。夫子勤編緝。諸生賤斗筲。更旬分薄奉。浹

日厭嘉肴。官舍梅垂蕊。寒冬竹有苞。固窮歸未得。衆口尙鑿鑿。

由江口泛舟至焦山

人言金山屋包山。焦山高復包屋。舵樓清切望疎林。風急何容傍山麓。扁舟半日始接灘。山僧驚喜開禪關。排灘松檜一千樹。內有榴火猶含丹。此生得到清淨地。垢髮未洗停躋攀。齋廚粥飯客粗飽。石磴千級臻回環。佛樓梵塔構雄傑。下視了了徵君壇。衆生大垢積有地。雀污不遣歸名山。對面一峯。峯巖堆積。峯頂數尺爲白。澄心一鏡旣全寂。礙眉兩株行可刪。反思去水不千步。耳寂已不聞潺潺。海門初日孤照我。寒沁肌骨愁衣單。吾生窮眺祇百里。八荒縱望目力殫。譬如鷹隼視天地。力薄道遠猶知還。江流入海會有定。萍梗蹤跡苦未閒。魚鱗雲起欲飛雨。雅背風黑當狂瀾。東南一徑尙蒙密。有景不歷知緣慳。山僧約客復來此。我笑此行非可止。登舟解纜忽疾風。驚魂欲墮一江水。

冬夜不寐追念亡友率成十律其前後以死之日月詮次不繫輩行也

蔣表弟定熙

憶昨僑居久。親知冷煖殊。曾爲秦贅壻。未齒魯諸儒。公子尤憐姊。姬宗孰問姑。童烏真義重。三復贈羅襦。

董公子書圖

垂堂曾未戒。痛絕下帷生。我友能爲厲。如君尙可生。讞疑成鷺黑。冤孰辨魚頰。花院冷泠雨。猶聞唄佛聲。

潘上舍振煥

臥病潘公子。秋來尙一編。參苓欺命薄。其豆感時煎。服缺從殤禮。囊充靳藥錢。空餘抱琴妾。愁絕總帷邊。蔣表兄寶善

何來車載鬼。已見室憑狐。店本緣思婦。山應化望夫。枕棺麻經在。入夢羽衣無。好擇諸弟子。行將任撫孤。

君遺命以道士服斂所聘孫氏君死後守節不嫁

錢進士璟

早著錢神論。難期駐景方。蓋棺家難起。入室舊巢傷。屬有稽康戮。門餘戴聖賊。衰親真命塞。頭白哭諸郎。唐公子肇文

小築邗谿上。尤愁逼歲除。田荒還賣券。力薄更藏書。世澤應歸汝。才名孰可如。塵封舊留贈。石硯贅蟾蜍。楊處士笠雲

欲識先人事。翁真大父行。快譚三世過。飽食一身強。後起憐余在。衰年覺慮長。詩編付誰手。零落感孫傷。天寧寺僧智能

先襯歸禪室。靈堂寄弱孤。苴麻參佛座。粥飯乞僧廚。北寺鐘同聽。東園菜早輸。前塵猶可憶。刻徧誦經珠。盛處士龍光

人爲奇士目。說爾是孫斌。我讀先賢傳。知吾邁法真。授徒租舍北。行藥住江濱。歎有遺言在。碑文付託頻。  
楊秀才燠

弱歲矜通達。相知誼早敦。累年傷惡疾。遷室竟亡魂。燕燕篇中警。星星曙後存。素交恩義重。歸日哭私門。  
登樓

出郭登樓客思多。啓窗三面俯江沱。下流未可依終古。中策頻誰障大河。堂北雪流客病臥。淮南歲歎尙  
高歌。虛愁薄俗透迤久。欲挂征帆次弟過。

贈孫秀才星衍

孫郎少日偏兒戲。一室狂言及曩季。詩句終能向我誇。姓名真不勞人記。嚴君四十官廣文。銜齋苜蓿連  
寒雲。窗開了了見絕壁。邂逅冀遇茅山君。茅山僊人不可學。時復讀書升屋角。醉舞堦前海鶴看。狂唸樹  
底山猿覺。

醉後登蜀岡野望

歲晚狂唸急。樓高莫景俱。燒原災野鵲。葬地入谿魚。樸塞天心苦。飛騰人事虛。眼中生計足。欲傍此村居。  
慰汪孝廉端光悼亡

尺五薔薇一徑陰。孝廉亡婦正愁唸。緣知舊侶偏同命。轉讀新詩爲撫心。室靜有聲飄故紙。夜寒無寐對

重衾蕭郎衣薄裝綿少。不怕冰花結素襟。

與楊秀才倫夜話作卽寄其尊人詩南上舍

君家昔有江上田。歲租百斛輸豐年。官糧入倉穀積廩。蜡臘時復開賓筵。十年遷移不常好。有兒讀書田已少。朝供肉醢不足餐。莫食魚殮未能飽。生男娶婦女縮烟。看君已作無田人。空倉穴鼠噪終夕。老屋巢鶻翻清晨。君今擁書不復出。令子相逢在天末。剛世翻嫌識面疎。幾旬欲使狂蹤密。朗吟一篇避舍三。雞鳳不語饑鶯慙。置牀客舍容我住。喜我興發能狂譚。試看萬事東流水。貧賤于今莫深恥。矧君家貧有才子。穀田初荒硯田始。

贈木蘭院僧誦茗

相逢同著軟紅塵。誰認前身與後身。我信西來本無佛。茅庵還坐苦吟人。謀餐會費寫經錢。遲客猶留炊後烟。一樣揚州木蘭院。山僧煮筍廿年前。

樓上

樓上踈鐙徹夜明。營前擊柝斷人行。宵嚴都尉觀巡柵。歲歉村農罕入城。峴首一書愁未報。淮南十月更孤征。霜寒不是無衣苦。淒瑟難爲負米情。

春間彭少宗伯元瑞和蔣編修韻見贈未及裁報茲當還朝輒敘述德抒情一首五十韻奉上

闊絕諸生禮。淒其勞者歌。新春謁轅下。朔雪溯江沱。將母能毋亟。傷負未可訶。憐儒曾降格。擢士本殊科。託業嗟萍梗。封書救坎軻。頻言才作記。俾以禮爲羅。幕府勤箋奏。時薦入維揚關署生徒藉切嗟。長饑資莞爾。卒業誦猗那。雅喜朋簪盍。徒成側弁俄。賓僚輕賈誼。旅舍值常何。積瘁消篇詠。更旬費揣摩。躊躇噲短翮。曲折妒修蛾。譽匪羊公鶴。嘲因仲子鵝。有時逃座客。轉或泛湖波。歎處心期永。茲邦習尙頗。儒纔分菽麥。俗總壤鹹鹺。駭浪崇朝積。征帆竟夕過。省闈愁屢試。匣硯怕重磨。月挂依无忌。天花感曼陀。虬鏡虛照影。鵲語記傳譌。雅意將雕朽。微名等棄梭。情常關去住。請詎厭煩苛。使節經時滿。潮聲昨夜多。暫容停越席。旋即理征舸。學爲膠庠式。心尤下士荷。羣星咸識漢。衆水合宗河。愧比尋源鯉。真同測澗螺。書紳言縷縷。箴佩色瑳瑳。鼎鼐調羹切。笙簧間瑟蘇。行將膺玉簡。去卽侍金坡。已返春官敕。選鳴學士珂。傳呼過淮甸。消息近東阿。海燕巢初徙。河魚疾已瘥。閭閻思集木。城郭彙盤渦。一再頻加賑。流移詎有佗。早歡平塾仄。誰復肆么靡。風霰初回旆。萑苻正倒戈。奏應天聽喜。歸及聖情和。禁院趨青瑣。名廳做綠莎。讖譚欣乍接。昔酒驗微醅。遠訊裁鴻雁。陳編究蚪蝌。總期襄化理。寧敢罷逋逃。別夢牽襟袖。垂情念笠簑。潛鱗驚失餌。倦鳥欲離窠。客館金先罄。高堂鬢已皤。涼風吹閣瓦。生意撫庭柯。室豈饒麤糲。門猶閉薜蘿。岡岐空頽殺。三百恥無禾。覓食悲諸弟。言愁紹九哥。匪公推肺附。孰肯念蹉跎。燭向孤舟跋。詩成五字哦。感恩兼佩德。將紙復摩挲。

清泉白石圖爲余芑貽先生賦

清泉何淙淙。白石何盤紆。先生六十味道腴。頰端新拈白髭須。貌之玉立微有軀。雙肩山聳步復趨。枕流坐石樂有餘。談說仁義顏非迂。憶昔一載登師門。寒廳聚首十一人。二三子者章與秦。題難韻險裁畢陳。各脫束縛愁難馴。我成數藪甫及晨。頗恥刻燭來宵分。就中數子業最醇。乃歎譽我稱能文。風狂雪暗短景臻。作詩送別邁等倫。我慙貧賤敬未伸。十載念此空銜恩。先生五子一子才。早掇芹藻身猶孩。作詩曹謝賦馬枚。杕榦栝柏看呈材。先生師法妙化裁。門墻百株手自栽。披圖春風坐中來。泉石已老堪徘徊。我雖蒙鑄慙顏回。朗吟一篇獻濁醅。

段上舍達和修竹吾廬圖

我家城東南。數日過城北。馬家池頭竹樹幽。破曉來看雨中色。我思移竹先移居。近乞數筍栽東隅。待其榦老筍復茁。影覆一室真吾廬。君子于此意亦三復。筆底森森繪寒玉。夜闌題竹復贈君。驚筍出我牆東屋。折桃行當西洲曲。

折桃訊妝樓。咏桃寄蕭寺。咏桃人十三。折桃人十四。十四復翩翩。郎年羨妾年。摩書爭睇腕。聽講得隨肩。隨肩誰復見。只有書堂燕。種得百叢花。隔窗紅四面。妾處接郎家。門前石徑斜。來年不相見。知道鬢垂鴉。垂鴉年復幾。只住深閨裏。南陌踏青時。眼光還礙姊。別姊下庭除。尋郎問素書。還將奇字睹。試把玉釵輸。



釵分情自急。去已低頭泣。遠水帶殘陽。爲郎幾時立。去住復匆匆。帆吹幾尺風。年年臨七夕。只自淚珠紅。指尖空自長。腰瘦難如曩。昨夜又重陽。夢郎名在榜。去夢復悠悠。來魂值陌頭。東風吹夢合。一夜上妝樓。瘦影疎香圖。

簾前露色垂空白。屋底鏡光捨慘黑。三更窗外發古樸。瘦步行來月華直。寒雅窺人爭一枝。卻視人影何參差。雛顏小妹愁不知。處姊十五應相思。

寒窗幽夢圖二首爲孫大賦

日紅不到谿光濕。風折黃墻蘇燕蟄。園扉清冷未經春。薄暝初銜淚痕入。銀衫貼石手腕涼。病餘支頰銷頰黃。幽裏沉沉夢難破。魂小還從竹梢墜。

附鮪軒詩卷第六

鍾阜蜀岡集乙未

詠史十首

項羽欲入關。沛公無如何。神明所都會。日復尋干戈。咸陽宮殿中。流血遂成河。哀啓青門瓜。乃比人頭多。神理有代謝。杜伯齊城陽。峩峩蔣子文。晚復出建康。一朝無神靈。毀廟升牧羊。何似三戶民。常禮楚懷王。晉家府庫災。三日火未已。所藏希世珍。灰燼收不起。神奸與至聖。寧止相倍蓰。如何王莽頭。得配孔子履。廢興非無端。今古若一轍。亡隋視亡秦。皆至二世失。才非不兼人。志乃在玩物。雷塘一斛螢。竟以天下易。吾欽韓張良。吾愛越范蠡。穀城山下石。笠澤湖中水。遐哉兩先生。千古常不死。徒學辟穀方。真成妄男子。荆山鼎既成。卞和玉亦剖。如何希世珍。俱爲楚人有。江流合漢處。萍實大如斗。我欲剖食之。甘芳溢人口。燕丹欲圖秦。既殺樊于期。咄哉淮陰侯。不能活鍾離。求存反速亡。賣友仍貽譏。虞卿真丈夫。棄印隨魏齊。鬱儀既織人。恒娥亦悖婦。干戈生曠林。弟傲兄不友。如聞天上樂。乃復分道走。昭昭日月星。竟作逋逃藪。我思蓋世豪。實惟楚重瞳。其事雖不成。氣已吞域中。男兒頭可斷。不惜歸江東。始知孫伯符。未足稱英雄。顯項出上代。伊尹生殷商。巍巍龍蹲聖。誕降徵奇祥。讀書撫然疑。史說恐未詳。如何三聖人。類皆出空桑。

送黃大景仁至都門

弱冠心期誓始終。故人江夏有黃童。數行書札來春半。一夕舟檣出雨中。雀鼠幾時仍共穴。馬牛誰信不同風。應憐楚越依都徧。更向燕臺試轉蓬。

姑谿夜雨剪春蔬。歸計頻番說荷鋤。放眼關河斜日永。驚心歲月二毛初。生涯未解營巢急。妻子都嗤涉世疎。此日北堂應有夢。凝塵黯黯鬢慵梳。

鉛槧頻年席未溫。十年心跡幾朱門。難忘節物偏垂涕。有約乾坤不受恩。涉世未妨顏更冷。依人何意舌猶存。蕭蕭故業斜陽外。共爾無慙廉吏孫。

蹤跡平生苦未閒。我貧君病改朱顏。料量絕業思傳世。各有名山待閉關。曉袂靜看雲氣白。夜鐙慵拂劍光斑。偏慙楚客多鄉思。依舊春風策蹇還。

將至都門留別洪大六首

黃景仁

翻與歸鴻共北征。登山臨水黯愁生。江南草長鶯飛日。遊子辭鄉去友情。五夜壯心悲伏櫪。百年左計負躬畊。白嫌詩少幽燕氣。故作冰天躍馬行。

看人爭着祖生鞭。彩筆江湖焰黯然。親在名心留十一。我行客路慣三千。誰從貧女求新錦。肯向朱門改舊弦。吳市簫聲燕市筑。一般淒斷有誰憐。

窮交數子共酸辛。脉脉臨歧語未申。割席管寧休罷讀。分財鮑叔尙知貧。初心小負栖岩約。後會依然戴笠人。除是白雲知此意。幾曾情艷軟紅塵。

冷炙殘杯夢亦慵。雪痕到處印泥蹤。原管好客依都遍。鄒季論交別更濃。浪許詞場誇姓氏。要將人海盪心胸。不妨面似先生黑。上帝何曾殺黑龍。

身世渾拚醉似泥。醉醒無奈聽晨雞。詞人畏說中年近。壯士愁看落日低。才可升沉何用卜。路通南北且昏迷。只憐寒食清明後。鬼飯坟頭羨馬醫。

載酒扁舟障錦車。風情昔日擅年華。牽魂西子湖頭月。照淚吳王苑裏花。已是舊遊如夢境。那堪遠別更天涯。馬前細草茸茸碧。來歲相看可憶家。

題陶太守易東井汲泉圖

君昔官并州。五冬而徂春。愛此樸寒區。唐魏之遺民。不假鞭撲威。民氣始一中。義棧三間堂。案牘不復陳。日出報早衙。野老獻束薪。豈不上下孚。相與以性真。兒童習君顏。不識長吏尊。愿者吾教之。斐然有其文。關堂聘經師。相與恣討論。復苦遠汲勞。君也蔬鑿勤。講舍之東偏。比戶得飲淳。偉哉十萬錢。卽澤十萬人。報最復遠移。千騎刺楚分。忽逢秋雨餘。值此黃淮奔。遠近決堵壩。老幼屋角蹲。君時值倉皇。拯溺復止紛。立馬尺水間。不惜泥土渾。息此百衆囂。魚貫出一門。餘人託城壩。兀兀萬竈屯。夜火明城樓。擊柝衛遠村。

時時撫循之。無間晨與昏。善後計復周。俾得息痛呻。披圖識君顏。廉直厲且溫。惟茲兩州民。沐浴其深恩。我感此一隅。先人蹟猶存。先曾祖曾歷官山西幾二十年君也更繼之。惠遠澤復臻。誰爲使君謠。我實廉吏孫。他時國史中。補此吏蹟循。

酬彭秀才翰

洪子家貧不素飽。作客遙憐自辛卯。未過社日已離家。憶得出門何草草。昇州刺史苦愛客。隔歲招呼絕傾倒。數子相隨藉討論。六經未熟慙師表。君來適館我則喜。共對寒窗坐昏曉。避跡曾嫌吳楚囂。移家爲厭黃淮擾。已拈經籍過淮南。更覓書堂住江島。三百五篇頌難輟。六日七分工復早。魯兩生看絕業傳。楚三戶覺居人少。彭生避地攜弟季。洪子辭家念衰老。別夢更番涉米鹽。狂情歷亂辭花鳥。雨花亭子南城外。我昔來遊與孤矯。壯歲君看有鬢絲。少年我詎工文藻。彭生彭生本非俗。我有新詩向君讀。明日浮雲各去留。相思寄我書千幅。

寄趙大裏玉四絕

趙生讀魯詩。篇舉三百五。今日鉛槧中。例應廢蒙楚。一說蒙楚悼亡詩也

築室雲谿東。讀書慕不朽。亦若顏子淵。髮白二十九。

兀兀秉禮生。一歲值兩朞。誰能善居喪。吾終望銚期。時趙有世母及妻之喪

得朋信無力。結交戒便辟。今日士大夫。移牀誰遠客。

與徐民部大榕同舟述其先人殉節及家僕從死事感賦此

半日猶遲江上楫。一宵更聽官街鼓。鼓聲隆隆客難寐。意外逢君倍淒楚。譚深不厭傾耳聽。語久復煩屈

指數。我悲詩老埋碧血。謂趙戶部文哲汝哭先人亦黃土。九原可作晉隨會。百身莫贖秦鍼虎。墨衰從軍自歲卯。

君先人以丁父憂留營辦事赤羽飛書贊旁午。崎嶇意自激風雲。慷慨心寧怯刀俎。箭鋒轉鬪無全目。裹瘡夜戰亡半

服。是時列陣盡猿鶴。憶昨軍門萬貅。招魂蕭蕭植大旗。歸元淒淒忽飛雨。平生氣尙留須髮。慟哭腰猶

繫圭組。丈夫既死存全豹。國士捐生出五毅。先生二僕從死其一業治皮者可憐共作百夫防。詎有名編五人伍。微軀容

易裹馬革。今子切莫聞雞舞。方今聖人赫然怒。兀兀千軍倍雄武。心膂欣看任方叔。爪牙不復歌祈父。還

聞二月傾巢穴。佇看千屯破樓櫓。帛米更番賜上方。廟謨重疊頒樞府。建祠錫爵隆俎豆。聚魄凝魂列勳

簿。已看戰骨慰泉源。復見靈輻下江浦。君行記歷川南北。早歲卽依天尺五。骨肉方看聚里閭。功名期不

慙宗祖。君談已竟猶悲憤。我感無端自仰俯。男兒忠義非偶爾。烈士捐軀未爲苦。明年春後塞草生。詞客

還歌戰場古。

春望

城隅聊北望。芳草一何多。繁花最撩人。稚禽鳴春和。飄飄襲輕裾。沉沉窺素波。漁唱忽復來。帆從影中過。

南村散賑圖爲山陽尉題

河流東來不可當。憶昨魚鼈升君堂。官卑方攝丞簿尉。天險欲合江淮黃。河流決城已旬日。散賑還呼尉官出。尉官耳聾年六十。驗粟呼人百無失。大者屋角狂狐犇。小者樹底饑鷹蹲。頭顛頸縮三日餓。共盼賑粟來空村。持瓢舉釜復攜斗。已見千人立沙阜。黃衫小吏足不停。村後村前更招手。深泥沒髀無肩輿。尉來村北跨一驢。行籌散盡整鞭去。不遺索米來豪胥。淮陰太守知君績。早晚臺端奏賢跡。君今所補非寸尺。不見遺黎活千百。

憶舍弟

爲賈憐吾弟。犇馳屢告勞。奉親居舍北。食力去江臬。歲火周榆柳。年辰卜桔槔。尙慙非義養。未敢競秋毫。

偶成

弱冠始讀書。緬焉託經穴。不作章句儒。平生慕奇節。曲臺日繫肘。取與日用切。此外三百篇。行行富陳說。扶風業雖粹。槐里節尤絕。磊落一世裏。儻容有不屑。

禮堂寫六經。虎觀集羣愬。事經百輩後。不復有殘缺。所貴其師儒。人人善遺說。庶幾先聖意。得再見施設。昌黎障中流。功與魯鄒埒。井田與學校。不在守陳轍。緬此經濟儒。慨焉門戶別。

善哉歐陽言。六經盡除緯。我謂非聖書。流傳更滋僞。支離衆家說。頗苦隔肝胃。邪流混寰區。吾儒所深諱。

功應闢吾黨。何忽歆異類。前古與後古。想焉望同志。芟夷蘊崇之。而俾無所試。浮屠道德言。自信無一字。我愛一世儒。兀兀釋負擔。士生習風流。恐復開清談。日用其經常。願欲鄙大凡。陳編百年來。反復叢謗讒。逃儒或歸禪。士也行二三。義義卞忠貞。晉世多蒙愍。太息通鄙間。憂來念焚燼。遲舍弟不至。

別館雨方歇。離堂夜已扃。躊躇思子意。破曉看殘星。春草生門戶。鄰花覆居墻。貧家生意足。早晚願稱觴。

題陶公子花下讀書圖

我昔卑居近谿築。鄰花過墻常覆屋。少年不識杏與桃。但覺春光艷心目。嬌兒恃母無不至。竟欲把書升屋讀。鄰花吹墮復吹開。我讀書完復書續。未因屋窄思遷徙。可奈花殘意蕭肅。爾來一室更淒然。春日渾如坐空谷。眼中對此空成羨。慧眼輸君看春足。君家窮海花枝少。故畫踈枝滿橫幅。朝朝把卷惜朱顏。夜夜看花燒絳燭。居然少壯分今管。我鬢初蒼爾顏玉。勸君時讀復時看。歲月看如電奔速。

讀書

我思古聖賢。一一備載記。讀書無餘閒。安能復營利。幸茲將母暇。入室卻遊戲。力食既已周。盤殮幸粗備。少窮本孤露。離析到弟季。長識干祿艱。無心學毛義。陳編恣偃仰。非欲置論議。丈夫一寸心。筆墨非可寄。



千秋萬歲外，有人知此意。

憶孫秀才星衍兼寄朱訓導沛

雨中春事忽過半，今者已往時難失。人生稱意只少年，花枝可看唯二月。墻頭燕語初撩亂，戶外草生殊鬱勃。已看花氣逼眉宇，其奈春愁刻肌肉。迎風梅蕊飄屋角，淺笑桃枝倚巖窟。可憐花好更落開，痛若人生有存沒。如君肯來來已莫，謂我不思思轉鬱。整衣日復望趨承，束帶誰能受迎謁。慣經作客甘顏厚，不善著書寧口吃。君因漫叟識愚公，世總肥秦視瘠越。遙思句曲不百里，近苦客齋無十笏。喜君比舍得詩人，坐讀新篇激林樾。前時一見尤深慰，古道須眉意超忽。先生老矣憐徐穉，夫子聖者同臧紇。酒兵越席工射覆，蠟屐登山歷凹凸。平生學杜能遺貌，朱君前以近作見寄并贈余詩數章十得其九非髣髴。筆端森嚴鋒穎禿，君以異采相黼黻。狂言欲使坐中詫，好句忽來紙上突。昌黎和仲舌本強，畏子巧言甘木訥。尤驚春去偏冉冉，思與酒徒同兀兀。榮枯得失休更計，久識此生由造物。我飯桃花例得仙，君悲石火猶依佛。蟬乾久已難吞豕，瓜苦惟應僅留麩。要從方寸息雕錢，須向口中留石闕。勞生役役本其理，嗟我道自爲親屈。三旬望弟復不至，柔櫓江心自搖抗。男兒青眼當向誰，看我朱門衣卽拂。

夜坐

疇嘗樂貧居，衡門亘松陰。一與塵世緣，久非平生心。朝出莫復還，豈不愧素禽。偃仰一室餘，不欲聞衆音。

耳目雖無詘。尙苦俗慮侵。我行忘歲時。庭草忽已深。落月照我牀。恍然思幽尋。振步苦不遙。咫尺阻密林。瑤華信無多少。壯忽至今。秉燭有所思。遂以成長吟。

造物無成心。流藏有生息。于茲桃李花。偶然寄顏色。百物當其榮。欣欣亦攀陟。感茲羣動意。不復能緘默。英華信流露。方寸庶彫飾。吳生傷疾疾。盛守苦淒惻。早讀叔夜書。但焉寐先識。

寒食醉歸作

身如病鶴形。踽躅。昨者苦辭歌舞筵。繞廊匝室百回步。初五月照空簾前。花開桃枝復李枝。忽恐春去無來時。含情清淚一飄灑。已被鶯燕窺相思。小樓西角簫聲永。有客傷春愁獨省。可憐五夜起徘徊。明燭滿堂。唵瘦影。花枝折來非晉春。人老亦苦非春人。春風吹園雨如塵。夢斷不斷愁侵晨。臨街已聞折柳聲。苦道明日成清明。

曉起

曉聞粥鼓官齋側。瞥眼今朝是寒食。鄰家屋外數枝春。蜂蝶爭誇好顏色。游蜂蛺蝶安得忙。拂曉卻復經頹墻。三春人稀徑泥滑。一雨昨過苦痕香。橫塘遠映城西閣。十丈朝暉射羅幕。誰從簾底著春衫。花好只從衫上落。園空無人山木幽。我今不來誰與愁。樓高欲隨峰勢側。簾卷已逐波紋流。華年作客情如昨。綺語銷除愁不作。傷春擬復共孫郎。寶馬日高馳郡郭。

讀馬令南唐書

神仙空說善調劑。畢竟誰將國事醫。劫裏萬人籠似豆。空中五嶽走如棋。經時肘繫眞王印。幾日心懸大將旗。莫向新亭更西望。年來疆域漸離披。

簡寂虛推帝外臣。卅年三見海揚塵。皖公山下今非昔。固子坡前夢是眞。天上鯉魚傳吉語。宮中烏爪出僊人。東南地大如甌子。肯使羣公議得伸。

春日偶成

傷春客占舊池臺。稱意簾櫳信手開。一晌鏡中紅不定。折花人帶日光來。

寄呂秀才星垣

前年作客歸里門。舊游說子能論文。蘭陵城邊數握手。杯酒未洽重辭君。識君文名已三載。才如百川不歸海。銀河倒注弱水西。努力滄溟欲相待。

錢公子中銑招飲卽出其尊人文敏詩見示感賦二首

三年爲客歎消沉。聞說尙書墓山深。顧我久虛泉下望。感公重讀座中箴。時讀所書格言經時絕嶠清烽火。公貴平貴

州苗香要往事燕臺盼雨霖。不爲蒼生留莫歲。杜陵淒斷蜀州吟。清宵同款雨中扉。高閣開筵夜漏微。老去詩篇尤澹宕。重來賓客尙依稀。郎君彩筆親承久。小弟青雲事

業非時樹叢會  
試報罷。剛過公門豈無意。感恩歎爲淚沾表。

旗亭小飲悼馬秀才鴻運

馬卿消渴酒壚邊。只住人間三十年。黃卷共愁生計累。紅塵苦被世名牽。城樓月出誰同上。竹屋風吹祇獨眠。今日下河休痛飲。更無僮送典衣錢。君寄籍順天補博士弟  
子員以往反勞瘁病卒

醉歌

年華過眼如飛塵。一杯自酌當春辰。眼看百事不復闕。只惜風雅無傳人。青蓮仙人本長庚。醉中揮手騎玉鯨。五花筆采埋九京。恨事頓使文章平。我今裏古抱積誠。欲生者死死者生。後來才弱誰與爭。冢中枯骨珍連城。烏呼。一杯酒。萬世名。舉以贈子良非輕。我狂亦酌杯中酒。百篇于世應不朽。男兒何必事功名。落落姓名高北斗。

書陶太守易朝天贈言冊後

三千里路趨朝去。四十篇詩餞客回。循吏共傳邀異數。帝心仍復念偏災。召見時間去秋  
淮安水災甚悉。頻年蓓雨聯心契。歸日新緘許手開。不是吳公知賈誼。幕中誰得滯通材。

寄襄州倅舅氏

浮雲送翁豈有極。如翁五十復六十。窮愁心跡數端迸。多難人生百憂集。兩兒兩女昏嫁畢。五嶽催翁理。

遊笈浮生寧作車坎軻。歲月難同蚓蟠蟄。聞翁求祿意有餘。擾擾自曳侯門裾。黃塵拜跪顏色苦。赤縣簿尉鞭笞俱。坐思一斗復百篇。安得轉翁還少年。時人愛少翁復老。何所位置于其間。白雲谿。白雲宅。中有茅籬兩蓬壁。鄭公之詩費公易。待翁歸來竟牋釋。所注有周易選注等翁閒更作左氏鍼。儻能驅我周官癖。重過廢園有感。

十二窗櫺敞絳紗。關心閒看後時花。殘春寥落成秋夢。曉日荒黃似月華。憶舊已無機上錦。清遊思泛斗間槎。橫塘波影空如昔。噪盡官私兩部蛙。

年荒

田荒舊分摘園蔬。薄暑還看帶露鋤。鼎鼎百年生計少。勞勞人海著書初。重逢元禮談心切。若說深源濟世疎。青眼幾回南北望。感時懷舊鬢慵梳。自儀真放舟至揚州。冀汪孝廉端光。

不及虹橋修禊辰。布帆東下剩殘春。罨澗里俗非吾土。窮憶交游有此人。日晚細尋花下路。風喧時避竹間塵。重來屈指無流輩。董相祠前駐短輪。不雨。

消息秋江上。連旬望雨霖。斗間雲耿耿。日畔氣森森。螻棟橫猶昔。蝗蝻害至今。吳鄉頻歲歉。愁絕旅人心。

寄舍弟

憶把家書讀。愁言米價增。已知河鯉涸。只望雨龍升。八口茲何計。三田再不登。年荒應殺禮。親迎莫燒燈。

有客

有客更傳淮左郡。五旬不雨已無禾。頻年歸燕思巢木。此日枯魚泣過河。賣屋置船移地急。荷鋤立澤望恩多。百年土著流離甚。辛苦勞人尙作歌。

陶太守易守淮安。日入古寺見維摩。詰旁像周公孔子侍立。因斥維摩象毀之。重建惜陰書院中。楹祀先聖先師。而使諸生讀書。其旁彭少司空元瑞。既爲作惜陰書院記。余復繫之以詩。

浮屠之言竟如此。孔子吾師之弟子。空譚惑世已足誅。況敢模金鑄形似。居然右孔復左周。手搢罔笏還垂旒。此方儒者不能闢。無乃學術人心憂。淮安太守行春暇。古壁流觀發驚訝。三千盡繪經橫膝。五百復驚僧出舍。大呼斥出象與獅。搃有法力寧能施。正周南面孔東面。盤辟雅拜尊吾師。我聞外侮人所召。史說無端列三教。謂魏收北魏書能驅楊墨世已希。奏毀淫祠政尤要。羣經插架梵籙沉。太守建堂名惜陰。傳之後世俾勿失。莫使浮屠闌入室。

丙吉問牛圖

車斑斑。斑兩輪。我識漢家丞相尊。漢家丞相朝趨朝。道中累累奔百僚。車停不行路人咤。丞相公然爲牛

下仁心豈止愛一牛。丞相自爲陰陽憂。長安殺人不用論。我慶此牛丞相問。披圖今古服軛同。恨生不逢丙相公。君不見。三時不雨暑復酷。牛喘深宵汗流足。天心似復爲宏羊。丞相誰來問黃犢。

孝陵瓜

陵旁三十戶。都賣孝陵瓜。野本摘來細。踈藤隨處花。薦新虛寢殿。乞種故侯家。忽覺新涼永。簾前感物華。

雲谿競渡詞在趙大襄玉席上賦卽寄蔣氏舅仲并引

谿流一曲。渡口數家。兩橋則風月居多。三徑則人材最盛。僕也少焉棲息。長復淹留。墅屢居甥。樓曾作贅。茲值歸帆之便。欣逢競渡之時。問畫舫之寂寥。頻云歲歉。詢烏衣之消息。半屬天涯。不無瘠歲之憂。益以勝遊之感。值倚樓之招客。遂入座以抒詞。對爾言愁。爲余命酒。然今者雖承雅讌。何心烹谿口之魚。儻異時念我狂言。爲手補岸頭之柳。

雲谿水淺舟難行。今年競渡不進城。居人閉戶懸艾虎。行客坐岸聽林鷺。雲谿渡口晴陽驕。一十八株風柳搖。遊蹤至此起歎息。欲去被客還招要。招要我過谿南室。約把雲谿盛時說。我住雲谿二十年。風光除我無人述。當時雲谿只兩樓。樓檻對映東西流。蔣家居南趙家北。兩處日夜從清遊。相逢只說天中節。容易人生值茲日。龍舟夜謁水神祠。便喜明朝是初一。晏公祠外當河衝。水清波淺戲五龍。一龍前驅四龍竝。後者擊水前呼風。還因國忌龍舟歇。夜久鐙船復齊出。燭影看過第四橋。簾鉤正值初三月。兩邊樓閣

竝時開。午日龍舟次第來。齊向趙家樓下泊。鬧鵝一日戲千回。此時卻憶豐年樂。節底遊錢恣揮霍。海口生魚集市橋。湖裏好米填城郭。東家西家集畫船。南岸北岸銀鐙懸。沿河漁叟苦不睡。絲竹徹夜聞喧闐。俗奢則敝由來忌。荒歉頻年本天意。斗米應須二百錢。閉門不敢重遊戲。雲谿我別今五年。蔣家舊宅聞頻遷。移居都向冷坊住。開閣誰款幽人眠。閒來谿口尋蹤跡。巷裏居人尙相識。路指南頭乳媪居。舟橫北岸篙師宅。可憐石徑盡欹斜。多半樓臺住小家。簾幕影沉回舞燕。管絃聲歇鬧棲雅。日光下照官河口。趙家不種春楊柳。我向雲谿渡小舟。寂寥谿閣頻招手。今年已去明年來。我願俗好淳風回。相攜士女樂佳節。不飲亦可傾千杯。我爲客譜雲谿曲。欲寄雲谿兩家讀。何時更續廿年遊。除是年豐室家足。

寄從舅氏人駢卽題行卷

書來憶我秦淮路。秋到思人越舫齋。十日雨餘開菊徑。五旬歸後著芒屨。料量竹石心殊苦。看取花枝影亦佳。只有謝家庭畔樹。尙隨萍梗客天涯。謂小阮重光

夜抵泗州作

快哉風帆不能留。我乘夜月來茲州。舟人興發不避淺。篙急已觸城門樓。城門樓對僧伽塔。月裏頽牆見周匝。傑閣都教水勢沉。佛樓苦被帆檣壓。民人魚鼈厄有期。我豈識有吳支祁。此方戶口最寥落。人實苦瘠蛟龍肥。收帆港口還鳴鐸。月黑波腥杏難託。行客終宵厭水風。居民百載無城郭。自州城湮後。泗州移治盱眙。不復設城郭。



道中作

上元縣南逢野叟。十里渴走將何求。呼余道上馬應馬。羨爾笠邊牛戴牛。禾枯浹旬向余語。欲到官衙請祈雨。翁乎任爾秧種枯。縣官祈雨怕減租。

七夕夜坐

屈指看初月。關心未及秋。一年春夏永。七夕古今愁。暗鵲響辭樹。明河影入樓。此宵成獨立。清切數牽牛。

約伴

約伴東頭去。三更啓曲筵。誰知芸閣上。望雨亦難眠。

舍弟以八月親迎予。憫其未知稼穡之艱難。而卽有家室。爰作詩二章勗之。以成人之義云爾。

我年十五六。卽爲童子師。無父誰復憐。門戶獨力支。汝行作螟蛉。識母父不知。嗟嗟叔父喪。千里歸何遲。門少片瓦遺。廢讀亦此時。汝雖歷飢寒。幸母畜汝慈。衰宗數十年。變故亦已滋。前者汝勿忘。後者汝勉之。貧家婚媾遲。汝尙未宜匹。傷茲季母心。急爲而授室。晨昏侍堂幃。冀以慰苦節。黽勉卅載修。冰霜歷周折。年衰心血盡。始及抱孫日。願汝勗室人。承顏幸無缺。

贈史秀才凱卽送至潁州

與君本相知。卜舍幸咫尺。迢迢兩家巷。臨水一畝宅。犬吠過石橋。晨扉已知關。綢繆外姻締。縉絳復逾昔。

契闊屢過從。清譚恣閒適。浮萍匪長聚。去矣自南北。舟楫誰更遙。君爲潁陽客。傾茲一杯酒。屈指分手夕。歲暮歸衡門。相期事休息。

男兒行

君不見。男兒出身當建勳。二十作將皇威申。長安東頭第一門。去時餞別歸洗塵。漢皇重武不重文。丞相詎有將軍尊。麒麟閣上十一人。磊磊落落當其倫。人生功成亦莫喜。計失頭須行萬里。

蓬生麻中行

但種麻。莫種蓬。種麻蓬已生。麻中移蓬根。植麻側。蓬心飛揚麻性直。君不見。蓬生麻中有張說。百年所爭只一日。

立仗馬行

立仗馬。不得鳴。丞相以此愚明廷。馬不鳴。食三品。戀棧人多消祿廩。君不見。立仗馬生舞馬死。丞相之言亦良旨。

卽事

鄉民數千人。曉集龍祖殿。焚香禱靈雨。老小叩頭徧。痛哭對縣官。民情亦堪見。鄉閭報荒冊。堆案驚雪片。君等司牧民。無爲數清宴。災荒尙屠殺。事已動謠諺。宴客設八珍。嗟余豈能咽。家雖無負郭。八口寄吳甸。

晨昏助祈禱。天豈鑒微賤。齋肅告牧民。勉思民所便。

去冬淮安荒。民死十七八。天意未可知。水荒兼旱魃。感茲財賦地。頻復降茲罰。抑聞物力侈。商賈更輕狹。土木既已繁。多金建崇刹。奢淫理召禍。誰復肯深察。盛夏百草枯。炎炎肆誅殺。

近復

近復遷城東。屋舍八九間。非因卜其鄰。樂此蹤跡閒。久客偶一歸。入室靜掩關。兀兀經史陳。文章藉以刪。燕語不識疲。屢啓慈母顏。弱子復數齡。提抱不覺頑。遠聞剝啄聲。予仲亦已還。倘得無事貧。偃息安足患。

曉起

爐烟幾絲裊。獨愁殘魄一綫辭。簾鉤雞聲已曉。方報曉。蟲韻未秋。先警秋。秋聲初來。隔帷帳。遠憶幽人起。相望。夢好難尋。五夜餘。樓高只住三層上。

憫旱

山之嶙嶙。不解出雲。雲之繹繹。不解沛澤。南山有雷。我聞其聲。朝雷興雲。暮雷復晴。十旬皇皇。民力亦屈。萬車遏流。江海亦竭。

寄遠

昨送北歸人。今逢北歸燕。傳語北歸人。來書附征雁。

夜起

遠隨明月去。獨望曉星來。蟋蟀三兩聲。海棠花半開。秋衫全濕露。團扇半粘苔。戶訝流螢出。窗驚電影回。非因馳照遠。誰復認池臺。

秋風歎

秋風吹。復秋雨。簾底秋人怨如許。牽牛花開不歸家。滿庭又放金錢花。花間門鎖誰相省。電紫燐紅少人影。空房燭冷眠易驚。下階雨歇看啓明。

紅梅閣小憩

靈構非一椽。蓬門畫常局。道流習清靜。塵跡罕到庭。時邀二三子。暇日每一經。愛此野圃風。竹外敞曲櫺。北戶時啓扉。圍棋子丁丁。中有鶴髮翁。服食致百齡。瞠目不與言。高臥枕道經。各欲適羸抱。久久還忘形。題江天雲樹圖送陶兵備易至廣東

黃陵廟前官舫開。使君遙溯長江來。金陵渚邊津鼓響。使君復傍長江上。長江一碧吳楚交。公來早潮去午潮。江寧太守衡陽宰。公官只飲長江水。江天尺幅寫入神。溯江送者還百人。就中年少揖官舸。綠鬢朱顏差似我。君不見。江潮初生海日紅。來船去帆咸使風。我乘素舸何所從。送公西上吾還東。太平訪沈太守業富不值贈公子在廷四首

蹤跡辭賢守。心期念友生。款門逢夜雨。撫樹識秋聲。兩地余遊倦。三年爾業成。談經匡鄒事。莫更急詩名。今歲江南地。愁看八郡荒。蝗蝻曾接壤。禾黍獨茲方。日晚初離郭。秋成驗築場。似聞祈雨切。澤早徧山鄉。

入太平境。禾黍甚茂。

尊酒留賓切。開筵樂縱譚。脫冠懸竹樹。拾果貯筐籃。後約知南北。時座中有賈田祖。願九苞諸人。清光此十三。桓公臺上望。題句爾何慙。

清絕憐公子。華年日正東。卷圖衣袂碧。落紙海雲紅。觀水淵源合。譚經志節同。他時東觀闕。應許嗣家風。時攜觀海圖索題。

題饒上舍陞印譜

元明文敏筆法工。六書八體無能通。爾來識字益不廣。誰肯細意搜魚蟲。省文破體入書舍。閣帖堂碑益增價。子雲奇字縱失傳。太常說文猶可借。豫章先生值此時。乃欲一意追冰斯。唐人識字宋人否。藉與末俗平嘲嗤。祇今白髮看盈把。姓氏鐫殘賞音寡。幸印寧訛白下羊。隸書不混烏邊馬。先生五十動齒牙。只惜四海還無家。攜將絕技廣南去。炎嶠恐乏窮侯芭。


中秋偶成四首之一

檀板聲搖燭影紅。韋郎情劫記匆匆。鄉閭一賦傷窮鳥。帷幕三秋盼斷鴻。往事酒傾波影裏。幾時簾動月

明中春人樓閣疑天上。十載遙遙夢未通。

至日度清流關作補壬辰冬。

元雲開北嶺。至日度崇關。人馬朝飢極。烏雅掠食還。



附鮪軒詩卷第七

茅峰攝山集乙未丙申

書汪少尹蒼霖民謠三章後并引

甲午八月河決入淮安城。其冬蒼霖奉憲檄。運米抵淮安城下。賦詩三章。仁人之言。知民疾苦矣。昔杜甫讀元結舂陵行。謂得結輩十數公。參錯天下爲邦伯。天下可安。余亦謂今日得蒼霖輩十數人爲令丞。于吏治未必無補。蒼霖又嘗以強直爲上官所斥。因賦贈此章。非特贈蒼霖。亦甫所云庶幾知者聽耳。

五十命一官。悠悠困簿領。山城當孔道。坐席不得永。憶昨抵任來。東西屢馳騁。黔陽竣差委。飛檄調至省。載米數十船。前輸被災境。淮民水中哭。聞者爲咽哽。風謠譜三章。言要意深警。江南財賦地。水旱更苦併。今年零雨絕。赤地百萬頃。山邑命更懸。饑寒久延頸。心期長官至。爲可急匡拯。慷慨前竭誠。果遭上司屏。承微顧白事。不斥良已幸。歸來臥荒廳。逸氣空耿耿。稽查又蒙檄。零雨泥沒脛。流離散清奉。不忍溝壑挺。我聞昔丞簿。得爲民命請。監門繪流圖。藍田奏蒙省。居儒所當效。不必厭官冷。酌酒讀子詩。中心契剛甗。九月十三日飲朱博士沛室奉贈二首



博士齋頭飲。偏逢月十三。官貧愁歉歲。節冷喜狂譚。百念營生計。吾曹合負擔。無窮憂樂意。白髮影鬢鬢。宵宿荒西署。先生未厭貧。官清雙古柏。吟老一閒身。種學兒曹切。談經士氣淳。猶餘憔悴客。共爾結東隣。

九月十五日沈公子紹祖招飲月上後復移飲王廣文吉士西舫醉歸贈孫大星衍作

沈生一樓滿貯書。其下置酒招癯儒。就中年少數爾我。吐納俱有千明珠。峩峩縣東王廣文。玉骨飲酒無由醺。攜樽晚復酌西舫。我醉脫落頭上巾。十年作客狂難忍。萬椀急須澆吾本。蠶腸食蟹苦攻馳。髀肉騎驢復消損。我前失路無所歸。典衣作客來款扉。洛中先生初釋菜。院南主人思採薇。

孫大自言生時夢伯夷入室因字薇隱

忽然相約過谿步。數子于吾亦非故。三尺雛童訝款門。主人迎階客四顧。清譚已了進百壺。愛客更肯容歡呼。燭花低昂眼花眩。失足尙厭旁人扶。狂來高歌出門走。兀兀橫街屢招手。君從東路邀狂客。我頃西行追北斗。谿西尙有一燈紅。醉影延回谿路中。脫衫懸樹墮涼露。振袂過橋迎好風。橋頭匆匆復爾汝。爛醉誰知是賓主。三更歸路過縣門。側耳還聽數聲鼓。

得孫大詩知昨日醉眠處乃古墓也戲賦一首卽寄孫大

城南路。昨日宵眠不知處。沙寒月薄影荒荒。白項老烏啼一樹。石阡埋沒不計年。跣足走上岡頭眠。夢中白骨相爾汝。惹起醉魄時流涎。古人身後亦足悲。烈火燬盡山南碑。當時百縑乞名筆。奇字剝落飛成灰。青天沉沉醉歌苦。地下何知月三五。幽眠時揭紙錢開。漠漠酒香驚沁土。枕碑莫更笑客狂。猶勝斷隴眠。

半羊。喬公墳上故人少。誰肯過往傾千觴。酒杯去手卽欲愁。況復地下眠春秋。荒墳一畝儘容臥。未識更有閒人不。鬼風吹人寒露襲。幾尺醉魂離地立。跨驢明日復經過。贏得奇人壠頭揖。

同作

孫星衍

兩生宵來醉眠處。卻往經過不能去。原頭乃有大臥人。一簣斗起殊嶙峋。道旁農人爲予語。此墓多年近畊塢。天寒出窟狐作羣。林空無人鳥呼侶。悵然爲憶昨日遊。快意一失成千秋。試呼墓中人。汝亦能飲不。醉魂飄飄出幽穴。知汝見麴涎應流。山頭土乾夜寂莫。知爾哀歌動吟魄。得非古豪英。列屋羅香姬。瓊杯綺食伐天稟。坐使螻蟻相凌欺。不然朝行碌碌廁官尹。似吏非吏隱非隱。黃金買譽立作碑。磨滅不傳行人憫。君乎名山一息苟。足垂若敖雖餒悲何爲。君不見。浮名如雲死卽歇。三寸桐棺喪幽骨。才豐德薄肆語言。不及墓底甘淪沒。清風朗月去不回。知爾至樂無如歸。百年大悟信豪舉。回視身世真劫灰。吾儕不飲亦黃土。夷躔塵埃各千古。一杯榛棘死何靈。莫聽酒人頭上舞。

新霽晚步歸小飲沈公子紹祖宅

句曲城東路。蕭蕭雨載塗。暫晴思策蹇。不夜復啼烏。地冷踈門禁。年荒減市租。華陽山石盡。聞已食蒿蘆。

今歲句容最荒。村民先屑石粉食之。名觀音粉。近復食蘆根。

公子能留客。深杯敢盡歡。早憐詩思窘。未覺酒腸寬。粟米應儲種。魚蝦僅入餐。吾輩欣飽食。莫更計宵寒。

樓上倚聲圖

夏居舫。秋居樓。月華只來樓上頭。吹瓊簫。續羌笛。梧葉秋飄。古墻隙。梧飄一葉。笛一聲。聲遲聲疾已五更。秋花如烟隔墻裏。石上聽歌人未起。

養寂

養寂非予心。習勞從所慣。非甘棄筋力。庶以別芻豢。羣居無一事。恐復涉嘲訕。才短識亦庸。無師古人慢。逢迎畏文士。涉歷羞巧宦。不作一世人。何能寡憂患。

得黃大書知家叔自潁州歸

樓被蕭蕭出潁城。空囊羞復溯歸程。關心鄉落悲年歉。過眼兒童愧世情。多病更憐難作達。詣人都餉不留行。惟因騎馬淮南路。水碧山青尙送迎。

潁歌清絕繫人思。開篋欣緘七字詩。感激最憐翻楚調。升沉且復任吳兒。孤猿獨鶴傷岐路。廢瓦頽垣夢昔時。多事更休題綺句。春人都已鬢如絲。時黃大寄到綺憶詩十數首

道士家看鞠

道人半歲不出門。種得堦前一畦菊。菊枯望雨無消息。日致城西水三斛。百錢買水寧忍饑。花開道士已典衣。我笑琳宮狂道士。看菊朝饑還飲水。

前題

孫星衍

道人無家花作命。只種此花開獨盛。愆陽自說人力多。觸熱我知花骨勁。原頭草枯落照紅。更上傑閣看雲峰。秋心不及花態濃。九月村景如殘冬。

讀黃二綺憶詩漫和四首

小閣珠簾動影紋。別離消息悵初聞。徒教小玉燒心字。枉乞麻姑看手文。籠袖紙燈行怯怯。牽衣花刺觸紛紛。兒家一片橫塘水。只到門前派已分。

氍毹廳北揖新正。碧玉多時羨長成。乍語已知留後識。相逢都尙識前生。消沉楚雨三更夢。來往鄰雞第一聲。剪罷燭花裁罷句。玉釵原不墮塵情。

紅墻一角露薔薇。日晚人來喚闔扉。說夢故教聲悄悄。傷春偏覺影依依。清修篋底裁番勝。密約樓頭毀嫁衣。最是玉缸淒冷處。蒲團真欲證忘機。

華年作客此蕭辰。已覺涼秋勝好春。鸚鵡頓離前度劫。芙蓉須認再生人。空從碧落傳私語。只句金僊乞病身。殘月一鉤幽夢醒。笑他還墮軟紅塵。

題沈公子畫幃

東風吹春著花樹。有客閉門花裏住。春光九月初三。漠漠卷簾流影素。幽居隔竹時見山。竹外好鳥聲

綿蠻沈生園亭莫上關。恐有逸翮宵飛還。

聞同人會飲沈公子宅。予以事阻不得往。戲寄。

我來句曲無所爲。日夕知從少年飲。廣文齋頭酒尙醉。復思騎馬過狂沈。沈生無錢能典衣。洪子得飲殊忘飢。連朝短晷去尤速。誰復料理霜螿肥。生家粉壁繪子安。樓上作賦千人看。忽思我亦好身手。二十落拓吟聲酸。鄰齋兀坐非一時。我狂只有羣公知。撐腸挂腹五百卷。快意不欲爲人師。朝來高歌氣如虎。客欲出門逢吏阻。人生敗意皆若斯。卻值升堂打官鼓。

憶昨

憶昨寬租詔。頻言下縣官。連旬清戶冊。累日駐征鞍。大吏徵求急。飢黎歎息看。窮鄉無宿食。莫更侈傳餐。

十月六日同朱大桂芳孫大星衍城南晚步

十日五日一出遊。原上草木初辭秋。惜啓歲歎寡歡思。且覓二子唵窮愁。市中擾擾無百家。落日鼓已鳴官衙。飢民入市競挈攬。野店插竹覓攔遮。故人住近宮墻左。破壁經時有烟火。吏病無能索市租。客來聊復供山果。芒屨日晚踏市塵。城上月出光愁人。斜陽欲沒尙未沒。照曜樹頂棲烏噴。城南城北荒塗永。城裏蓬蒿餘百頃。檜柏難尋隱士壇。輓轡已斷仙人井。前時一雨潤麥田。短麥稍喜抽平阡。已看黃口竭樵探。忍聽白髮談豐年。道旁一輩還相告。日昨征西捷書到。時命川大捷百斛襄船米禁開。征人失喜居人噪。我

今作客雖一方。百里尙得稱吾鄉。眼中見此誰得忍。樹赤無皮石無粉。

偶書呈朱博士

十餘年來俗不淳。水陸食譜宗吳門。維揚富人益輕狷。土木侈麗窮奇珍。淫祠一方有千百。媚禱役役勞心魂。衣裳更厭陳制度。袍袖割裂無完純。一方好尙匪細事。此事得不尤薦紳。吾曹讀書有原本。忍讓薄俗憂君親。十年此論不敢發。得遇公等眉纔申。一門風氣最淳古。兀兀把卷勤人倫。廣文雖微有祿入。節齋尙得分親朋。喜公招客只一尊。五盃不必羅雞豚。佳兒四十布作禪。冠服稱禮無新陳。行之一方俗可敦。請以此法遺子孫。

苦雨

始聞視北斗。初昏見南門。陽月燄已除。節候尙復溫。驚看未蟄蟲。唧唧鳴樹根。山雨忽復來。急響勢若奔。寒暑理已乖。涼燠異旦昏。夙有登涉心。時擬遊茅山。浹旬阻清尊。我友住巷南。眼急瞻朝暾。予懷亦鬱紆。對此屋漏痕。

遊城東千佛樓作

原頭蕭蕭北風動。騎馬登山不施鞵。斜陽入寺紅已微。竹色圍樓綠疑夢。竹中添綠莓苔肥。慘碧忽訝開雙扉。移鐙入室許相見。可惜僧老無完衣。樓旁三楹屋深暗。僧言一樓狐復占。佛頭經雨已落青。畫壁凝

霜欲成紺。鐘魚聲中日未昏。羣狐擲磚催閉門。空廊星踈鬼復語。白骨欲起亡精魂。欲言不言還屏息。此地年深本難宅。半畝莓苔積殞宮。敗墻破塚連荒碧。我思僧語無所徵。起視爲剔長明鏡。樓頭缺月夜半升。欲挈襍被陪枯僧。

同作

孫星衍

城東佛樓幾年閉。寒徑秋榛刺芒利。飛燐射屋烏啄墻。鬼風吹檐斷佛臂。此間非墓非戰原。豈有厲魄號煩冤。青狸捧骨夜窺月。日氣不到羅神姦。迎廊一僧病枯瘠。見慣妖蹤訝人跡。老莎出戶曲復斜。反鎖空堂晝深黑。樓前冷碧竹作堆。逼袖細影明殘暉。愁霖滴塔漬幽血。敗粉剝壁生陰苔。竹梢朦朧上無路。疑墮中宵夢遊處。回頭不憶隔世來。過眼復恐今生去。蒼牙壓肩樓腳搖。驚起穴棟千年鵝。屏聲獨立瓦爭落。失勢一墮魂難招。原頭日落樹蒼莽。既下心神久恍悅。林梢卻顧寺角移。那得騰身立平壤。

晚眺同得景字

惜此歲序遷。高原自引領。城空氣蕭瑟。鬱鬱見遙嶺。流水聲已漸。原田百餘頃。行當苦寒月。野復少遺乘。落日下北城。暉暉半樓影。荒塗寡人跡。枯骨穿棘梗。晷短測景臺。泉枯煉丹井。村墟炊烟直。籬落鐙火永。薄霧復四圍。蕭條隔人境。

偕孫大張二步月復得景字

初三月雖好。初五光尤永。一巷鞦韆聲。雙橋月華影。橋南二三子。蹤跡喜馳騁。狂孫旣軒宕。張子更修整。偶復作一篇。先尋句中警。嗟余本孤客。非子誰復省。編摩苦無暇。欲去未得請。昨復寄一書。還家索衣領。牀頭餘病婦。念我迫寒景。宵漏定不眠。踈窗剪刀冷。

丹陽鄺布衣爲予寫雲谿一曲圖。時予客句曲而黃二景仁則遠在淮潁間。因并命寫入圖。復作詩寄黃門前水。屋下流。屋小亦若蜻蜓舟。蜻蜓舟輕舉家住。楊柳門深不知處。沿谿柳色搖空春。春來只思樓上人。樓前流水深三尺。樓上人今去爲客。谿南狂客唵欲顛。月出喚渡愁無錢。沿谿灣環百回走。搖盡東風岸頭柳。谿花初開谿水鮮。谿禽窺客還少年。芒屨布襪岸南立。復有笠影垂吟肩。元卿居子雲宅。此時莫問樓頭客。一在江南一江北。

夜宿茅山元符宮步至印房待月復下飲石壇作

山行數十里。破暝入巖腹。勞人慣登涉。未欲憇征躅。携火出院門。荒荒踏叢竹。狂尋石千級。孤轉徑三曲。幽房經久閉。衰草已沒足。青苔點朱符。元鴉咒紅燭。危蹲悄塵慮。激響應空谷。東山一千頃。月色依嫩綠。光景忽復新。參差辨層屋。孤蹤尙登眺。道侶已相速。樹杪下石壇。山隈面平盞。欣茲一尊酒。石上手屢屬。夜久霧氣清。山虛漏聲促。肴殘尙傾榼。石冷忽思褥。棲羽亦已醒。幽人杳難宿。歡悰于此聚。頗復念幽獨。



時張紹南未得至

心賞不可忘。良辰記十六。

同作

孫星衍

琳宮鎮山坳。高下飛軒櫺。征鞍上盤盤。日暝客始停。遵途百勞忘。尋異千念盈。徑微已三折。屋暗仍重局。竝上怯曳衣。孤行危建瓴。道士然炬來。開門導前行。靜覺鼠嚙松。微聞鳥梳翎。林空虎氣逼。草滑馳涎腥。山頭白濛濛。寒氣生夜明。空窮露華涼。誰見風笛橫。悄然步初還。遊侶見自驚。誰能守幽房。客夢冷易醒。

自元符宮上大茅峰憇曉霞閣

申且不復眠。視此崖上月。初陽尙未升。了了見仙闕。冥濛松樹外。復見一星沒。樓北客尙眠。樓西窗已豁。藍輿顧不至。久待意鬱勃。二里抵一泉。流清鑑毛髮。延回積千轉。磊磊出山骨。原野何鬱紆。陰雲氣飄忽。層樓自孤迥。燬壁尙高揭。峰頂有五層樓今燬于火原田間山麓。日復不居一。歲歉民氣愁。山行寡完褐。犁鋤復羣聚。草樹經劇掘。野雉不敢飛。窮搜入狐窟。疲蹤願登閣。幽想已入樾。曾言富仙釀。斟酌苦易竭。亦感生計微。年荒未收秬。

同作

孫星衍

晨策登危峰。峰危屏鞍騎。巖阿氣候交。僕從神色異。目流衣邊雲。足滑崖上翠。陷知仙蹤深。斷若鬼斧

利回巒。激泉響。暗谷聚風勢。蟻行信透迤。猿升亦凌厲。倒視白日懸。仰干黃雲閉。寒空四垂光。積氣浮厚地。唯聞天雞喧。不見井蛙沸。靜懷鴻濛始。遠厭身世細。誰能逐輕塵。擾擾此中寄。山樓足高寒。飛闥白晝閉。寧惟戀佳釀。兼想挈孤被。

入蓬壺洞行二里許以燭盡不得入

探奇愜幽尋。百步得數洞。巉巖束穴口。已復拒徒衆。挾暝持一鏡。幽光破苔縫。遲回歎遊侶。賈勇得予仲。

孫大暨霞浦鄭聯華同入足洗踏伏流。身輕擬飛鞚。仙局怯靈響。鬼壁恍虛哄。百步不一申。稍寬復思縱。頗欣露巖竇。

已復出盎甕。去脈始及泉。回塗漸成街。猗獐閃身入。岌嶮壓肩重。惜此燭炬消。誰持蠟燈送。蝸涎入衣綻。

蝠嗉補壁空。堅此獨往心。危詞阻羣從。崖昏杳無覩。地煖已消凍。石乳嗅復馨。壁書捫可誦。石上有數人題名靈

蹤此疑聚。深處列屋棟。想有太古入。莓苔閉幽夢。

同作

孫星衍

看山不能吞。卻往入山腹。玉柱既參差。華陽復洄洑。茲遊稍通人。所歷亦娛目。奇鋒訝孤豎。密理看斜。蠹冬溫蒸厚地。溜響滴虛谷。初驚石繚繚。始見沙漉漉。捫蹤走妖怪。穴竅散蝙蝠。垂乳甘可餐。流膏滑難觸。心疑轉仙遙。曠蕩見平陸。身輕便僂僂。足冷勇踏蹴。道人見纔訝。謂此足虵虻。微微濕氛腥。慘慘陰霧蓄。子行決獨往。我興恥瑟縮。惜哉萬丈窟。一乞一寸燭。山靈厭搜覽。居客恠剗劇。莫附杞人憂。甘

同謝公辱

遊乾元觀尋陶宏景宰相堂舊址

此山產丹砂。林木頗不茂。十里及鬱岡。幽篁始深秀。峰回拓平陸。峻足亦已驟。山翠忽到門。鐘聲及清晝。沿林飛弱雉。列級臥頽獸。古壁挂笠瓢。虛堂祀星宿。碑文炫雷合。籤軸遭雨漏。尋井識毀垣。穿松歷遺構。夫君感通隱。信美想華胄。元芝究方術。玉篋富章奏。澗響已出扃。山雲詎歸岫。流連若人度。沉想莫余覩。三歎讀道書。孤懷爲心疚。

同作

孫星衍

尋幽轉山腰。折杖行數里。離崖樹歷歷。蝨地石齒齒。羣峰已低環。茲岡復孤起。巖棲寡俗駕。客至道人喜。開門響叢竹。繫馬落松子。檐澁挂薜蘿。階荒合椿杞。蕉心冷逾碧。茗味苦還美。星燈列金僊。雷火合石理。窮搜已折屐。促坐況陳籟。念沉鐘聲前。影閉竹華裏。耽奇悵將別。臥靜想無始。遵路何茫茫。霜林亂紅委。

偕王三沈大孫大遊駱氏園林

出郭祇一里。入村唯數家。過橋追落葉。搖樹起飛雅。上客留題急。名園春信賒。茅籬隔三處。只少酒旗斜。自句容至江寧半道欲遊青龍山未果

鳴雞聲未斷。一路續山禽。古寺出層碧。當門轉午陰。霜林鞭影瘦。石燈燒痕侵。客飯匆匆去。幽棲未及尋。自雨花岡北。攜酒至臺上。痛飲復憇永寧泉二首。

岡北岡南路。蕭蕭雨黯晨。大都饒落木。不復有居人。寒意欲侵骨。酒香思入唇。明朝騎馬去。無分乞閒身。荒岡千百轉。知有永寧泉。屋底亂流響。原頭野火然。村童供茗具。行客臥苔甄。到晚逢僧語。憐余未解禪。

同作

孫星衍

寂寞荒臺路。狂眠共子來。居人驚麝脅。行客看擎杯。無復侵袍草。空生貼徑苔。客心襄舊迹。交手步千回。路轉知泉近。冷然漱玉琴。頽檐方列坐。危徑更幽尋。露肘天風冷。鈎衣竹翠深。原頭莫招手。正爾作鸞音。

遊小倉山房卽呈袁大令枚

不覺幽居僻。孤行入竹中。鳥驚穿樹客。鶴抵應門童。白髮耽文史。青山作寓公。園西風月滿。二十五房通。初七日雪與孫大飲城南酒樓

此日樓頭飲。還搜篋底錢。百壺邀冷客。雙燭啓離筵。詩許逢人說。狂驚入市眠。雪花如掌大。偏欲墮吟肩。雨夜偕孫大宿承恩寺十笏齋讀僧雨疇詩孫大賞其破樓鬼拜自鳴鐘句相約爲詩贈之竝寄偉然。偉然亦寺中詩僧。

寒風蕭蕭催卷簾。三更枕側開詩緘。虛堂晝短夜苦淹。一僧詩成白髮添。危樓初升雨廉纖。樓角倒射酸風尖。鬼聲隨葉墮屋檐。欲落不落蛛絲黏。琉璃燈昏佛火燭。羨爾險韻還頻拈。一詩刻鬼印玉鈿。壘光游仲亦已殲。粘詩作符可止疢。七字霍若霜鋒鋌。一僧垂老甘蠶鹽。好句亦復抵十縑。雙編攜來驚阿咸。手擘八法爲書籤。子今往矣口若箝。嗟我石闕悲親銜。詩腸已澁韻苦織。刻削心刃魂難恬。庵深不聞更漏嚴。雞唱喔喔來窮閭。新詩寄將不自嫌。文公遠公誰得兼。函封勿受世俗砭。我詩自有神明監。將至句曲酌酒與孫大別。

共被唵宵雨。添衣念曉寒。故人應話別。尊酒足餘歡。夢逐嚴更轉。詩留隔歲看。雲谿春水闊。隨我把魚竿。

時擬同孫大旋里

夜宿西來庵因憶春初與吳九祖健宿此感賦一首

西來庵畔聞鐘路。聊寄頻年此間住。故人襖被念宵寒。行客衣裘犯朝露。三更騎馬入一村。四更風急復出門。馬毛旋冰馬尾凍。兀兀鞍上愁吟魂。馬頭擊柝聲遙遙。曉星如月照過橋。聞敲村店市濁酒。一醉陡覺冰顏消。眠牛岡頭曙雅起。一綫朝暎射林裏。居人宵夢尙未醒。客馬嘶風已十里。

偶成寄孫大

邑宰容狂客。居人識寓公。看山荒署裏。騎馬驛亭中。作達銜杯酒。尋幽理釣筒。吾交有孫楚。詩筆擅宗風。

爲林大令光照題劍俠圖

三尺寒雲落苔井。飛仙人來月無影。秋霜瑟瑟依鬢青。五花靈符佩鎮星。蒼松爲橋石爲室。相與隔橋論劍術。星文百步森有芒。已覺氣冷侵毛骨。神仙幾日離岫中。衣袂常帶朝霞紅。可憐秋水一渠碧。水色欲上搖青瞳。華陽仙令杯在手。說劍知君飛將後。繡綠千年尙不銷。無聊化作杯中酒。

烏翅岡探梅分得果字

秋仲余始來。仲冬歸未果。蕭條霜林下。凜冽雪花墮。園丁掃枯枝。驚見發梅朵。勸客時一來。寥寥此間坐。竄踈露山角。墻缺隱城堞。僻徑偶獸尋。重門尙深鎖。寧知狂客飲。喜與主人左。三兩酌濁醪。圍爐聚溫火。吟篇判蔬蕨。是日以席間所有分韻 投贈及果蔬。薄酒苦易醒。誰人復招我。

大風登攝山頂望江

山僧出戶驚狂客。絕頂立同山木植。蒼松岡南開一層。飛鳥欲下人還登。白雲濛濛一招手。天風忽吹離立久。雄心直挾海水飛。南望天門北京口。

白鹿泉

松杉已疑蟄澗龍。闌干亦如飲渚虹。天青下合水泉碧。山綠暗裏樓臺紅。鈴簷飄風看百尺。石徑生雲埋四壁。欲從略約飲寒泉。怯此巉巖墮危石。

桃花澗

寒月欲盡居窮山。道人厭客久閉關。禽棲深林獸藏穴。只有孤客偏忘還。杉身三年長過屋。松石一鱗如  
瞪目。嚴寒尙厭冰雪稀。靜揀山泉濯雙足。

紫峰閣石龕作

幾年捫壁壁忽崩。石頂裂穴藏枯僧。窮冬移來暑復出。愛此雲氣時薰蒸。幽崖無風日色斷。貼屋驚看蟄  
蟲滿。枯僧定後眼忽開。下視山空地輪轉。

與孫大約作攝山詩久不見寄戲簡一首

我生好恠不避讒。詩到何沈猶遭芟。平生刻骨愛羶鮑。謂此駿馬辭羈銜。騷壇庶復見黃子。能刈惡木培  
松杉。喜君筆力更食象。病虎不足充君饑。吾曹生世匪無益。一奇尙救世俗凡。風塵顏面日苦醜。人復銳  
意憎青衫。森然落筆剛寒餓。豈意共有神明監。窮冬登陟本不惡。遊屐捷過隨風帆。君狂喜我百無畏。深  
處往往逢麝臙。山川靈秀積肺腑。剩者亦遣眉端嵌。君留奇句壓嵩華。岡阜不足窮鐫剗。

幽居菴雨夜偕王三吉士沈大紹祖孫大星衍聯句三十韻

茅菴面山腰。嶢秃各百仞。豹霧釀濕雲。吉士虬枝結陰陣。渠荒澗猶澁。亮吉脉斷壑誰濬。梅梢束春魂。紹  
祖篔叢定風信。廊敗已剝椒。星衍階頽尙榮薜。杉根破石理。吉士隼瓜畫沙印。陰陰結垂螺。亮吉歷歷伏

蹲踈坳奇臥猶局。紹祖崖滑墜甘殉。盤鴝啾巢寒。星衍饑颺竄枝迅。龜深黑初透。吉士壁合紺誰覺。苔綠  
掩佛曠。亮吉晴紅閃妖瞬。層氛塞巖罅。紹祖積踵陷石躡。藤影交怒蛇。星衍樓形露飛蜃。絲垂暗天網。吉  
士屬濕鮮地餽。蟻穴訝走珠。亮吉蛟宮伏犇汛。微濛霑裘毫。紹祖幽滴沐少鬢。飈風短燭焰。星衍石气浮  
礎潤。呼酒拭敗兒。吉士割鮮僭銛刃。餓嫌鴨脚瘦。亮吉渴若鯨口進。驕唵帽先側。紹祖耻醉魄尙振。枯僧  
刻殘香。星衍雖僕匿斷燼。狂才愛披衲。吉士壅客厭垂緡。循茲袂褊襤。亮吉愧我髮鬢鬢。無舟遂藏壑。紹  
祖有骨苦行殭。奇懷逼神惡。星衍恠語奪天吝。佳遊眞逝鳥。吉士去日更馳駿。良朋偶散一。亮吉時沈  
寒月驚過閭。遽廬大誰息。紹祖傳舍閒亦僅。狂遊謝緹絆。星衍兒戲學齟齬。莫聽嶺鐘鳴。羈心逐轉軌。

小除前一日與孫大城北痛飲卽送歸句容度歲

一句歸客狂難已。十日醉眠呼不起。我病何能謝友朋。君才頗不容鄉里。城門樓西放晚晴。我歸惜君還  
遠行。酒徒無人只爾我。兀兀共把深杯傾。我憐歲月去不回。日晚聊折甕頭榘。墻頭榘花贈行客。明日東  
西復南北。男兒行路亦可憐。道上飄零寡顏色。君今二十衣仍素。我入中年鬢難黑。粟米慙餘損道心。文  
章富後供人役。金陵昔時共酒杯。前輩亦復知君才。我甘黃金與千擲。君被紅顏惱百回。紅顏昨日非今  
日。歲宴相逢又相失。富兒門巷鬧車輿。貧客衣裘厭霜雪。荒荒衰柳出層城。冷巷窮門爆竹聲。津頭戍鼓  
方三下。屋角疎星已二更。新詩別我何橫放。同輩誰能出君上。世上兒偏苛細微。里中姥忽驚奇狀。還君



歌詩酬一卮。鄉黨豈足容男兒。人生貧薄亦何厭。握手只惜爲歡遲。孫郎高歌狂轉甚。別我還因接王沈。破產明朝事遠遊。典衣此日供荒飮。此間亦有趙與楊。累日爲爾稱離觴。座中卜子庶同調。送客獨至官河旁。官河迢迢夜程黑。倦僕離披立船側。一風鼓棹不畧停。明日還家已除夕。

同作

孫星衍

千杯酬我上北邙。不及容我生前狂。千言相思寄行路。不及逢君尋君怒。君來巷南雙拍肩。入市欲藉糟叩眠。六街隆隆塞賓從。酌酒還呼乞人共。市中先醉識子兄。入座不飲如公榮。卜生吾交君未識。揮袂徑使飛千饋。市橋來看立重足。更脫纓裾舞鸚鵡。我生志大不自量。非薄曩詰如糝糠。小儒不答風射耳。愛我如君合心死。屈魂鮑鬼不可呼。我識二子今應無。百千年來復誰樂。六十日醉真吾徒。凡鉛難燒石難煮。此腸應歸濁醪腐。眼中絕業合有傳。身後榮名苦無主。三更惜別各不知。欲去顛倒前相持。幽魂如絲墮空闊。側聽鄉語離多時。菰蒲蕭蕭夢中過。骨冷猶疑枕君臥。

送汪秀才中歸里

不敢居鄉里。來遊戀友朋。狂名偏自慰。絕業許相矜。我病心無竅。君愁眼有稜。明朝風雪路。應亦厭飛騰。十六夜偕諸同人步月

破墻明月上。從爾復東行。一市鏡明滅。三更酒淺清。篷聲隨岸遠。離羽墜巢驚。無復童年戲。牽衣入曲城。

句曲與孫大遊烏趨岡探棗

荒岡野橋谿水清。我初來遊因沈生。橋邊古棗百餘朶。瘦影入柏何縱橫。孤轡東去復逾月。來此已聽春禽聲。花間氣候亦殊絕。墟北飛雨墻西晴。看花人老苦無暇。可惜數日還東行。油衫泥鞮二三子。勸我花底傾餘觥。看花初舒復盛放。不待花落非人情。孫郎高歌值好春。瘦骨我獨支花辰。繞花百匝與君別。明日病馬騎勞人。

句曲與孫大別

長亭有春草。可以復遠行。我今別君歸。憔悴無歡情。可憐手中花。不及隄上草。隨我東西南北行。因風零落何能好。一生不合工隱憂。早與俗士成愆尤。閒門冷巷慣飄泊。一刺更厭逢人投。君知我心如咬日。我念君情比明月。落拓君真與世殊。狂名我更從人乞。世人與我爭百年。擾擾禮法拘名賢。讒聲笑口有時止。我共君名入青史。邑中大姓讒馮君。桓生自識楊子雲。里中少年辱韓信。異國偏能重廉藺。君今抑鬱何所爲。莫自憂愁減青鬢。我行折君墻上棗。數日念爾還東來。插棗泥中有根本。君若不來棗瘦損。江頭水色深復深。不能隨我去潁陰。潁中兒歌亦堪聽。對酒聞歌發狂興。一日寄一書。百日祇百回。莫嫌信使久闊絕。江口時有淮船來。淮船遙遙出江汜。欲別心難贈知己。我去真慙集戢鳥。君留更作趨庭鯉。貽君書籍貯閒廳。絕業無如校六經。芟除園草種叢竹。俗客不到門嘗扃。君憐別語方離口。我念征人復回首。

曲岸初生黯黯波。層城已隔青青柳。

社日雨偶成

短牆矮屋橫如艇。杏樹垂枝入苔井。窗外濛濛濕雨絲。折花聲裏春人醒。蛛絲黏戶暗不開。蒼鼠出牖銜莓苔。三條闊小雨聲滿。靜聽蠟屐衝泥來。此時樓北亦啓扉。細響曲折升層梯。空園初春悵無侶。小咒東風社公雨。

憶孫大

所思終不見。日夕對衡宇。暗牖翻月波。驚巢墜棲羽。沿門柝聲響。夢醒識人語。燭燼暗不光。薄帷風自舉。塵虛繪遺跡。琴慘續遙緒。古井時一聲。知零前夜雨。

盤馬圖

君如有氣吞西城。兀兀草間騎一匹。馬頭飛鶴閃神弓。直叱驍驅與爭疾。我騎款段亦狂唵。雅有男兒一寸心。贈君芻糧戒君御。獨向西望君去。

寒食出遊作

眼明不欲看春水。意懶只合尋殘花。殘花飛飛不辭遠。風急復入春人家。蕭閒橋北遠市聲。我逐燕翦登春城。春城東西夕陽好。蝴蝶雙翻女牆草。紅橋白塔臨水旁。十里目極黃花黃。黃花叢邊故人住。死墓花

香最深處。

謂馬秀才廣運

沿谿楊柳記同攀。詎料都成墓前樹。死友已死生友狂。鄉黨欲斥憐孫郎。城東乞者飲

君德。百徧問爾遊何方。我尋春出亦偶然。寂莫歸喚臨谿船。聽歌買醉亦有處。耻與俗士同周旋。

清明日諸同人餞予旗亭醉後賦此

君知我狂休更激。醉中牽人醒不識。君知我倦休復來。夢裏得句醒還猜。十年寥寥賞音寡。四座誰人手  
搗把。君今欲看隴頭花。使我頻隨富兒馬。東門城上放陽春。青眼看春有幾人。城中車輿盡東去。日莫不  
斷花間塵。欲行不行誰與共。獨客緣知乏人送。谿南燕翦忽西飛。十里隨人去如夢。

上冢

今朝原上草。萬綠慘一望。北郭展嫩晴。東塘拓新漲。全家茲上冢。人語雜烟舫。岸柳記昔移。山泥識初葬。  
林紅逗遙溜。窗碧啓虛障。新月眉際垂。春花袖中放。遲歸待深春。薄飲接幽貺。十里颺紙錢。春人復惆悵。  
夜泊金山寺

柳綠垂黃不垂碧。雨脚飄青復飄白。風林吹散一萬雅。隨我東來蔽江黑。前舟只聞柔艣聲。風水不定愁  
宵程。後舟微茫接沙尾。稍辨人聲出蓬底。一更初明山寺鐘。二更雨止歸寺僧。三更棲鳥避光景。塔漾空  
明七層影。

江上曉行

船頭明月已四更。孤客幽夢隨潮生。寺樓疏鐘祇一聲。北風吹舟南岸橫。晨光初浮港口沙。微雨已落江南花。江魚千頭迎日華。水色艷艷明紅紗。朝暎東來月西缺。卻視隔林星景沒。舟人無言去帆疾。欲至真州岸頭歇。

遲孫大不至

相識隔百里。待來殊不來。酒邊雙淚落。身外一花開。病婦裾應擘。狂交札復催。城南風與日。遲爾上荒臺。遣僕詞寄汪二尹蒼霖。

予方愁。汝莫哭。主人堂前遣一僕。主人一步僕卽隨。三月西來無斗粟。朱門騎馬誰家子。僕學主人還上視。人嗔汝拙汝莫懲。遣汝去隨強項丞。

雨花岡北小飲復至西天寺久憩

探巢豈止墮鵲卵。捫壁且欲尋蝸涎。百壺遊春不知遠。醉倒只乞墻根眠。花枝滿身縈綠煙。酒面冷貼青苔錢。天桃嬌春柳絲愁。竹裏樓高有人占。花須隨蝶自悠揚。露眼窺人復明暗。原頭山心吹冷香。衣上日脚明殘黃。殘黃過水光不沒。一半驚看入墻缺。谿南古屋三四家。已有幽人盼新月。

自岡北至暢春園看牡丹因憶去歲與孫大醉飲處

日晚迷歸路。隨雲度北岡。野花沿岸白。新月過橋黃。百里虛傳札。經旬待舉觴。臺高更孤上。無復昔時狂。

落拓居人識。相逢索酒錢。好春餘幾日。爲客入中年。竹冷怕侵鬢。枝低更壓肩。明朝一雙淚。眞欲墮花前。  
上巳日寄孫大時擬重遊句容

短後衣看逐短輪。荒塗擾擾值茲辰。銷殘塵海無奇士。寥落雲山隔酒人。痛飲摠虛遙夜約。狂吟苦覓昔時春。浮萍飛絮都飄泊。好向閒中悟此身。

重過拈花庵

尙欲隨雲度小谿。四山殘月眼都迷。塵中惘惘千年鶴。夢裏荒荒五夜雞。客久竟須忘巧拙。塗窮寧復辨東西。拈花庵畔枯僧老。一再逢人乞舊題。  
得句容諸友人札

九十山程折簡呼。尙憐狂跡滯窮塗。禰衡自欲兒文舉。爰盎偏應弟灌夫。爲客百年悲白日。論交一輩近黃墟。重來只向閒街走。多恐人知舊酒徒。

書事

戶勘災荒里。訟冤心清久。厭吏庭喧。早聞市卒添梅福。已覺衙官少屈原。脫屣何能喻妻子。挂冠終不夢田園。甕君洗眼看塵海。局促誰人尙守轅。  
客句容署中以縣試不得出寄孫大

夢醒空自惜年華。法鼓聲聲報晚衙。兩度摠慙巢幕燕。一春只看隔牆花。窺鏡鼠怯穿衣桁。緣壁蟲驚落畫叉。我自懷人不可寐。高吟時復振窗紗。

偶成

莫學王公寡宦情。耻隨平叔竊時名。百年我聽村雞舞。一輩誰先仗馬鳴。孤客感時雙鬢改。小樓入夜衆星明。亂雲堆裏重南望。水黑山昏斷去程。

重至句容

莫歎頻來席未溫。一旬騎馬入朱門。蹇年不復營妻子。岐路翻成戀友朋。烏鵲辭巢知樹冷。狐狸窺院趁鐘昏。浮生迸入今宵夢。夢破勞勞斷客魂。

寄張紹南

只隔橋南北。離居未得同。酒魂沉盞綠。春夢壓鐙紅。念爾孤生蒂。憐余獨轉蓬。鄉心與流水。日夕向川東。

觀棋圖

山風颯颯卷床書。日午聊將倦眼舒。攜得橘中雙病叟。三株松下鬥秋儲。

句容遊孔氏園亭

參差黃白一畝花。竹扇闔處知誰家。青衣亭亭復孤立。手搏飛絮圍輕紗。深紅淺碧開錦屏。萬朵綴壁如

華星我唵。一句一星落。片片飛入谿南亭。閒門卻映深深竹。竹葉濃遮鳥巢綠。簷前鳩婦鳴不飛。靜看水塘烏浴浴。

三月二十日夜與孫大掣榼至城上飲

華堂非不樂。相與草間飲。擾擾千百中。孤生自殊稟。君來攜一榼。味復異烹飪。曲木藉作盤。曲枝勞作枕。回瞻白楊路。先有石甓寢。酒面鋪月光。鬼風吹懷懷。

趙大襄王招飲醉後卻寄

朝狂飲百觴。莫狂飲千鐘。恨客只說樊少翁。恠君何招蓋次公。立談一語咸失歡。醉鄉天地何能寬。醒時頗知客顏色。兀兀一尊移面壁。酒狂於我不可當。一月不出蓬蒿堂。讀書只欲究世務。放筆安肯爲詞章。胸中之奇亦思吐。意欲上書丞相府。直將心跡寄青雲。不用頭顱入黃土。

郊行

十日耽狂飲。茲遊欲避人。衫輕蕩飛雨。髮短入流塵。僧古百年衲。松閒七尺身。東門橋下水。照影失青春。癡寺

尺五當門草。心知久閉關。亂墳三畝地。幽夢一房山。客鬢慙行役。僧修厭往還。尙留遺殿址。淒絕此松關。種蔬



食力所無暇。經旬獨種蔬。狂難知死所。儉欲夢生初。井李偏愁咽。壚蒿尙欲鉏。何因棄貧病。知好亦全疎。  
得孫大書

我書必雙函。君書亦百紙。書來幾回讀。淚落忽不止。我顏如灰君色苦。夢慘從君聽街鼓。離堂一鏡分。構思病婦黃頰支。多時忽然好句落。唵管晦日寄我城南詩。華年只覺犇馳急。君匪春人我三十。舟楫終慙身世浮。龍蛇苦羨秋冬蟄。一生一死安足愁。生我何不如蜉蝣。庸書朝莫自一室。搃閱百歲同憂囚。離居入夢華陽阪。冶葉倡條識春晚。生魂應挂楊柳枝。雨濕風飄不能反。

附鮪軒詩卷第八

天台雁蕩集 丙申

獨鶴行寄黃景仁

獨鶴亦不高。如人長七尺。羅張網布。不可以暗飛。悄然墮爾秋原之孤白。幽蟾光短不得長。一星當天病眼黃。鶴于此時何處翔。不隨雅頭青。不隨鳴頭碧。不隨愁鴻南。不隨悽燕北。汝黑汝白不可知。汝南汝北我則思。君不見羽毛如霜膝如鐵。汝今雖遠遊。慎勿使霜毛摧。鐵骨折。

飢鶴行寄孫星衍

飢鶴爾何來。聞自天上墮。世人不知爲奇祥。聞聲而驚反懼禍。何爲牽汝頭。縛汝腳。使汝烏不烏。鶴不鶴。瞻傾月明。庭低露涼。秋蟲食之。令人心傷。徘徊不能行。我見驚是飢鳳凰。君不見鳳凰雖已飢。光采自不藏。猶吐五色雲。高若百尺墉。世人文章休目迷。我辨毛質皆山鷄。不然何以飢鶴苦飢汝苦肥。

病馬行

糝三升。糝一尺。馬病空槽不能食。神駒力屈亦有時。馬今不病主不知。青天白日。蓋此四野。馬辭主人。哀鳴其下。鳴聲不欲高。恐復驚道邊。世人不相知。謂馬爲乞憐。文絲十尺絡罔羸。主今復飾疥駱駝。君不見。

同生相逢尙相失。空費黃金求死骨。

獨居裏黃二

二十力學經初橫。三十著書還未成。隣家老翁苦槌壁。欲睡厭我呻吟聲。園蔬青青食貧始。此意何能喻。妻子富人僚壻苦見輕。自審貧薄何由齒。我貧于世應食力。八口還嫌婦慵織。瓜葵未飽緣年歉。藥物預儲愁里疫。雅無親串饒知己。遠寄雙縑潤行李。肯將心力事時人。月值纔能謀粟米。故人已獻長楊賦。自說雲霄尙無路。飢寒念爾筋骨疲。百里津門直徒步。與君同家谿水頭。午日簫鼓喧中流。我貧頗復厭薄俗。不遣病婦登高樓。還愁賃屋豪家側。簷溜傾庭積卑濕。苦吟時復過三更。擔裏竹竿知月直。

舟行三塔蕩看月

湖堤昨日崩新漲。青石帆螺紛相向。舟人飯罷衝北風。擊鼓船行三塔蕩。湖堤灣環湖月白。復有斜陽半湖赤。橋門去水只數分。波底接天無一尺。前帆已礙雅巢過。後艇方驚魚窟出。空明積水漾蒲衣。寥落居人飯蓮實。船頭明月忽已過。不若夢裏聽吳歌。前山白雲如絮多。明日急雨翻層波。

雨過石白湖

溧陽之南集商舶。百錢買舟長十尺。推篷漁叟不識人。錯認湖頭販魚客。微風吹篷雨腳粗。一日一夕穿層湖。水花空明映蓮葉。時有菱角翻菰蒲。漁人網結湖邊宅。笑指層湖作衣食。牀前水淺撈白蝦。竈底泥

深探清鯽。五湖天闊煙水通。放艇只憶陶朱公。按范蠡所泛五湖此其一。餘不出當禽蕪湖界中。故人戲語天倘從。老作石臼湖

中龍。同行周君所言如此。

### 簡黃二景仁

東西南北誰能達。一月不寄長安札。金陵江頭候消息。兀兀束裝聞欲發。泥中垂翅亦其理。殿上策名知有幾。時獻賦報罷。我貧已是歷三州。嗟子何不遠千里。男兒脫身行路旁。素面日益塵沙黃。黃金臺前集多士。

笑爾八尺身空長。斬蛟射虎縱一往。少年何必齒鄉黨。能容卿輩詎止千。雅識國士真無兩。平生亦知少

所與。憶爾唯同瘦孫語。我因作客締心知。女也粵人非貌取。余與孫子訂交因黃二。君家南頭住狂呂。百斛龍文亦

思舉。矜名苦遭時俗罵。畧句唯邀鬼神許。可憐蹤跡二三子。母病妻愁摠如此。固窮不出誰能勸。離俗未

遠吾猶耻。長貧寧使婦無禪。不遣朋來缺酒尊。當時總角共言笑。一輩更有誰人存。讀書雖多顏不迂。食

力既久形非羸。乾坤亦憐壯心在。不使齋恨填溝渠。別離幾載無苗麥。君意欲歸歸詎畧。三間老屋蒿數

尺。十畝荒田禾半石。世奢豈復慮終始。我儉纔能救晨夕。瓶無斗粟休謀因。身有葛衣應賤帛。狂來苦欲

慕前賢。俗薄何能謝其責。我今作客苦乏資。女復告我歸無時。窮愁屬女休苦思。破悶聊寄孫郎詩。

五鼓出句容東門聞孫大已先期走送不值卻寄

君乘殘月來。我逐荒雞起。華陽門邊後先出。豈意違君復數里。原頭草荒行接天。病馬兀兀楷楊鞭。谿橋

東西路還判。別夢隨君已零亂。君今驚魂不自招。我逐暗影徒飄搖。春泥深尺那可跡。蠟炬遺灰杳難覓。哀笳三更復五更。憶君出城還入城。悲來無端念死生。此別惘惘俱吞聲。

紅梅閣夜坐贈道士王清真

勞勞定何意。擾擾遣久住。兀傲七尺身。特立百年樹。幽蹤無端心賞僻。喜聽禽聲厭人跡。卽看松櫟醒醉顏。愛向宵深坐壇石。堂中飛仙人。一一古丈夫。莓苔陰陰場西壁。恠此慘綠生肌膚。棲真幽人顏色醜。月午臺前禮星斗。塵沙十尺障眼脂。對面寧能辨誰某。蘭心玉質脆不堅。國士何以無長年。豈其奇才眩世目。不遣白髮亟吮肩。沉心觀物亦如此。幾徧棊枰栢難死。辭家君欲侶松喬。入世余愁對妻子。鑪煙已滅飛暗灰。道童天曉殊不回。振衣縱步出門去。歸路覺我形神摧。

寄朱博士沛

君管送我時。城南廣文宅。門前青竹竿。森森月華直。博士今冷官。謀餐不能飽。頗感招客勤。盤中飢梨聚。我愁鬢髮疎。君苦牙齒缺。相識只一年。驚看五回別。

縣丞輸餉作。大尹賑饑詞。絕憶窮衙裏。都工五字詩。

謂汪蒼霖林光照

將遊白紵山待同人不至

百日低眉坐。看山眼倍明。靜餘懸屐想。狂卽拂衣行。破冢愁尸氣。荒邨覓吠聲。何因久相待。幽絕晚涼生。  
白紵山半望江北諸山漫賦

前行未及松頂關。半嶺已落天門山。晴江帆風走十里。望去不越坳堂間。江天空濛雲百頃。行人舉頭天  
壓頂。驚濤隨風落耳邊。長松蕭蕭日沒景。丈夫生世不合閒。履險始覺開心顏。吳船百斛看橫渡。臥穩亦  
覺魚龍頑。何時疾帆飛。渡我至江北。黃河決處看迅流。使我軒眉畫奇策。潛行欲索河伯符。不佩五嶽真  
形圖。魚頭誰識可換黑。龜眼切莫輕塗朱。山川英靈幾人在。看此橫流日歸海。杯底銀濤雪浪飛。鏡中綠  
髮朱顏改。山雲欲出山雨從。越嶺已覺聲洶洶。君不見。壯遊能消磊落胸。愛此激電鋪江紅。

于湖曲

晉書明帝微行。至于湖陰。察王敦營壘。于湖縣名。屬丹陽郡。樂府誤作湖陰曲。溫尉集亦然。今正之。  
一言不合收斬豎。利劍入座光新磨。虬須心懸祖龍坐。拔劍指天雲欲破。營門三日兀不開。妖夢豈識真  
龍來。原頭天低日輪黑。日在幺麼夢中赤。將軍大呼蜂日突。十萬犇鯨盤皮骨。豺聲一出衆已驚。怒叱百  
馬追龍行。君不見。西飛黃塵東掣電。赤日上天龍入殿。  
方布衣薰寫幽居圖見寄賦謝

男兒已自辭官府。壯歲應須立門戶。八口終嫌無事貧。一身肯作多錢賈。感君爲圖伯夷築。愧我未學樊

遲圃年豐祭止陳魚菽。歲歉資應缺雞黍。承顏竟日說桑麻。入室三時響機杼。山田定早輸農稅。臘月先聞擊村鼓。波平百尾齊上竿。雨急萬菌爭出土。瓜桃未熟隣先餉。錢帛可通誰是主。過因不事斥官蛙。未厭無稽傳市虎。能憂雅欲師唐魏。問俗甘不如鄒魯。譚知野老慣掀須。讀飭兒曹莫刺股。田廬課後童無約。種植經存茶乏譜。立談客可贈一困。量腹我纔消二鬴。君不見。三間老屋亦太古。兩足木牀穿未補。男能辛勤女作苦。一月共粿四十五。

姚良年鑄奸鼎歌

君不見山之南。鬼止一足行。君不見山之北。蛇豕兩頭人不識。乾坤浩大何足窮。日月匿影于巖側。柰何天生人。人復發其覆。形幽迹殊詭。一一誌篆籀。蠶身虎質非不仁。何必責獸皆麒麟。援籒攪糊理有壓。粿食尚不嫌雞豚。性哉神奸只食人。狂口嚼嚙憎人馴。遂令居高揣肥瘠。食盡不懼天公噴。人觀此鼎毛髮逼。我謂鼎陳神鬼惑。豺狼當塗狐被劾。熊羆噬人貉遭責。一言君還縱姦慝。百性誰甘受雕刻。強吞弱囚理豈容。造物未必終夢夢。森然顏面待錢削。舍此更欲求良工。君不見。經蟲雕。史構杌。飢餐人屍渴人血。問工何時鑄饕餮。四十八州爭獻鐵。

與孫大飲鳥翅岡主人園

鳥翅岡頭路。春殘屢款門。後來無此客。別夜肅清尊。病覺詩篇短。狂憐骨相存。千杯吾未厭。渾欲醜狂孫。

賈孝女詩。高郵人。翰林檢討賈兆鳳女。

一臂落節獲完。兩臂碎。孝復全。剝膚活親奇女子。兒臂若完心卽死。左臂療母母不亡。右臂剗肉乞父嘗。骨肉已合肌膚傷。肌膚傷兒勿惜。親在還能念兒瘡。君不見親身康強家乏食。兒合臂創須事織。

九井山讀書歌爲朱明經滋年賦

望山山不登。卷書書不讀。山奇要戴巨鼈首。字古須搜蠹魚腹。我聞昆侖高。食嶠奇。發興欲遣愚公移。復聞秦土墳。不韋冢。兀兀陳編富周孔。腐儒執經休聚喧。中郎發邱須置官。寰中苦無名嶽住。地下或有奇書看。願君讀書能棄書。鼻準磨墨人嗤儒。願君入山不識山。山雨滴硯屏嘗關。君不見山扉嘗關山徑阻。九井九龍稱地主。井泉聲寒誦聲苦。願君飲此可釋暑。

偶書

收得城西博進錢。一旬七日啓華筵。閉門只共屠沽飲。羞殺城東惡少年。

七月十二夜偕孫大暨王吳二秀才易僧服泛舟訪青山莊故址薄暝銜醉歸仍至旗亭痛飲四鼓乃別

莊爲京江相國孫布政迺別業

清秋攜客出郭門。名園傳自丞相孫。當時官富乞休早。聊以暇日娛清尊。名園蒼蒼列松柏。此地由來遠城北。无山而山名目奇。飛白當門題徑尺。平泉莊啓賓客多。往者不樂還高歌。鄉閭我識陸恭仲。試語舊



事勞滂沱。曾言騎馬園南走。斥買閒田起岡阜。田夫築土經幾時。老去園丁變樵叟。橫塘水涸煙雨荒。夜久月白西頭廊。傷心并乏狐兔窟。祇有曲院藏牛羊。山纔一成谿數尺。谿鬻淺魚山鬻石。水車載水注旱田。山丁移山入豪宅。百年老樹惜不畧。大斧摧殘落巖側。寒窗无樞戶无格。署券園南索昂直。可憐憔悴張公子。辟債臺高客中死。諸孫寥落寡屋椽。依徧相公門下士。相公昔日崇清儉。盤馬廳成寡欄檻。哲嗣移家志已荒。多金築室心還慊。盛衰興廢无百年。看田作園園作田。林禽埜鵲遞相誚。巢樹不定頻遭遷。吾曹痛飲愁何著。還院僧來借衣著。三更艇子不畧停。歸及江城鎖門鑰。

八月十三夜偕趙大襄玉令姪學愈暨孫大搆酒至覓渡橋上飲

前宵飲城東。昨復飲城北。偏驚里中兒。成羣喜觀客。城西岸頭七尺橋。紅欄卻喜挂酒瓢。狂孫短趙幸俱集。共說月好輪今宵。人生放手即復左。遠夢遙遙落飛舸。瓠腰菱角秋正鮮。明日縣南誰醉我。

中秋夕邀同錢唐郭焜暨孫大呂大搆笛及酒至雲谿泛舟作

雲谿里中夜四更。無多少年只郭橫。傾囊攜來一瓠酒。欲覓同輩吹新聲。孫郎歌殘意不懌。隔岸還招呂生笛。五年圓月歷五方。喜此復尋从君狴。回洲三面眺明鏡。升樹百尺餐清光。歌聲飛來壓簾重。可惜谿南百家夢。隨聲吹落波影中。宿燕啾啾復離棟。吾曹吟魂怕歸束。尺五菱舟載人六。風塵明日即別家。辛苦牽船不居屋。

嘉興煙雨樓

川淒雨復淒。天遠雲亦遠。寥寥沙際楫。擾擾竹中館。卑鄉集魚蟹。豐歲樂鷄犬。煙柳積百重。坡塘信千轉。征衣旣頻質。寒序忽更煖。日午候北風。應看去帆滿。雨霽登飛來峰。

積奇登茲峰。峰卑阻雄眺。煙蘿雖復翳。巖石苦未峭。秋霖雜飛瀑。深谷積泥潦。窄訝虺蜮居。圓摩蝙蝠窟。朋僚厭幽濕。攀樹引夕照。空此邁往心。松門一舒嘯。

傷鱗賦并詩

洪子以丙申之秋。蒼皇遠出。斯時也。聶政有母。寄姊嫫之家。文矩別妻。歸弟法之宅。十口遠送。百錢從行。車輪折於吳門。征帆淪于越市。猶復踰越險遠。窮來會稽。狂唵墮魂。獨處失影。嚮故衣於市上。備乾糗於日中。楊朱遭岐塗而悲。元伯念死友而泣。爰作傷鱗之賦。以寄所思。其辭曰。

鱗兮鱗兮。產於西蠡。柰何來遊。困此越谿。惟此越谿。匪子之依。投絲於南。設餌於西。萍之有實。子不尋食。晉之斑斑。魚尾之赤。所思如何。我江我河。何時旋歸。送子涉波。念此涉波。有魴有鱖。餉子藻蘋。慰子風雨。一鱗之困。心焉永傷。一士之厄。于何不恫。惟翔思林。惟伏思沼。爰作傷鱗。以配窮鳥。

有讀傷鱗賦而悲者爲作二詩

囊金達千里。貧賤死里閻。柰何抱饑寒。顧欲處路隅。鰥生足文史。於世何所須。陶朱一何賢。泉明一何愚。北風凌朝至。悲我无衣裳。念之輟晨餐。晨餐亦難望。入市有所需。餅餌索少嘗。多錢不能供。少錢不充腸。嗟嗟復嗟嗟。我僕泣路旁。

九日登府山望海亭寄里中諸子

沉憂匪不傷。夕鬢朝已改。侵晨冒幽險。飛鳥忽不待。山氣何淒淒。危岬匿陽采。寧知唵眺處。先有數人在。萍梗離北江。浮蹤眺東海。行傷居者病。去惜僕夫殆。禰衡憶孔融。侯生結朱亥。徒悲成令節。復此念前載。歸計辦耦耕。無年願同餒。

曉發曹娥江

晨帆縣江開。夕騎府山發。秋原易風雨。喜此天宇豁。微茫數峰轉。奮迅百里達。蓬寒服朝華。檻膩積流沫。蘋花聚川氣。蒲節散石髮。眼識化隼鳩。心傷祭魚獺。川程此迢遞。山驛方峭拔。甫託東歸雲。還繙北來札。虞江舟中晝眠夢孫大。

雨淚忽不停。心傷枕函重。簾帷開虛風。秋陽暴幽夢。悲茲遲遲日。幽鳥時一哢。非无求友志。首疾念予仲。三旬滯鄉邑。百里走相送。放楫余已遙。犇駒爾難鞿。徒云堅後約。待此川澤凍。遠恨一以生。尋君舊詩諷。晚泊櫟樹灘。

黃悲西逝日。紅傷秋末花。羈聲出叢薄。暗影聚回沙。抑鬱川原棹。淒迷山半笳。停餐征騎集。持火夜程賒。推篷見孤月。何心不憶家。

白嶠縣至天台山行雜詩

楓生北山上。葉落入西嶺。傷此東南風。愁看去來影。蕭條莫天氣。悽瑟鬪人境。露草黃一壇。土花紅半井。傷禽旣相戒。廐馬行復警。寥寥天地心。窮秋一深省。夜唵方倚樹。曉夢已入竹。風鈴散踈聲。懸鏡照悽綠。頗欣謝塵事。息仰在深谷。迹感鍛羽禽。狂驚失羣鹿。窮鄉此留滯。樂歲苦躑躅。豈念褻與安。徒成歌復哭。青谿多道士。華棟祀僊人。綠屨封君達。醜顏賀季真。林腰束雲岫。谷口入風塵。川綠疑成雨。巖紅忽覺春。開窗恠禽集。繫檻野猿馴。無由乞靈藥。終此駐閒身。鐘沉遂無聲。燭滅忽有影。還登落月峰。眺此犇雲境。荒荒北來水。阻此西去嶺。客久亦撫心。僮勞屢延頸。來蹤匪无戀。去志忽不猛。寒月无裳衣。徒憂涉波冷。山禽呼水禽。棲息多在戶。夏蟲語秋蟲。寒久何忽暑。川原旣相間。涼燠各有主。車馬喧寂中。勞勞自爾汝。征衣冒荆棘。客飯雜塵土。曰發斑竹山。言尋白蘋浦。秋心何其紛。宵念亦不一。思隨麋鹿遊。矧有犬馬疾。遲遲及沙岸。擾擾駐巖室。霧徑杳已迷。星塗易相失。

寒頻怯風信。飢苦藉木實。明發登北山。行當復三日。

台州使院雜詩寄孫大

秋風何其悲。冥雨入空隙。林鳩啼檐端。晨光慘將白。同儕渺何所。衰山斷行跡。簾櫳悲深沉。青鐙挂餘壁。階除展余步。墮瓦甫及額。竹柏淒一林。東西綠苔色。回房昔清譙。饑鼠嚼歌席。誰聽晨鐘鳴。聊來視孤客。山樓與水樓。高下千百級。南城視北城。飛鳥亦不及。離離夕雲起。裊裊晨氣濕。枯薪旣盈路。墮果欣可拾。獨客窗際樵。居人樓上汲。孤猿乍驚竄。已復傍人立。旅念亦已消。經旬滯鄉邑。

秋衾旣迢遞。冬夜淒以肅。非因念遠人。胡爲秉明燭。明燭何搖搖。光紅條成絲。囊哉不能寐。深室遣僮僕。帷帳列北隅。緇塵拂茵褥。衣裳久顛倒。書史誰復束。昏旦一目遠。鳴雞喚人宿。

茲邦及鄉邑。東西千里遙。林禽皆殊聲。感歎同枝條。抱疴來幽巖。辭喧及崇朝。雖曰積驅馳。文史亦已勞。日晚忽北風。塵廬送塵囂。鬱鬱梁棟間。巖雲不能消。登涉興轉孤。歡譙理必招。因悲復成篇。歌竟還長謠。西軒夜吟寂。北寺鐘聲歇。山館落葉深。荒黃不因月。三更啓南牖。頽仰眺叢樾。墮石響北林。犇雲動城闕。巖要恠風起。老獸亦離穴。中野忽一鳴。哀聲振寥闊。霜嚴肅帷幔。寒至砭肌骨。已念无衣裳。誰能坐悽瑟。游思雖无方。鬱積亦有在。自與斯人違。沉沉歲時改。秦嘉傷婦病。范冉值妻餒。禽窮只守巢。萍離乃飄海。吳雲旣昇威。越嶺復崔嵬。子有東顧憂。予殆後時悔。蕭條此陽月。惻愴日无采。歸日東郭門。何人岸巾待。

見有倒松爲橋者

老樹裁爲橋。其根施作艇。纔辭恠鳥聲。已動游魚影。

謁禹陵觀窆石

蒼梧之崩竹已斑。黃蘗之殉血復殷。人疑賢聖盡野死。亦識君父非生還。地崩山傾水泉出。誰識防風悍  
侯骨。誅龍于淵首不殊。蠲鼈于山足不缺。茲陵峩峩獨百尺。豐碑蹲南穴列北。雲埋山昏人不識。四千年  
來一橫石。當時神功爲剛山。山石已破摧天關。頰紅尙帶海蛟血。慘綠入骨生瀰爛。江淮修修怨神女。生  
魂不招柰何許。嶽山立石石不語。鬢絲爲風沫爲雨。乾坤功大寧復論。截江作國封未孫。我疑無物可酌  
德。庶海作醴山爲罇。君不見驚濤昨日入海門。海岸已沒千家村。時蕭山海塘屢壞漂沒人家汝曹面目須感恩。不爾  
摠載魚頭犇。一坏山青一瓢海。疏鑿功深孰能改。神祠無窮石不毀。息壤千秋復留彼。

無錫舟次與孫大別倏忽三月詩已代簡

一船如梭眠不得。更覓一船東作客。推篷見我燭燼紅。落月懸君布帆白。錢唐江頭惡浪軒。我別郭子無  
一言。東西遙遙屢揮手。淚落不落中心煩。飛蓬无根逐風起。東去一千三百里。離家百日不得書。欲覓南  
谿北谿鯉。山中食桃還憶君。足繭遠踏東峰雲。貽君許覓鮑家艾。申旦入谷勞樵斤。寒風蕭條日西馭。破  
樓懷人獨箕踞。冬窮臘盡春不生。天盡海飛人復去。

自黃巖至樂清經盤石斤竹十餘嶺兼望雁蕩諸峰作

舒心及朝陽。結念向西日。犇星空谷中。驅濤廣川末。遵途念寒病。履險恃頑質。連峰驚西回。犇厓此孤突。危維天柱險。陰訝地維缺。目極泛海舟。神迷入山轍。離蹤念松桂。幽賞寄芝朮。終憶謝守言。歸同阮生述。持鐙何遙遙。照此前路濕。心傷戍樓鼓。值我夜行急。巖雨何蕭條。犇雲及原隰。林猿既哀嘯。宿鳥感回集。鬪嶺一以長。衣驚北風襲。宵餐念難飽。僕馬誰更給。途慘且復行。嚴程尙三十。

盤松岡還長。斤竹嶺亦阻。非因征客瘦。兼傷馬行苦。遲遲發長道。出堡值亭午。前旌既穿屋。後響復沿浦。蠶繅十里塵。巖花渺無主。冬川感陰翳。昏谷事仰俯。藤蔓慎莫牽。先愁客衣補。

林紅無天光。竹綠補地影。藍輿及曠黑。顧視不可省。十里勢鬱盤。延回歎宵永。尋聲始離樹。辨響已入井。猿慘落果頻。禽驚出林猛。居人涉津訝。戍鼓隔樓警。紛茲菱粟餉。遠復啜巖茗。心怯念後來。懸燈照山頂。

過黃巖六十四條嶺

時逢江都人寄書與汪大端光自臨海至黃巖六十四里半屬嶺路故名

東雲既鬱蒼。西嶺亦荒荒。古橋人巢聚。空灘雁渡忙。奇峰圍作屋。橫石臥成梁。寥落長松蔭。淒清澗壑光。海飛天已盡。无復望君方。

舟行夜起

徒知川路闊。誰識夜還長。暗棹穿絲網。犇帆礙石梁。嚴程初擊鼓。寒月正褰裳。露白迷荒徑。鐙紅出毀墻。

樓頭搖旆影。樹杪射星芒。徒歌既難樂。空檣行復傷。已及鳴雞店。雞聲慘不揚。將至青田作。

蓬心初轉白。橘實未全丹。犇馳此冬月。迢迢及越灘。村紅列楓拍。郭暗樹松檀。廢井迎人少。窮鄉候騎單。五門臨細水。雙闕峙危壇。城隅落帆駛。山樓吹角殘。誰信奔灘急。真如上嶺難。

石門懋誠意書院看飛瀑

黯黯晨光開。泠泠布帆疾。非因探虛泉。聊爲駐幽室。川原開異境。曠朗見遙闕。鑿石避險艱。沿流戒奔越。亭空注飛雨。景短迫寒日。靈川饒徂思。華年緬陳哲。墟泉失真氣。犇壑斷雲轍。時平乏龍蛇。羣材實蟻蝨。流離念文史。倣儻負奇節。稷下未奮須。隆中猶抱膝。埋垣神劍起。毀篋異書出。三復名世思。孤衷濟時術。石帆山

放舟石帆山。山險落帆幅。犇流信湍激。水淺石蟲蠹。巉崦入窗際。頽仰欣在目。維茲僧宇峻。絕頂秀林木。墮響摠入雲。危巢猶戴屋。延回勢千仞。壁立此背腹。常瞻東升雲。不見西景伏。陰厓畜陽煦。十月逗巖壑。疊嶺眺不窮。回灘去何速。思迎甘始藥。未辟子房穀。從此亦山居。彌年謝塵躅。冬月寄孫大

同心燭不分。懸腕書尤疾。緣君傷遙程。知余念新別。離牀展冬夢。晝闔理宵結。瘴嶺一月行。蠻灘百重越。



吳文三尺箠。越嶠千頭橘。且欲寄一書。何由審虛實。時孫大婦病甚劇。

天台赤城歌寄孫大

赤城黃海天下奇。我昔探奇入雲海。天台山高一萬丈。結霧蒙雲住仙宰。犇車覆舟何不閒。數載豈復窺青山。丈夫事業百無就。筋力苦瘁登臨間。山中之人薜蘿繞。塵面看山亦徒擾。犇猿立鶴噪豈休。笑我飢驅髮蓬葆。黃塵入骨體不輕。手扶赤藤上赤京。崖窮壑轉忽相失。側耳已聽鳴泉清。塵寰下士禽子夏。五嶽遊期迫衰謝。我留綠髮不敢遲。急復料理居山資。人生何爲南北馳。憂患亦苦無窮時。巖棲谷汲誰賞心。素抱幸有雍門琴。不然雲山蒼蒼萬條路。更挂飛瓢覓君去。唵肩拍處我欲狂。君亦尋君遂初賦。

甌江阻雨夜起望江心寺作

寺爲宋文信國避難興復地

海潮初入雨縱橫。帆落東甌九斗城。夜半題詩亦何意。荒雞聲裏醉先生。